



# I I I **IOKOAYO**

**SEHEMU YA PILI**

**ELLEN G. WHITE**

# *Imani Jokoayo*

Tafsiri Kamili ya Kitabu cha The Faith I Live By  
Kilichoandikwa na Ellen G. White  
Kesha la Asubuhi **Sehemu ya Pili** (Julai – Desemba)  
mwaka 2024, Mafungu Yote Yamenukuliwa Kutoka  
Biblia ya Kiswahili Union Version ya mwaka 1952  
(Iliyosahihishwa 1989)

ISBN 978 – 9976 – 583 – 31 - 1

Hakimiliki© 2024 Haki zote zimehifadhiwa. Hairuhusiwi  
kudurufu, kunakili, kutafsiri, kuiga, kutoa nakala kivuli  
au kupiga chapa sehemu yoyote ya kitabu hiki bila idhini  
ya maandishi kutoka kwa mchapaji Ufunuo Publishing  
House

Wachapaji : Ufunuo Publishing House,  
S.L.P. 635, Morogoro - Tanzania

Bwana Yupo Mahali Hapa,

*Yakobo akaamka katika usingizi wake, akasema, Kweli Bwan yupo mahali hapa, wala mimi sikujua. Naye akaogopa akasem mahali hapa panatisha kama nini! Bila shaka, hapa ni nyumba y Mungu, napo ndipo lango la mbinguni. — Mwanzo 28:16, 17.*

**U**nyenyekevu wa kweli kwa Mungu unaamshwa na utambuzi wa ukuu Wake usio na kikomo na utambuzi wa uwepo Wake. Kila moyo unapaswa kuguswa kwa mgusikuu na utambuzi huu wa Asiyeonekana. Saa na mahali pa maombi ni patakatifu kwa sababu Mungu yuko pale. Na pale kicho kinapooneshwa katika mwenendo na adabu, hisia ambayo inayoichochea itafanywa ya ndani zaidi. Mtunga zaburi anatangaza "Jina Lake ni takatifu la kuogopwa." Malaika, wanapolitaja jina hilo, wanafunika nyuso zao. Ni kwa kicho jinsi gani basi, sisi tulioanguka na wenyewe dhambi tunapaswa kulitaja katika midomo yetu! Ingekuwa vyema sana kwa wazee na vijana kuyatafakari maneno hayo ya Maandiko ambayo yanaonesha namna ambavyo eneo linalotajwa kuwa na uwepo maalum wa Mungu linapaswa kuchukuliwa. "Vua viatu vyako miguuni mwako," Alimwamuru Musa pale katika kichaka kinachowaka moto, "maana mahali hapo unaposimama ni nchi takatifu" (Kutoka 3:5).

Mungu ni mkuu na mtakatifu; na kwa nafsi iliyonyenyekea, inayoamini, nyumba Yake duniani, mahali ambapo watu Wake hukutana kwa ajili ya ibada, ni kama lango la mbinguni. Wimbo wa sifa, maneno yaliyonenwa na wahudumu wa Kristo, ni wakala walioteuliwa na Mungu kuandaa watu kwa ajili ya kanisa la juu, kwa ajili ya ibada hiyo iliyo bora zaidi ambayo cho chote kilicho kichafu hakiwezi kuingia... Mungu huona kila wazo au tendo lisilo la heshima, na limeandikwa katika vitabu vya mbinguni... Hakuna kinachofichwa kutoka kwa jicho Lake linalochunguza kila kitu. Ikiwa umeunda kwa kiwango cho chote tabia ya uzembe na kutojali katika nyumba ya Mungu, tumia uwezo ulionao kusahihisha... Jizoeze uchaji Mungu hadi pale utapokuwa ni sehemu yako mwenyewe.

## Kaa Kimya Mbele Zake

*Lakini Bwana yumo ndani ya hekalu lake takatifu; dunia yote na inyamaze kimya mbele Zake.—Habakuki 2:20.*

**W**akristo wanaweza kujifunza namna ya kuchukulia mahali ambapo Bwana anakutana na watu Wake kutoka kwenye utakatifu uliokuwa umefungamana na hekalu takatifu la duniani. Kumekuwa na mabadiliko makubwa, sio kwa wema, bali kwa ubaya zaidi, katika mwenendo na desturi za watu kuhusiana na ibada ya kidini. Mambo ya thamani na matakatifu ambayo yanatuunganisha na Mungu kwa haraka yanapoteza mvuto wake kwenye akili na mioyo yetu, na yanashushwa chini hadi kwenye kiwango cha mambo ya kawaida. Kicho ambacho watu wamekuwa nacho zamani kwa ajili hekalu ambapo walikutana na Mungu katika ibada takatifu kwa kiwango kikubwa kimetoweke. Hata hivyo, Mungu Mwenyewe alitoa utaratibu wa Ibada Yake, akiiinua juu zaidi ya kila kitu chenye asili ya kitambo tu.

Nyumba ni mahali patakatifu kwa ajili ya familia, na chumba cha faragha au kichakani mbali na nyumbani ni mahali tulivu zaidi kwa ajili ya ibada ya mtu binafsi; lakini kanisa ni mahali patakatifu kwa ajili ya watu wote kukutanika. Katika jina la Yesu tunaweza kuja mbele Zake kwa ujasiri, lakini hatupaswi kumkaribia Yeye kwa ujasiri wa kiburi, kana kwamba yuko sawa na sisi wenyewe. Kuna wale ambao wanazungumza na Mungu mkuu, Mweza wa yote na mtakatifu, ambaye anakaa katika nuru isiyoweza kufikiwa, kama ambavyo wangezungumza na mtu aliye sawa na wao au hata wa chini yao. Kuna wale ambao wanatenda watakavyo nyumbani Mwake tofauti na vile ambavyo wanethubutu kutenda katika mikutano na viongozi wa dunia. Hawa wanapaswa kukumbuka kwamba wako mbele Zake Yeye ambaye maserafi wanamwabudu na kumsujidia.

Wale ambao wanakusanyika ili kumwabudu Yeye wanapaswa kuweka kando kila jambo ovu. Kukutanika kwao kutakuwa hakuna faida isipokuwa wanamwabudu Yeye katika roho na kweli na katika uzuri wa utakatifu Wake.

Marafiki vijana wapendwa, ni fursa yenu kumtukuza Mungu duniani. Ili kuweza kufanya hivi, mnalazimika kuelekeza akili zenu mbali na mambo ambayo ni ya kubabaisha, ya kipuuzi na yasiyo ya muhimu na kuyaendea yale ambayo ni yenyе thamani ya milele.

## Kutakaswa Toka Dhambini

*"Ndipo niliposema, Ole wangu! Kwa maana nimepotea; kwa saba-bu mimi ni mtu mwenye midomo michafu, nami ninakaa kati ya watu wenyewe midomo michafu; na macho yangu yamemwona Mfalme, Bwana wa majeshi". — Isaya 6:5.*

**N**abii Isaya alipouona utukufu wa Bwana, alistaajabishwa na kushindwa kwa utambuzi wa udhaifu na kutostahili kwake mwenyewe, kisha akalia, "Ole wangu! ..."

Isaya amekuwa akishutumu dhambi za wengine; lakini sasa anajiona mwenyewe akikabiliwa na shutuma sawa na ile aliyokuwa ameitoa juu yao. Alikuwa ameridhishwa na taratibu baridi zisizo na uhai katika kumwabudu kwake Mungu. Alikuwa hajapata kulijua hili mpaka pale alipopewa njonzi na Bwana. Alipotazama utakatifu na ukuu wa patakatifu, hekima na ujuzi wake wote ulionekana kuwa mdogo sana... Mtizamo wake juu yake unalazimika kuelezewa katika lugha ya mtume Paulo, "Ole wangu maskini mimi! ni nani atakayeniokoa na mwili huu wa mauti?" (Warumi 7:24)... "Kisha mmoja wa maserafi wale akaruka akanikaribia; naye alikuwa na kaa la moto mkononi mwake, ambalo alikuwa amelitwaa kwa makoleo toka juu ya madhabahu; na akanigusa kinywa changu kwa kaa hilo, akaniambia, Tazama, hili limekugusa midomo yako, na uovu wako umeondolewa, na dhambi yako imefunikwa" (Isaya 6:6, 7).

Njozi aliyopewa Isaya inawakilisha hali halisi ya watu wa Mungu katika siku za mwisho. Wamepata fursa ya kuona kwa Imani kazi ambayo inaendelea mbele katika patakatifu pa mbinguni... Kadiri wanavyoangalia kwa imani ndani ya patakatifu pa patakatifu na kuona kazi ya Yesu Kristo katika patakatifu pa mbinguni, wanatambua kuwa wao ni wenyewe midomo michafu — watu ambao midomo yao imeongea upuuzi na ambao talanta zao hazijatakaswa na kutumiwa ili kumletea Mungu utukufu. Naam wanaweza kukata tamaa pale wanapoona tofauti kati ya udhaifu wao wenyewe na kutostahili kwao na usafi na uzuri wa tabia tukufu ya Yesu. Lakini ikiwa wao kama Isaya, watapokea mguso ambao Bwana amekusudia ufanywe miyonini mwao, ikiwa watanyenyekeza nafsi zao mbele za Mungu, basi kuna tumaini kwao. Upinde wa ahadi u juu ya kiti cha enzi na kazi iliyofanywa kwa ajili ya Isaya itafanywa ndani yao pia.

## Roho Mtakatifu Ndani ya Hekalu la Nafsi

*Hamjui ya kuwa ninyi mmekuwa hekalu la Mungu, na ya kuwa Roho wa Mungu anakaa ndani yenu? — 1 Wakorintho 3:16.*

Tangu enzi za milele limekuwa kusudi la Mungu kwamba kila kiumbe, tangu kwa serafi ang'aaye na mtakatifu hadi kwa mwanadamu, kipate kuwa hekalu kwa ajili ya ukaaji wa Mungu ndani yake. Kwa sababu ya dhambi, binadamu walikoma kuwa hekalu kwa ajili ya Mungu. Moyo wa mwanadamu ukiwa umejazwa giza na kuchafuliwa na uovu, ulikoma kuonesha utukufu wa Mungu Mtakatifu. Lakini kwa kufanyika mwili kwa Mwana wa Mungu, kusudi la Mbingu linatimizwa. Mungu anakaa ndani ya wanadamu, na kwa njia ya neema iokoayo kwa mara nyingine tena moyo wa mwanadamu unakuwa hekalu la Mungu.

Mungu alikuwa amekusudia kwamba hekalu la Yerusalem liwe shahidi wa daima wa hatima kuu iliyowekwa wazi kwa kila nafsi. Lakini Wayahudi hawakuwa wameelewa umuhimu wa jengo waliloliangalia kwa kiburi mno. Hawakujitoa wao wenyewe kuwa mahekalu matakatifu kwa Roho wa Mungu. Nyua za hekalu la Yerusalem, zikiwa zimejawa na msukosuko wa watu wasio watakatifu, ziliwakilisha hekalu la moyo kwa kweli... Yesu alitangaza utume Wake wa kuutakasa moyo kutokana na kunajisiwa na dhambi — mbali na ... tamaa binafsi, tabia mbaya zinazoharibu nafsi pale alipokuwa akilisafisha hekalu kutokana na uwepo wa wanunuzi na wauzaji wa kiulimwengu.

Hakuna mtu awezaye kwa yeze mwenyewe kufukuza majeshi ya uovu ambayo yameuteka moyo wake. Ni Yesu peke yake ambaye anaweza kulitakasa hekalu la moyo. Lakini hawezi kulazimisha kuingia. Haingii ndani ya moyo kama vile katika hekalu la zamani; bali anasema, "Tazama, nasimama mlangoni, nabisha; mtu akiisikia sauti yangu, na kufungua mlangano, nitaingia kwake, nami nitakula pamoja naye, na yeze pamoja nami" (*Ufunuo 3:20*). Atakuja, sio kwa siku moja tu; kwa maana Anasema, "Nitakaa ndani yao, na kati yao nitatembea; ... nao watakuwa watu Wangu" (*2 Wakorintho 6:16...*) Uwepo Wake utasafisha na kuitakasa nafsi, ili kwamba iweze kuwa hekalu takatifu kwa Bwana na "Maskani ya Mungu katika Roho" (*Waefeso 2:22*).

Bwana yuko tayari zaidi kuwapatia Roho Mtakatifu wale ambao wanamtumikia Yeye kuliko vile ambavyo wazazi wako tayari kuwapa watoto wao vipawa vyema.

## Kusudi la Patakatifu

*Nao na wanifanyie patakatifu; ili nipate kukaa kati yao. — Kutoka 25:8.*

“Na mimi nitakaa kati ya wana wa Israeli, nami nitakuwa Mungu wao,” “na hiyo Hema itafanywa takatifu na utukufu wangu” (Kutoka 29:45, 43), ilikuwa ni ahadi aliyopewa Musa.

Katika ujenzi wa patakatifu kama mahali pa makazi kwa ajili ya Mungu, Musa alielekezwa kutengeneza vitu vyote kulingana na mfano wa vile vya mbinguni. Mungu alimwita juu mlimani, na kumfunulia vile vitu vya mbinguni, na katika mfanano wao hekalu, na vitu vyote vilivyokuwa ndani yake, vilitengenezwa.

Kwa hiyo kwa Israeli, ambaye Mungu alitamani kumfanya kuwa mahali pa makazi Yake, alimfunulia utukufu wa tabia Yake njema. Walikuwa wameoneshwa kielelezo pale mlimani sheria ilipotolewa toka Sinai... Lakini kwa wao wenye, hawakuwa na uwezo wa kufikia ubora huu. Ufunuo wa pale Sinai ungeweza tu kuwaonesha hitaji na kutoweza kwao. Somo jingine ambalo Hekalu lilipaswa kuwafundisha kupitia kwa huduma zake za utoaji kafara ni somo la msamaha wa dhambi na kupokea nguvu kwa njia ya Mwokozi kwa ajili ya utii hadi uzima.

Kwa njia ya Yesu lilipaswa kutimizwa kusudi ambalo kwalo hekalu lilikuwa ishara — jengo hilo lenye utukufu, kuta zake za dhahabu ing'aayo zikiakisi katika rangi za upinde wa mvua mapazia yaliyopambwa kwa makerubi, harufu ya uvumba uliokuwa ukichomwa daima uliwafikia wote, makuhanani wakiwa wamevaa mavazi meupe yasiyokuwa na doa, na katika siri kuu ya mahali pa ndani, juu ya kiti cha rehema, katikati ya mwonekano wa malaika walioinama wakiabudu, utukufu wa Patakatifu pa Patakatifu. Mungu alitamani watu Wake kujifunza kusudi Lake kwa ajili ya roho za wanadamu katika yote hayo. Lilikuwa ni kusudi lilo hilo lililotangazwa muda mrefu baadaye na mtume Paulo, alipokuwa akisema kwa kuongozwa na Roho Mtakatifu:

“Hamjui ya kuwa ninyi mmekuwa hekalu la Mungu, na ya kuwa Roho wa Mungu anakaa ndani yenu? Kama mtu akiliharibu hekalu la Mungu, Mungu atamharibu mtu huyo. Kwa maana hekalu la Mungu ni takatifu, ambalo ndilo ninyi” (1 Wakorintho 3:16, 17).

## Hekalu Lililojengwa kwa Dhabihu

*Waambie wana wa Israeli kwamba wanitwalie sadaka; kila mtu ambaye moyo wake wampa kupenda mtatwaa kwake sadaka yangu.* — *Kutoka 25:2.*

Mungu mwenyewe alimpatia Musa mpango wa jengo Mhilo [patakatifu], pamoja na maelekezo maalum kuhusu ukubwa wake na umbo lake, vifaa vyta kutumiwa, na kila chombo cha samani ambacho kilipaswa kuwekwa. Mahali patakatifu palipofanywa kwa mikono ya wanadamu palipaswa kuwa “”Mfano wa patakatifu halisi”” (*Waibrania 9:24*), “nakala za mambo yaliyo mbinguni”” (*Waibrania 9:23*) – onesho la mfano mdogo sana wa hekalu la mbinguni mahali ambapo Yesu, kuhani wetu mkuu, baada ya kuutoa uhai Wake kuwa dhabihu, alipaswa kuhudumu kwa niaba ya mwenye dhambi... Maandalizi makubwa na ya gharama yalikuwa ni muhimu kufanyika kwa ajili ya ujenzi wa patakatifu; idadi kubwa ya vito vyta thamani na vyta gharama kubwa vilihitajiwa; lakini Bwana alipokea tu sadaka za hiari. “Kila mtu ambaye moyo wake wampa kupenda mtatwaa kwake sadaka yangu,” ni amri ya Mungu iliyorudiwa na Musa kwa kusanyiko lote. Kujitoa kwa Mungu na roho ya kujikana nafsi vilikuwa ni takwa la kwanza katika maandalizi ya makao Yake Aliye Juu Zaidi.

Watu wote waliitikia kwa moyo mmoja. “Wakaja kila mtu ambaye moyo wake ulimhimiza, na kila mtu ambaye roho yake ilimfanya kuwa apenda, nao wakaleta sadaka za kumpa Bwana, kwa kazi ya hema ya kukutania, na kwa utumishi wake, na kwa hayo mavazi matakatifu. Nao wakaja, waume kwa wake, wote waliokuwa na moyo wa kupenda, wakaleta vipini; ... kila mtu aliyetoa toleo la dhahabu la kumpa Bwana.” *Kutoka 35:21, 22...* Watu wote, wazee kwa vijanawanaume, wanawake na watoto – waliendelea kuleta sadaka zao, mpaka wale waliokuwa wasimamizi wa kazi kuona kuwa vilikuwa vinatosha na hata vimezidi mahitaji yao... Wale wanaopenda kumwabudu Mungu na wanaothamini sana baraka ya uwepo wa utakatifu Wake, wataonesha roho hiyo hiyo ya kujikana nafsi katika kuandaa mahali ambapo Atakutana nao.

Ikiwa kumewahi kuwa na wakati ambapo kujinyima kunahitajika, ni sasa.

## Nguvu na Uzuri katika Patakatifu Pake

*Heshima na adhama ziko mbele Zake, Nguvu na uzuri zim<sub>0</sub> katika patakatifu pake. —Zaburi 96:6.*

Tangu uumbaji na anguko la mwanadamu hadi wakati wa sasa, kumekuwa na onesho la daima la mpango wa Mungu kwa ajili ya ukombozi kwa jamii iliyoanguka, kwa njia ya Yesu. Patakatifu na hekalu la Mungu duniani vilikuwa mfano wa ile ya asili ya mbinguni. Pale patakatifu na ibada zake makini zilikusanya kwa namna ya ajabu kweli kuu ambazo zilipaswa kuendelezwa kote katika vizazi vyote vilivyofuatia.

Hakuna wakati ambapo Mungu ametoa uthibitisho mkubwa zaidi wa fahari na ukuu Wake uliotukuka kuliko wakati Alipokuwa kiongozi wa Israeli anayetambuliwa. Udhahirisho wa Mfalme asiyeonekana ulikuwa mkubwa na wa kutisha sana. Fimbo ya enzi ilitawala, lakini haikuwa imeshikiliwa na mkono wa mwanadamu. Sanduku takatifu, lililokuwa limefunikwa na kiti cha rehema, na lenye sheria takatifu ya Mungu, lilikuwa mfano wa Yehova Mwenyewe. Lilikuwa ni nguvu ya wana wa Israeli kushinda katika vita. Mbele yake sanamu ziliangushwa chini na maelfu ya watu waliangamia kwa kuangalia ndani yake bila kufikiri. Kamwe Bwana hajawahi kutoa udhirisho wa wazi wa ukuu Wake katika ulimwengu wetu kama wakati Yeye pekee alipokuwa mfalme aliyetambuliwa wa Israeli.

Sheria ya Mungu, ikiwa imetunzwa ndani ya sanduku, ilikuwa ni kanuni kuu ya haki na hukumu. Sheria hiyo ilitangaza hukumu ya kifo kwa mkosaji; lakini juu ya sheria kulikuwa na kiti cha rehema, ambapo juu yake uwepo wa Mungu ulifunuliwa, na kutoka hapo, kwa nguvu ya upatanisho, msamaha ultolewa kwa mwenye dhambi aliyetubu. Hivyo ndivyo kazi ya Kristo kwa ajili ya ukombozi wetu ilivyooneshwa kwa huduma ya patakatifu, "Fadhili na kweli zimekutana, Haki na amani zimehusiana" (Zaburi 85:10).

Leo tunapofurahia kwamba Mwokozi wetu amekuja, kwamba kafara za mfumo wa ibada wa zamani zimetoa nafasi kwa sadaka kamilifu ya dhambi, hatuna ruhusa katika kuonesha dharau kwa kipindi hicho.

## Mkombozi, Kuhani na Mfalme

*Maana ilitupasa sisi tuwe na kuhani mkuu wa namna hii aliye mtakatifu, asiyekuwa na uovu, asiyekuwa na waa lo lote, aliyetengwa na wakosaji, aliyekuwa juu kuliko mbingu. – Waebrania 7:26.*

Kabila la Yuda lilitengwa maalum kwa ajili ya huduma za patakatifu kwa uongozi wa Mungu. Katika nyakati za awali kila mtu alikuwa kuhani wa nyumba yake mwenyewe. Katika siku za Ibrahim, ukuhani ulichukuliwa kuwa haki ya kuzaliwa ya kijana mkubwa wa kiume. Sasa, badala ya kuwa mzaliwa wa kwanza wa Israeli wote, Bwana alilichagua kabila la Walawi kwa ajili ya kazi ya patakatifu... Kwa hiyo, kazi ya ukuhani iliwekwa wakfu tu kwa familia ya Haruni. Haruni na watoto wake wa kiume ndiyo walioruhusiwa kuhudumu mbele za Bwana; watu wengine waliosalia wa kabila hilo walikabidhiwa usimamizi wa hema takatifu...Kulingana na kazi hiyo ya kikuhanini, mavazi maalum yaliteuliwa kwa ajili ya makuhani. "Nawe utamfanyia Haruni ndugu yako mavazi matakatifu, kwa utukufu na kwa uzuri" (*Kutoka 28:2*), huo ulikuwa ni mwongozo wa Mungu kwa Musa... Kila kitu kilichohusiana na mavazi na mwenendo wa makuhani kilipaswa kuwa kile kinachowavutia wanaowatazama kwa mvuto wa utakatifu wa Mungu, utakatifu wa ibada Yake, na usafi unaohitajiwa wa wale ambao wamekuja katika uwepo Wake. Sio tu Patakatifu penyewe, bali pia huduma ya makuhani, vilipaswa kuwa "watumikiao mfano na kivuli cha mambo ya mbinguni" (*Waebrania 8:5*).

Ustahilifu wa dhabihu Yake [Yesu] unatosha kuwasilishwa kwa Baba kwa niaba yetu.

Tunapaswa kuwa na fursa ya kuipata bure damu ya upatanisho ya Kristo. Tunapaswa kuliona hilo kuwa fursa ya thamani zaidi, baraka kubwa zaidi ambayo imewahi kutolewa kwa mwanadamu mwenye dhambi.

## Kujiweka Wakfu kwa Mungu Kila Siku

*Basi, ndugu zangu, nawasihi, kwa huruma zake Mungu, itoeni miili yenu iwe dhabihu iliyo hai, takatifu, ya kumpendeza Mungu, ndiyo ibada yenu yenye maana. – Warumi 12:1.*

**H**uduma ya patakatifu ilikuwa na mgawanyiko wa aina mbili, huduma ya kila siku na ya kila mwaka. Huduma ya kila siku ilifanywa katika madhabahu ya sadaka ya kuteketezwa kwenye ukumbi wa patakatifu, na ndani ya patakatifu; wakati ambapo huduma ya kila mwaka ilikuwa ikifanyika ndani ya Patakatifu pa Patakatifu... Huduma ya kila siku ilijumuisha sadaka ya kuteketezwa ya asubuhi na jioni, sadaka ya uvumba wa manukato mazuri juu ya madhabahu ya dhahabu na sadaka maalum kwa ajili ya dhambi za kila mtu. Na kulikuwa pia na sadaka kwa ajili ya sabato, mwezi mpya na sherehe maalum.

Kila siku asubuhi na jioni mwanakondoo wa mwaka mmoja aliteketezwa juu ya madhabahu, pamoja na sadaka yake maalum, hivyo kuashiria uwekwaji wakfu wa taifa kwa Yehovah na utegemezi wao wa daima kwa damu ya Yesu ya upatanisho. Mungu alielekeza wazi kwamba kila sadaka inayotolewa kwa ajili ya huduma ya patakatifu inapaswa kuwa "isiyo na ila." ... Sadaka tu "isiyo na waa" inaweza kuwa alama ya ukamilifu wa usafi Wake Yeye ambaye alikuwa ajitoe Mwenyewe kuwa "Mwana-Kondoo asiye na ila wala waa" (1 Petro 1:19). Mtume Paulo anaonesha dhabihu hizi kuwa kielelezo cha kile ambacho wafuasi wa Yesu wanapaswa kuwa. Anasema, "Basi, ndugu zangu, nawasihi, kwa huruma zake Mungu, itoeni miili yenu iwe dhabihu iliyo hai, takatifu, ya kumpendeza Mungu, ndiyo ibada yenu yenye maana." ...

Saa zilizochaguliwa kwa ajili ya dhabihu za asubuhi na jioni zilichukuliwa kuwani takatifu na hatimaye zilitunzwa kama muda uliopangwa kwa ajili ya ibada zama zote kwa taifa la Wayahudi... Wakristo wanapata kielelezo kwa ajili ya maombi ya asubuhi na jioni katika utaratibu huu. Ingawa Mungu anashutumu duru tu ya sherehe, bila roho ya kuabudu, Yeye huwaangalia kwa furaha sana wale wampendao, wakipiga magoti asubuhi na jioni kuomba msamaha wa dhambi walizotenda, na kuwasilisha maombi yao ya baraka wanazozihitaji.

## Uvumba wa Haki

*Mkaenende katika upendo, kama Kristo naye alivyowapenda ninyi tena akajitoa kwa ajili yetu, sadaka na dhabihu kwa Mungu, kuwa harufu ya manukato. — Waefeso 5:2.*

**M**ikate wa wonesho iliwekwa daima mbele za Bwana kama sadaka ya milele... Iliitwa mikate ya wonesho, au "mikate ya uwepo," kwa sababu ilikuwa mbele za uso wa Bwana daima. Ilikuwa ni onesho la utambuzi wa mwanadamu kumtegemea Mungu kwa ajili ya vyakula vyote vya kimwili na kiroho, na kwamba ilikuwa inapokelewa tu kupitia kwa uingiliaji kati wa Yesu... Vyote mana na mikate ya wonesho vilielekeza kwa Yesu, aliye mkate wa uzima, ambaye yuko mbele za Mungu daima kwa ajili yetu.

Katika sadaka ya uvumba kuhani aliletwa karibu zaidi katika uwepo wa Mungu kuliko katika tendo jingine lolote la huduma ya kila siku. Kwa vile pazia la ndani la patakatifu halikuwa limefika juu kabisa ya jengo, utukufu wa Mungu, ambao ulionekana juu ya kiti cha rehema, ulionekana kwa kiasi kutokea kwenye chumba cha kwanza. Wakati kuhani alipofukiza uvumba mbele za Bwana, aliangalia kuelekea sanduku la agano; na kadiri wingu la uvumba lilipoinuka juu, utukufu wa Mungu ulishuka juu ya kiti cha rehema na kupajaza patakatifu pa patakatifu, na mara kadhaa ulivijaza vyumba vyote kiasi kwamba kuhani alilazimika kutoka nje ya mlango wa patakatifu. Kama ilivyokuwa kwa huduma hiyo ya mfano kwa imani kuhani aliangalia kwenye kiti cha rehema ambapo hakuweza kuona kitu, ndivyo ambavyo watu wa Mungu wanavyopaswa kuelekeza maombi yao kwa Yesu, kuhani wao mkuu, ambaye, pasipokuonekana kwa macho ya binadamu, anaomba kwa niaba yao katika patakatifu pa juu.

Uvumba, ulipokuwa ukipanda juu na maombi ya Israeli, unawakilisha ustahilifu na maombezi ya Yesu, haki Yake kamilifu, ambayo kwa njia ya imani imetolewa kwa watu Wake, na ambayo ndiyo pekee inayoweza kufanya ibada ya wenye dhambi kukubalika kwa Mungu. Mbele ya pazia la patakatifu pa patakatifu palikuwa na madhabahu ya maombezi ya daima, mbele ya Patakatifu, madhabahu ya upatanisho wa daima. Mungu alipaswa kufikiwa kwa damu na uvumba – vielelezo vinavyoelekeza kwa Mpatanishi mkuu, ambaye kupitia Kwake wenye dhambi wanaweza kumkaribia Yehova, na ambaye kupitia Kwake rehema na wokovu vinaweza kutolewa kwa nafsi itubuyo na yenye kuamini.

## Kristo Alikufa kwa Ajili ya Mtu Binfsi

*Ni neno la kuaminiwa, tena lastahili kukubalika kabisa, ya kwamba Kristo Yesu alikuja ulimwenguni awaokoe wenyewe dhambi; ambao wa kwanza wao ni mimi. —1 Timotheo 1:15.*

**S**ehemu muhimu sana kwa huduma ya kila siku ilikuwa ni ile shuduma iliyoanywa kwa niaba ya watu binafsi. Mwenye dhambi anayetubu alileta dhabihu yake mpaka langoni mwa hema takatifu, na kuweka mikono yake juu ya kichwa cha Yule mnyama wa kafara, alizungama dhambi zake, hivyo kwa mfano kuzihamisha kutoka kwake mwenyewe kwenda kwa mnyama wa kafara asiye na hatia. Alimchinja Yule mnyama kwa mikono yake mwenyewe, na damu yake ilichukuliwa na kuhani hadi ndani ya chumba cha kwanza cha patakatifu na kunyunyizwa mbele ya pazia, ambalo nyuma yake kulikuwa na sanduku lililokuwa na sheria ambayo mwenye dhambi alikuwa ameivunja. Kwa utaratibu huu dhambi ilihamishwa kwa mfano hadi patakatifu kwa njia ya damu. Katika matukio kadhaa damu haikupelekwa mahali patakatifu; lakini nyama hiyo ilipaswa kuliwa na kuhani... Huduma zote mbili kwa pamoja ziliwakilisha uhamishaji wa dhambi kutoka kwa anayetubu hadi ndani ya patakatifu.

Hiyo ndiyo kazi iliyo kuwa ikifanya kwa siku, kwa mwaka mzima. Mahali patakatifu palikuwa pamechafuliwa kwa dhambi za wana wa Israeli zilizokuwa zimehamishiwa ndani ya patakatifu, na hivyo basi, kulihitajika kazi maalum kwa ajili ya kuondolewa kwa dhambi. Mungu aliamuru kuwa upatanisho ufanywe kwa kila kimoja cha vyumba vya patakatifu, kama ilivyokuwa kwa madhabahu, ili "kuvisafisha na kuvitakasa ili machafu yote ya wana wa Israeli yaitoke" (*Walawi 16:19*).

Mara moja kwa mwaka, kuhani aliingia patakatifu pa patakatifu katika siku ya upatanisho kwa ajili ya utakasaji wa patakatifu. Kazi iliyoanywa hapo, ilihitimisha huduma ya mzunguko wa kila mwaka... Patakatifu pa duniani palijengwa ... kulingana na sampuli iliyooneshwa juu mlimani. Ilikuwa "mfano wa wakati huu uliopo sasa, wakati ambapo sadaka na dhabihu zinazotolewa"; sehemu zake mbili takatifu zilikuwa "nakala za mambo ya mbinguni", Kristo, kuhani wetu mkuu, ni "mhudumu wa patakatifu, na wa ile hema ya kweli, ambayo Bwana aliiweka waka si mwanadamu" (*Waebriania 9:9, 23; 8:2*).

Anaonekana mbele za Mungu, ... akiwa tayari kupokea toba na kutoa majibu ya maombi ya watu Wake.

## Dhabihu ya Yesu ya Hiari

*Ndipo niliposema, Tazama nimekuja: Katika gombo la chuo nimeandikiwa, Kuyafanya niapenzi yako, Ee Mungu wangu, ndiyo furaha yangu; Naam, sheria yako imo moyoni mwangu.—Zaburi 40:7, 8.*

**W**ana wa Israeli waliamriwa tangu zamani kutoa sadaka kwa ajili ya kusanyiko lote ili kuwatakasa kutoka kwa unajisi wa kikaida. Dhabihu hii ilikuwa ni mtamba mwekundu na iliwakilisha dhabihu kamilifu zaidi ambayo ingewaokoa kutoka katika uchafuzi wa dhambi. Hii ilikuwa ni kafara iliyotolewa mara moja kwa ajili ya utakaso wa wale wote ambao waligusa maiti kwa lazima au kwa bahati mbaya. Kwa kawaida wale waliojikuta kugusana na maiti walichukuliwa kuwa najisi. Hili lilipaswa kukaza kwa nguvu akilini mwa Waembrania ukweli kwamba mauti yalikuja kama matokeo ya dhambi na hivyo basi ni ashirio la dhambi. Mtamba mmoja, Sanduku la Agano moja, na Nyoka wa shaba mmoja, kwa uhakika vinaelekeza kwa Dhabihu kuu moja, kafara ya Yesu Kristo.

Huyu mtamba alipaswa kuwa mwekundu, ambayo ilikuwa ni ishara ya damu. Hakupaswa kuwa na doa wala waa, na ambaye hajawahi kutiwa nira. Hapa tena, Kristo alioneshwa kwa mfano. Mwana wa Mungu alikuwa kwa hiari Yake ili kukamilisha kazi ya upatanisho. Hakuwa amelazimishwa kufungwa nira juu Yake, kwa kuwa Alikuwa huru na juu ya sheria yote. Malaika, wakiwa wajumbe wa Mungu wenye weledi, walikuwa wamebekwa chini ya nira ya uwajibikaji; dhabihu yao binafsi isingeweza kulipa fidia ya mwanadamu aliyeanguka. Ni Yesu peke Yake ambaye alikuwa huru kutokana na madai ya sheria ili kuthibitisha ukombozi wa jamii yenye dhambi... Yesu angeweza kuendelea kubaki katika mkono wa kuume wa Baba Yake, akiwa amevaa taji Yake ya kifalme na mavazi ya kifalme. Lakini Alichagua kubadilisha utajiri wote, heshima na utukufu wa mbinguni kwa ajili ya umasikini wa wanadamu, na cheo Chake cha uamiri jeshi mkuu kwa tishio la Getsemani na fedheha na uchungu wa Kalwari... Mikono ilijojeruhiwa, mbavu zilizotobolewa, miguu iliyoharibiwa, husihi kwa ufasaha kwa ajili ya mwanadamu aliyeanguka, ambaye ukombozi wake unanunuliwa kwa ghamama hiyo isiyo na kikomo. Lo, unyenyekevu usio na kifani! Wakati wala matukio hayawezi kupunguza ustahili wa dhabihu ya upatanisho.

## Damu Ilinyunyizwa Kila Siku

*Kwa maana, ikiwa damu ya mbuzi na mafahali na majivu ya ndam<sub>q</sub> ya ng'ombe walionyuniyiwa wenyewe uchafu hutakasa hata kuusafish<sub>q</sub> mwili: basi si zaidi sana damu yake Kristo, ... itawasafisha dhamiri zen<sub>u</sub> na matendo mafu, mpare kumwabudu Mungu aliye hai? — Waebrania 9:13, 14.*

**K**afara ya mtamba [mwekundu] ilifanywa nje ya kambi na Kalichinjwa kwa namna ya kuvutia sana. Ndivyo ambavyo Yesu aliteswa nje ya lango la Yerusalem, kwa kuwa Kalwari ilikuwa nje ya kuta za jiji. Hii ilikuwa inaonesha kuwa Yesu Kristo hakufa kwa ajili ya Wayahudi pekeyake, bali kwa ajili ya wanadamu wote. Anatangaza kwa ulimwengu ulioanguka kwamba Alikuwa amekuja kuwa Mkombozi wao na kuwataka kuukubali wokovu Anaowapatia. Mtamba huyo alipokuwa amechinjwa kwa namna iliyotakiwa, kuhani, aliyekuwa amevalia mavazi meupe kabisa, aliichukua damu mikononi mwake kama ilivyotolewa kutoka kwenye mwili wa kafara hiyo na kuinyunyiza juu ya hekalu mara saba... Mwili wa mtamba huyo ulichomwa mpaka kuwa majivu, ishara ioneshayo dhabihu timilifu na ya kutosheleza. Kisha majivu yalikusanya pamoja na mtu asiyechafuliwa kwa kugusana na maiti na kuyaweka ndani ya chombo chenye maji yaliyotoka kwenye kijito kitiririshayo maji. Kisha mtu huyusafina asiye na waa alichukua kijiti cha mwerezi pamoja na nguo ya rangi nyekundu na matawi ya hisopo, na kunyunyiza mchanganyiko uliomo ndani ya chombo juu ya hema na juu ya watu wakakusanya. Sherehe hii ilirudiwa mara kadhaa ... na ilifanywa kama utakaso kutoka dhambini.

Hivyo Kristo, katika haki Yake Mwenyewe isiyo na doa, baada ya kumwaga damu Yake ya thamani, anaingia katika patakatifu ili kupatakaswa patakatifu. Na hapo mkondo wa damu unaletwa katika huduma ya kumpatanisha Mungu na mwanadamu. Wengine wanaweza kuchukulia huu uchinjaji wa mtamba kama taratibu isiyo na maana yoyote, lakini ilifanywa kutokana na amri ya Mungu na inabeba maana kubwa ambayo haijapoteza thamani yake hata sasa... Damu ya Yesu inatosheleza, lakini inahitaji kunyunyizwa daima... Ikiwa ilikuwa muhimu sana hapo kale kwa wenyewe unajisi kusafishwa kwa kunyunyiziwa damu, ni kwa jinsi gani ni muhimu kwa damu ya Yesu Kristo kunyunyizwa kila siku katika mioyo yao wale wanaoishi katika siku za mwisho za hatari na kukabiliwa na majoribu ya shetani?

## Ndani ya Mahali pa Patakatifu

*Wala si kwa damu ya mbuzi na ndama, bali kwa damu Yake mwenyewe aliingia mara moja tu katika Patakatifu, akiisha kupata ukombozi wa milele. – Waebrania 9:12.*

**K**atika majira ya kuchipua ya A.D. 31, Kristo, ambaye ni Dhabihu ya kweli, alitolewa kafara pale Kalvari.

Kristo Yesu alipolia pale msalabani, "Imekwisha," pazia la hekalu lilipasuka vipande viwili. Pazia hili lilikuwa la muhimu sana kwa taifa la Wayahudi. Lilikuwa la kitambaa cha gharama kubwa zaidi, la zambarau na dhahabu, na lilikuwa na urefu na upana mkubwa. Wakati Kristo Yesu alipokata roho, kulikuwa na mashuhuda ndani ya hekalu ambao waliona kitambaa hicho kigumu na kizito kikipasuliwa na mikono isiyoonekana tokea juu hadi chini. Tukio hili lilionesha kwa ulimwengu wa mbinguni na kwa ulimwengu uliochafuliwa na dhambi, kwamba njia mpya na iliyo hai ilikuwa imefunguliwa kwa jamii iliyoanguka dhambini, kwamba dhabihu zote za kafara zilikomeshwa katika dhabihu moja kuu ya Mwana wa Mungu.

Ishara ... ilikutana na halisi katika kifo cha Mwana wa Mungu... Njia kwa ajili ya kupaingia patakatifu mno iliwekwa wazi. Njia mpya na iliyo hai imeandaliwa kwa ajili ya watu wote. Hakukuwa na uhitaji tena wa wanadamu wenye dhambi na huzuni kusubiria ujio wa kuhani mkuu. Tangu sasa na kuendelea Mwokozi alipaswa kuhudumu kama kuhani na wakili katika mbingu ya mbingu... Hapa sasa ndio mwisho wa kafara na matoleo yote kwa ajili ya dhambi. Mwana wa Mungu amekuja kulingana na Neno Lake, "Tazama, nimekuja (katika gombo la chuo nimeandikiwa) Niyafanye mapenzi yako, Mungu." "Kwa damu Yake mwenyewe" Aliingia "mara moja tu katika Patakatifu, akiisha kupata ukombozi wa milele kwa ajili yetu" (*Waebrania 10:7; 9:12*).

Roho Mtakatifu ambaye alishuka katika siku ya Pentekoste alichukua akili za wanafunzi kutoka kwenye patakatifu pa duniani hadi Patakatifu pa mbinguni, ambapo Yesu amepaingia kwa damu Yake mwenyewe, ili kuwaangazia wanafunzi manufaa ya upatanisho Wake.

Macho ya wanadamu yaligeuzwa kuelekezwa kwenye dhabihu ya kweli kwa ajili ya dhambi za ulimwengu. Huduma ya kikuhanu duniani ilikoma; lakini tunamtazama Yesu, mhudumu wa agano jipya la ukombozi.

Kaka Mkubwa wa jamii yetu ameketi katika kiti cha enzi cha milele.

## Kiini Hasa cha Kazi Yake

*Basi, katika hayo tunayosema, neno lililo kuu ndilo hili: Tunaye kuhanii mkuu wa namna hii, aliyeketi mkono wa kuume wa kiti cha enzi cha Ukuu mbinguni, mhudumu wa patakatifu, na wa ile hema ya kweli, ambayo Bwana aliiweka wala si mwanadamu. — Waebrania 8:1, 2.*

**S**wali, Patakatifu ni nini? limejibiwa kwa uwazi sana kwenye Maandiko. Neno “patakatifu,” kama lilivyotumika katika Biblia, hurejelea, kwanza, hema takatifu iliyojengwa na Musa, kama mfano wa mambo ya mbinguni; na pili, hurejelea “Hema takatifu ya kweli” huko mbinguni, ambayo hema takatifu ya duniani ilikuwa ikielekeza kwayo. Wakati wa kifo cha Yesu msalabani huduma za mifano zilikoma. “Hema takatifu ya kweli” mbinguni ni patakatifu pa agano jipya.

Mahali patakatifu na patakatifu pa patakatifu mbinguni panawakilishwa na vyumba viwili katika patakatifu pa hapa duniani. Mtume Yohana alipokuwa katika njonzi alioneshwa hekalu la Mungu mbinguni, aliona pale “taa saba za moto zikiwaka mbele ya kile kiti cha enzi.” (Ufunuo 4:5). Aliona malaika “mwenye chetezo cha dhahabu, akapewa uvumba mwingi, ili autie pamoja na maombi ya watakatifu wote juu ya madhabahu ya dhahabu, iliyo mbele ya kiti cha enzi” (Ufunuo 8:3). Hapa nabii aliruhusiwa kuona chumba cha kwanza cha patakatifu mbinguni; na aliona humo “taa saba za moto” na “madhabahu ya dhahabu,” iliyowakilishwa na kinara cha dhahabu na madhabahu ya uvumba katika patakatifu duniani. Vilevile, “hekalu la Mungu lilikuwa limefunguliwa” (Ufunuo 11:19), na aliangalia ndani ya pazia la ndani, patakatifu pa patakatifu. Hapa aliona “sanduku la agano Lake,” likiwa linawakilishwa na Sanduku takatifu lilijojengwa na Musa ili kutunza sheria ya Mungu...Musa alijenga hema takatifu ya duniani kwa mfano wa ile ambayo alioneshwa. Paulo anafundisha kwamba kielelezoo hicho kilikuwa ni patakatifu pa kweli pa mbinguni. Naye Yohana anashuhudia kwamba alipaona patakatifu pa mbinguni.

Patakatifu pa mbinguni ni kitovu pekee cha kazi ya Kristo kwa niaba ya wanadamu. Panaihusu kila nafsi ambayo inaishi duniani.

Wakati Yesu alipopaa kwenda mbinguni, Alipaa kama Mtetezi wetu. Wakati wote tunaye Rafiki Mahakamani.

## Anaonekana Mbinguni kwa Ajili Yetu

*Kwa sababu Kristo hakuwingia katika patakatifu palipofanyika kwa mikono, ndio mfano wa patakatifu halisi; bali aliingia mbinguni hasa, aonekane sasa usoni pa Mungu kwa ajili yetu. — Waebrania 9:24.*

**W**atu wa Mungu wanapaswa kuielewa mada ya patakatifu vizuri sana. Wote wanahitaji maarifa kwa ajili yao wenyewe ya nafasi na kazi ya Kuhani wao Mkuu... Kazi ya Kristo ya kuomba kwa niaba ya mwanadamu katika patakatifu pajuu ni muhimu kwa mpango wa wokovu kama vile kifo Chake msalabani. Kwa kifo Chake alianza ile kazi ambayo baada ya ufufuo Wake Alipaa ili kuikamilisha mbinguni. Tunalazimika kuingia kwa imani ndani ya pazia, "alimoingia Yesu kwa ajili yetu, mtangulizi wetu" (Waebrania 6:20). Nuru kutoka kwenye msalaba wa Kalvari imeakisiwa pale. Pale tunaweza kupata utambuzi sahili wa mafumbo ya ukombozi. Wokovu wa mwanadamu unakamilishwa kwa gharama ya mbinguni isiyo na kikomo; sadaka iliyotolewa inatosha kulipa madai mapana zaidi ya sheria ya Mungu iliyovunjwa. Yesu amefungua njia ya kukielekea kiti cha enzi cha Baba na kwa njia ya upatanisho Wake hitaji la kweli la wote wanaomjia kwa imani linaweza kuwasilishwa mbele za Mungu.

"Afichaye dhambi zake hatafanikiwa; bali yeye aziungamaye na akuziacha atapata rehema" (Mithali 28:13). Ikiwa wale wanaoficha na kutoa udhuru kwa makosa yao wangeweza kuona jinsi shetani anavyofurahia juu yao, jinsi anavyomdhihaki Kristo na malaika watakatifu kwa utendaji wao, wangefanya haraka kuziungama dhambi zao na kuzitupilia mbali. Kupitia kasoro katika tabia, Shetani anafanya kazi ili kupata udhibiti wa akili yote, na anajua kwamba kasoro hizi zikitukuzwa, atafanikiwa. Kwa hiyo daima anatafuta kuwadanganya wafuasi wa Kristo kwa ujanja wake wa kufisha ambao hauwezekani kwao kuushinda. Lakini Yesu anasihi kwa niaba yao kwa makovu ya majeraha ya mikono Yake, mwili Wake uliochubuliwa; na Anatangaza kwa wote ambao wangemuata Yeye, "Neema yangu yakutosha." 2 Wakorintho 12:9... Hebu basi wasiwepo wale wote, watakaochukulia kuwa mapungufu yao hayawesi kuondolewa. Mungu atatoa imani na neema ili kuyashinda.

## Wokovu Mkamilifu kwa Watoto Wake

*Bali yeye, kwa kuwa akaa milele, anao ukuhani wake usioondoka. Naye, kwa sababu hii, aweza kuwaokoa kabisa wao wamjiao Mungu kwa yeye; maana yu hai siku zote ili awaombee. — Waebrania 7:24, 25.*

**K**ila uwezekano umefanywa kwa ajili ya udhaifu wetu, kila shime imetolewa kwetu ili kuja kwa Kristo.

Kristo aliutoa mwili Wake uliovunjika ili kuununua tena urithi wa Mungu, ili kumpatia mwanadamu fursa nyingine... Kristo Yesu aliitetea jamii iliyopotea kwa maisha Yake yasiyo na doa, utii Wake na kifo Chake katika msalaba wa Kalvari. Na sasa, Kapteni wa wokovu wetu hutuombea si kama muombaji tu, bali kama Mshindi anayedai ushindi Wake. Sadaka Yake imekamilika, na kama Mwombezi wetu anatekeleza kazi Yake aliyojipatia mwenyewe, akiwa ameshikilia mbele za Mungu chetezo chenye ustahilifu Wake usio na doa na sala, maungamo na shukrani za watu Wake. Zilizojawa na harufu nzuri ya manukato ya haki Yake, haya hupanda juu kwa Mungu kama harufu nzuri sana. Sadaka inakubalika kabisa, na msamaha huundoa makosa yote.

Yesu Kristo anajitolea kuwa mbadala na mdhamini wetu, na hampuuzi ye yote. Yeye ambaye kupitia upatanisho Wake mwenyewe alitoa kwa ajili ya mwanadamu hazina isiyo na kikomo ya uwezo wa kimaadili, hatashindwa kutumia uwezo huu kwa niaba yetu. Tunaweza kuzipeleka dhambi na huzuni zetu miguuni Pake; kwa kuwa anatupenda. Kila mwonekano Wake na neno Lake hutuita ili kumwamini. Ataunda na kufinyanga tabia zetu kulingana na mapenzi Yake Mwenyewe.

Katika nguvu zote za shetani hakuna uwezo wa kuishinda nafsi hata moja ambayo kwa imani sahili inajiachilia kwa Kristo Yesu. "Huwapa nguvu wazimiao, humwongezea nguvu yeye asiyekuwa na uwezo"( Isaya 40:29).

## Mpatanishi wa Kweli

*Kwa sababu Mungu ni mmoja, na mpatanishi kati ya Mungu na wanadamu ni mmoja, Mwanadamu Kristo Yesu. — 1 Timotheo 2:5.*

**U**pendo wa Mungu ulifunuliwa katika ukamilifu wake kwa wanadamu na malaika kupitia kazi ya Yesu Kristo ya upatanisho.

Anafanya upatanisho kwa ajili yako. Yeye ni Kuhani Mkuu ambaye anasihi/anaomba kwa niaba yako; na unalazimika kuja na kuwasilisha suala lako kwa Baba kupitia kwa Yesu Kristo. Hivyo unaweza kuwa na fursa ya kumwendea Mungu; na ikiwa utatenda dhambi, suala lako lina matumaini. "Na kama mtu akitenda dhambi, tunaye mwombezi kwa Baba, Yesu Kristo mwenye haki" (1 Yohana 2:1).

Kristo Yesu ni Mkombozi wako; hataacha kukusamehe dhambi zako zinazofedhehesha. Ikiwa unayo dhambi ya tabia ya sirini, iungame kwa Yesu, ambaye ni mpatanishi pekee kati ya Mungu na mwanadamu.

Anatuwasilisha kwa Baba tukiwa tumevikwa mavazi meupe ya tabia Yake Mwenyewe. Anasihi kwa niaba yetu mbele za Mungu, akisema: Nimechukua mahali pa mwenye dhambi. Usimwangalie huyu mtoto mkaidi, bali niangalie Mimi. Shetani anatushitaki vibaya dhidi ya nafsi zetu, ... akidai sisi kuwa mawindo yake, damu ya Yesu inatuwakilisha kwa uwezo mkubwa.

Kazi ya Yesu katika patakatifu pa mbinguni, kila mara akiwasilisha damu Yake Mwenyewe mbele ya kiti cha enzi, pale anapotuombea, inapaswa kuwa na mguso kamili miyoni mwetu, ili kwamba tuweze kuthamini umuhimu wa kila nafasi. Yesu anaishi daima ili kutuombea; lakini kila nafasi moja inayotumiwa vibaya haiwezi kurejeshwa tena milele.

Mtafakari Yesu. Yuko mahali Pake patakatifu, sio katika hali ya upweke, bali akiwa amezungukwa na malaika wa mbinguni elfu kumi mara elfu kumi wanaosubiri kuzitii amri Zake. Na anawaamuru waende kufanya kazi kwa ajili ya mtakatifu aliye dhaifu zaidi ambaye anaweka imani yake kwa Mungu. Wote wa hali ya juu na ya chini, matajiri na masikini, wamapewa msaada mmoja.

Zingatia huu ukweli mkuu kwamba Yesu kamwe hakomi kujihusisha kwenye kazi Yake muhimu sana katika patakatifu pa mbinguni, na ikiwa utajivika nira ya Yesu, ikiwa utaubebe mzigo wa Yesu, utakuwa umejihusisha katika kazi ya tabia moja na ile ya Kiongozi wako Aliye hai.

## Mambo ya Mbinguni Yatakaswa

*Na katika Torati karibu vitu vyote husafishwa kwa damu, na pasipo kumwaga damu hakuna ondoleo. Basi ilikuwa sharti nakala za mambo yaliyo mbinguni zisafishwe kwa hizo, lakini mambo ya mbinguni yenye we yasafishwe kwa dhabihu zilizo bora kuliko hizo. — Waebrania 9:22, 23.*

**K**utakaswa kwa patakatifu ni nini? Imenenwa katika Maandiko ya Agano la Kale kwamba, kulikuwa na huduma hiyo kuhusiana na patakatifu pa duniani. Lakini, kunaweza kuwa na kitu chochote mbinguni kinachohitaji kutakaswa? Kutakaswa kwa patakatifu pote pa duniani na pa mbinguni kumefundishwa wazi katika Waebrania sura ya 9...Kutakaswa kote katika huduma kielelezo na halisi, kulilazimika kukamilishwa kwa njia ya damu: katika ile ya zamani, kwa damu ya wanyama; na kwa ile ya mwisho, kwa damu ya Yesu Kristo.

Utakaso huo haukuwa kuondolewa kwa uchafu wa kimwili, kwa maana ulipaswa kutimizwa kwa damu na kwa hiyo lazima uwe utakaso wa dhambi.

Lakini inawezekanaje kuwe na dhambi ikihusianishwa na patakatifu, ama pa mbinguni au pa duniani?

Kama vile ambavyo dhambi za watu zilihamishwa zamani, kwa mfano, hadi patakatifu pa duniani kwa damu ya dhabihu ya dhambi, ndivyo dhambi zetu, kwa kweli, zinavyohamishiwa kwenye patakatifu pa mbinguni kwa damu ya Yesu Kristo. Na kama vile utakaso wa kawaida wa kidunia ulivyokamilishwa kwa kuondolewa kwa dhambi ambazo kwazo palikuwa pametiwa unajisi, ndivyo utakaso halisi wa patakatifu pa mbinguni utatimizwa kwa kuondolewa, au kufutwa, kwa dhambi ambazo zimerekodiwa humo. Hili linafanya uchunguzi wa vitabu vya kumbukumbu mbinguni kuwa muhimu sana ili kubaini ni **nani**, kwa njia ya toba ya dhambi na imani katika Kristo, wanastahili kupata faida za upatanisho Wake.

Kisha (katika siku ile kuu ya tuzo ya mwisho) kwa nguvu ya damu ya upatanisho ya Yesu Kristo, dhambi za wote wanaotubu kwelikweli zitafutwa kutoka katika vitabu vya mbinguni.

Yeye (Kristo) anawaombea watu Wake si tu msamaha na kuhesabiwa haki, ya kutosha na kamilifu, lakini kushiriki sehemu katika utukufu Wake na kuketi juu ya kiti Chake cha enzi.

## Kristo Mbele ya Mzee wa Siku

*Nikaona katika njozi za usiku, na tazama, mmoja aliye mfano wa mwadamu akaja pamoja na mawingu ya mbinguni akamkaribia huyo mzee wa siku, wakamleta karibu naye. —Danieli 7:13.*

Baada ya kupaa Kwake mbinguni, Mwokozi wetu Balianza kazi Yake kama Kuhani wetu Mkuu. Paulo anasema, "Kristo hakuingia katika patakatifu palipofanyika kwa mikono, ndio mfano wa patakatifu halisi; bali aliingia mbinguni hasa, aonekane sasa usoni pa Mungu kwa ajili yetu" (*Waibrania* 9:24)...Kwa karne kumi na nane kazi ya huduma hii iliendelea katika chumba cha kwanza cha patakatifu. Damu ya Yesu, iliyosihi kwa niaba ya waumini waliotubu, ilijitwalia msamaha na kukubaliwa na Baba, lakini bado dhambi zao zilibaki kwenye vitabu vya kumbukumbu. Kama vile katika huduma ya mfano kulivyokuwa na kazi ya upatanisho mwishoni mwa mwaka, vivyo hivyo kabla ya kazi ya Yesu ya ukombozi wa wanadamu kukamilika, kuna kazi ya upatanisho kwa ajili ya kuondolewa kwa dhambi kutoka patakatifu. Hii ni kazi ambayo ilianza pale siku 2300 zilipoisha. Wakati huo ... Kuhani wetu Mkuu aliingia patakatifu pa patakatifu, ili kutekeleza sehemu ya mwisho ya kazi Yake muhimu sana — ya kulitakasa hekalu...Ujio wa Kristo kama Kuhani wetu Mkuu ndani ya patakatifu pa patakatifu, kwa ajili ya utakaso wa patakatifu, ulielezwa katika *Danieli* 8:14; ujio wa Mwana wa Adamu kwa Mzee wa siku, kama ilivyowakilishwa katika *Danieli* 7:13; na ujio wa Bwana Hekaluni Mwake, uliotabiriwa na Malaki, ni maelezo ya tukio moja; na hili pia linawakilishwa na ujio wa bwana harusi harusini, ulioelezewa na Yesu katika mfano wa wanawali kumi wa *Mathayo* 25.

Utakasaji wa patakatifu ... unahusisha kazi ya upelegezi — kazi ya hukumu. Kazi hii lazima ifanywe kabla ya kuja kwa Kristo kuwakomboa watu Wake; kwa maana ajapo ujira Wake utakuwa pamoja Naye ili kumlipa kila mtu kwa kadiri ya matendo yake.

Katika siku ya kutoa hesabu ya mwisho, nafasi, cheo au utajiri havitabadilisha hata kidogo sana hatima ya mtu yeoyote. Wanadamu watahukumiwa na Mungu ajuaye mambo yote kwa jinsi walivyo katika usafi, katika uadilifu na katika upendo kwa Kristo.

## Ishara ya Kuanza

*Akamwambia, Hata nyakati za jioni na asubuhi elfu mbili na mia tatu; ndipo patakatifu patakapotakaswa.—Danieli 8:14.*

T'unalazimika kuwa wanafunzi wenye bidii wa unabii; Thatupaswi kupumzika mpaka tuwe na uelewa mzuri kuhusiana na somo la patakatifu, ambalo limeelezwa katika njozi ya Danieli na Yohana. Somo hili limetoa nuru kubwa katika nafasi na kazi yetu ya sasa, na linatupa uthibitisho usio na shaka kwamba Mungu ametuongoza katika uzoefu wetu uliopita. Linaelezea kukatishwa kwetu tamaa mnamo mwaka 1844, likituonesha kwamba patakatifu palipopaswa kutakaswa hapakuwa dunia, kama tulivyodhani, bali kwamba ndipo Yesu alipoingia chumba cha patakatifu pa patakatifu pa patakatifu pa mbinguni, na yupo pale akifanya kazi ya mwisho ya ofisi Yake ya kikuhanani, katika utimilifu wa maneno ya malaika kwa nabii Danieli.

Siku 2300 zimeonekana kuanza wakati amri ya Artashasta kwa ajili ya kurejeshwa na kujengwa kwa Yerusalem ilipoanza kufanya kazi, mnamo majira ya vuli 457 K. K. Kwa kuichukua hii kuwa sehemu ya kuanzia, ndipo kukawa na uwiano katika uhalisia wa matukio yote yaliyotabiriwa katika maelezo ya kipindi hicho katika *Danieli 9:25 – 27...* Majuma sabini, au miaka 490, yalipaswa kuhusiana sana na Wayahudi. Katika kufikia mwisho wa kipindi hiki, taifa liliweka sahihi kumkataa kwake Kristo kwa mateso ya wanafunzi Wake, na mitume waliwageukia Mataifa, mnamo mwaka 34 B. K. Baada ya miaka ya kwanza 490 ya miaka 2300 kuisha, ingebaki miaka 1810. Kutoka mwaka 34 B.K., 1810 iliendelea hadi mwaka 1844; "Ndipo," alisema malaika, "patakatifu patakapotakaswa."

Imani yetu kuhusiana na ujumbe wa malaika wa kwanza, wa pili na wa tatu ulikuwa sahihi. Alama kuu tulizozipita njiani hazibadilika. Ingawa majeshi ya kuzimu yanaweza kujaribu kuzirarua kutoka kwenye msingi wake, na kushangilia katika mawazo kwamba yamefaulu, lakini bado hayawezi kushinda. Nguzo hizi za ukweli zimesimama kidete kama vilima vya milele, pasi kutikiswa na juhudi zote za wanadamu pamoja na zile za Shetani na jeshi lake. Tunaweza kujifunza mengi na tunapaswa kuyachunguza Maandiko daima ili kuona kama mambo haya ndivyo yalivyo.

## Macho Yetu Yamtazama Kristo

*Ee Mungu wetu, je! Hutawahukumu? Maana sisi hatuna uwezo juu ya jamii kubwa hii, wanaotujia juu yetu; wala hatujui tufanyeje; lakini macho yetu yatazama kwako. — 2 Nya. 20:12.*

**N**ikatazama,” anasema nabii Danieli, “hata viti vya enzi vikawekwa, na mmoja aliye mzee wa siku ameketi... Maelfu elfu wakamtumikia, na elfu kumi mara elfu kumi wakasimama mbele zake; hukumu ikawekwa na vitabu vikaf-unuliwa” (*Danieli 7:9, 10*).

Hivyo ndivyo ilivyooneshwa kwenye njozi ya nabii ile siku kuu na adhimu wakati tabia na maisha ya wanadamu vitakapopitiwa upya mbele ya Hakimu wa dunia yote na kila mtu anapaswa kulipwa “kwa kadiri ya matendo yake.” Mzee wa siku ni Mungu Baba... Ni Yeye, chanzo cha viumbe vyote, na kijito cha sheria yote, ndiye atakayeongoza katika hukumu. Na malaika watakatifu kama wahudumu na mashuhuda, kwa idadi ya “elfu kumi mara elfu kumi, na maelfu ya maelfu” (*Ufunuo 5:11*), watahudhuria mahakama hii kuu.

Nikaona katika njozi ya usiku, na tazama, mmoja aliye mfano wa mwanadamu akaja pamoja na mawingu ya mbingu akamkaribia huyo mzee wa siku, wakamleta karibu naye.” *Danieli 7:13....* Ujio wa Yesu Kristo unaoelezwa hapa sio ujio Wake wa mara ya pili duniani. Anakuja kwa mzee wa siku huko mbinguni ili kupokea mamlaka, na utukufu, na ufalme, ambao atapewa wakati wa kumaliza kazi Yake kama mpatisihi. Ni ujio huu na sio ujio Wake wa mara ya pili duniani, ambao ultabiriwa kutokea mwishoni mwa siku 2300 mnomo mwaka 1844. Akizungukwa na malaika wa mbinguni, Kuhani wetu Mkuu anaingia patakatifu pa patakatifu, na hapo anaonekana katika uwepo wa Mungu ... ili kuifanya kazi ya hukumu ya upeletelezi, na kufanya upatanisho kwa wale wote ambao wanaoneshwa kustahili fadhila zake.

Watu wa Mungu sasa wanalazimika kukaza macho yao kuelekea patakatifu pa mbinguni, ambapo ... Kuhani wetu Mkuu ... anawatetea watu Wake.

Punde tutapimwa kwenye mizani ya patakatifu na juu ya majina yetu itaandikwa hukumu iliyotekelizwa.

## Kuhukumiwa Kulingana na Kumbukumbu

*Kwa maana Mungu ataleta hukumuni kila kazi, pamoja na kila neno la siri, likiwa jema au likiwa baya.—Mhubiri 12:14.*

**K**atika siku kuu ya mwisho ya upatanisho na hukumu ya upelelezi, kesi pekee zinazozingatiwa ni zile za wale wanaodai kuwa watu wa Mungu. Hukumu ya wenye dhambi ni kazi tofauti na ya peke yake, na hufanyika katika kipindi cha baadaye... Vitabu vya kumbukumbu mbinguni, ambavyo ndani yake majina na matendo ya watu yamenakiliwa, vitaamua maamuzi ya hukumu hiyo... Kitabu cha uzima kina majina ya wote ambao wamewahi kuingia katika utumishi wa Mungu. Yesu aliwaambia wanafunzi Wake, "Furahini, kwa sababu majina yenu yameandikwa mbinguni" (*Luka 10:20*). Paulo anazungumza juu ya watenda kazi wenzake waaminifu, "ambao majina yao yamo katika kitabu cha uzima" (*Wafilipi 4:3*)... "Kitabu cha ukumbusho" kimeandikwa mbele za Mungu, ambamo kumeandikwa kumbukumbu za matendo mema ya "wale waliomcha Bwana, na kulitafakari jina Lake" (*Malaki 3:16*). Maneno yao ya imani, matendo yao ya upendo, yamesajiliwa mbinguni... Kuna kumbukumbu pia ya dhambi za wanadamu... Makusudio na madhumuni ya siri huonekana kwenye kumbukumbu isiyo na makosa.

Kazi ya kila mwanadamu hupitiwa upya mbele za Mungu... Mkabala na kila jina katika vitabu vya mbinguni kumeingizwa, kwa usahihi wa kutisha, kila neno baya, kila tendo la ubinafsi, kila jukumu lisilotimizwa na kila dhambi ya siri, kwa kila udanganyifu wa hila. Maonyo au makaripio yanayotumwa na mbingu yaliyopuuzwa, wakati uliopotezwa, fursa ambazo hazijatumwa, mvuto unaotolewa kwa wema au kwa uovu, pamoja na matokeo yake makubwa, yote yameandikwa na malaika aliyerekodi.

Ikiwa jina lako limesajiliwa katika kitabu cha uzima cha Mwana-Kondoo, basi, yote yatakuwa heri kwako. Iweni tayari na shauku ya kuungama makosa yenu na kuyaacha, ili makosa na dhambi zenu zipate kwenda kabla ya wakati kwenye hukumu na kufutwa.

## Kila Mtu Hupitiwa Upya

*Wewekijana, uufurahie ujana wako, na moyowako ukuchangamshe siku za ujana wako, ukaziendee njia za moyo wako, na katika maono ya macho yako, lakini ujue wewe ya kwamba kwa ajili ya hayo yote Mungu atakuleta hukumuni. —Mhubiri 11:9.*

**K**atika muda ulioamriwa kwa ajili ya hukumu—Kmwishoni mwa siku 2300, mnamo 1844—kulianza kazi ya upelelezi na uondoaji wa dhambi. Wote ambao wamewahi kujidai wenyewe kuwa Wake Kristo lazima wapitie uchunguzi wake wa makini. Wote walio hai na waliokufa watahukumiwa “katika mambo hayo yaliyoandikwa katika vile vitabu, sawa sawa na matendo yao” (*Ufunuo 20:12*).

Alisema Hakimu: “Wote watahesabiwa haki kwa imani ya Yesu na kuhukumiwa kwa matendo yao.”

Dhambi ambazo hazijaungamwa na kutelekezwa hazitasamehewa na kufutiliwa mbali kwenye vitabu vya kumbukumbu, bali zatabaki ili kuwa ushuhuda dhidi ya mwenye dhambi katika siku ya Mungu...Kuna vita kali mbele yao wote ambao wangeishinda mielekeo miovu ambayo inajitahidi kuwatawala. Kazi ya maandalizi ni kazi ya mtu binafsi. Hatuokolewi kwa makundi. Usafi na kujitoa kwa mtu mmoja hakutaondoa matakwa ya sifa hizi kwa mwingine. Ingawaje mataifa yote yatapitishwa katika hukumu mbele za Mungu, bado atapima kesi ya kila mtu binafsi kwa uchunguzi wa kina kana kwamba hakuna kiumbe mwingine duniani. Kila mmoja lazima ajaribiwe, na kupatikana bila doa wala kunyanzi au kitu chochote kama hicho.

Kwa sasa hukumu inaendelea kutekelezwa katika patakatifu pa mbinguni. Kazi hii imekuwa ikiendelea kwa miaka mingi. Punde—hakuna ajuaye ni lini—itaingia katika kesi za wale walio hai. Maisha yetu yanapaswa kuchunguzwa katika uwepo wa Mungu wa kutisha. Katika wakati huu zaidi ya mambo yote inailazimu kila nafsi kuyatii maonyo ya Mwokozi, “Kesheni na ombeni: kwa kuwa hamjui wakati ule utakapokuwapo” (*Marko 13:33*). “Walakini usipokesha, nitakuja kama mwivi, wala hutaijua saa nitakayokuja kwako” (*Ufunuo 3:3*).

## Kuondolewa kwa Dhambi

*Yeye ashindaye atavikwa hivyo mavazi meupe, wala sitalifuta kamwe jina lake katika kitabu cha uzima, nami nitalikiri jina lake mbele za Baba yangu, na mbele ya malaika zake. — Ufunuo 3:5.*

**M**aisha ya wote ambao wamemwamini Yesu yanachunguzwa upya mbele za Mungu pale vitabu vya kumbukumbu vinapofunguliwa katika hukumu. Wakili wetu anawasilisha kesi za kila kizazi kinachofuatia akianza na wale waliowahi kuishi duniani na kumalizia na walio hai sasa. Kila jina linatajwa na kila kesi inachunguzwa kwa undani. Majina mengine yanakubaliwa na mengine yanakataliwa. Mtu anapokuwa na dhambi zilizobaki kwenye vitabu vya kumbukumbu, zisizotubiwa na kusamehewa, majina yao yataondolewa kwenye kitabu cha uzima, na kumbukumbu ya matendo yao mema yatafutwa kutoka katika kitabu cha Mungu cha ukumbusho... Wote ambao kwa kweli wametubu dhambi, na kwa imani kuidai damu ya Yesu kuwa dhabihu yao ya upatanisho, wamepata msamaha ulioandikwa mbele ya majina yao katika vitabu vya mbinguni; kwa vile wamekuwa washiriki wa haki ya Kristo, na tabia zao zinaonekana kuwa zinapatana na sheria ya Mungu, dhambi zao zitafutwa, na wao wenyewe watahesabiwa kuwa wanastahili uzima wa milele... Mungu mwombezi anawasilisha ombi kwamba wale wote ambao wameshinda kwa njia ya imani katika damu Yake wasamehewe makosa yao, kwamba warudishwe kwenye makao yao ya Edeni na kutawazwa kama warithi pamoja na Yeye Mwenyewe kwenye "mamlaka ya kwanza." ...

Wakati Yesu anaomba kwa ajili ya raia wa neema Yake, shetani anawashitaki mbele za Mungu kuwa wakosaji... Sio kwamba Yesu hazoni dhambi zao, bali anaonesha toba yao na imani, na anadai msamaha kwa ajili yao, anainua mikono Yake ilijojeruhiwa mbele za Baba na malaika watakatifu, akisema, "Ninawafahamu kwa majina." Majina yao yanabaki yakiwa yameandikwa katika kitabu cha uzima na kuhusiana nao imeandikwa, "Watakwenda pamoja nami hali wamevaa mavazi meupe, kwa kuwa wamestahili" (Ufunuo 3:4).

Wakristo wanaweza kukuza imani kila siku kwa kumtafakari Yeye ambaye amechukua kesi zao, Kuhani wao "mkuu mwenye rehema na mwaminifu."

## Hukumu ya Awali

*Dhambi za watu wengine zi dhahiri, zatangulia kwenda hukumuni; wengine dhambi zao zawafuata. – 1 Timotheo 5:24.*

**K**azi ya hukumu ya upelelezi na kuondolewa kwa dhambi inapaswa kukamilishwa kabla ya ujio wa Bwana mara ya pili. Kwa kuwa wafu watahukumiwa kutokana na mambo yaliyoandikwa katika vitabu hivyo, haiwezekani kwamba dhambi za wanadamu zisubiri mpaka baada ya hukumu ndipo ziondolewe ambapo kesi zao zitachunguzwa... Wakati hukumu ya upelelezi itakapomalizika, Yesu atarudi tena na ujira Wake utakuwa pamoja Naye ili kumlipa kila mtu kama kazi yake ilivyo.

Wote watahukumiwa kulingana na mambo yale yaliyoandikwa katika vitabu na watapewa tuzo kama kazi zao zilivyokuwa. Hukumu hii haifanyika wakati wa kufa.

Katika huduma ya mfano kuhani mkuu, akiwa amefanya upatanisho kwa ajili ya Israeli, alitoka na kisha kulibariki kusanyiko. Kadhalika Kristo, katika kufunga kazi Yake ya uombezi, atatokea, "pasipo dhambi kwa wokovu" ili kuwabariki watu Wake waliokuwa wakimsubiri kwa uzima wa milele. Kama vile ambavyo kuhani, katika kuondoa dhambi kutoka kwenye hema takatifu, aliziungama juu ya kichwa cha mbuzi wa Azazeli, vivyo hivyo Kristo ataziweka dhambi hizi zote juu ya Shetani, aliye mwanzilishi na mchochezi wa dhambi. Mbuzi wa Azazeli, akiwa amebeba dhambi za wana wa Israeli, alipelekwa "mpaka nchi isiyo na watu;" kadhalika Shetani akichukua hatia za dhambi zote ambazo aliwasababisha watu wa Mungu kuzitenda, atakuwa akifungwa kwa miaka elfu moja, ambapo atakuwa mkiwa, bila wakazi na hatimaye atapata adhabu kamili ya dhambi katika moto ambao utawaangamiza waovu wote.

Wachache, naam, wachache tu kati ya idadi kubwa ya watu wa dunia wataokolewa hata uzima wa milele, wakati ambapo umati wa watu ambao hawajakamilisha nafsi zao katika kuutii ukweli watawekwa kwenye mauti ya pili.

Wakati dhambi za waumini waliotubu zinaondolewa kutoka patakatifu, kunapaswa kuwa na kazi maalum ya utakasaji wa kuondoa dhambi, mionganoni mwa watu wa Mungu duniani.

## Muda Unakwisha!

*Mkiukomboa wakati kwa maana zama hizi ni za uovu. — Waefeso 5:16.*

Roho wa Bwana alitulia juu yangu, asubuhi ya Oktoba 23, 1879, yapata saa nane kamili, kisha nikaona matukio katika hukumu inayokuja... Siku kuu ya utekelezaji wa hukumu ya Mungu ilionekana kuwa imekuja. Elfu kumi mara elfu kumi walionekana kukusanyika mbele ya kiti cha enzi kikubwa, ambapo juu yake alikuwa ameketi Aliye na mwonekano wa utukufu. Vitabu kadhaa vilikuwa mbele Yake na juu ya vifuniko vya kila kimoja kulikuwa kumeandikwa kwa herufi za dhahabu, ambazo zilionekana kama mwali wa moto uwakao: "Kitabu cha Mbinguni." Moja ya vitabu hivi, kilikuwa na majina ya wale wanaodai kuuamini ukweli, kilikuwa kimefunguliwa... Wakati watu hawa walipotajwa mmoja mmoja na matendo yao mema kutajwa, nyuso zao ziling'aa kwa furaha takatifu... Kitabu kingine kilikuwa kimefunguliwa, ambacho ndani yake kulikuwa kumenakiliwa dhambi za wale wanaoukiri ukweli. Chini ya kichwa kikuu cha ubinasi kukifuatiwa na kila dhambi nyingine... Kadiri Yeye Aliye Mtakatifu juu ya kiti cha enzi alivyofunua taratibu kurasa za kitabu hicho na macho Yake kutulia kwa muda juu ya watu binasi, mtupo Wake wa jicho ulionekana kuchoma ndani ya nafsi zao na wakati uo huo kila neno na tendo la maisha yao lilipita akilini mwao kwa uwazi kana kwamba yaliandikwa kabla ya maono yao kwa herufi za moto... Daraja moja la watu waliandikishwa kama wapinzani wa duniani.... Kundi hili walikuwa wameitukuza sana nafsi, wakifanya kazi tu kwa matamanio ya ubinasi... Kisha swali likaulizwa: "Kwa nini hamkufua mavazi ya tabia na kuyafanya kuwa meupe katika damu ya Mwana — Kondoo? ... Hamkutaka kuwa washirika wa mateso Yake, na hamwezi sasa kuwa washirika pamoja Naye wa utukufu Wake." ... Kisha kitabu kikafungwa, na kifuniko kikaanguka kutoka kwa ile Nafsi Yake aliyeketi kwenye kiti cha enzi, kikiacha wazi utukufu wa kutisha wa Mwana wa Mungu.

Kisha tukio hili likatoweka, na nikajikuta bado nipo duniani, nikishukuru mno kwamba siku ya Mungu ilikuwa bado haijafika na wakati huo wa rehema wenye thamani bado tumepewa sisi kujiandaa kwa ajili ya umilele.

## Mlango wa Rehema Unapofungwa

*Mwenye kudhulumu na azidi kudhulumu; na mwenye uchafu na azidi kuwa mchafu; na mwenye haki na azidi kufanya haki; na mtakatifu na azidi kutakaswa. – Ufunuo 22:11.*

**M**ungu hajatufunulia wakati ambapo ujumbe huu [wa malaika Yule wa tatu] utafungwa, au wakati mlango wa rehema utakapofungwa... Barua zimetumwa kwangu zikiuliza kama ninayo nuru maalum kuhusu wakati wa rehema utakapofungwa; na ninajibu kwamba ninao ujumbe huu tu wakubeba, kwamba wakati wa kufanya kazi ni sasa kungalipo mchana, kwa maana usiku unakuja ambapo hakuna mtu atakayeweza kufanya kazi.

Wakati Bwana Yesu atakaposimama katika patakatifu pa patakatifu, na kuyavua mavazi Yake ya upatanisho, na kujivika kwa mavazi ya kulipa kisasi badala ya mavazi ya kikuhanini, kazi kwa ajili ya wenyе dhambi itakuwa imekwishwa... Muda wa rehema kwa wote unafungwa wakati maombezi kwa ajili ya wenyе dhambi yanapokoma na mavazi kwa ajili ya kulipa kisasi kuvaliwa.

Kesi ya kila nafsi itakuwa imekwishaamuliwa na hakutakuwa na damu ya upatanisho ili kutakasa kutoka dhambini... Kisha Roho wa Mungu azuiaye ataondolewa kutoka duniani.

Katika saa hii ya kutisha wenyе haki wataishi pasipokuwa na mwombezi mbele ya Mungu mtakatifu. Kizuizi kilichokuwa kimewekwa juu ya waovu kinaondolewa, ndipo hatimaye Shetani anakuwa na udhibiti kamili wa wale wasiotubu... Kisha Shetani atawasukasuka wakazi wa dunia katika dhiki kuu na ya mwisho. Malaika wa Mungu wanapokoma kuzizua pepo kali za huruma ya binadamu, vipengele vyote vya vurugu vitaachiliwa. Ulimwengu wote utahusika katika uharibifu wa kutisha zaidi kuliko ule ulioijia Yerusalemu ya zamani.

Hatuna muda wa kupoteza. Bwana wetu Yesu anakuja na hatujui ni muda mfupi kiasi gani mlango wetu wa rehema utafungwa.

Kukoma kwa wakati wa rehema, kutakuwa ghafla, pasipokutegemewa—katika saa ambayo hatuitegemei. Lakini tunaweza kuwa na kumbukumbu safi mbinguni leo, na kujua kuwa Mungu anatukubali; na hatimaye, tukiwa waaminifu, tutakusanywa katika ufalme wa mbinguni.

## Watakatifu Watauhukumu Ulimwengu

*Basi ninyi msihukumu neno kabla ya wakati wake, hata ajapo Bwana; ambaye atayamulikisha yaliyositirika ya giza, na kuyadhihirisha mashauri ya mioyo; ndipo kila mtu atakapoipata sifa yake kwa Mungu. —1 Wakorintho 4:5.*

**W**akati wa miaka elfu moja katikati ya ufufuo wa kwanza na wa pili, hukumu ya waovu itafanyika. Mtume Paulo anaitaja hukumu hii kama tukio ambalo linafuatia Ujio wa Pili wa Yesu. "Basi ninyi msihukumu neno kabla ya wakati wake, hata ajapo Bwana..." Danieli anaeleza kwamba wakati Mzee wa siku alipokuja, "nao watakatifu wake Aliye juu wakapewa hukumu" (Danieli 7:22).

Wakati huu wenye haki wanatawala kama wafalme na makuhanini kwa Mungu. Yohana katika Ufunuo amasema, "Kisha nikaona viti vya enzi, wakaketi juu yake, nao wakapewa hukumu" (Ufunuo 20:4)... Ni wakati huu kwamba, kama ilivyoelezwa na Paulo, "watakatifu watauhukumu ulimwengu" (1 Wakorintho 6:2, 3). Wakiwa wameungana na Yesu wanawahukumu waovu, wakilinganisha matendo yao na kitabu cha sheria, Biblia na kuamua kila kesi kulingana na matendo yaliyofanywa katika mwili. Kisha kikombe ambacho waovu wanapaswa kukinywea wanapewa na kisha inanakiliwa mbele ya majina yao katika kitabu cha mauti.

Hatutasikia shitaka dhidi yetu katika uwanja wa kuzuka kwa dhambi tulizozifanya, lakini tutashitakiwa tu kwa kuzembea kutimiza kazi nzuri na adhimu tulizoamriwa na Mungu wa upendo. Mapungufu ya tabia zetu yatafunuliwa. Ndipo itakapo julikana kwamba wale wote waliohukumiwa walikuwa na nuru na maarifa, walikabidhiwa mali za Bwana wao na wakaonekana kutokuwa waaminifu kwa amana yao.

Bwana Yesu pamoja na watu Wake watauhukumu Shetani pamoja na malaika waovu pia. Paulo anasema, "Hamjui ya kuwa mtawahukumu malaika?" (1 Wakorintho 6:3).

Wakati Hakimu wa ulimwengu wote atakapomhoji shetani, "Kwa nini uliniasi, na kuniibia raia wa ufalme Wangu?" mwasisi wa uovu hatakuwa na kisingizio. Kila mdomo utafungwa na majeshi yote ya uasi yatanyamaza kimya.

## Hila za Shetani

*Mwe na kiasi na kukesha; kwa kuwa mshitaki wenu Ibilisi, kama simba angurumaye, huzunguka-zunguka, akitafuta mtu ammeze. – 1 Petro 5:8.*

**S**io salama kuziamini hisia au fikra; haziwezi kutumai-niwa kutuongoza. Sheria ya Mungu ndiyo kipimo pekee cha utakatifu. Ni kwa sheria hii kwamba tabia inapaswa kuhakikiwa. Ikiwa watafutaji wa wokovu wangeuliza, "Nifanye nini ili niurithi uzima wa milele?" waalimu wa utakaso leo wangejibu, "Amini tu kwamba Yesu anakuokoa." Lakini Yesu alipouлизwa swali hili alijibu, "Imeandikwa nini kwenye torati? Wasomaje?" Na mwuliza swali alipojibu, "Mpende Bwana Mungu wako kwa moyo wako wote, na jirani yako kama nafsi yako," Yesu alisema, "Umezibu vyema; fanya hivi nawe utaishi" (Luka 10:26 – 28).

Hakuna thamani iliyopo katika kukiri tu kumwamini Yesu; ni upendo tu unaooneshwa kwa matendo pekee ndio unaohesabiwa kuwa wa kweli. Na bado ni upendo peke yake ambao mbele za Mungu hulifanya tendo lolote kuwa la thamani... Ubinafsi wa wanadamu uliofichika unaonekana kufunuliwa katika vitabu vya mbinguni... Kumbukumbu ambazo malaika wanazipeleka mbinguni ni za kuhuzunisha. Watu wenye akili, wanaodai kuwa wafuasi wa Kristo, wamemezwa katika kuji-patia mali za ulimwengu au kufurahia anasa za dunia. Pesa, muda na nguvu vinatolewa mhanga kwa ajili ya maonesho na kujifurahisha nafsi; lakini ni wakati mdogo sana unaotolewa kwa ajili ya maombi, kuyachunguza Maandiko, kuinyenyekenza nafsi na kuungama dhambi.

Shetani anabuni mbinu zisizohesabika ili kuzishughulisha akili zetu, kiasi kwamba haziwezi kudumu katika kufanya kazi ambayo kwayo tunapaswa kujishughulisha nayo. Mdanganyifu mkuu anauchukia ukweli mkuu unaofunua dhabihu ya upatanisho na Mpatanishi mwenye uweza wote. Anajua kwamba, kwake yeye kila kitu kinategemea uhamishaji wake wa akili kutoka kwa Yesu na Ukweli Wake.

Wale ambao wangependa kushiriki na wengine faida za upatanisho wa Mwokozi hawapaswi kuruhusu chochote kuingilia kati wajibu wao wa kufikia utakatifu mkamilifu katika hofu ya Mungu.

## Kuthibitishwa katika Ukweli wa Leo

*Kwa hiyo nitakuwa tayari kuwakumbusha hayo siku zote, ija-pokuwa mnayajua na kuthibitishwa katika kweli mliyo nayo. —2 Petro 1:12.*

Pasipo na shaka tunaamini kwamba Yesu anakuja hivi karibuni. Hii sio hadithi ya kubuni kwetu; ni ukweli mtupu. Hatuna mashaka, wala hatujawa na mashaka kwa miliaka mingi kwamba mafundisho tunayoyashikilia leo ni ukweli wa leo, na kwamba tunaikaribia hukumu. Tunajiandaa kutana na Yeye ambaye, akiwa anasindikizwa na msafara wa malaika watakatifu, atatokea katika mawingu ya mbinguni ili kuwapatia waaminifu na wenye haki mguso wa mwisho wa kutokufa. Atakapokuja hatatutakasa dhambi zetu, ili kutuondolea uharibifu wa tabia zetu au kutuponya udhaifu wa hasira na tabia zetu. Kama ingefanywa kwa bidii, kazi hii ingekuwa imekwisha kabla ya wakati huo.

Bwana Yesu atakapokuja, wale ambao ni watakatifu watadumu kuwa watakatifu. Wale ambao wametunza miili na roho zao katika utakatifu, katika utakaso na heshima, basi wataapokea mguso wa mwisho wa kutokufa. Lakini wale wasio haki, wasiotakaswa, na wachafu watabaki kuwa hivyo milele. Hakuna kazi itakayofanywa kwa ajili yao ili kuondoa madhai-fu yao na kuwapatia tabia takatifu. Mtakasaji hakai tena kuen-deleza mchakato Wake wa utakasaji na kuondoa dhambi zao na uharibifu wao... Kazi hiyo inapaswa kukamilishwa kwetu sasa hivi.

Mungu anawajaribu na kuwathibitisha watu Wake sasa. Tabia inakuzwa sasa. Malaika wanapima thamani ya maadili, na kuweka kumbukumbu ya uaminifu wa matendo yote ya wana wa wanadamu... Huyo Mungu ambaye anasoma moyo wa kila mtu, atadhihirisha mambo ya giza yaliyofichika mahali ambapo hayawezi kushukiwa, ili vikwazo ambavyo vimezuia maendeleo ya ukweli viweze kuondolewa.

Hakutakuwa na muda wa rehema tena wa kuijandaa kwa ajili ya umilele. Ni katika maisha haya ndipo tunapaswa kuvaa vazi la haki ya Kristo. Hii ndiyo fursa yetu pekee kuunda tabia kwa ajili ya makao ambayo Kristo amekwisha kuwaandalia wale ambao wanatii amri Zake.

### Yesu Mfano Wetu Mkamilifu

*Yeye asemaye ya kuwa anakaa ndani Yake, imempasa kuenenda mwenyewe vile vile kama Yeye alivyoenenda. – 1 Yohana 2:6.*

**M**bele yetu tunacho kielelezo cha juu na kitakatifu mkabisa. Yesu hakutenda dhambi katika fikra, maneno na hata kwa matendo. Ukamilifu ulionekana kwa kila alilolitenda. Anatuelekea katika njia aliyoienda, akisema, "Mtu ye yote akitaka kunifuata, na ajikane mwenyewe, ajitwike msalaba wake, anifuate" (*Mathayo 16:24*).

Kristo katika nafsi Yake anajumuisha utimilifu na ukamilifu wa Uungu na utimilifu na ukamilifu wa ubinadamu usiokuwa na dhambi. Alikabiliana na majaribu yote ambayo kwayo Adamu alishambuliwa na aliyashinda haya majaribu kwa sababu katika ubinadamu Wake Alitegemea uweza wa Mungu. Somo hili linahitaji kuzingatiwa zaidi kuliko linavyochukuliwa. Wakristo wanajishusha sana. Wanaridhishwa na uzoefu wa kiroho wa juu juu, na kwa sababu hiyo wana nuru hafifu tu, wakati wanaweza kutambua kwa uwazi zaidi ukamilifu wa ajabu wa ubinadamu wa Yesu, ambao unainuka zaidi ya ukuu wote wa mwanadamu, nguvu zote za kibinadamu. Maisha ya Yesu ni ufunuo wa kile ambacho wanadamu walioanguka wanaweza kuwa kwa njia ya muungano na ushirika na asili ya Mungu... Wanaume na wanawake huunda visingizio vingi kwa mwelekeo wao wa kutenda dhambi. Dhambi inawakilishwa kama hitaji, uovu ambao hauwezi kushindwa. Lakini dhambi sio hitaji. Yesu aliishi katika ulimwengu huu tangu utoto hadi utu uzima, na wakati huo alikabiliana na kushinda majaribu yote ambayo kwayo mwanadamu alishindwa. Yeye ni kielelezo kamili cha utoto, cha ujana na utu uzima.

Maisha ya Yesu yameonesha kile jamii ya wanadamu inachoweza kufanya kwa njia ya kuwa washirika wa asili ya Uungu. Yote ambayo Yesu alipokea kutoka kwa Mungu sisi pia tunaweza kuwa nayo. Basi omba na upokee... Hebu maisha yako na yafumwe kwa nyuzi zisizoonekana kwenye maisha ya Yesu.

## Dini kuwa ya Juu Kabisa

*Akamwambia, Mpende Bwana Mungu wako kwa moyo wako wote, na kwa roho yako yote, na kwa akili zako zote. Hii ndiyo amri iliyo kuu na ya kwanzá.—Mathayo 22:37, 38.*

**V**ijana wanatakiwa kujua kwamba wanahitaji uzoefu wa kina katika mambo ya Mungu. Kazi ya juu juu tu haitakuwa na faida kwao. Mnahitaji kuihifadhi nuru ya Neno la Mungu miyoni mwenu, ili mpate kulichunguza kama kwa nuru iliyo angavu.

Wengi wanakiri kuwa katika upande wa Bwana, lakini hawako; uzito wa matendo yao yote uko upande wa Shetani. Ni kwa njia zippi tunaweza kutambua kuwa ni tuko upande gani? Ni nani anayeujaza moyo? Fikra zetu zimejazwa na nani? Tunapenda kuzungumza juu ya nani? Ni nani ambaye tunampenda kwa moyo wetu na kwa nguvu zetu zote? Ikiwa basi tuko upande wa Bwana, mawazo yetu yatakuwa na Yeye, na mawazo yetu mazuri kabisa yatakuwa Yake. Hatuna urafiki na ulimwengu; tumevisalimisha vyote tulivyonayo na vile tulivyo Kwake. Tunatamani kubeba sura Yake, kupumua pumzi Yake, kufanya mapenzi Yake na kumpendeza katika mambo yote.

Dini ya Biblia sio mojawapo mionganini mwa mvuto mingi, bali mvuto wake ni wa juu kabisa, unaopenya na kutawala kila mvuto mwingine. Dini ya Biblia inapaswa kutawala maisha na mwenendo wetu. Haipaswi kuwa kama dashi ya rangi, iliyopakwa hapa na pale juu ya turubai, lakini mvuto wake unapaswa kumenya katika maisha yote, kana kwamba turubai lilichovywa ndani ya rangi hadi kila uzi wa kitambaa ukazamishwa kabisa, na kukolea rangi isiyofifia.

Dini ya Kristo ni kitambaa thabiti, kinachoundwa na nyuzi zisizohesabika, zilizofumwa pamoja kwa busara na ustadi. Tunaweza kufuma kitambaa hiki kwa hekima ile tu anayotupatia Mungu. Tukijitegemea wenyewe, tunafuma ndani yake nyuzi za ubinafsi na kisha kielelezo kinaharibika.

Hebu kila mmoja na aulize kwa dhati, "Je! Mimi ni Mkristo wa kweli? Je! Ninabeba alama za kweli za Mkristo? Je! Ninafanya kila niwezalo ili kukamilisha tabia inayofanana na tabia ya Mungu iliyo kielelezo?"

Dini iliyo safi ni kufanana na Kristo.

## Kutengwa na Ulimwengu

*Mimi siombi kwamba uwatoe katika ulimwengu; bali uwalinde na yule mwovu. – Yohana 17:15.*

Wengi wanaodaiwa kuwa Wakristo wanawakilishwa vyema na mzabibu ambao unatambaa na kikonyo chake kusokota mizizi kwenye udongo na takataka ambazo ziko katika njia yake. Kwa hao wote ujumbe unakuja, "Tokeni kati yao, Mkatengwe nao, asema Bwana" (2 Wakorintho 6:17). Ukano wako lazima ukatwe mbali na kila kitu cha kidunia... Ni vigumu kwako kubaki kuwa safi ukiunganishwa na wale ambao ni wapotovu.

Laiti kama vijana wanetambua kwamba wanaweza kuwa kama mimea ya thamani kubwa katika bustani ya Mungu... Hebu vikonyo dhaifu vya upendo viunganishwe na Yesu, ili kupokea lishe Kwake na badala ya kutambaa juu ya nchi, vielekeze uelekeo wao kwenye Jua la Haki, ili vipate miale ya nuru ya Mungu. Siku kwa siku wakue hadi kufanana Naye, na kuwa washirika wa asili Yake ya utakatifu, ili kwamba hatimaye waweze kukutwa wakiwa wakamilifu katika paradiso ya Mungu...Kaza nafsi yako kwenye Mwamba wa milele; kwa kuwa ni katika Kristo pekee kuna usalama.

Muungano na Kristo kwa imani hai ni wa kudumu; kila muungano mwingine lazima uangamie... Lakini muungano huu unatugharimu kitu. Lazima kuwepo na kazi ya kuumiza ya kujinasua, kadhalika na kazi ya kufungamana. Kiburi, ubinafsi, majivuno, kupenda anasa za duniani – dhambi kwa jinsi zake zote – lazima ishindwe, ikiwa tunataka kuingia katika muungano na Kristo. Sababu inayowafanya wengi kuona maisha ya Kikristo kuwa magumu yasiyokubalika kabisa, kwa nini ni ya kubadilikabadilika sana, ya tofauti mno, ni kwamba, wanajaribu kufungamana na Yesu bila kujitenga na sanamu wanazozipenda sana.

Je, tutalikubali sharti lililowekwa katika Neno Lake – kutengwa mbali na ulimwengu? ... Kujiweka wakfu kwetu kwa Mungu sharti kuwe kanuni iliyo hai, iliyoungamanishwa na uzima, na kuongoza katika kujikana nafsi na kujitoa kafara. Lazima kuwe na msingi wa fikra zetu zote na kuwa chemchemi ya kila tendo. Hili litatuinua juu zaidi ya ulimwengu na kututenga mbali na mvuto wake uchafuao.

## Usalama katika Fikra Sahihi Pekee

*Linda moyo wako kuliko yote uyalindayo; Maana ndiko zitokako chemchemi za uzima. —Mithali 4:23.*

**M**aana mtu "aonavyo nafsi mwake, ndivyo alivyo" (Mithali 23:7). Mawazo mengi yanaunda historia isiyoandikwa ya siku moja; na mawazo haya yanahusiana sana na uundaji wa tabia. Mawazo yetu yanapaswa kulindwa mnno; kwa maana wazo moja chafu huichafua sana nafsi. Wazo ovu huacha mvuto mwovu kwenye akili zetu. Ikiwa mawazo yatakuwa safi na matakatifu, mtu anakuwa heri kwakuyatunza moyoni. Kwa hiyo mapigo ya kiroho yanaimarishwa, na nguvu ya kutenda mema huongezeka. Na kama ambavyo tone moja la mvua huandaa njia ya jingine katika kuilowesha dunia, ndivyo ambavyo wazo moja jema huandaa njia kwa ajili ya jingine kuiimarisha nafsi.

Tabia mbovu za mawazo, zinapokubaliwa, zinakuwa **nguvu dhalimu** ambazo huikaza akili kama kifungo cha chuma.

Mawazo hayapaswi kuruhusiwa kufanya kama yanavyotaka bila kudhibitiwa. Lazima yazuiliwe, yawekwe katika kifungo kwa utiifu wa Yesu. Hebu na yatunzwe katika mambo matakatifu. Ndiposa, kwa njia ya neema ya Yesu, yatakuwa safi na ya kweli. Tunahitaji ufahamu wa **kudumu wa nguvu iwezeshayo** ya mawazo safi. Usalama pekee **kwa nafsi yoyote ni fikra adilifu**.

Akili zetu huchukua kiwango cha mambo ambayo mawazo yetu huyazoelea, na ikiwa tunafikiri juu ya mambo ya duniani, tutashindwa kuchukua msukumo wa kile kilicho **mbinguni**. Tungenufaika sana kwa kutafakari rehema, wema na **upendo** wa Mungu; lakini tunapata hasara kubwa kwa kutafakari **juu** ya vile vitu ambavyo ni vya duniani na vya kitambo.

Ingawa kunaweza kuwa na mazingira **machafu**, yaliyoharibika karibu nasi, hatuhitaji kupumua **ukungu** wake, lakini tunaweza kuishi katika hewa safi ya **mbinguni**. Tunaweza kufunga kila mlango kwa mawazo machafu **na** mawazo yasiyotakaswa kwa kuinua nafsi hadi katika **uwepo** wa Mungu kupitia maombi ya dhati. Wale ambao mioyo yao imewekwa wazi ili kupokea msaada na Baraka za **Mungu** wataenenda katika angahewa takatifu zaidi kuliko ile ya dunia na watakuwa na ushirika wa kudumu na Mbingu.

## Kubadilishwa kwa Kulichunguza Neno

*Kama watoto wachanga waliozaliwa sasa yatamanini maziwa ya akili yasiyoghoshiwa, ili kwa hayo mpate kuukulia wokovu. —1 Petro 2:2.*

Hakuna mwanaume, mwanamke au kijana anayeweza kufikia ukamilifu wa Kikristo huku akiwa anapuuza usomaji wa Neno la Mungu. Kwa uchunguzi makini na wa karibu wa Neno la Mungu tutatii maagizo ya Kristo, "Mwayachunguza Maandiko; kwa sababu mnadhani ya kwamba ninyi mna uzima wa milele ndani yake; na hayo ndiyo yanayonishuhudia" (*Yohana* 5:39). Utafiti huu unamsaidia mwanafunzi kuchunguza kwa karibu Mfano wa Mungu... Mfano lazima ukaguliwe mara kwa mara na kwa karibu ili kuuiga. Mtu anapoifahamu vizuri historia ya Mkombozi, anagundua ndani yake upungufu wa tabia; kutofanana kwake na Kristo kunakuwa kukubwa mno kiasi kwamba anaona kuwa hawezi kuwa mfuasi Wake bila kufanya mabadiliko makubwa sana maishani mwake. Bado anaendelea kujifunza, akiwa na shauku ya kuwa kama Kielelezo chake Kikuu; anafikia mwonekano, roho ya Mwalimu wake mpendwa; kwa kutazama anabadilishwa.

Falsafa zote za asili ya mwanadamu zimeongoza katika kukanganyikiwa na aibu wakati Mungu anapokuwa hajatambuliwa kuwa yote katika yote. Lakini imani ya thamani yenye uvuvio wa Mungu inatoa nguvu na uadilifu wa tabia. Kadiri wema Wake, rehema Zake, na upendo Wake unavyokazwa juu yake, utambuzi wa ukweli utakuwa wazi zaidi na zaidi; wajuu, mtakatifu zaidi, shauku ya usafi wa moyo na usafi wa mawazo. Nafsi inayodumu katika hali ya hewa safi ya mawazo matakatifu inabadilishwa kwa ushirikiano na Mungu kwa njia ya kusoma Neno Lake. Ukweli unakuwa mkubwa sana, unaogusa mno, wa kina zaidi, mpana zaidi, kiasi kwamba ubinafsi unatoweke. Moyo unalainishwa na kutiishwa katika unyenyekevu, wema na upendo.

Biblia ... inaifundisha akili kupambana na matatizo makubwa mno na kuandama ugunduzi mpana. Inakuza uwezo wa kufikiri. Inaokoa nafsi... Ichukue kuwa kioo chako. Itakuwa kiongozi mwaminifu, ikigundua dosari na makosa ya tabia yako. Itaimarisha kila tabia njema.

Neno ambalo linafunua hatia ya dhambi, lina nguvu juu ya moyo wa mwanadamu ili kumfanya mtu kuwa mwadilifu na kumtunza hivyo.

## Kesha na Ukaombe

*Kwa sala zote na maombi mkisali kila wakati katika Roho, mkikesha kwa jambo hilo na kudumu katika kuwaombea watakatifu wote. — Waefeso 6:18.*

**K**uomba na kukesha hivyo ni muhimu kwa ajili ya ukuaji katika maisha matakatifu... Usalama wako pekee uko katika kuishi kama mlinzi [mtu akeshaye]. Kesha na uombe kila wakati. Lo, ni ulinzi wa pekee jinsi gani dhidi ya kujitiisha kwenye majaribu na kuangukia kwenye mitego ya ulimwengu!

“Zingatieni, kukesha na kuomba.” (Marko 13:13)...Kwanza, unalazimika kukesha. Kesha, usije ukaongea kwa kuropoka, kwa wahaka, na kwa hasira. Kesha, ili kiburi kisije kikapata nafasi moyoni mwako. Kesha, ili usije tekwa na hisia kali za uovu, badala ya kuzishinda kwako. Kesha, usije ukawa mpungufu na mpumbavu, na mvuto wako kuwa ishara ya mauti, badala ya uzima.

Pili, unapaswa kuomba. Yesu asingekuwa ameamuru hili juu yako, kama kungelikuwa na ulazima wa kufanya hivyo. Inafahamika vizuri Kwake kwamba wewe peke yako huwezi kuyashinda majaribu mengi ya Yule adui, na mitego mingi iliyotegwa miguuni mwako. Hajakuacha kufanya hili peke yako; lakini ameandaa njia ili uweze kupata msaada. Kwa hiyo amekuamuru kuomba.

Kuomba sawa sawa ni kumwomba Mungu katika imani kwa ajili ya mambo kweli unayohitaji. Nenda katika chumba cha peke yako, au mahali pa kimya, na umwombe Baba ili akusaidie kupitia kwa Yesu. Kuna nguvu katika ombi ambalo limepelekwa juu kutoka kwenye moyo unaotambua udhaifu wake, huku ukitamani sana nguvu ile ambayo inatoka kwa Mungu. Maombi ya dhati na ya bidii yatasikiwa na kujibiwa...

Usikate tamaa. Jinyenyekeze miguuni kwa Yesu, ambaye amewahi kujaribiwa, na anajua namna ya kuwasaidia wale ambao wanajaribiwa... Wakilisha kesi yako mbele za Mungu, kupitia kwa Yesu, mpaka nafsi yako iweze kwa ujasiri kumtegemea Yeye kwa ajili ya nguvu, mpaka uhisi kwamba hujaachwa kufanya kazi ya kushinda peke yako. Mungu atakusaidia. Malaika watakulinda. Lakini kabla hujatarajia msaada huu, unapaswa kufanya kile uwezacho kwa sehemu yako. Kukesha na kuomba.

## Ushirika wa Moyo na Mungu

*Umongoje Bwana, uwe hodari, upige moyo konde, naam umongoje Bwana. – Zaburi 27:14.*

**N**guvu ambayo haijawahi kuonekana hapo awali inashika nhatamu katika ulimwengu. Katika maburudisho, katika kutafuta pesa, katika kugombea madaraka, katika mapambano kwa ajili ya maisha, kuna nguvu ya kutisha ambayo hushughulisha sana mwili na akili na roho. Katikati ya mwendo huu wa taharuki, Mungu anazungumza. Anatusihi tuje faraghani tuzungumze na Yeye. "Acheni, mjue ya kuwa mimi ni Mungu" (Zaburi 46:10).

Wengi, hata katika nyakati zao za ibada, wanashindwa kupokea Baraka za ushirika wa kweli na Mungu. Wanakuwa na haraka sana. Kwa hatua za haraka wanasonsaga mbele katika mazoea ya uwepo wa upendo wa Kristo, wakikaa labda kwa muda ndani ya eneo takatifu, lakini bila kungoja ushauri. Hawana muda wa kukaa na Mwalimu wa mbinguni. Wanarudi katika kazi zao wakiwa na mizigo yao... Hitaji letu sio kukaa kwa muda katika uwepo Wake, bali ni kuwa na mawasiliano binafsi na Kristo, na kuketi chini katika kujenga uhusiano na Yeye.

Tunaweza kumletea Yeye taabu na mashaka yetu madogodogo kadhalika na fadhaa zetu kubwa. Chochote kinachotokea kutusumbua au kutuhuzunisha, hebu na tukipeleke kwa Bwana katika maombi.

Kwa utulivu, lakini kwa bidii, nafsi inapaswa kumtafuta Mungu; na kisha furaha na utii vitakuwa mvuto unaotoka kwa Yeye aonaye sirini, ambaye sikio Lake liko wazi kusikia maombi yanayotoka moyoni. Yeye ambaye kwa imani sahili anafanya mazungumzo ya upendo na Mungu atajikusanya miale ya nuru ya Mungu ili kumuimarisha na kumpatia ushindi katika pambano na shetani.

Tukimtanguliza Bwana wakati wote mbele yetu, tukiiruhusu mioyo yetu kumtolea shukrani na kumwimbia nyimbo za sifa, tutakuwa na burudiko daima katika maisha yetu ya kidini. Maombi yetu yatachukua muundo wa mazungumzo na Mungu wetu kama vile ambavyo tungeongea na wenzi wetu. Atazungumza siri Zake kwetu binafsi. Mara kwa mara tutajawa na hisia tamu, ya furaha ya uwepo wa Yesu... Maombi yanafukuzia mbali mashambulizi ya Shetani.

## Furaha Tele

*Utanijulisha njia ya uzima; Mbele za uso Wako ziko furaha tele;  
Na katika mkono wako wa kuume Mna mema ya milele. —Zaburi  
16:11.*

Dini ya Yesu ni furaha, amani na raha.

Mbingu yote inafurahishwa na furaha ya mwanadamu. Baba yetu wa mbinguni hafungi njia za furaha kwa kwa viumbwe Wake. Matakwa ya Mungu yanatutaka kufunga yale mazoea ambayo yangetuletea mateso na kukatishwa tamaa, ambayo yatautfungia mlango wa furaha na mbingu... Yeye [Mkombozi wa ulimwengu] anatutaka tufanye kazi zile tu ambazo zitaongoza hatua zetu kwenye vilele vya furaha kamili ambavyo wale wasiotii kamwe hawawezi kufikia. Maisha ya kweli ya furaha ya nafsi ni kuumbwa kwa Yesu ndani yake, aliye tumaini la utukufu.

Wale wanaokaa ndani ya Yesu watakuwa na furaha, uchanganamu, na shangwe kwa Mungu. Upole uliotiishwa utaonesha sauti, heshima kwa mambo ya kiroho na ya milele itaoneshwa katika matendo na muziki, muziki wa furaha, utasikika kuto-ka midomoni, kwa kuwa unachukuliwa kutoka kwenye kiti cha enzi cha Mungu. Hii ni siri ya utauawa, haiwezi kueleze-wa kwa urahisi, lakini hata hivyo inahisiwa na kufurahiwa.

Maneno hayawezi kuelezea amani na furaha aliyo nayo yule anayemkubali Mungu katika Neno Lake. Majaribu hayamsumbui, matusi hayamuudhi. Nafsi inafishwa kila siku. Kazi zake zinaweza kumshughulisha sana siku kwa siku, majaribu yake magumu, maonjo yake makali mno, lakini haumii; kwa maana hupokea nguvu kulingana na uhitaji wake.

Dini ya Yesu itajidhihirisha yenyewe kwa wale walionayo kuwa kanuni ya uzima, ipenyayo, iliyo hai, ifanyayo kazi na nguvu ya kiroho. Kutakuwa na udhihirisho wa burudiko na furaha ya ujana usiokoma. Moyo ule unaopokea Neno la Mungu sio kama bwawa linaloyeyuka, sio kama birika la maji lililovunjika ambalo hupoteza hazina yake. Ni kama kijito cha mlimani kinacholishwa na chemchemi zisizokoma, ambazo maji yake baridi na yanayochemka huruka kutoka mwamba hadi mwamba, yakiwaburudisha waliochoka, wenye kiu, wenye kulemewa na mizigo.

## Makao ya Mungu

*Au hamjui ya kuwa mwili wenu ni hekalu la Roho Mtakatifu aliye ndani yenu, mliyepewa na Mungu? Wala ninyi si mali yenu wenyewe. —1 Wakorintho 6:19.*

**K**wa kielelezo kizuri na cha kuvutia sana, Neno la Mungu linaonesha jinsi Yeye alivyoweka heshima juu ya miili yetu na wajibu ulio juu yetu wa kuitunza katika hali bora zaidi... Mwili ni hekalu ambalo Mungu anatamani kukaa ndani yake, ... unapaswa kuwekwa safi, mahali pa makazi ya mawazo ya juu na ya uadilifu.

Ujuzi kwamba mwanadamu analazimika kuwa hekalu kwa ajili ya Mungu, makazi ya kufunulia utukufu Wake, unapaswa kuwa kichocheo cha juu zaidi kwa ajili ya utunzaji na ukuzaji wa nguvu zetu za kimwili. Kwa namna ya ajabu na ya kutisha Muumba ameweke katika umbo la mwanadamu, na anatuagiza tuuchunguze, ili tuelewe mahitaji yake na kufanya sehemu yetu katika kuuhifadhi mbali na uharibifu na unajisi.

Wajibu wetu wa kwanza kwa Mungu na kwa wanadamu wenzetu ni ule wa ukuaji wetu binafsi. Kila uwezo ambao Muumba ametupatia, unapaswa kukuzwa kwa kiwango cha juu kabisa cha ukamilifu, ili tuweze kufanya kiasi kikubwa zaidi cha wema tunachoweza. Kwa hiyo muda huo unatumwa kwa mambo mazuri ambayo yanatumwa katika uanzishaji na utunzaji wa afya ya mwili na akili. Hatuwezi kumudu kudumaza au kulemaza utendaji wo wote wa mwili au akili. Hakika tunapofanya hivi lazima tutavuna matunda yake.

Shauku ya Mungu kwa kila mwanadamu imeelezwa katika maneno, "Mpenzi naomba ufanikiwe katika mambo yote na kuwa na afya yako, kama vile roho yako ifanikiwavyo." (3 Yohana 2).

Yeye ndiye ambaye, "Akusame maovu yako yote, Akuponya magonjwa yako yote; Aukomboa uhai wako na kaburi, akutia taji ya fadhili na rehema" (Zaburi 103:3, 4...)

"Zaidi ya mambo yote," Mungu anatamani "tuwe na afya njema" — afya ya mwili na roho. Na tunalazimika kuwa watenda kazi pamoja na Yeye kwa ajili ya afya ya vyote, mwili na roho.

## **Afya ni Tuzo ya Tabia Adilifu**

*Mwanangu, usiisahau sheria Yangu; Bali moyo wako uzishike amri Zangu; Maana zitakuongezea wingi wa siku na miaka ya uzima na amani. —Mithali 3:1, 2.*

**S**heria za asili ni sheria za Mungu — ni takatifu kabisa skama zilivyo kanuni za Amri kumi za Mungu. Sheria ambazo zinaongoza viungo vyetu vya mwili, Mungu ameziandika juu ya kila neva, msuli na nyuzinyuzi za mwili. Kila ukiukaji wa kutojali au wa makusudi wa sheria hizi ni dhambi dhidi ya Muumba wetu.

Kuna uhusiano wa karibu mno kati ya akili na mwili na ili kufikia kiwango cha juu cha mafanikio ya kimaadili na kiakili, sheria zinazodhibiti utu wetu wa kimwili lazima zizingatiwe. Ili kupata tabia thabiti, yenyе ulinganifu mzuri, nguvu zote za kiakili na kimwili lazima zitumike na kuendelezwa. Ni somo gani linaweza kuwa la muhimu zaidi kwa vijana kuliko lile ambalo linautendea huu mwili wa ajabu ambao Mungu ametukabidhi na sheria ambazo kwazo unaweza kuhifadhiwa katika afya?

Afya inaweza kupatikana kwa kuwa na mwenendo sahili wa maisha na inaweza kufanywa kutoa mvuto na faida ambatani. Lakini mtaji huu, wenye thamani zaidi kuliko amana yoyote ya kibenki, unaweza kufujwa kwa kukosa kiasi katika ulaji na unywaji, au kwa kuacha viungo viote kutu kwa kutofanya kazi. Mazoea mabaya lazima yaachwe, na uvivu sharti ushindwe.

Afya inapaswa kulindwa kwa hali ya dhati kama tabia.

Miili yetu ni mali iliyonunuliwa na Kristo, na hatuna uhuru wa kuifanya tupendavyo. Wote wanaoelewa sheria za afya wanapaswa kutambua wajibu wao ili kuzitii sheria hizi ambazo Mungu alizianzisha katika uwepo wao. Utii kwa sheria za afya unapaswa kufanywa kuwa suala la wajibu binafsi. Sisi wenyewe lazima tupate matokeo ya kukiukwa kwa sheria hiyo. Ni lazima kila mmoja wetu ajibu kwa Mungu kwa tabia na mazoea yetu. Kwa hivyo swali kwetu sio, "Mazoea ya ulimwengu ni nini?" lakini, "Je, mimi binafsi nitayachukuliaje makao ambayo Mungu amenipa?"

## Afya katika Kutii Amri za Mungu

*Kwa maana kujizoeza kupata nguvu za mwili kwafaa kidogo, lakini utauwa hufaa kwa mambo yote; yaani, unayo ahadi ya uzima wa sasa na ya ule utakaokuwapo baadaye. – 1 Timotheo 4:8.*

**K**una afya katika kutii sheria ya Mungu.

Mwenye hekima anasema kwamba hekima "Njia zake ni njia za kupendeza sana, na mapito yake yote ni amani" (*Mithali* 3:17). Wengi huthamini wazo kwamba kujisalimisha kwa Mungu huleta madhara kwa afya na kwa matumaini ya furaha katika uhusiano wa kijamii maishani. Lakini wale waendao katika njia ya hekima na utakatifu wanagundua kuwa "utauwa hufaa kwa mambo yote; yaani, unayo ahadi ya uzima wa sasa na ya ule utakaokuwapo baadaye." Wanatambua kwamba ili kuwa na furaha ya kweli maishani, pasipo kusumbuliwa ovyo na majuto dhidi ya kupoteza muda wa thamani, wala pasipo kuwa na utusitusi au hofu ya akili, kama vile ulimwengu unavyokuwa mara nyingi, ni pale wanapokuwa tu hawajakengeushwa na maburudisho ya msisimko... Utawu haushindani na sheria za afya, bali hukubaliana nazo. Laiti kama watu wangekuwa watiifu kwa sheria ya Amri Kumi ... laana za magonjwa yaufurikishao ulimwengu isingekuwapo.

Uhakikisho wa ukubali wa Mungu utahamasisha afya ya mwili. Huimarisha nafsi dhidi ya mashaka, wasiwasi na huzuni iliyopitiliza, ambayo mara nyingi hudhoofisha nguvu za uzima na kusababisha magonjwa ya neva.

Ufahamu wa kutenda haki ndio dawa bora kwa miili na akili zenye magonjwa. Baraka maalum ya Mungu apaswayo kuitegemea mpokeaji ni afya na nguvu.

Mtu ambaye akili yake imetulia na kutosheka kwa Mungu ndiye mwenye kuwa na afya. Kuwa na utambuzi kwamba macho ya Bwana yanatuelekea, na masikio Yake yako wazi ili kusikia maombi yetu, hakika inaridhisha. Kujua kuwa tunaye Rafiki asiyeshindwa kamwe ambaye kwake tunaweza tukamwambia siri zote za mioyo yetu, ni fursa ambayo maneno hayaweza kutosha kuielezea.

Ujasiri, tumaini, imani, huruma, upendo, hukuza afya na kurefusha maisha. Akili iliyotosheka, nafsi yenye furaha, ni afya mwilini na nguvu kwa nafsi.

## Kula kwa Ajili ya Afya na Furaha

*Basi, mlapo, au mnywapo, au mtendapo neno lo lote, fanyeni yote kwa utukufu wa Mungu. – 1 Wakorintho 10:31.*

**I**fuatayo ni kanuni ambayo ndiyo msingi wa kila tendo, wazo Ina nia; uwekaji wakfu wa nia kwa ujumla, kwa vyote, kimwili na kiakili, katika utawala wa Roho wa Mungu.

Hata tendo la kawaida la kula au kunywa, linapaswa kufanywa ... "kwa utukufu wa Mungu."

Ikiwa kuendekeza uchu wa chakula kulikuwa na nguvu sana juu ya jamii ya wanadamu kiasi kwamba, ili kuvunja nguvu zake, Mwana wa Mungu, kwa niaba ya mwanadamu, alitakiwa kufunga takribani majuma sita, ni kazi iliyoje mbele ya Mkristo ili kwamba aweze kushinda kama Kristo alivyoshinda! Nguvu ya jaribu la kuendekeza uchu mpotovu wa chakula inaweza kupimwa tu kwa uchungu mkali usioelezeka wa Kristo katika mfungo huo mrefu nyikani.

Kama vile wazazi wetu wa kwanza walivyoipoteza Edeni kwa kuendekeza uchu wa chakula, tumaini letu pekee la kuipata tena Edeni ni kupitia kwa ukataaji kabisa wa uchu wa chakula.

Mungu amemjaza mwanadamu na njia nyingi kwa ajili ya uridhishaji wa shauku ya chakula isiyi na upotovu. Amemwekeea mbele yake mazao ya ulimwengu – aina nyingi za vyakula vinavyopendeza na vyenye lishe kwa mfumo. Kati ya hivi Baba yetu wa mbinguni mwenye ukarimu anasema tunaweza kula kwa uhuru. Matunda, nafaka, na mboga, vilivyoandaliwa kwa njia rahisi, bila vikolezo na mafuta ya wanyama na mimea, vikitengenezwa kwa maziwa au malai [jibini], kinakuwa chakula cha kiafya zaidi. Hivi ... hutupatia nguvu ya ustahimilivu na nguvu ya akili ambayo haiwezi kutolewa na vyakula vyakula vya kusisimua.

Hatutoi orodha sahihi ya kufuatwa katika lishe; lakini tunasema kwamba katika nchi ambako kuna matunda, nafaka, na njugu kwa wingi, chakula cha nyama si chakula kinachofaa kwa watu wa Mungu.... Ikiwa kula nyama kulikuwa na afya njema, sio salama kwa sasa.

Tena na tena nimeoneshwa kwamba Mungu anajitahidi kuturudisha nyuma, hatua kwa hatua, kwenye mpango Wake wa asili – ili kwamba mwanadamu aweze kujikimu kwa mazao ya asili ya nchi.

## Kujiepusha na Starehe Zinazodhuru

*Wapenzi, nawasihi kama wapitaji na wasafiri, ziepukeni tamaa za mwili zipiganazo na roho. — 1 Petro 2:11.*

**N**eno la Mungu linatuonya waziwazi kwamba tusipojepusha na tamaa za mwili, asili ya mwili itakuwa kati-ka pambano na asili ya kirohò. Ulaji wa kukidhi tamaa unpambana dhidi ya afya na amani. Hivyo basi, vita huanzishwa kati ya sifa njema na mbovu za mwanadamu. Hulka za chini, huikandamiza nafsi kwa nguvu na uthabiti. Maslahi ya juu zaidi ya kiumbe yanahatarishwa na uendekezaji wa tamaa ya chakula ambayo hajaidhinishwa na Mbingu.

Afya, tabia na hata uzima, huhatarishwa na matumizi ya visisimua mwili, ambavyo husisimua nguvu zilizochoka kwa juhudzi zisizo za asili, za kuamshwa ghafla.

Vitia ladha kwenye chakula kwa asili yake vinaleta madhara kwa afya. Haradali, pilipili, viungo, achali na vitu vingine vinavyofanana na hivyo, husumbua tumbo na kufanya damu kuwa na moto na kuchafuka...

Chai na kahawa havirutubishi mfumo wa chakula... Kuendelea kwa matumizi ya vichocheo hivi vya neva hufuatiwa na maumivu ya kichwa, kukosa usingizi, kupigapiga kwa moyo, kutomeng'enywa kwa chakula, kutetemeka na maovu mengine mengi; maana zinachakaza nguvu za uzima... Tumbaku ni sumu inayodhuru polepole, kwa siri, lakini ni mbaya mno. Kwa namna yejote ile inavyotumiwa, inaleta madhara kwa mtumiaji; ni ya hatari sana kwa sababu madhara yake yanatokea taratibu na vigumu sana kutambulika mwanzoni... Matumizi yake yanaamsha kiu ya kupata pombe kali na mara nydingi huweka msingi wa tabia ya ulevi.

Kuhusiana na chai, kahawa, tumbaku na vinywaji vya pombe, njia pekee ya usalama ni kutovigusa, kutovionja na kukaa navyo mbali.

Kuwa na kiasi kwa kweli hutufundisha kuachana kabisa na kila kitu chenye kutudhuru na kutumia kwa busara kile amba-chio ni kizuri kwa afya zetu.

Roho wa Mungu hawezি kuja kutuhurumia na kuja kutusaidia katika kukamilisha tabia ya Kikristo, wakati tunaende-keza uchu wetu wa chakula hadi kudhuru afya zetu.

## Baraka katika Kuushughulisha Mwili

*Bwana Mungu akamtwa huyo mtu, akamweka katika bustani ya Edeni, ailime na kuitunza. —Mwanzo 2:15.*

**M**oja ya sheria za kwanza za binadamu ni ile ya kufanya kazi. Kila kiungo cha mwili kina kazi yake iliyopangwa, ambayo kwayo hutegemea kupata nguvu kwa ajili ya ukuaji wake. Utendaji kazi wa kawaida wa viungo vyote huvipa nguvu na uzima; kutofanya kazi huleta uharibifu na mauti.

Wakazi wa Edeni walipewa kazi ya kuitunza bustani, "kuilima na kuitunza." ... Mungu alitoa kazi kuwa mbaraka kwa mwanadamu, ili kuishughulisha akili yake, kuimarisha mwili wake na kukuza viungo vyake. Katika shughuli za kiakili na kimwili, Adamu alipata moja ya raha ya juu zaidi ya uwepo wake mtakatifu.

Mazoezi ya uwiano ya viungo vyote na uwezo wa mwili ni muhimu kwa kazi bora ya kila kimoja. Wakati ubongo unapofanyishwa kazi sana huku viungo vingine vya mwili vikiwa havifanyi kazi, kunakuwa na upotevu wa nguvu, mwili na akili.

Wale ambao mazoea yao ni ya kukaa wanapaswa, wakati hali ya hewa inaporuhusu, kufanya mazoezi katika eneo la wazi kila siku, iwe ni majira ya joto au baridi. Kutembea kunafaa zaidi kuliko kuendesha balskeli au gari, kwa sababu kunaishughulisha misuli yote. Mapafu yanalamishwa kufanya tendo la kiafya, kwa sababu ni vigumu kutembea haraka bila kuyahusisha... Mvuto kamili, wa kina wa hewa safi, ambayo huyajaza mapafu na oksijeni, husafisha damu. Huiwekea damu rangi na kuipeleka, kwa mkondo utoao uzima, kwenye kila sehemu ya mwili. Upumuaji mzuri huburudisha mishipa; huamsha hamu ya chakula na hufanya mmengenyo kuwa mzuri zaidi; na kusababisha usingizi mzuri, uburudishao.

Daima Yesu alifanya kazi kwa bidii. Kamwe hakujawahi kuishi mwanadamu mwingine aliyejewa na majukumu mengi kama Yeye... Na bado maisha Yake yalijawa na afya tele. Kwa hali ya kimwili na kiroho aliwakilishwa na Mwana-Kondoo wa kafara, "asiye na ila, asiye na waa" (1 Petro 1:19). Katika mwili na katika roho alikuwa kielelezwa cha kile ambacho Mungu alipanga wanadamu wote kuwa kupitia utii kwa sheria Zake.

## Njoni Faraghani Mpumzike

*Akawaambia, Njoni ninyi peke yenu kwa faragha, mahali pasipokuwa na watu, mkapumzike kidogo. Kwa sababu walikuwako watu wengi, wakija, wakienda, hata haikuwapo nafasi ya kula. —Marko 6:31.*

**Y**eye Yesu hakuwahimiza wanafunzi Wake ulazima wa kufanya kazi bila kukoma... "Njoni ninyi peke yenu kwa faragha, ... mkapumzike kidogo," Anawaambia wale wote ambaao wamechoka sana. Sio vizuri wakati wote kuwa katika kazi ya kuchosha na ya taharuki, ... maana kwa njia hii uchaji Mungu binafsi hupuuzwa na uwezo wa akili na roho na mwili huharibiwa.

Uangalifu unapaswa kutekelezwa kuhusiana na utaratibu wa saa za kulala na kufanya kazi. Lazima tuwe na muda wa kupumzika, muda wa maburudisho na muda kwa ajili ya kutafakari Mungu.

Kuna aina za maburudisho ambazo zina manufaa makubwa kwa akili na mwili... Maburudisho kwenye sehemu ya wazi, kutafakari kazi ya Mungu katika viumbe vyaa asili, kutakuwa na manufaa makubwa zaidi.

Kwenda nje ya nyumba zetu na kutumia muda mwingi iwezekanavyo kwenye hewa safi ni kwa ajili ya afya na furaha yetu... Tunapaswa kuzielekeza akili zetu katika kuvutiwa na mambo yote mazuri ambayo Mungu ametupatia kwa mkono mkunjufu. Na katika kutafakari juu ya chanzo hiki cha upendo na utunzaji Wake mwingi, tunaweza kusahau udhaifu, kuwa wachangamfu na kumwimbia Bwana miyoni mwetu.

Hewa safi, mwanga wa jua, kujihini, kupumzika, kufanya mazoezi, mlo kamili, unywaji wa maji, kuamini katika uweza wa Mungu — hizi ni tiba za kweli... Asili katika uhuru wake hufanya kazi vyema na kwa busara. Wale ambaao wanadumu katika utii wa sheria zake watavuna thawabu katika afya ya mwili na akili.

Yeye (Yesu) alitafuta burudiko katikati ya mandhari ya asili... Saa Zake za furaha kuu zilikuwa pale Alipoacha kazi Zake na kwenda porini, kutafakari katika mabonde tulivu, ili kujumuika na Mungu mlimani au katikati ya msitu.

Tunaweza ... kuzifanya nyakati zetu za maburudisho kuwa kile ambacho jina hudokeza — nyakati za ujenzi wa kweli wa mwili na akili na roho.

## Urafiki wa Marafiki wa Kristo.

*Mimi ni mwenzao watu wote wakuchao, na wale wayatiid mausia yako. – Zaburi 119:63.*

**N**i jambo la kawaida kutafuta rafiki. Kila mtu anaweza kupata au kufanya marafiki. Kutakuwa na kiwango cha ushawishi kitakachowea kuwaathiri marafiki kwa wema au kwa uovu tu kulingana na nguvu ya urafiki... Vijana wanaoanza kujiingiza katika uhusiano na wengine wanaweza kufanya muungano wao kuwa wa baraka au laana. Wanaweza kujengana, kubarikiana, na kutiana nguvu, wakiboresha mwenendo, tabia, maarifa; au, kwa kuruhusu kuwa wazembe na kutokuwa waaminifu, wanaweza kuwa na mvuto mbaya.

Ni kwa kuwaongoza wafuasi wa Kristo kushirikiana na wasiomcha Mungu na kuungana katika burudani zao, ndipo Shetani anafaulu zaidi katika kuwavuta waingie dhambini... Wafuasi wa Yesu wanapaswa kujitenga mbali na wenye dhambi, wakichagua ushirika wao tu pale kunapokuwa na fursa ya kuwatendea mema. Hatuwezi kufikiri sana katika kuepuka ushirika wa wale wanaotumia mvuto wao ili kutuvuta mbali na Mungu. Wakati tunaomba, "Usitutie majaribuni," tunapaswa kuyaepuka majaribu, kadiri inavyowezekana.

Kwa uchaguzi wa rafiki waovu wengi wameongozwa hatua kwa hatua mbali na njia ya wema hati kwenye **kina** cha uasi na upotovu ambao kwa wakati fulani wangefikiri kuwa haiwezekani kwao kuzama humo.

Tunaweza kukataa kupotoshwa, na kuijweka **mahali** ambapo ushirika mbaya hautaharibu moyo yetu. Kijana mmoja mmoja anapaswa kutafuta kushirikiana na wale wanaojikokota kwenda juu kwa hatua zisizoyumba.

Urafiki bora kabisa kuliko urafiki wote wa ulmwengu **ni** urafiki wa waliokombolewa na Yesu. Vuguvugu la urafiki wa kweli, upendo ule unaouanganisha moyo kwa moyo, **ni** mwonjo wa awali wa furaha ya mbinguni.

## Mvuto Wako Ni Muhimu!

*Amri yangu ndiyo hii, Mpendane, kama Nilivyowapenda ninyi. – Yohana 15:12.*

Je! Upendo huu una sifa gani? ... ni upendo kwa ajili ya nafsi ambayo itaachana na kujifurahisha nafsi na kisha kujikana nafsi kabisa ili kukuza, kuadilisha, na kutakasa wale ambao tunashirikiana nao. "Na kwa ajili yao naijiveka wakfu mwenyewe, ili na hao watakaswe katika kweli" (*Yohana 17:19*). Je! Unawapenda wale ambao unashirikiana nao vizuri kiasi cha kuacha tamaa yako ya maburudisho na kujifurahisha kiasi kwamba hutaziweka nafsi hizi kwenye njia ya majaribu, kwamba hutawataka kufuata mwenendo wa kujifurahisha na wa mzaha ambao unaongoza kwenye kuzimwa kwa mawazo makini kuhusiana na wokovu wa nafsi zao? Je! Unakuza uchaji Mungu binafsi, ... ili kwamba marafiki zako wa ujana waweze kufuata kule unakoelekea, ili kuimarisha utii kwa Mungu bila kurudi nyuma? ... je! upendo wako una sifa gani? Je! Ni tabia yako kuwafanya washirika wako kufanana zaidi na Kristo? Je! Utakuwa na mwelekeo wa kuleta mbao imara katika ujenzi wa tabia zao?

Mungu anawaagiza wafuasi Wake wote kutoa ushuhuda ulio hai kwa lugha iliyodhahiri kwa njia ya mwenendo wao, mavazi na mazungumzo yao, katika shughuli zote za maisha, kwamba nguvu ya utauwa wa kweli ina faida kwa wote katika maisha haya na yale yajayo.

Tabia duni ya Mkristo huleta uharibifu zaidi ulimwenguni kuliko tabia ya walimwengu, kwa wale wanaodai kuwa Wakristo huwapotosha wengine kwa kudai kuwa wanamwakilisha Yeye ambaye wanaojiita tu kwa jina Lake.

Mungu ni upendo. Yeye akaaye ndani ya Mungu, hukaa katika pendo. Wote ambao kwa hakika wamejizoeza ... na upendo na wingi wa huruma wa Baba yetu wa mbinguni watatoa nuru na furaha popote watakapokuwa. Uwepo na mvuto wao utakuwa kama harufu ya maua mazuri kwa washirika wao, kwa sababu wameunganishwa na Mungu pamoja na mbingu, na usafi na uzuri uliotukuka wa mbinguni vinawasilishwa kupitia kwao kwenda kwa wote wanaofikiwa na mvuto wao.

Mnaweza kuzifanya nafsi zenu kuzungukwa na angahewa ambayo itakuwa kama Zefiri kutoka Edeni ya mbinguni.

## Maneno Yenye Neema

*Maneno yenu yawe na neema siku zote, yakikolea munyu, mpa kujua jinsi iwapasavyo kumjibu kila mtu. — Wakolosai 4:6.*

Inakuwaje kwamba, wengi wanaolikiri jina la Kristo hutamkili. Imaneno mengi ya ubatili, na yasiyofaa? Shetani hutazamili kupata fursa dhidi ya wale wanaozungumza kwa uzembe. Pale tunapotamka maneno yasiyo na maana na ya upuuze tunawahamasisha wengine kujiingiza katika mazungumzo yayo... Maneno ambayo yanapaswa kutoka midomoni mwetu na yale tu yaliyo mema na masafi. Hakuna mtu anayeweza kueleza ni dhambi kiasi gani huletwa na maneno ya ovyo, ya upuuzi na yasiyo na maana... Kila neno unaloongea ni kama mbegu ambayo itaota na kuzaa ama matunda mema au mabaya.

Unapokuwa kwenye kundi la wale wanaojihusisha na mazungumzo ya kipuuzi, ni wajibu wetu kubadilisha mada ya mazungumzo ikiwa inawezekana. Kwa msaada wa neema ya Mungu tunapaswa kuachia maneno taratibu au kuanzisha mada ambayo itabadilisha mazungumzo kuwa mkondo wenye faida.

Yeye (Mungu) anatutaka tuwe wachangamfu, lakini siowapumbavu. Anasema kwa kila mmoja wetu, "Bali kama yeye aliyewaita alivyo mtakatifu, ninyi nanyi iweni watakatifu katika mwenendo wenu wote" (1 Petro 1:15). Mungu anataka sisi tuwe na furaha. Anataka kuweka wimbo mpya midomoni mwetu, yaani sifa kwa Mungu wetu.

Unapoleta mvuto kwa rafiki, hebu sifa kwa Mungu iwe midomoni mwako na moyoni mwako. Hili litayavuta mawazo yake kwa Yesu.

Mwokozi anafurahi jinsi gani anaposikia wafuasi Wake wakizungumzia masomo yenye thamani ya maagizo Yake, na kujua kwamba wamekuwa na shauku kwa mambo matakatifu! ... Kile ambacho kipo moyoni kitatoka midomoni. Hakiwezi kuzuiliwa. Mambo ambayo Mungu ameyaandaa kwa wale wampendao yatakuwa mada kuu ya mazungumzo yao. Upendo wa Yesu uko ndani ya nafsi kama kisima cha maji, kikibubujisha uzima wa milele, kikitoa vijito hai, ambavyo huleta uzima na furaha popote vinapotiririkia.

Tunapata hasara kubwa kwa kutomzungumzia Yesu zaidi na mbingu, iliyo urithi wa watakatifu. Kadiri tunavyotafakari zaidi mambo ya mbinguni, ndivyo miyo yetu itakavyojawa sana na shukrani kwa Muumba wetu mkarimu.

## Kitu Bora!

*Nimemiveka Bwana mbele yangu daima, Kwa kuwa yuko kuumeni kwangu, sitaondoshwa. — Zaburi 16:8.*

**C**hochote ambacho Yesu anatutaka tuachane nacho, Yeye hutoa kitu bora badala yake. Mara nyingi vijana huthamini vitu, kazi na starehe ambazo haziwezi kuonekana kuwa mbaya, lakini ambazo zinapungukiwa na wema wa hali ya juu. Vinayageuza maisha kutoka kwenye lengo lake jema.

Kamwe usiruhusu maburudisho au uhusiano wa wengine, kusimama kati yako na Yesu, Rafiki yako mwema... Wakati matakwa ya asili yanapokuvuta katika mwelekeo wa kutimiza baadhi ya matamanio binafsi, mtangulize Bwana mbele yako kama mshauri wako na uulize, "Je, hili litampendeza Yesu? Je! Hili litaongeza upendo wangu kwa Rafiki yangu mwema? Je! Mwelekeo huu utamhuzunisha Mwokozi wangu mpandwa? Je! Utanitenganisha na umoja Wake? Je! Yesu ataenda pamoja nami kwenye karamu ya starehe, ambapo mambo yote yatakuwa ya kuchangamsha na kuburudisha, ambapo hakutakuwa na chochote chenye asili ya kidini, chochote chenye maana, wala mawazo ya mambo ya Mungu?

Wakristo wana vyazo vingi vya furaha mikononi mwao, na wanaweza kung'amua bila kukosea ni maburudisho gani ni halali na sahihi. Wanaweza kufurahia maburudisho hayo kwa kuwa hayatafuja akili au kushusha thamani nafsi, ambayo hayatawaangusha na kuacha mvuto wa huzuni baadaye utakaoharibu heshima yako binafsi au kuzuia njia ya manufaa. Kama wataenda pamoja na Yesu na kudumisha roho ya maombi, wako salama salmini.

Akili iliyoongoka, inayopambanua itapata njia nyingi za maburudisho na pumziko, kutoka kwenye vyanzo ambavyo sio tu havikosei, bali vinavyoelimisha.

Katika vipindi vyote vya maburudisho tunaweza kukusanya kutoka kwa Mungu aliye Chanzo cha uwezo ujasiri na nguvu mpya, ili tuweze kuinua maisha yetu kwa mafanikio zaidi hadi kufikia usafi, wema wa kweli na utakatifu.

Wale ambao kwa kweli wanafaidika na upendo wa Mungu watakuwa na furaha na amani. Dini haikuanzishwa ili kumfanya mtu asiwe na furaha. Je! Ni nini kinachoweza kuwa matokeo ya furaha kuu kuliko kufurahia amani ya Yesu, ambayo ni nuru angavu ya uwepo Wake?

## Kufunga Mlango wa Majaribu

*Msiipende dunia, wala mambo yaliyomo katika dunia. Mtu akiipenda dunia, kumpenda Baba hakumo ndani yake. —1 Yohana 2:15.*

**M**iongoni mwa jumuiya ya wafuasi wa Yesu **kwa** maburudisho ya Kikristo na mikutano ya watu **wa** dunia kwa ajili ya starehe na maburudisho, kutakuwa na utofauti wa wazi. Badala ya maombi na kutajwa kwa Yesu na mambo matakatifu, kutasikiwa kutoka midomoni mwa watu **wa** ulimwengu vicheko vya ovyo na mazungumzo ya kipumbavu. Lengo ni kuwa na hatima ya jumla.

Starehe za kidunia zinapumbaza; na kwa burudiko lao la kitambo wengi huteketeza urafiki wa Mbinguni, pamoja na upendo na furaha ipatikanayo. Lakini vitu hivi vilivyochaguliwa kuleta furaha punde huleta maudhi, na kutoridhisha.

Baadhi ya maburudisho maarufu sana, kama vile mpira wa miguu na masumbwi, vimekuwa shule ya kujifunzia ukatili... Michezo mingine ya riadha, japo sio ya kikatili sana, ni ya kuchukiza kidogo kwa sababu inatumia muda mwingi zaidi. Inaamsha upendo wa starehe na msisimko, hivyo kukuza **chuki** kwa kazi za maana, tabia ya kuepuka wajibu na majukumu ya kiutendaji... Hivyo mlango unafunguliwa kwa uasherati na **uasi**, pamoja na matokeo yao ya kutisha.

Mkristo wa kweli hatatamani kuingia mahali popote pa maburudiko au kujihusisha katika hila yoyote ambayo **kwayo** hawezi kuomba baraka ya Mungu. Hawezi kukutwa kwenye ukumbi wa maonesho ya starehe, ukumbi wa biliadi, kiwanja **cha** mchezo wa kuviringisha tufe. Hataungana na michezo ya walawiti au kujihusisha katika starehe za kichawi ambazo zitamwondoa Yesu akilini. Kwa wale ambao wanatusihi kwa ajili ya upotovu huu tunawajibu, Hatuwezi kuijingiza huko katika jina la Yesu wa Nazareti... Hakuna Mkristo ambaye angetamani kukutana na **kifo** katika maeneo hayo. Hakuna mtu ambaye angetamani kukutwa kwenye majumba ya starehe pale Yesu atakaporudi.

Kama tukijikalisha kwenye uwanda wa Shetani hatuna uhakika wa ulinzi kushinda nguvu zake. Kadiri tunavyoweza kufanya, inatupasa kufunga kila njia ambayo kwayo mjaribu anaweza kupata njia ya kutufikia.

## Wekeza Kwenye Benki ya Mbinguni

Dini iliyo safi, isiyo na taka mbele za Mungu Baba ni hii, Kwenda kiuwatazama yatima na wajane katika dhiki yao. na kujilinda na dunia pasipo mawaa. – Yakobo 1:27.

**H**uruma kuu za Mwokozi wetu ziliamshwa kwa ajili ya wanadamu walioanguka na wanaoteseka. Kama unataka kuwa mfuasi Wake, lazima ukuze upole na huruma... Wajane, yatima, wagonjwa na wale walio katika hali ya kufa watahitaji msaada daima. Hii ni fursa ya kuhubiri injili – kumshikilia Yesu, aliye tumaini na faraja ya wanadamu wote. Wakati mwili unaoteseka unapokuwa umeokolewa, ... moyo unafunguliwa na kisha unaweza kumimina ndani yake zeri ya mbinguni.

Kundi la waumini wanaweza kuwa maskini, wasioelimika na wasiojulikana; lakini katika Kristo wanaweza kufanya kazi nyumbani, kwa majirani, kwa kanisa na hata katika "mikoa mingine," ambayo matokeo yake yatakuwa yanaenda mbali hata milele. Ni kwa sababu kazi hii imepuuzwa ndio maana wanafunzi wengi vijana hawaendelei zaidi ya alfabeti tu za uzoefu wa Ukristo. Nuru iliyokuwa inang'aa ndani ya miyo yao wenyewe wakati Yesu alipowaambia, "Umesamehewa dhambi zako," walipaswa kuitunza kwa kuwasaidia wale walio wahitaji. Nguvu isiyo na utulivu ambayo mara nyingi ni chanzo cha hatari kwa vijana inaweza kuelekezwa kwenye njia ambazo itatiririka katika vijito vya baraka.

Saa ambazo zinatumwiwa katika maburudisho ambazo zinaburudisha sio mwili wala nafsi zinapaswa kutumika katika ... kutafuta kumsaidia mtu fulani ambaye yu katika uhitaji.

Kila fursa ya kumsaidia ndugu aliye katika uhitaji, au kusaidia kazi ya Mungu katika kuusambaza ukweli, ni lulu ambayo unaweza kuituma kabla ya wakati na kuiweka katika benki ya mbinguni kwa ajili ya usalama.

Upendo, heshima, kuifisha nafsi – kamwe hivi havitapotea. Wakati wateule wa Mungu watakapobadilishwa kutoka kwenye hali ya kufa na kuvikwa kutokufa, maneno na matendo yao ya wema yatadhahirishwa, na yataturunzwa katika vizazi vya milele. Kupitia sifa za kuhesabiwa haki ya Kristo, harufu ya maneno na matendo hayo huhifadhiwa milele.

## Mungu na Kaisari

*Je! Ni halali tumpe Kaisari kodi, au sivyo? ... Akawaambia, B. vya Kaisari mpeni Kaisari, na vya Mungu mpeni Mungu.—Lu 20:22—25.*

Jibu la Yesu lilikuwa ... jibu la wazi kwa swali hilo. Aki Jameshikilia mkononi Mwake sarafu ya Kirumi, ambuu yake kulipigwa chapa ya jina na sura ya Kaisari, Alitanga kwamba kwa kuwa waliishi chini ya ulinzi wa mamlaka Kirumi, wanapaswa kuipatia hiyo mamlaka msaada inaotaki imradi tu hili halikupingana na wajibu wao wa juu. Laki wakati ambapo wanapaswa kutii kwa amani sheria za ndiwanalazimika kutoa utii wao kwa Mungu wakati wote.

Tunapaswa kutambua serikali ya kibinadamu kama agiza lililowekwa na Mungu na kufundisha uiii kwa serikali kar wajibu mtakatifu, ndani ya mamlaka yake halali. Laki wakati serikali itakapotaka haki dhidi ya madai ya Mungu tunapaswa kumtii Mungu kuliko wanadamu. Lazima Nen la Mungu litambuliwe kuwa juu ya sheria zote za wanadamu "Bwana asema hivi" haipaswi kuwekwa kando kwa ajili ya "Kanisa lasema hivi" au "Serikali yasema hivi." Taji ya Yesu ya kifalme inapaswa kuinuliwa juu zaidi ya taji za tawala za wafalme wa dunia.

Hekima na mamlaka ya sheria ya Mungu ni ya juu kabisa.. Kanuni kumi za Yehova ni msingi wa haki na sheria zotnjema. Wale wanaopenda amri za Mungu watakulaliana n kila sheria njema ya nchi.

Hatutakiwi kuzikataa mamlaka... Tunapaswa kusonge mbele katika jina la Yesu, tukiutetea ukweli tuliokebidhiwa Ikiwa tutazuiwa na wanadamu kuifanya kazi hii, basi tunaweza kusema, kama walivyosema mitume, "Kwamba ni haki mbele za Mungu kuwasikiliza ninyi kuliko Mungu, hukumuni ninyi wenye. Maana sisi hatuwezi kuacha kuyanena mambu tuliyoyaona na kuyasikia" (Matendo 4:19, 20).

Ufalme wetu sio wa ulimwengu huu. Tunamngojea Bwana wetu kutoka mbinguni aje duniani ili ... kusimamisha ufalme Wake wa milele.

## Vijana Wakristo na Vitabu Vyao

*"Hatimaye, ndugu zangu, mambo yo yote yaliyo ya kweli, yo yote yaliyo ya staha, yo yote yaliyo ya haki, yo yote yaliyo safi, yo yote yenye kupendeza, yo yote yenye sifa njema; ukiwapo wema wo wote, ikiwapo sifa nzuri yo yote, yatafakarini hayo." – Wafilipi 4:8.*

**W**ale ambao wanetaka kutokuwa mawindo kwa mitego ya shetani, sharti wazilinde vyema njia za nafsi; lazima waepuke kusoma, kuangalia au kusikiliza vile ambavyo vitaleta mawazo najisi.

Machapisho mengi maarufu ya leo yamejawa na hadithi za kuamsha mhemko ambazo zinawafundisha vijana katika uovu na kuwaongoza katika njia ya uangamivu. Watoto wadogo tu kwa miaka michache wanakuwa watu wazima katika ujuzi wa uhalifu. Wanavutwa kufanya uovu na hadithi wanazozisoma... Mbegu za uhalifu zinapandwa kote. Hakuna anayehitaji kushangaa kwamba mazao ya uhalifu ndiyo matokeo yake.

Wasomaji wa hadithi za kubuni wanajiingiza katika uovu ambao unaharibu hali ya kiroho, zikitia giza uzuri wa kurasa takatifu. Zinaunda mihemko hatari, zikisisimua fikra, hudhoofisha akili isifae kitu, huiondoa nafsi katika maombi na kuiondolea uwezo kwa ajili ya matumizi ya kiroho.

Usijisumbue kufungua vifuniko vya kitabu ambacho kina utata. Kuna mvuto mbaya sana kwenye fasihi (vitabu) vya shetani. Ni nguvu ya beteri ambayo huitumia kuipasulia mbali imani sahili ya kidini. Kamwe usifikiri kuwa una nguvu imara zaidi kusoma vitabu vya udanganyifu; kwa maana vina sumu kama ile ya nyoka wenyе sumu kali.

Vijana wa kiume na wa kike, someni machapisho ambayo yatawapatia elimu ya kweli na ambayo yatakuwa msaada kwa familia nzima. Sema kwa uthabiti: Sitatumia nyakati za thamani katika kusoma kile ambacho hakitakuwa na faida kwangu, na kile ambacho kinanifanya nisifae kuwahudumia wengine... Nitayafumba macho yangu kwa mambo ya kipuuzi na yale ya dhambi."

Kadiri unavyosoma Biblia mara kwa mara na kwa bidii zaidi, ndivyo itakavyoonekana kuwa nzuri zaidi, na ndivyo utakavyokoma kufurahia usomaji wa juu juu. Hifadhini kitabu hiki cha thamani moyoni mwenu. Kitakuwa kwenu rafiki na kiongozi.

## Wimbo Moyoni

*Mkisemezana kwa zaburi na tenzi na nyimbo za rohoni, huki  
mkiimba na kumshangilia Bwana miyoni mwenu. — Waefeso 5:19*

**W**imbo wa sifa ni hewa safi ya mbinguni; na pale mbingu zinapowasiliana na dunia, kunakuwa na nyimbo na uimbaji... Juu ya dunia iliyoumbwa upya, kama inavyoonekana, maridhawa na isiyo na waa, kwa kudra za Mungu, "Hapo nyota za mbinguni zilipoimba pamoja, na wana wote wa Mungu walipopiga kelele kwa furaha" (Ayubu 38:7). Kwa hiyo wanadamu, kwa kuonesha ukubali wao kwa mbingu, waliuitikia wema wa Mungu kwa nyimbo za sifa.

Vijana wa kiume na wa kike ... wana uwezo mkubwa wa kuelewa na kuupokea muziki na Shetani anajua ni kiungo gani akisisimue, akichangamshe, akishughulishe sana, na kuiroga akili ili kwamba Kristo asihitajiwe... Nyimbo za kipuuzi na nakala ya muziki za leo zinaonekana kuleta mvuto mkubwa kwao. Vyombo vya muziki vimechukua muda ambao ungepaswa kutumiwa kwa ajili ya maombi. Muziki usipotumiwa vibaya, ni mbaraka mkubwa; lakini unapotumiwa vibaya, unakuwa laana ya kutisha. Unasisimua, lakini hautoi ile nguvu na ujasiri ambao Mkristo anaweza kuupata tu katika kiti cha enzi cha neema... Shetani anawaongoza vijana kuwa mateka wake... Ni mchawi mahiri, akiwashawishi ili kuwaangamiza kabisa.

Burudani za muziki ambazo, kama zikiendeshwa ipasavyo, hazitaleta madhara, mara nyingi huwa chanzo cha uovu... Kipaji cha muziki mara nyingi sana huchochea kiburi na tamaa ya kujionesha, na waimbaji huwa na mawazo kidogo tu kuhusu ibada ya Mungu.

Hebu wote na watumie muda ili kutengeneza sauti ili kwamba sifa za Mungu ziweze kuimba katika toni wazi na nyororo... Uwezo wa kuimba ni karama ya Mungu; hebu na itumiwe kwa ajili ya utukufu Wake.

Tukumbuke kwamba kuimba sifa kwetu kunaongezewa na kwaya za majeshi ya malaika wa mbinguni.

Wale ambao wanajiunga na kwaya ya malaika mbinguni katika wimbo wao wa sifa zina wajifunze duniani wimbo wa mbinguni, ambao nafasi kutoa shukrani.



## Uzuri Udumuo

*Kujipamba kwenu, kusiwe kujipamba kwa nje, yaani, kusuka nywele; na kujitia dhahabu, na kuvalia mavazi; bali kuwe utu wa moyoni usioonekana, katika mapambo yasiyoharibika; yaani, roho ya upole na utulivu, iliyo ya thamani kuu mbele za Mungu.—1 Petro 3:3, 4.*

**K**atika mavazi, kama ilivyo katika mambo mengine yote, ni fursa yetu kumtukuza Muumbaji wetu. Anatamani mavazi yetu kuwa siyo tu nadhifu na yenyе afya, lakini yawe ya kufaa na kupendeza... Mwonekano wetu katika kila nyanja unapaswa kuoneshwa na unadhifu, kiasi, na usafi... Pamoja na nguo zetu kuwa za staha na sahili, zinapaswa kuwa na ubora mzuri wa rangi za kupendeza na kufaa kwa ajili ya huduma.

Unyenyekevu ulio safi katika mavazi, unapouanganishwa na ustaarabu wa kiasi, utaenda mbali sana hata kumzingira mwanamke kijana na mandhari ya hifadhi takatifu ambayo itakuwa kwake ngao kutokana na hatari elfu.

Ni sawa kununua kitambaa kizuri na kukishona kwa ustadi. Hili ni suala la uchumi. Lakini mapambo ya kitajiri hayahitajiki na kujishughulisha nayo ni kutumia kwa ajili ya kujitosheleza nafsi pesa ambayo inapaswa kuwekwa katika kazi ya Mungu... Jizoeze kuwa mwekevu katika matumizi yako ya upatikanaji wa mavazi.

Wakati akili imekitwa katika kumpendeza Mungu pekee, mapambo yote ya mtu yasiyo ya lazima hutoweka.

Yeye (Yesu) atatumia miale angavu ya Jua la Haki katika nafsi, ambayo itatia uzuri na harufu nzuri katika maisha ya kiroho. Ataipatia tabia mapambo ya upole na roho tulivu, ambayo mbele za Mungu ni ya thamani kubwa.

Ni sahihi kupenda uzuri na kuutamani; lakini Mungu anatutaka tupende na kutafuta kwanza uzuri wa juu zaidi, ule ambao hauharibiki milele. Hakuna mapambo ya nje ambayo yanaweza kulinganishwa kwa thamani au kwa uzuri na ule "upole na utulivu wa roho," ya "kitani nzuri, nyeupe na safi," ambayo watakatifu wote wa duniani watavaa. Mavazi haya yatawafanya kuwa wazuri na wa kupendeza hapa na hapo baadaye yatakuwa beji yao ya kukubaliwa kwenye kasri la Mfalme.

## Ya Kumi kwa Mungu

*Tena zaka yote ya nchi, kama ni mbegu ya nchi, au kama matunda ya nchi, ni ya Bwana; ni takatifu kwa Bwana. —Law. 27:*

Bwana ametupatia sisi hazina ya thamani kubwa sa. Ya mbinguni kwa njia ya kutupatia Yesu. Pamoja Na Ametupa vitu vyote kwa wingi ili tuvifurahie. Mazao ya nchi mavuno mengi, hazina za dhahabu na fedha, ni zawadi Zak Nyumba na mashamba, chakula na mavazi, ameviweka katili umiliki wa wanadamu. Anatutaka tumtambue Yeye kuwa i Mpaji wa vitu vyote; na kwa sababu hii anasema, Katika ma yako yote, Ninajiwakea sehemu ya kumi, zaidi ya zawadi n matoleo, ambayo yataletwa ka ika ghala Yangu.

Mpango wa Mungu katika mfumo wa zaka ni mzuri katikusahili na usawa wake... Wote wanaweza kuhisi kwambwana uwezo wa kufanya sehemu katika kuiendeleza kazaya thamani ya wokovu. Kila mwanamume, mwanamke, n kijana anaweza kuwa mweka hazina wa Bwana na anawezekuwa wakala wa kukidhi mahitaji kwenye hazina. Anasemmtume: "kila mtu kwenu na aweke akiba kwake, kwa kadir ya kufanikiwa kwake." (1 Wakorintho 16:2).

Hebu kila mmoja achunguze mapato yake mara kwa mara ambayo yote ni Baraka kutoka kwa Mungu na kutenga zaka kama pesa inayojitegemea, ili itunzwe kwa ajili ya Bwana Fedha hii kwa namna yoyote ile isitumike kwa matumizmengine; inapaswa kutolewa tu ili kusaidia huduma ya injili.

Zaka ya pato letu ni "takatifu kwa Bwana." Agano Jipyahalitoi upya sheria ya zaka, kama vile ambavyo haifanyi kwa ile ya Sabato; kwa sababu uhalali wa zote mbili umehakikishwa.

Ninazungumzia mfumo wa utoaji zaka, lakini unaonekana kuwa kidogo jinsi gani akilini mwangu! Makadirio madogo jinsi gani! Jinsi gani ilivyo bure jaribio la kupima kwa kanuni za kimahesabu, wakati, pesa na upendo dhidi ya upendo na dhabihu isiyo na kipimo na isiyoweza kuhesabika! Zaka kwa ajili ya Yesu! Lo, ujira kidogo mno, fidia ya kuaibisha kwa kile ambacho kinagharimu mno! Toka kwenye msalaba wa Kalvari, Kristo anatuita kwa ajili ya kujisalimisha kusiko na masharti... Vyote tulivyonyavyo vinapaswa kuwekwa wakfu kwa Mungu.

## Sadaka za Shukrani

*Kila mtu na atende kama alivyokusudia moyoni mwake, si kwa huzuni, wala si kwa lazima; maana Mungu humpenda yeye atoaye kwa moyo wa ukunjufu. – 2 Wakorintho 9:7.*

**S**io tu kwamba tunalazimika kutoa kwa uaminifu zaka szetu kwa Mungu, ambazo anasema kuwa ni Zake, lakini tunapaswa kumtukuza kwenye hazina Yake kwa sadaka ya shukrani. Hebu kwa mioyo ya furaha tulete kwa Muumba wetu mazao ya kwanza ukarimu Wake wote – mali zetu bora, huduma yetu bora na takatifu.

Bwanaanahitajikaramazitumiwekwanyakatizilizoamriwa, zikiwa zimepangwa kiasi kwamba suala la utoaji litakuwa tabia na ukarimu uonekane kuwa ni wajibu wa Kikristo. Moyo, uliofunguliwa kwa karama moja, haupaswi kufungwa kwa baridi ya ubinafsi na kufungwa kabla ya mwingine kufadhiliwa. Kijito kinapaswa kuendelea kutiririka, hivyo kuufanya mkondo ubaki wazi kwa matendo ya ukarimu.

Michango iliyohitajika kwa Waebrania kwa madhumuni ya kidini na hisani ilifikia robo kamili ya mapato yao. Kwa hiyo kodi nzito juu ya rasilimali za watu inaweza kutarajiwa kuwafanya kuwa maskini; lakini, kinyume chake, utiifu wa uaminifu wa kanuni hizi ulikuwa mojawapo ya masharti ya ustawi wao.

Si ukuu wa zawadi unaofanya dhabihu ikubalike kwa Mungu; ni kusudi la moyo, roho ya shukrani na upendo ambayo inadhihirisha. Hebu maskini na wasifikiri kwamba sadaka zao ni ndogo sana hata kuwa isiyostahili kutambuliwa.

Kiasi kidogo cha pesa kilichotunzwa kwa matendo ya kujinyima kitafanya zaidi kwa ajili ya ujenzi wa kazi ya Mungu kuliko pesa nyingi zaidi ambazo zitafanikisha kile ambacho hakijafanyiwa kazi ya kujikana nafsi.

Hakuna kitu cha thamani sana kwetu sisi kumpa Yesu. Ikiwa tutamrudishia talanta za mali Alizotukabidhi sisi kuzitunza, Atatupatia zaidi mikononi mwetu. Kila bidii tunayoifanya kwa ajili ya Yesu tutazawadiwa na yeye; na kila jukumu tunalofanya kwa jila Lake litafanya huduma kwa ajili furaha yetu wenyewe.

## Katika Mkondo wa Baraka

*Wala tusiache kukusanyika pamoja, kama ilivyo desturi y... wengine; bali tuonyane; na kuzidi kufanya hivyo, kwa kadi mwonavyo siku ile kuwa inakaribia. — Waebrania 10:25.*

**K**amwe msiwaze kwamba mnaweza kuwa Wakristo na bado mjiondoe kati yenu wenyewe. Kila mmoja ni sehemu ya mtandao mkubwa wa binadamu, na asili na ubora wa uzoefu wako utaamuliwa kwa kiasi kikubwa na uzoefu wa wale unaoshirikiana nao... Kwa hiyo hebu tusiache kukusanyika pamoja.

Wengi wanasema kwamba hakika sio vibaya kwenda kwenye maburudisho ya muziki na kupuuza mkutano wa maombi, au kutojuwa wenyewe kwenye mikutano ambako watumishi wa Mungu wanapaswa kutangaza ujumbe kutoka mbinguni. Ni salama kwako kuwa tu pale Kristo aliposema Atakuwa... Yesu alisema, "Kwa kuwa walipo wawili watatu wamekusanyika kwa jina langu, nami nipo papo hapo katikati yao" (*Mathayo 18:20*). Je! Unaweza kustahimili kuchagua starehe yako na kukosa Baraka?

Ikiwa Wakristo wangeshirikiana pamoja, wakisemezana kila mmoja juu ya upendo wa Mungu na juu ya ukweli wa thamani wa ukombozi, mioyo yao wenyewe ingeburudishwa, na wangefurahishana wao kwa wao.

Wote wanapaswa kuwa na kitu cha kusema kwa ajili ya Bwana, maana kwa kufanya hivyo watabarikiwa. Kitabu cha kumbukumbu kimeandikwa kuhusu wale ambao hawaachi mkusanyiko wao wenyewe pamoja, lakini mara nyingi huzungumza kila mtu na mwenzake. Masilio wanashinda kwa damu ya Mwana-Kondoo na kwa neno la ushuhuda wao... Hatupaswi kukusanyika pamoja ili kuwa kimya; hao tu wanaokumbukwa na Bwana ndio wanaokusanyika ili kunena juu ya heshima na utukufu Wake na kutangaza uweza Wake; na baraka ya Bwana itakaa juu yao na wataburudishwa.

Tunapaswa kutumia vizuri kila fursa ya kujiweka wenyewe katika mkondo wa baraka... Mikutano ya kanisa, kama vile katika mikutano ya makambi, mikusanyiko ya kanisa la nyumbani nyakati zote ambapo kuna kazi binafsi kwa ajili ya roho, ni fursa zilizowekwa na Mungu kwa ajili ya utoaji wa mvua ya awali na ya masika.

## Mkono wa Mungu wa Msaada

*Akawaambia, Enendeni ulimwenguni mwote, mkahubiri Injili kwa kila kiumbi. —Marko 16:15.*

Kwa maana jinsi hii Mungu aliupenda ulimwengu, hata Kakamtoa Mwanawe pekee." "Mungu hakumtuma Mwana ulimwenguni ili auhukumu ulimwengu, bali ulimwengu uokolewe katika Yeye" (Yohana 3:16, 17). Upendo wa Mungu unawakumbatia wanadamu wote. Yesu, katika kutoa utume kwa wanafunzi, alisema: "Enendeni ulimwenguni mwote, mkahubiri Injili kwa kila kiumbi."

Wote waliowekwa wakfu kwa maisha ya Kristo wametengwa maalum ili kufanya kazi kwa ajili ya wokovu wa wanadamu wenzao. Miyo yao itadunda kwa kupatana na moyo wa Yesu. Shauku aliyonayo Yesu kwa ajili ya nafsi za watu Wake itadhihirika ndani yao. Sio wote wanaoweza kujaza sehemu moja katika kazi, lakini kuna mahali na kazi kwa ajili ya wote... Kila kipaji kinapaswa kutumiwa kwa ajili ya maendeleo ya ufalme Wake na ya utukufu wa jina Lake.

Kristo anatamani sana kuwatumia vijana katika huduma Yake. Anahitaji wamishenari. Maeneo ambayo hayajafikiwa ulimwenguni kote huiita mbingu kwa ajili ya watenda kazi. Ikiwa vijana watajitoa kwa Mungu, atawapatia hekima na maarifa, akiwaandaa kwa ajili ya huduma. Ikiwa watajiweka wakfu Kwake, atawafanya kuwa vyombo vya kuleta heshima, ambavyo ndani yake Atamimina maftuta ya thamani ya Roho, ili yatolewe kwa wengine. Mkono wa Mungu wa msaada — hivi ndivyo muvezavyo kuwa ikiwa mtajisalimisha katika utunzaji Wake.

Kwa kila mtu ambaye anajitoa kwa Bwana kwa ajili ya huduma, pasipo kuzuia chochote, anapewa uwezo wa kupata matokeo yasiyo na kipimo. Mungu atafanya mambo makubwa kuititia kwa watu hawa.

Kwa vijana wa kike na wa kiume, kadhalika na kwa wale walio watu wazima, Mungu atawapa nguvu kutoka juu. Wakiwana akili zinazoweza kubadilika, mikono iliyoongolewa, miguu na ndimi zilizobadilishwa, na midomo yao ikiwa imeguswa na kaa la moto kutoka kwenye madhabahu ya Mungu, watasonga mbele kwenye huduma ya Mwalimu, wakisonga mbele na juu zaidi kwa ustadi, wakiipeleka kazi mbele hata kufikia tamati.

## Dumu Kutazama Juu

*Tukimtzama Yesu, mwenye kuanzisha na mwenye kutimiza imani yetu; ambaye kwa ajili ya furaha iliyowekwa mbele yake aliustahimili msalaba na kuidharau aibu, naye ameketi mkono wa kuume wa kiti cha enzi cha Mungu. – Waebrania 12:2.*

**M**iaka kadhaa iliyopita, wakati nikisafiri kutoka Christiania, Norway, kwenda Goteborg, Swedeni, nilipata fadhila ya kuona machweo ya jua yaliyo mazuri mno ambayo ilikuwa ni jambo jema kwangu kuwahi kuyatazama. Luga haitoshi kuonesha uzuri wake. Miale ya mwisho ya machweo ya jua, yenyе rangi ya fedha na dhahabu, ya zambarau, ya kaharabu na ya damu ya mzee, yalionesha uzuri wake kote angani, ikizidi kung'aa zaidi, ikipanda juu zaidi na juu zaidi mbinguni, mpaka ikaonekana kwamba malango ya jiji la Mungu yalikuwa yameachwa wazi kidogo, na miale ya utukufu wa ndani ilikuwa inamulika. Kwa saa mbili uzuri wa kustaajabisha uliendelea kuangaza anga baridi la kaskazini — picha iliyopambwa kwa rangi nzuri na Msanii Mkuu kwenye turubai inayobadilikabadilika ya mbinguni. Kama tabasamu la Mungu, lilionekana, juu ya nyumba zote za kidunia, juu ya tambarare zilizo na miamba, milima mikali, misitu ya upweke, ambapo tulipita katika safari yetu.

Malaika wa rehema walionekana kunong'ona: "Tazama juu! Uzuri huu ni kama mng'ao tu wa nuru inayotiririka kutoka kwenye kiti cha enzi cha Mungu. Usiishi kwa ajili ya dunia pekee. Tazama juu, na utazame kwa imani majumba ya makao ya mbinguni." Mandhari hii ilikuwa kwangu kama upinde wa ahadi kwa Nuhu, ukiniwezesha kushikilia uhakikisho wa utunzaji wa Mungu usioshindwa, na kutarajia mahali salama pa pumziko palipo taraja la mtenda kazi mwaminifu.

Kama watoto wa Mungu, ni fursa yetu kutazama juu daima, tukiweka jicho la imani likikazwa kwa Yesu. Kadiri tunavyodumu kumtazama Yeye, mwanga wa jua la uwepo Wake hujaza vyumba vya akili. Nuru ya Kristo ndani ya hekalu la moyoni huleta amani. Nafsi inahifadhiwa kwa Mungu. Mashaka na wasiwasi wote vinasalimishwa kwa Yesu. Kadiri tunavyoendelea kumtazama Yeye, sura Yake inachorwa ndani ya moyo, na inadhihirishwa katika maisha ya kila siku... Rafiki zangu vijana wapendwa, mtazameni Yesu daima. Hivyo ndivyo tu mtakavyoweza kukaza jicho kuutazama utukufu wa Mungu. Yesu ni nuru na uzima na amani na dhamana yako daima.

## Mkono Ambao Kamwe Hauachilii

*Kwa maana mimi, Bwana, Mungu wako, nitakushika mkono wako wa kuumi, nikikuambia, Usiogope; Mimi nitakusaidia. — Isaya 41:13.*

Jua liliangaza vyema kwenye theluji ing'aayo ya mmojawapo ya milima mirefu zaidi ya Milima ya Alps, msafiri alipokuwa akimfuata kiongozi wake kwenye njia nyembamba... Alikuwa akimwamini kiongozi wake na kufuata nyayo zake bila hofu, japokuwa njia ilikuwa mpya kabisa kwake. Ghafla alisita; kwani yule mpanda mlima shupavu alivuka shimo jembamba lakini lenye kina kirefu sana, na kisha, akinyoosha mkono wake, akamwambia ... (yeye) aushike, na kuvuka. Bado msafiri alisita, lakini kiongozi wake alimtia moyo kutii, akimwondolea shaka kwa kusema, "Shikilia mkono wangu; mkono huu kamwe hauachilii."

Wapendwa marafiki vijana, Mmoja aliye mkuu kuliko kiongozi yejote wa kibinadamu anawaita mmfuate Yeye juu ya vilele vya subira na kujitoa nafsi. Njia siyo rahisi... Muda wote huo, Shetani ameandaa mitego kwa ajili ya kuwatega watu wasio na tahadhari. Lakini tukimfuata Kiongozi wetu, tunaweza kutembea kwa ulinzi kamili; kwa maana njia imetakaswa kwa nyayo Zake. Inaweza kuwa yenyewe mwinuko mkali na mikwaruzo, lakini Yeye ameipita; miguu Yake imeikandamiza chini miiba ili kuifanya njia iwe rahisi kwetu. Kila mzigo tunaoitwa kuubeba, Yeye Mwenyewe alishaubeba. Mawasiliano binafsi na Yeye huleta nuru na tumaini na nguvu. Kwa wale wanaomfuata Yeye, anasema, "Wala hawatapotea kamwe, wala hakuna mtu atakayewapokonya katika mkono wangu." (Yohana 10:28).

Tunapaswa kuishi siku moja tu kwa wakati mwafaka. Hatupaswi kufanya kazi ya maisha yote katika saa chache. Hatupaswi kuiangalia kesho kwa wasiwasi; kwa kuwa Mungu amefanya iwezekane kwetu kuwa washindi kila siku.

Kwa kudumisha imani hai leo, tunapaswa kumshinda adui. Tunalazimika kumtafuta Mungu, na kudhamiria kwamba hatutatulia tukiwa tumeridhika pasipo uwepo Wake. Tunapaswa kukesha na kufanya kazi na kuomba kana kwamba hii ilikuwa ndiyo siku ya mwisho ambayo tumepewa.

Ukiwa katika upatanifu na Mungu leo, uko tayari kama Yesu akirudi leo.

## Makazi ya Edeni

*Bwana Mungu akapanda bustani upande wa mashariki wa Edeni, akamweka ndani yake huyo mtu aliyemfanya. —Mwanzo 2:8.*

**M**akazi yale [makazi ya wazazi wetu wa kwanza], myaliyofanywa kuwa mazuri kwa mkono wa Mungu Mwenyewe, hayakuwa kasri la kifahari. Wanadamu, katika majivuno yao, hufurahia majumba mazuri kabisa na ya gharama kubwa, na kufurahia kazi za mikono yao; lakini Mungu alimweka Adamu bustanini. Haya yalikuwa makazi yake. Mbingu za bluu zilikuwa ni paa lake [kuba]; dunia, na maua yake mororo na zulia la kijani hai, vilikuwa ni sakafu yake; na matawi yenye majani ya miti mizuri ilikuwa kanopi yake. Kuta zake zilining'inizwa kwa mapambo ya fahari zaidi—kazi ya mikono ya Msanifu Mkuu.

Ilikuwa ni mpango wa Mungu kwamba mwanadamu apate furaha katika kazi ya kutunza vitu alivyoviumba, na kwamba mahitaji yake yatimizwe kwa matunda ya miti ya bustani.

Katika mazingira ya wenzi hawa wazuri kulikuwa na somo kwa ajili ya wakati wote — kwamba furaha ya kweli inapatikana, sio katika kuwa na majivuno na maisha ya starehe, bali katika kujumuika na Mungu katika kazi Zake alizoziumba. Kama wanadamu wanagetaka ... kukuza usahili mkubwa, wangekaribia kujua majibu ya kusudi la Mungu katika kuumbwa kwao.... Je! Mali hata ya wale walio matajiri zaidi ni nini, ikilinganishwa na urithi wa heshima aliopewa Adamu?

Bustani ya Edeni ilikuwaswira ya kile Mungu alichotaka ulimwengu wote kuwa, na ilikuwa kusudi Lake kwamba, kadiri familia ya wanadamu ilivyoongezeka kwa idadi, wangeanzisha ... mengine ... kama yale aliyokuwa Ametoa. Hivyo ulimwengu wote ungejawa na makazi na shule, na angepaswa kujifunzia maneno na kazi za Mungu. Po wanafunzi wangefanywa kufaa zaidi na ... u zaidi wangeakisi, katika nyakati zisizo na ... ya ujuzi wa utukufu Wake.

## Ndoa ya Kwanza

*Bwana Mungu akasema, si vema huyo mtu awe peke yake, nitamfanyia msaidizi wa kufanana naye.—Mwanzo 2:18.*

**M**wanamume hakuumbwa ili aishi peke yake; Malipaswa kuwa kiumbe wa kijamii. Bila kuwa na mwenzi, mandhari maridhawa na kazi zenyé kupendeza za Edeni zisingeleta furaha kamilifu. Hata ushirika na malaika usingetosha kukidhi haja ya kuonesha huruma na ushirikiano wa karibu sana. Kulikuwa hakuna wa asili hiyo wa kupenda na kupendwa.

Mungu mwenyewe alimpatia Adamu mwenzi. Alimpatia "msaidizi wa kufanana naye"—msaidizi wa kufanana naye—mmoja ambaye alifaa kuwa mwenzi wake, na ambaye angeweza kuwa mmoja na yeye katika upendo na huruma. Hawa aliumbwa kutoka kwenye ubavu uliotwaliwa kutoka ubavuni mwa Adamu, ikioneshaa kwamba hakupaswa kumtawala yeye kama kichwa, wala sio akanyagwe chini ya miguu yake kama mtu duni, bali kusimama kando yake aliye sawa naye, ili apendwe na kulindwa na mumewe. Sehemu ya mwanamume, mfupa kati ya mifupa yake, na nyama kati ya nyama zake, alikuwa ni nafsi yake [Adamu] ya pili; ikioneshaa mwunganiko wa karibu na mfungamano wa upendo ambao unapaswa kudumu katika uhusiano huu. "Maana hakuna mtu anayeuchukia mwili wake po pote; bali huulisha na kuutunza, kama Kristo naye anavyolitendea Kanisa." *Waefeso 5:29....*

Mungu aliiadhimisha ndoa ya kwanza. Ndivyo taasisi hiyo ilivyo kwa kuwa mwasihi wake ni Muumbaji wa ulimwengu. "Ndoa na iheshimiwe" (*Waibrania 13:4*); ilikuwa ni moja ya zawadi ya kwanza ya Mungu kwa mwanadamu, na ni moja ya taasisi mbili ambazo, baada ya Anguko, Adamu alitoka nazo nje ya malango ya Paradiso. Kanuni za Mungu zinapotambuliwa na kutiiwa katika uhusiano huu, ndoa inakuwa baraka; inatoa ulinzi kwa ajili ya usafi na furaha ya jamii hii, inampatia mwanamume mahitaji ya ushirikiano wa ndoa, inaadilisha mwili, akili na asili ya utu wema.

Kifungo cha familia ni cha karibu zaidi, chema zaidi na kitakatifu kuliko chochote duniani. Familia ilisanifiwa kuwa baraka kwa wanadamu. Na inakuwa Baraka popote pale agano la ndoa linapoingiwa kwa akili, katika uchaji Mungu, na kwa uzingatiaji mahususi wa majukumu yake.

## Kuchanganya Maisha ya Wawili

*Kwa hiyo mwanamume atamwacha baba yake na mama yake naye ataambatana na mkewe, nao watakuwa mwili mmoja. —Mwanzo 2:24.*

**M**ungu aliamua kwamba kuwepo upendo na mwafaka mmkamilifu kati ya wale wanaoingia katika uhusiano wa ndoa. Hebu bibi arusi na bwana arusi, katika uwepo wa ulimwengu wa mbinguni, wapeane ahadi ya kupendana kama ambavyo Mungu aliamuru wafanye.

Pote katika kila familia kuna wigo mtakatifu ambao unapaswa kutunzwa bila ya kuvunjwa. Ndani ya wigo huu hakuna mtu mwingine anayeruhusiwa kuingia. Hebu mwanamume au mwanamke asiruhusu mtu mwingine kushiriki siri ambayo ni haki yao wenyewe. Hebu kila mmoja ampende mwenzie kuliko kuulazimisha upendo. Sitawisheni yaliyo bora zaidi ndani yenu, na muwe wepesi kutambua sifa nzuri za kila mmoja wenu.

Upendo unaweza kuwa angavu kama madini na uzuri katika usafi wake, lakini unaweza usiwe wa kina kwa sababu haujajaribiwa kuonekana kuwa ni imara. Mfanyeni Yesu kuwa wa kwanza na wa mwisho katika mambo yote. Dumuni kumtazama Yeye, na upendo wenu Kwake utakuwa wa kina na imara wakati wote unapokuwa umewekwa kwenye mtihani wa majoribio. Na kadiri upendo wenu Kwake unavyoongezeka, ndivyo upendo wenu kwa kila mmoja utakavyokuwa wa kina na thabiti.

Kutakuwa na mwungano na upendo nyumbani kama kwa hakika Yesu ataumbwa ndani yenu, aliye tumaini la utukufu. Kristo Yesu akaaye ndani ya moyo wa mke ataafikiana na Yesu Kristo akaaye ndani ya moyo wa mume. Watajitahidi kwa pamoja ili kufikia makao ambayo Kristo ameenda kuwaandalia wale wampendao Yeye.

Ni pale tu ambapo Yesu anapatawala ndipo panaweza kuwa na upendo wa kina, wa kweli na usio na ubinafsi. Kisha nafsi itaunganishwa na nafsi, na maisha ya wawili yatachanganyika katika mwafaka wake. Malaika wa Mungu watakuwa wakitembelea nyumbani, na mkesha wao mtakatifu utakitakasa chumba wanapolala wanandoa. [Angalia The Adventist Home, sura ya 18, "Marital Duties and Privileges," uk. 121-128.]

Aina tamu zaidi ya mbingu ni nyumba ambayo Roho wa Bwana ndiye anayengoza.

## Muungano wa Maisha Yote

*Hata wamekuwa si wawili tena, bali mwili mmoja. Basi aliowaunganisha Mungu, mwanadamu asiwatenganiche.—Mathayo 19:6.*

**K**iapo cha ndoa ... kinaunganisha hatima ya watu hao wawili kwa vifungo ambavyo hakuna kitu kitachovivunja isipokuwa kwa mkono wa mauti.

Katika Hubiri la pale Mlimani Yesu alitangaza wazi kwamba hakutakuwa na ukomo wa kifungo cha ndoa, isipokuwa kwa kuvunja uaminifu kwa kiapo cha ndoa. "Kila mtu," Alisema, "amwachaye mkewe, isipokuwa kwa habari ya uasherati, amfanya kuwa mzinzi; na mtu akimwoa yule aliyeachwa, azini" (Mathayo 5:32).

Yesu aliwaelekeza wasikilizaji Wake kwenye taasisi ya ndoa kama ilivyoamriwa wakati wa uumbaji.... Basi ndoa na Sabato vina chanzo chake, taasisi pacha kwa ajili ya utukufu wa Mungu kwa faida ya wanadamu. Kisha, kama ambavyo Muumbaji aliunganisha mikono ya jozi takatifu katika ndoa, ... Aliitangaza sheria ya ndoa kwa ajili ya watoto wote wa Adamu mpaka mwisho wa wakati. Kile ambacho Baba wa Milele Mwenyewe alikuwa ametamka kuwa chema kilikuwa ni sheria ya baraka na maendeleo ya juu zaidi kwa mwanadamu. Kama ilivyo kwa zawadi zingine zote nzuri za Mungu zilizokabidhiwa kwa ajili ya kuwaendeleza wanadamu, ndoa imeharibiwa na dhambi; lakini ni kusudi la injili kurejesha usafi na uzuri wake.

Wanaume na wanawake, mwanzoni mwa maisha ya ndoa, wanapaswa kujiweka wakfu upya kwa Mungu....

Mahali ambapo Roho wa Mungu anatawala, hakutakuwa na mazungumzo yasiyofaa katika uhusiano wa ndoa.

Japokuwa shida, fadhaa, na vikwazo vinaweza kuibuka, hebu mume au mke asiwe na wazo kwamba ndoa yao ipo kwa makosa au ni ya kuvunja moyo. Dhamirieni kuwa vyote vile ambavyo inawezekana kuwa kwa kila mtu. Endezeni usikivu wa awali kabisa. Katika kila njia tianeni moyo kila mmoja katika kupambana na changamoto za maisha. Hebu na mjifunze kuendeleza furaha ya kila mmoja wenu. Hebu na kuwe na upendano na kuvumiliana. Ndoa, badala ya kuwa mwisho wa upendo, itakuwa kana kwamba ndio tu mwanzo wa upendo.

## Hebu Mungu Atawale

*Bwana asipoijenga nyumba Waijengao wafanya kazi bure. Bwanasipoulinda mji yeye aulindaye akesha bure. —Zaburi 127:1.*

**M**ungu ... alitamani kwamba dunia iiazwe na furaha nalamani. Alimuumba mwanadamu kwa ajili ya furaha na Anatamani kujaza miyo ya wanadamu kwa amani ya mbinguni. Anatamani kwamba familia za hapa duniani ziwe ishara za familia kuu ya mbinguni.

Nyumba za Kikristo, zilizoanzishwa na kuendeshwa kulingana na mpango wa Mungu, ni mionganini mwa mawakala. Wake wenye ufanisi zaidi kwa ajili ya uundaji wa tabia ya Kikristo na kwa ajili ya kuendeleza kazi Yake.

Nyumba inapaswa kutengenezwa kuwa kile chote ambacho neno linataka iwe. Inapaswa kuwa mbingu ndogo duniani, mahali ambapo mapenzi yanakuzwa badala ya kuzimishwa kwa bidii. Furaha yetu inategemea ukuzaji huu wa upendo, huruma na heshima ya kweli kwa kila mmoja.

Hebu nyumba yenu iwe ile ambayo Yesu anaweza kuingia na kuwa mgeni wa kudumu. Hebu na iwe vile ambavyo watu watawatambua kwamba ninyi mmekuwa pamoja na Yesu, na mmejifunza Kwake.

Nyumba ambayo washiriki wake ni Wakristo wema na waadilifu huweka mvuta mkubwa sana kwa ajili ya wema. Familia nyinginezo zinaona matokeo yaliyofikiwa na nyumba ya namna hiyo, na kufuata kielelezo walichokiweka, kwa nafasi yao huzilinda nyumba zao dhidi ya mivuto mibaya.

Maalaika wa mbinguni mara kwa mara huitembelea nyumba ambayo mapenzi ya Mungu hutawala ndani yake. Chini ya nguvu ya neema ya Mungu, nyumba ya namna hiyo inakuwa mahali pa burudiko kwa wasafiri waliochoka sana. Ubinafsi unazuiwa ili usitafute mambo yake wenyewe. Tabia njema zinaundwa hapa. Kuna utambuzi makini wa haki za wengine. Imani ambayo inafanya kazi kwa upendo na kuisafisha nafsi inashika usukani, kuongoza familia yote.

Ushuhuda mkuu wa nguvu ya Ukristo ambao unaweza kuwasilishwa duniani ni familia yenyе utaratibu mzuri na nidhamu ya hali ya juu. Hii itawakilisha ukweli kuliko kitu kingine kinavyoweza, kwa maana ni ushuhuda hai wa nguvu yake itendayo kazi kwa kila moyo.

## Upendo Unaodumu

*Maji mengi hayawezi kuuzimisha upendo, wala mito haiwezi kuuzamisha; Kama mtu angetoa badala ya upendo Mali yote ya nyumbani mwake, angedharauliwa kabisa.—Wimbo Ullo Bora 8:7.*

**U**pendo ni zawadi ya thamani, ambayo tunaipata kutoka kwa Yesu. Upendo wa kweli na mtakatifu sio hisia, bali ni kanuni. Wale ambao wanasukumwa na upendo wa kweli, sio wasio na akili wala vipofu.

Upendo wa Mungu utokao kwa Yesu kamwe hauharibu upendo wa wanadamu, bali huujumuisha. Kwa huo upendo wa mwanadamu hufanywa kuwa safi na mtakatifu, huadilishwa na kukuzwa. Upendo wa mwanadamu kamwe hauwezi kuzaa matunda yake ya thamani mpaka pale unapokuwa umeunganishwa na asili ya Uungu na kuelekezwa juu mbinguni.

Upendo wa kweli sio shauku kali, ya harara, na ya haraka. Kinyume chake, ni mtulivu na wa kina katika asili yake. Unaangalia ndani zaidi ya mwonekano wa nje tu, na unavutiwa na sifa njema pekee. Ni wenyewe busara na ubaguzi, mapenzi yake ni ya kweli na ya kudumu.

Miyo ambayo imejazwa na upendo wa Yesu kamwe haiwezi kutengana. Dini ni upendo, na nyumba ya Mkristo ni mahali ambapo upendo unatawala na kuonekana katika maneno na matendo ya wingi wa fadhili na heshima kubwa.

Nyumba zetu sharti zifanywe kuwa Betheli (nyumba ya Mungu), na miyo yetu hekalu takatifu. Popote upendo wa Mungu unapopokelewa kwa upendo moyoni, kutakuwa na amani, kutakuwa na nuru na furaha.

Yesu anataka kuona ndoa zenye furaha, sebule za kuotea moto zenye furaha.

Wanaume na wanawake wanaweza kufikia lengo la Mungu kwao ikiwa watamchukua Kristo kuwa msaidizi wao. Kile ambacho hekima ya binadamu haiwezi kukifanya, neema Yake itakikamilisha kwa ajili ya wale wanaojitoa Kwake kwa uaminifu wa upendo. Uwekevu Wake unaweza kuiunganisha miyo katika vifungo ambavyo ni vya asili ya mbinguni. Upendo hautakuwa kubadilishana tu maneno laini na ya kubembeleza. Ukuu wa mbinguni hufuma kwa nyuzi za mlalo na mkato kutengeneza, lililo imara zaidi, kuliko inavyoweza kufumwa kwa vifumio vya duniani. Matokeo yake sio kitambaa cha nyuzi kilichofumwa, bali msokoto ambao utastahimili mtihani na majaribio. Moyo utafungamanishwa kwa moyo katika vifungo vya dhahabu vya upendo wa kudumu.

## Kupita Kima cha Marijani

*Mke mwema, ni nani awezaye kumwona? Maana kima chake chapita kima cha marijani. Moyo wa mumewe humwamini, wala hatakosa kupata mapato. —Mithali 31:10, 11.*

Furaha ya familia humtegemea zaidi mke na mama.

Hebu kijana na amtafute mmoja wa kusimama upande wake ambaye ameandaliwa kuchukua sehemu yake ya mizigo ya maisha, mmoja ambaye mvuto wake utamfanya kuwa muungwana na mwenye adili, na ambaye atamfanya mumewe kufurahia upendo wake.

Maisha yandoa sio ya kuvutia tu, yana ugumu wake halisi na mambo yake ya nyumbani. Mwanamke asije akajifikiria kuwa mdoli, wa kuhudumiwa, bali mwanamke; ambaye atakubali kubeba mizigo halisi, si ya kufikirika, na kuishi maisha ya ufahamu, yenye kufikiria, kwa kuzingatia kwamba kuna mambo mengine ya kuyafikiria kuliko kujifikiria mwenyewe.

Ujuzi wa kazi za nyumbani ni zaidi ya mali kwa kila mwanamke. Kuna familia zisizohesabika ambazo furaha yao inaharibiwa na uzembe wa mke na mama.

Kila msichana anapaswa kujifunza kuchukua jukumu la shughuli za nyumbani, awe mpishi, mtunza nyumba na mshonaji. Anapaswa kuelewa mambo yote ambayo ni muhimu kwamba mama wa nyumba anapaswa kuyajua.

Ikiwa ni lazima, mtoto wa kike anaweza kuachana na ujuzi wa Kifaransa na aljebra, au hata piano; lakini ni muhimu sana kwamba ajifunze kutengeneza mkate mzuri, kutayarisha mavazi nadhifu, na kutekeleza kwa ustadi kazi nyingi zinazohusu utunzaji wa nyumba.

“Mke mwenye busara mtu hupewa na Bwana” (Mithali 19:14). Moyo wa mumewe humwamini....” “Hufumbua kichwa chake kwa hekima; na sheria ya wema i katika ulimi wake. Huangalia sana njia za watu wa nyumbani mwake; wala hali chakula cha uvivu. Wanawe huondoka na kumwita heri; Mumewe naye humsifu,” na kusema, “Binti za watu wengi wamefanya mema, lakini wewe umewapita wote” (Mithali 31:11, 12, 26–29). Mtu apataye mwanamke wa namna hiyo “apata kitu chema naye ajipatia kibali kwa Bwana.”

## Upendo Hushinda Mitihani

*Akanileta mpaka nyumba ya karamu, na bendera yake juu yangu ni mapenzi. — Wimbo Ulio Bora 2:4.*

Kabla hajakubali kuingia katika ndoa, kila mwanamke anapaswa kujiuliza kama Yule ambaye anakaribia kuunganisha naye hatima yake anastahili. Historia ya rekodi yake ya zamani imekuwa ya namna gani? Je, maisha yake ni safi? Je! Upendo anaouonesha ni wa tabia njema na adilifu, au ni upendo wa mhemkotu? Je! Kijana anazosifa za tabia bainifuzitakazomfanya afurahi? Je! Binti anaweza kupata amani na furaha ya kweli katika upendo wake. Je! Ataruhusiwa kuhifadhi utu wake, au je, ni lazima hukumu na dhamiri yake isalimishwe chini ya udhibiti wa mume wake? Kama mwanafunzi wa Yesu, si mali yake mwenyewe; amenunuliwa kwa gharama. Je! Anaweza kuyaheshimu madai ya Mwokozi kuwa ni ya juu kabisa? Je! Mwili na roho, mawazo na makusudi vitahifadhiwa safi na vitakatifu? Maswali haya yana umuhimu mkubwa kwa ustawi wa kila mwanamke anayeingia kwenye uhusiano wa ndoa.

Ikiwa umebarikiwa kuwa na wazazi wanaomcha Mungu, tafuta ushauri wao. Wajulishe matumaini na mipango yako, jifunze masomo ambayo uzoefu wa maisha yao umefundisha, na utakuwa umesaidiwa kuepukana na huzuni kubwa mno. Zaidi ya yote, umfanye Yesu kuwa ni mshauri wako pekee. Soma Neno Lake kwa maombi.

Chini ya uongozi huo hebu binti akubali kuwa mwenzi wa maisha na yule tu aliye na tabia safi, za mwanamume, mtu mwenye bidii, mwenye malengo, na mwaminifu, yule anayempenda na kumcha Mungu.

Moyo unauonea shauku sana upendo wa kibinadamu, lakini upendo huu hauna nguvu ya kutosha, au sio safi vya kutosha, wa thamani, kutosha kujaza nafasi ya upendo wa Yesu. Mwanamke anaweza kupata hekima, nguvu na neema kukabili mahitaji, majukumu na huzuni za maisha kutoka kwa Mwokozi wake tu. Hebu na amfanye Yesu kuwa nguvu na kiongozi wake. Hebu mwanamke na ajikabidhi kwa Yesu kwanza kabla hajajikabidhi kwenye urafiki wowote wa kidunia na asiingie kwenye uhusiano wowote utakaopingana na hili.

Ni katika Yesu pekee ambapo muungano wa ndoa unaweza kuundwa kwa usalama. Upendo wa binadamu unapaswa kuunganisha vifungo vyake kutoka kwenye upendo wa Mungu. Ni pale tu Yesu anapotawala ndipo panapoweza kuwa na upendo wa kina, wa kweli na usio na ubinafsi.

## Jua au Vivuli?

*Msifungiwe nira pamoja na wasioamini, kwa jinsi isivyo sawasawa; kwa maana pana urafiki gani kati ya haki na uasi? Tena pana shirika gani kati ya nuru na giza? – 2 Wakorintho 6:14.*

**M**oja ya hatari kuu inayowakumba watu wa Mungu leo, ni ile ya kushirikiana na wasiomcha Mungu; hasa katika kuungana katika ndoa na makafiri.

Mamia wamemkana Kristo na mbingu kwa sababu ya kuo watu ambao hawajaongoka.... Furaha na ustawi wa maisha ya ndoa hutegemea umoja wa wahusika. Nia ya kimwili inawezaje kupatana na akili ambayo imeunganishwa na nia ya Kristo? ... Kuna tofauti ya kudumu ya ladha, ya mwelekeo, na ya kusudi. Isipokuwa muumini, kwa kushikamana kwake vizuri na kanuni, atawashinda wasiotubu, kama ilivyo kawaida zaidi, atavunjika moyo na kuachana na kanuni zake za kidini kwa ajili ya ushirika duni wa Yule ambaye hana uhusiano na Mbingu.

Wale ambao wanaukiri ukweli huyakanyaga mapenzi ya Mungu katika kuoana na wasioamini; wanapoteza fadhili Zake na kuifanya kazi ya kutubu kwa uchungu. Wasioamini wanaweza kuwa na tabia bora kabisa ya maadili; lakini ukweli kwamba binti au kijana hajaitikia madai ya Mungu, na amepuuza wokovu mkuu wa namna hii, ni sababu tosha kwa nini muungano huo haufai kukamilishwa.

Kuhusiana na Sulemani Kumbukumbu Iliyovuviwa inasema, "Wake zake wakaugeuza moyo wake, ufuate miungu mingine, wala moyo wake hakuwa mkamilifu kwa Bwana Mungu wake." 1 Wafalme 11:4.... Hebu kumbukumbu ya kuhuzunisha ya ukengeufu wa Sulemani iionye kila nafsi kuepuka mpromoko huo huo.

Ikiwa wanaume na wanawake wana mazoea ya kuomba mara mbili kwa siku kabla ya kufikiria kufunga ndoa, wanapaswa kuomba mara nne kwa siku wakati hatua kama hiyo inapotazamiwa. Ndoa ni kitu ambacho kitahitarisha na kuathiri maisha yako, katika ulimwengu huu na katika ulimwengu ujao.

Isipokuwa kama unataka kuwa na nyumba ambayo vivuli haviondoki kamwe, usijiunge na mtu ambaye ni adui wa Mungu.



## Ubia Wenye Maana

*Kwa maana mume ni kichwa cha mkewe, kama Kristo naye ni kichwa cha Kanisa; naye ni mwokozi wa mwili. – Waefeso 5:23.*

**B**wana alimteua mume kuwa kichwa cha mkewe. Bili awe mlinzi wa mke; ni kiunganishi cha familia, akiwaunganisha wanafamilia pamoja, kama vile Kristo alivyo kichwa cha kanisa na Mwokozi wa mwili wa fumbo. Hebu kila mume anayedai kumpenda Mungu ajifunze kwa uangalifu matakwa ya Mungu katika sehemu yake. Mamlaka ya Kristo yanatumiwa kwa hekima, katika fadhili na utu wema; kwa hiyo hebu mume na atumie nguvu zake na kumuiga kiongozi Mkuu wa kanisa.

Mume anapaswa kukumbuka kuwa sehemu kubwa ya mzigo wa malezi ya watoto uko juu ya mama.... Hili linapaswa kumwamsha ili kutumia hisia zake njema, na kwa kujali ampunguzie mkewe mzigo huu. Anapaswa kumtia moyo mkewe kutumainia upendo wake mkuu kwake.

Sio mume wala mke ambaye anapaswa kujaribu kumtawala mwenzi wake kidikteta. Msijaribu kushurutishana kukubaliana na matakwa yenu. Hamwezi kufanya hivi na mkabaki bado mnapendana. Iweni wema, wavumilivu na wastahimilivu, wenyе huruma na heshima. Kwa neema ya Mungu mnaweza kufanikiwa katika kumfanya kila mmoja awe na furaha, kama mlivyoahidi kufanya katika kiapo chenu cha ndoa.

Ndoa, muunganiko wa maisha yote, ni kielelezo cha muungano kati ya Yesu na kanisa Lake. Roho ile ambayo Yesu anaionesha katika kanisa Lake ndiyo roho ambayo mume na mke wanapaswa kuionesha kwa kila mmoja wao. Ikiwa wanampenda Mungu sana, watapendana katika Bwana.... Katika kujikana nafsi kwao wenyewe kwa wenyewe na kujitoa mhanga wao wenyewe watakuwa baraka kwa kila mmoja wao....

Mungu anataka nyumbani kuwe ni mahali pa furaha zaidi duniani, kielelezo pekee cha maskani ya mbinguni. Wakibeba majukumu ya ndoa nyumbani, wakiunganisha mapenzi yao na Yesu Kristo, wakiegemea juu ya mabega Yake na dhamana Yake, mume na mke wanaweza kushiriki furaha katika muungano ambao malaika wa Mungu huufurahia. Ndoa haipunguzi uwezo wao, bali inauimarisha.

## Wafalme na Malikia

*Nyumba hujengwa kwa hekima, na kwa ufahamu huthibitika.  
Mithali 24:3.*

**K**atika mpango wa Mungu kwa Israeli kila famili kilikuwa na nyumba kwenye shamba, lililokuwa na ardhi ya kutosha kwa ajili ya kulima. Hivyo basi njia na motishini vilitolewa kwa ajili ya kuwa na maisha yenye manufaa, yanayochapakazi na ya kujitegemeza. Na hakuna ubunifu wanadamu ambao umewahi kuweka maboresho katika mpango huo.

Ardhi inazo baraka zilizofichwa ndani ya kina chake kwa wale walio na ujasiri na nia na uvumilivu kukusanya hazinazake. Kina Baba na kina Mama ambao wanamiliki kipande cha ardhi na nyumba ya kuridhisha ni wafalme na malikia.

Makazi ya bei ghali, fanicha za hali ya juu, mapambo, hali ya kustarehe na urahisi, havileti hali muhimu kwa maisha yenye furaha na yenye manufaa. Yesu alikuja humu duniani ili kukamilisha kazi kubwa zaidi iliyowahi kukamilishwa mionganini mwa wanadamu. Alikuwa kama balozi wa Mungu, ili kutuonesha namna ya kuishi ili kwamba tupate matokeo bora zaidi ya maisha. Je! Ni masharti gani yalichaguliwa na Baba wa milele kwa ajili ya Mwanawewe? Nyumba iliyojitenga katika vilima vya Galilaya; kaya iliyofulizwa na uaminifu, kazi ya kuijheshimu; maisha ya kawaida, migogoro ya kila siku pamoja na shida na taabu, kujinyima, uwekevu na uvumilivu, huduma ya furaha, saa ya kujifunza kandokando ya mama Yake, pamoja na gombo lililofunguliwa la Maandiko; utulivu wa nuru ya alfajiri au jioni katika bonde la kijani; huduma takatifu za asili; masomo ya uumbaji na uwekevu; na ushirika wa nafsi na Mungu – haya ndiyo yalikuwa masharti na fursa za maisha ya awali ya Yesu....

Hebu na liwe kusudi lako kutengeneza nyumba ya kufurahisha. Hakikisha kukimu nyenzo ambazo zitaleta wepesi katika kazi na kukuza afya na faraja....

Ijaze nyumba yako kwa vitu dhahiri na vya kawaida, vitu ambavyo vitahimili utunzaji, ambavyo vinaweza kusafishwa kwa urahisi, na ambavyo vinaweza kubadilishwa bila gharama kubwa. Kwa kufanya uchaguzi, unaweza kuifanya nyumba ya kawaida kuwa ya kupendeza na kuvutia, ikiwa upendo na kuridhika vimo humo.

## Hazina Kuu ya Nyumbani

*Mkeo atakuwa kama mzabibu uzaao, vyumbani mwa nyumba yako. Wanao kama miche ya mizeituni Wakiizunguka meza yako.—Zaburi 128:3.*

**W**atoto na vijana ni hazina ya Mungu ya thamani.

Wawili wanapounda familia, ... na hapana watoto ili kufanya kazi subira, uvumilivu na upendo wa kweli, kuna haja ya kukesha daima ili ubinafsi usije ukatawala, ninyi wenyewe msije mkawa kitovu, na mnahitaji usikivu, kujali na mvuto, ambavyo mnahisi kulazimika kuvirithisha kwa wengine.

Utunzaji na upendo kwa watoto wanaotutegemea huondoa ukatili kutoka kwenye desturi zetu, hutufanya kuwa wapole na wenyewe huruma, na kuwa na mvuto wa kukuza misingi adilifu ya tabia zetu.

Henoko alifikia uzoefu wa juu zaidi baada ya kuzaliwa kwa kijana wake wa kwanza; alivutwa katika uhusiano wa karibu sana na Mungu. Alitambua kikamilifu majukumu na wajibu wake mwenyewe zaidi kama mwana wa Mungu. Na kadiri alivyoona upendo wa mtoto kwa Baba yake, imani yake sahili katika ulinzi wake; kadiri alivyoohisi shauku ya kina ya upendo wa moyo wake mwenyewe kwa Yule mwana mzaliwa wa kwanza, alijifunza somo la thamani la upendo wa ajabu wa Mungu kwa wanadamu katika zawadi ya Mwanawe, na ujasiri ambao watoto wa Mungu wanaweza kuwa nao kwa Baba yao wa mbinguni.

Ninawapenda watoto wote.... Nimechukua watoto wengi ili kuwatunza, na siku zote nimehisi kwamba ushirikiano na usahili wa hali ya utoto umekuwa mbaraka mkubwa sana kwangu....

Huruma, ustahimilivu na upendo vinavyohitajika katika kushughulika na watoto vingekuwa mbaraka katika nyumba yoyote. Vingelainisha na kutiisha tabia zilizowekwa kwa wale wanaohitaji kuwa wachangamfu zaidi na watulivu. Uwepo wa mtoto katika nyumba huleta furaha na kuadilisha. Mtoto aliyelelewa katika kumcha Bwana ni mbaraka....

Wanao wa kike na wa kiume ni washirika wadogo wa familia ya Mungu. Amewakabidhi katika uangalizi wako, ili wakufunze na kukuelimisha kwa ajili ya mbingu.

Nafsi ya mtoto mdogo ambayo inamwamini Yesu ni ya thamani machoni Pake kama walivyo malaika wakizungukao kiti Chake cha enzi.

## Je! Ni Urithi wa Namna Gani?

*Manoa akasema, Basi sasa hayo maneno yako yatakapotimia, je! Huyo mtoto atakuwa wa namna gani, na kazi yake itakuwa ni nini? – Waamuzi 13:12.*

**M**aneno yaliyosemwa kwa mke wa Manoa yalikuwa na Mukweli ambao akina mama wa leo wangefanya vyema kuyajifunza.

Mtoto ataathiriwa kwa ajili ya wema au ubaya na tabia za mama. Mama mwenyewe lazima atawaliwe na kanuni, na lazima ajizoeze kuwa na kiasi na kujikana nafsi, kama atataka mafanikio mema ya mwanaye.

Ikiwakabla ya kuzaliwa kwa mtoto wake anakosa msimamo, kama ni mbinafsi, mwenye maudhi na mlazimishaji, tabia ya mtoto wake itabeba alama za mwenendo wake mbovu.... Lakini ikiwa atashikamana na haki bila kuyumba, ikiwa ni mkarimu, mpole na asiye na ubinafsi, atampa mtoto wake sifa hizi za tabia.

Na kina baba kama vile kina mama wanahuksika katika jukumu hili. Wazazi wote wawili huambukiza tabia zao wenyewe, kiakili na kimwili, tabia na uchu wao wa chakula kwa watoto wao.... Swalilakila baba na kila mama lingekuwa, "Kazi ya mtoto huyu atakayezaliwa kwetu itakuwa ni nini?" Matokeo ya athari za kabla ya kujifungua hayajazingatiwa na wengi; lakini maagizo yaliyotumwa kutoka mbinguni kwa wazazi wale Waembrania ... yanaonesha namna jambo hilo linavyochukuliwa kwa umakini na Muumba wetu.

Mama ambaye anafaa kuwa mwalimu kwa watoto wake lazima, kabla ya kuzaliwa kwao, ajenge tabia ya kujikana nafsi na kujidhibiti; kwa maana anawaambukiza tabia zake mwenyewe zilizo bora, sifa zake imara au dhaifu za tabia. Adui wa roho analifahamu jambo hili vyema zaidi kuliko wanavyofahamu wazazi wengi. Ataleta majaribu juu ya mama, akijua kwamba kama hatampinga, anaweza kupitia kwake kudhuru mtoto wake. Tumaini pekee la mama liko kwa Mungu. Anaweza kumkimbia Mungu kwa ajili ya kupata neema na nguvu. Hataomba msaada bure. Mungu atamsaidia ili aweze kuambukiza kwa watoto wake sifa ambazo zitawasaidia kupata mafanikio katika maisha haya na kuupata uzima wa milele.

## Kielelezo kwa Watoto na Vijana

*Yule mtoto akakua, akaongezeka nguvu, ameja hekima, na neema ya Mungu ilikuwa juu Yake. – Luka 2:40.*

**Y**esu ni mfano wetu.... Ni katika maisha ya nyumbani Kwake ndipo anakuwa kielelezo kwa watoto na vijana wote.

Mama Yake alikuwa mwalimu Wake wa kwanza wa kibinadamu. Kutoka katika midomo ya mamaye na kutoka kwenye magombo ya manabii, Alijifunza mambo ya mbinguni.... Ufahamu wake wa karibu wa Maandiko unaonesha jinsi miaka Yake ya awali ilivyotolewa kwa bidii katika kujifunza Neno la Mungu.... Tangu miaka Yake ya awali kabisa alikuwa Amejawa na kusudi moja; Aliishi ili kuwabariki wengine.

Katika ujana Wake alifanya kazi na baba yake katika kazi ya useremala.... Tangu utoto Wake Alikuwa kielelezo cha utii na uchapaji kazi. Alikuwa kama mwanga wa juu wa kupendeza kwenye familia nzima. Kwa uaminifu na kwa furaha Alitenda sehemu Yake, Akifanya kazi za unyenyekevu ambazo Aliitwa kufanya katika maisha Yake ya upole.

Maisha ya Kristo yalikuwa ya unyenyekevu, yasiyo na tabia ya majivuno na kujionesha. Mara nyingi alikuwa mbali na nyumbani.... Ndege, maua ya asili ambayo yalipamba mashamba kwa uzuri wao angavu, miti mizuri na milima mirefu, miamba iliyochakaa na vilima virefu, vyote vilikuwa na mvuto maalum Kwake.... Akiwa amejitenga mbali na uwepo wa wanadamu, alizungumza na Baba Yake wa mbinguni. Nguvu za unyofu Wake ziliimarishwa na tafakari na ushirikiano Wake na Mungu.

Ni fursa ya thamani ya ... wazazi kushirikiana katika kuwafundisha watoto namna ya kunywa katika furaha ya maisha ya Kristo kwa kujifunza kufuata mfano Wake. Miaka ya awali ya Mwokozi ilikuwa ni miaka yenye manufaa. Alikuwa msaidizi wa mama Yake nyumbani; na Alikuwa akitimiza tu utume Wake wakati wa kutekeleza majukumu ya nyumbani na kufanya kazi kwenye benchi la seremala kama vile Aliposhiriki katika kazi Yake ya hadhara ya huduma.

Kila kijana anayefuata kielelezo cha Kristo cha uaminifu na utii katika nyumba Yake ya hali ya chini anaweza kudai maneno hayo yaliyonenwa kuhusiana Naye na Baba kwa njia ya Roho Mtakatifu, "Tazama mtumishi wangu, nimtegemezaye; mteule wangu, ambaye nafsi yangu imependezwa naye" (Isaya 42:1).

## Kazi Kubwa kuliko Zote

*Wana wetu na wawe kama miche Waliokua ujanani. Binti zetu kama nguzo za pembedi zilizonakishwa kwa kupamba hekalu.—Zaburi 144:12.*

**U**husiano bora zaidi unyenyekezao ni ule ulio kati ya mama na mwanawе.

Kila mama ana jukumu takatifu kutoka kwa Mungu kupitia kwa watoto aliokabidhiwa ili kuwatunza. "Mchukue kijana huyu, binti huyu," Anasema; "mlee huyo kwa ajili Yangu; mpatie tabia iliyong'arishwa kufaa kwa ajili ya makao ya kifalme, ili apate kung'aa katika nyua za Bwana milele."

Hii kazi ya kufinyanga, kusafisha, na kung'arisha ni ya mama. Tabia ya mtoto ni lazima ikuzwe. Mama lazima aandike kwenye ubao wa moyo masomo ya kudumu hata ya umilele.

Kufundisha mtoto ni kazi kubwa kuliko zote ziliyowahi kutolewa kwa wanadamu. Mtoto ni wa Bwana, na tangu akiwa mtoto mchanga mikononi mwa mama yake, atafundishwa kwa ajili Yake.

Nyumbani kunapaswa kuwa mahali pa kuvutia zaidi kwa mtoto duniani, na uwepo wa mama unapaswa kuwa kivutio kikubwa zaidi.... Kwa adhabu ya upole, kwa maneno na matendo ya upendo, akina mama wanaweza kuwafunga watoto wao mioyoni mwao.

Kuna Mungu aliye juu, na nuru na utukufu kutoka kwenye kiti Chake cha enzi hukaa juu ya mama huyo mwaminifu anapajaribu kuwaelimisha watoto wake kuinga mvuto wa uovu. Hakuna kazi inayoweza kulinganisha na kazi yake kwa umuhimu. Yeye, kama mchoraji, hajachora umbo la uzuri kwenye turubai, wala, kama mchongaji, kuichonga kutoka kwenye marumaru. Yeye, kama mwandishi, hajajumuisha wazo zuri kwa maneno yenye nguvu, wala, kama mwanamuziki, kuelezea hisia nzuri katika wimbo. Ni kazi yake, kwa msaada wa Mungu, kukuza katika nafsi ya mwanadamu mfano wa Mungu.

Mfalme katika kiti chake cha enzi hana kazi kubwa kuliko kazi ya mama. Mama ni malikia wa nyumba yake. Anao katika uwezo wake uundaji wa tabia za watoto wake, ili waweze kufaa kwa maisha ya juu, ya kutokufa. Malaika hakuweza kuomba utume wa juu zaidi.

## Kiunganishi cha Familia

*Ninyi, akina baba, msiwachokoze watoto wenu; bali waleeni katika adabu na maonyo ya Bwana. – Waefeso 6:4.*

**K**ama ilivyo kazi kubwa ya mama, isije ikasahaulika kuwa baba pia anayo sehemu ya kutenda katika kutoa elimu na katika malezi ya watoto wake.... Hasa kadiri watoto wanavyokua ndivyo mvuto wa baba unavyohitajiwa, katika muungano na ule wa mama, kuwazuia, kudhibiti na kuwaongoza.

Baba Mkristo ni kiunganishi cha familia yake, akiwaunganisha kwenye kiti cha enzi cha Mungu. Kamwe shauku yake kwa watoto wake isipungue. Baba ambaye ana familia ya watoto wa kiume hapaswi kuwaacha hawa wavulana wasiotulia kabisa chini ya uangalizi wa mama.... Anapaswa kujitahidi kuwa swahiba na rafiki yao. Anapaswa kujitahidi kuwaepusha na washirika waovu.... Anapaswa kujitwika mzigo zaidi, akifanya yote awezayo kuwaongoza wavulana wake kwa Mungu.

Watoto wanaposhindwa kujizuia na kusema maneno yenye hisia kali, wazazi wanapaswa kunyamaza kwa muda.... Ukimya ni dhahabu, na utasaidia zaidi kuleta toba kuliko maneno yoyote yanayoweza kutamkwa. Shetani hufurahishwa sana wazazi wanapowaudhi watoto wao kwa kusema maneno makali na ya hasira.... "Ninyi, akina baba, msiwachokoze watoto wenu, wasije wakakata tamaa." Wakolosai 3:21.... Hebu ruhusu utulivu wako usaidie kuwarejesha katika hali nzuri ya akili.

Kwa usimamizi mzuri na wa busara, akina baba kadhalika na akina mama wanapaswa kuwafunga watoto wao kwao kwa vifungo thabiti vya heshima, shukrani, na upendo, na wanapaswa kuchochea ndani ya mioyo yao michanga, shauku ya dhati ya uadilifu na ukweli. Wakati mama anatafuta kupandikiza kanuni nzuri, baba anapaswa kuona kwamba mbegu ya thamani haisongwi na ukuaji wa uovu. Nidhamu yake kali inahitajika ili watoto wake wajifunze uthabiti na kujidhibiti....

Baba Mkristo, fanya kazi kwa upole, kwa subira, kwa ajili ya ustawi wa watoto wako. Tafuta kugeuza mioyo yao kuielekea miale angavu ya Jua la Haki. Wafundishe kwa kanuni na kielelezo kwamba roho ya Kristo ni roho ya utendaji mema.

## Kushika Hatamu za Serikali

*Enyi watoto, watiini wazazi wenu katika Bwana, maana hii ndiyo haki. – Waefeso 6:1.*

**M**apenzi ya Mungu ni sheria ya mbinguni. Wakati lambapo sheria ile ilikuwa kanuni ya maisha, familia yote ya Mungu ilikuwa takatifu na yenye furaha. Lakini sheria ya Mungu ilipovunjwa, ndipo husuda, wivu na ugomvi vikaanzishwa, na sehemu ya wakazi wa mbinguni ikaanguka. Wakati sheria ya Mungu inapoheshimiwa katika makazi yetu ya duniani, familia itakuwa ni yenye furaha.

Somo la kwanza kabisa mtoto analohitaji kujifunza ni somo la utii. Kabla hajafikia umri wa kupambanua mambo, anaweza kufundishwa kutii.

Mama ni malikia wa nyumbani, na watoto ni raia wake. Anapaswa kuiongoza nyumba yake kwa hekima, katika hadhi ya umama wake. Ushawishi wake katika nyumba ni kuwa mkuu.

Kamwe ukaidi haupaswi kuruhusiwa kuendelea bila kukemewa. Ustawi wa baadaye wa mtoto unahitaji kufundishwa nidhamu ya upole, upendo, lakini iliyo thabiti.... Haiwezekani kueleza vizuri uovu unaotokana na kuacha mtoto kufanya mapenzi yake mwenyewe.

Utawala unaofaa – wakati fulani ukishikilia kanuni kwa uthabiti, na wakati mwingine ukiruhusu yale ambayo yamekataliwa – ni uharibifu kwa mtoto.

Uthabiti usioyumba na uongozi wenye msimamo ni muhimu kwa ajili kutunza nidhamu ya kila familia. Sema kile unachomaanisha kwa upole, nenda kwa uangalifu, na utekeleze unayosema bila kukengeuka.

Matakwa ya wazazi yanapaswa kuwa ya busara kila wakati; fadhili inapaswa kuoneshwa, si kwa kuendekeza upumbavu, bali kwa mwongozo wa hekima. Wazazi wanapaswa kuwafundisha watoto wao kwa raha, bila kukaripia au kutafuta makosa, wakitafuta kufunga mioyo ya watoto kwao kwa kamba za hariri za upendo.

Ushawishi wa pamoja wa mamlaka na upendo vitafanya iwezekane kushikilia kwa uthabiti na kwa fadhili hatamu za utawala wa familia. Tukielekeza fikra zetu kwa utukufu wa Mungu na kwa kile ambacho watoto wetu wanawiwa na Yeye kutatuepusha na ulegevu na kuruhusu uovu.

## Kamba za Hariri za Upendo

Tena iweni wafadhili ninyi kwa ninyi, wenyewe huruma, mkasameheane kama na Mungu katika Kristo alivyowasamehe ninyi. — Waefeso 4:32.

**K**anuni inayofundishwa na sheria, "Mpendane ninyi kwa Ninyi" (Warumi 12:10), iko katika msingi wa furaha ya nyumbani.

Ukosefu wa huruma, kulalamika na hasira humzuia Yesu kukaa nyumbani. Niliona kwamba malaika wa Mungu wataondoka kwenye nyumba ambapo kuna maneno mabaya, yasiyofaa na mabishano.

Tabia za upole, mazungumzo ya uchangamfu, na matendo ya upendo yatafunga mioyo ya watoto kwa wazazi wao kwa kamba za hariri za upendo na kufanya mengi zaidi ili kuifanya nyumba ivutie kuliko mapambo adimu sana yanayoweza kununuliwa kwa dhahabu.

Upendo wa kweli unapaswa kutunzwa kati ya Mume na Mke, wazazi na watoto, kaka na dada. Maneno ya kuropoka yanapaswa kuangaliwa, na wala hapastahili kuwa na hata mwonekano wa kukosekana kwa upendo wa mmoja kwa mwingine.... Watoto wanapaswa kuwastahi na kuwaheshimu wazazi wao, na wazazi wanapaswa kudhihirisha uvumilivu, utu wema na upendo kwa watoto wao. Kila mmoja anapaswa kutafuta kwa kila njia iwezekanayo kuwaridhisha na kuwafurahisha washiriki wa duru ya familia.

Matendo ya wema .... Yataifunga mioyo pamoja, na itawavuta karibu kwenye moyo wa Yule ambaye kila msukumo wa ukarimu unatoka. Wema kidogo, matendo madogo ya upendo na kujitoa mhanga, ambavyo hutiririka kutoka kwenye maisha kwa utulivu kama harufu nzuri kutoka kwenye maua — haya hutoa zaidi sana baraka na furaha ya maisha.

Lo, ni miale mizuri na ya kupendeza jinsi gani iliyooneshwa katika maisha ya kila siku ya Mwokozi wetu! Ni uzuri wa jinsi gani ultiririka kutoka katika uwepo Wake! Roho iyo hiyo itadhihirishwa kwa watoto Wake. Wale ambao Kristo anakaa nao watazingirwa na angahewa la uwepo wa Mungu. Mavazi yao meupe ya usafi yatakuwa harufu nzuri ya manukato kutoka kwenye bustani ya Bwana. Nyuso zao zitaakisi nuru kutoka kwenye nuru Yake, zikiangazia njia kwa ajili ya nyayo zilizozuiwa na kuchoshwa.

## Kufanya Kazi Pamoja

*Mchukuliane mizigo na kuitimiza hivyo sheria ya Kristo. – Wagalatia 6:2.*

**W**atoto na wazazi wana majukumu ya muhimu nyumbani. Wanapaswa kufundishwa kwamba wao ni sehemu ya familia madhubuti. Wanalishwa na kuvishwa na kupendwa na kutunzwa; na wanapaswa kuitikia rehema hizi nyingi kwa kubebe sehemu yao ya mizigo ya nyumbani, kuleta furaha yote inayowezekana katika familia.

Hata wale wadogo wanapaswa kufundishwa kushiriki katika kazi za kila siku, na wanapaswa kufanywa kuhisi kwamba usaidizi wao unahitajika na unakubaliwa. Wale wakubwa wanapaswa kuwa wasaidizi wa wazazi wao, wakiingia katika mipango yao, na kushiriki majukumu na mizigo yao. Hebu akina baba na akina mama watumie muda kuwafundisha watoto wao, hebu na wawaoneshe kwamba wanathamini usaidizi wao, wanahitaji ujasiri wao na kufurahia ushirikiano wao, na watoto hawatasita kuitikia. Sio tu kwamba mzigo wa wazazi utapunguzwa, na watoto kupokea mafunzo ya vitendo ya thamani isiyo na kifani, lakini kutakuwa na uimarishaji wa uhusiano wa nyumbani na kuimarishwa kwa misingi ya tabia.

Kazi ni nzuri kwa watoto; wanafurahi zaidi kutumia kwa ufanisi sehemu kubwa ya muda; hufurahia maburudisho yao yasiyo na madhara kwa uchangamfu mkubwa baada ya kukamilisha kwa mafanikio kazi zao. Kazi huimarisha vyote viwili, misuli na akili. Kina mama wanaweza kutengeneza wasaidizi wadogo wa watoto wao.

Ukubali wa Mungu u katika uhakika wa upendo juu ya watoto ambao kwa uchangamfu hufanya sehemu yao katika majukumu ya maisha ya nyumbani, wakishiriki mzigo wa baba na mama.

Ikiwa watoto wangefundishwa kuheshimu mfululizo wa majukumu ya kila siku kama kazi waliyopangiwa na Bwana, ... kazi yao ingeonekana kuwa ya kupendeza na ya uadilifu. Kufanya kila jukumu kama kufanya kwa Bwana, kunaweka mvuto mnamo kazi ya unyenyekevu, na kuwaunganisha watenda kazi duniani na viumbe watakatifu ambao wanayafanya mapenzi ya Mungu mbinguni.

## Nitawaokoa Watoto Wako

*Naam, Bwana asema hivi, hata jeshi la wafungwa wake aliye hodari watapokonywa mikononi mwake, na mateka yake aliye jabari wataokoka; kwa maana nitateta na yeye atetaye nawe, nami nitawaletea wana wako wokovu. – Isaya 49:25.*

**V**ijana ni shabaha ya mashambulio maalum ya shetani.

Popote tunapogeukia, pambano linaendelea bila kukoma.... Wengi wa vijana wanazolewa na wimbi la uovu linaloangamiza. Ndani ya moyo wa kila Mkristo mwenye bidii swali linaibuka, "Kwa nini, loo, mbona, katika nchi ya Biblia na mafundisho ya Kikristo, adui wa nafsi anaweza kutumia juu ya ujana wetu mamlaka yenyenye nguvu sana, isiyozuiliwa?" Sababu iko wazi. Wazazi wanapuuza wajibu wao makini.

Ikiwa shamba litaachwa bila kulimwa, mimea ya magugu ni lazima itaota. Ndivyo ilivyo na kwa watoto. Ikiwa udongo wa moyo hautalimwa, Shetani anaotesha mbegu zake za hasira na chuki, ubinafsi na kiburi, na kisha zinaota kwa haraka, kutoa mazao ambayo wazazi wanavuna kwa majuto machungu. Kwa kuchelewa wanaona makosa yao ya kutisha.

Moja ya ishara za "siku za mwisho" ni kwa watoto kukosa utii kwa wazazi wao. Dhambi ya uasi dhidi ya mamlaka ya wazazi, iko katika msingi wa mateso na uhalifu ulimwenguni leo.

Yesu anawapenda watoto na vijana. Anafurahia pale anapomwona Shetani anashindwa katika juhudzi zake ili kuwashinda. Vijana wengi wanakaribia hatari kwa njia ya majoribu ya namna nyingi, lakini Mwokozi anawahurumia, na anatumia malaika Zake ili kuwaokoa na kuwalinda. Yeye ni Mchungaji Mwema, aliye tayari daima ... kutafuta kondoo waliopotea na kutangatanga.

Wazazi wanasimama mahali pa Mungu kwa watoto wao, na watapaswa kutoa hesabu, kama wamekuwa waaminifu kwa kazi iliyowekwa katika amana yao.

(Wazazi Wakristo,) iweni wa kweli kwenye amana yao. Mungu atawasaidia. Wakiongozwa na Yeye, watoto wenu watakua na kuwabariki na kuwaheshimu katika maisha haya na kwa yale yajayo.

## Watoto Wadogo Wanaweza kuwa Wakristo

*Lakini Yesu akasema, Waacheni watoto wadogo waje kwangu; wala msiwazuie; kwa maana walio mfano wa hao, ufalme wa mbinguni ni wao.—Mathayo 19:14.*

**M**ungu anataka kila mtoto wa umri mdogo awe Mwanawe, ili aasiliwe katika familia Yake. Japokuwa wanaweza kuwa wadogo, vijana wanaweza kuwa washiriki wa nyumba ya imani, na kuwa na uzoefu wa thamani mno.

Nilikuwa na umri wa miaka kumi na mbili nuru ilipozuka moyoni mwangu. Nilikuwa na wazazi wacha Mungu, ambao walijaribu kila njia kuwafanya watoto wao kuhusiana na Baba yao wa mbinguni. Tuliimba sifa za Mungu katika nyumba yetu. Tulikuwa na ibada ya familia kila asubuhi na jioni. Kulikuwa na watoto nane katika familia, na kila fursa ilitumiwa na wazazi wetu kutuongoza ili tutoe mioyo yetu kwa Yesu.

Watoto wanaathiriwa zaidi na mafundisho ya injili; mioyo yao iko wazi kupokea mvuto wa Mungu, na wenyewe uwezo kuhifadhi masomo waliyopokea. Watoto wadogo wanaweza kuwa Wakristo, wakiwa na uzoefu kulingana na miaka yao.

Wazazi wenyewe furaha ni wale ambao maisha yao ni kielelezo cha kweli cha utakatifu, ili kwamba ahadi na amri za Mungu ziamshe katika mtoto shukrani na heshima; wazazi ambao huruma na uadilifu na ustahimilivu wao hufafanua kwa mtoto upendo na haki na ustahimilivu wa Mungu; na ambao, kwa kumfundisha mtoto kuwapenda na kuwaamini na kuwatii, wanamfundisha kumpenda na kumwamini na kumtii Baba yake wa mbinguni. Wazazi wanaompa mtoto zawadi ya namna hiyo wamemjalia hazina yenyewe thamani zaidi kuliko utajiri wa nyakati zote — hazina inayodumu hata umilele.

Kamwe usiruhusu watoto wako wafikiri kwamba sio watoto wa Mungu mpaka wanapokuwa wakubwa kutosha kubatizwa.

Ikiwa watafundishwa vyema, watoto wadogo sana wanaweza kuwa na mtazamo sahihi wa hali yao ya dhambi na njia ya wokovu kupitia kwa Yesu.

Kwa upendo, imani na maombi hebu wazazi wafanye kazi kwa ajili ya nyumba zao, mpaka kwa furaha waweze kumwendea Mungu wakisema, "Angalieni, mimi na watoto hawa niliopewa na Bwana" (Isaya 8:18).

## Kujilisha Neno la Mungu

*Na maneno haya ninayokuamuru leo, yatakuwa katika moyo wako; nawe uwafundishe watoto wako kwa bidii, na kuyanena uketipo katika nyumba yako, na utembeapo njiani, na ulalapo na uondokapo. – Kumbukumbu la Torati 6:6, 7.*

Baba yetu wa mbinguni, katika kutoa Neno Lake, Bhakuwapuuza watoto. Katika yote ambayo wanadamu wameandika, ni wapi panaweza kupatikana kitu chochote ambacho kinaweza kuugusa moyo hivyo, kitu chochote kilichotoholewa vizuri ili kuamsha shauku ya watoto wadogo, kama visa vya Biblia? Katika visa hivi rahisi kunaweza kuwekwa wazi kanuni kuu za sheria ya Mungu.

Shule ya Sabato huwapatia wazazi na watoto fursa ya thamani kwa ajili ya kujifunza Neno la Mungu.... Wazazi, tengeni muda kidogo kila siku kwa ajili ya kusoma somo la shule ya Sabato pamoja na watoto wenu.... Wazazi na watoto, watapata faida katika kujifunza huku. Hebu vifungu muhimu zaidi vya Maandiko vinavyohusiana na somo vitunzwe akilini, sio kama wajibu, bali kama fursa....

Weka utaratibu wa kujifunza Maandiko katika familia zenu. Puuzia kila kitu chenye asili ya kitambo; ... lakini uwe na uhakika kwamba nafsi inalishwa kwa mkate wa uzima.

Kuna faida nyingi zinazopatikana katika kujilisha Neno Lake.... Tabia za kujidhibiti zinaundwa na kuimariswa. Madhaifu ya utoto – kutoridhika, kukosa utii, ubinafsi, maneno ya harara, matendo ya shauku kali – hutoweka, na mahali pao panakuzwa hali ya kuwa wanaume na wanawake Wakristo.

Tunahitaji kumtambua Roho Mtakatifu kuwa ni Yeye atutiaye nuru. Roho huyo anapenda kuongea na watoto, na kuwafunulia hazina na uzuri wa Neno. Ahadi zilizosemwa na Mwalimu Mkuu zitavutia hisia na kuihuisha nafsi ya mtoto huyo kwa nguvu za kiroho ambazo ni za Mungu. Katika akili sikivu kutakuwa na ujuzi wa mambo ya Mungu ambao utakuwa kama kizuizi dhidi ya majaribu ya adui.

## Saa Tamu Zaidi ya Siku

*Bwana, asubuhi utaisikia sauti yangu, asubuhi utaisikia dua yangu na kutazamia. – Zaburi 5:3.*

**K**ama kumewahi kuwa na wakati ambapo kila nyumba kinapaswa kuwa nyumba ya maombi, ni sasa.

Katika kila nyumba ya Kikristo Mungu anapaswa kuheshimiwa kwa dhabihu za asubuhi na jioni za maombi na sifa. Watoto wanapaswa kufundishwa kuzingatia na kuheshimu saa za maombi. Ni wajibu wa wazazi Wakristo, kuwazungushia wigo watoto wao, asubuhi na jioni kwa maombi ya dhati na imani stahimilivu.

Saa za ibada ya asubuhi na jioni zinapaswa kuwa tamu na zenye manufaa zaidi ya siku. Hebu na ieleweke kwamba ndani ya saa hizi hakuna fikra za taabu, zisizo njema ambazo zinapaswa kujipenyeza; kwamba wazazi na watoto wakusanyike ili kukutana na Yesu, na kukaribisha ndani ya nyumba uwepo wa malaika watakatifu. Hebu huduma ziwe fupi na zenye uchangamfu, ziendane na mazingira, na zinazobadilika mara kwa mara. Hebu wote wajiunge katika usomaji wa Biblia, na kujifunza na kurudia mara kwa mara sheria ya Mungu.

Katika kanisa la nyumbani watoto wanapaswa kujifunza kuomba na kumwamini Mungu.... Njooni kwa unyenyekevu, kwa moyo uliojaa huruma, na kwa hisia ya majaribu na hatari mbele yenu na watoto wenu; kwa imani uwafunge madhabahuni, na kuwaombea utunzaji wa Bwana. Wafunze watoto kutoa maneno yao rahisi ya maombi. Waambie kwamba Mungu anafurahi kuona kuwa na wao wanamwita Yeye.

Je! Bwana wa mbinguni atazipita nyumba hizo, na kutoacha baraka hapo? Hakika, hapana. Malaika wahudumu watawalinda watoto ambao wamejiweka wakfu kwa Mungu. Wanaskia uimbaji wa sifa na maombi ya imani, na wanachukua maombi yao Kwake yeye ambaye anahudumu katika patakatifu kwa ajili ya watu Wake, na kutoa kustahili Kwake kwa niaba yao.

Masomo mazuri ya visa na mifano ya Biblia, maagizo safi na sahili ya Neno la Mungu Takatifu, ni chakula cha kiroho kwa ajili yako na watoto wenu. Lo, kazi ya pekee sana i mbele yako! Je! Utaing'ang'ania kwa upendo na kwa kumcha Mungu?

## Kuimba Maishani

*Heri watu wale waijuao sauti ya shangwe, Ee Bwana, huenenda katika nuru ya uso wako.—Zaburi 89:15.*

**K**ama vile Wana wa Israeli walipokuwa wakisafiri jangwani, waliifurahia safari yao kwä kuimba muziki wa nyimbo takatifu, ndivyo Mungu anavyowaalika watoto Wake leo kufurahia maisha ya kusafiri kwao. Zipo njia chache zenyе ufanisi zaidi katika kuweka maneno Yake kwenye kumbukumbu kuliko kuyarudia katika nyimbo. Na nyimbo hizo zina nguvu ya ajabu kabisa. Zina uwezo wa kutiisha asili mbovu na zisizokuzwa; uwezo wa kuhuishha mawazo na ... kukuza maelewano ya vitendo.... Ni mojawapo ya njia zenyе matokeo zaidi za kukaza moyo na ukweli wa kiroho. Ni mara ngapi kwa nafsi iliyosongwa sana na kuwa tayari kukata tamaa, kumbukumbu huikumbusha neno la Mungu—mzigo uliosahaulika kwa muda mrefu wa wimbo wa utoton—na kufanya majaribu kupoteza nguvu zake.... Hebu na kuwe na uimbaji nyumbani, wa nyimbo zilizo nzuri na safi, hapo kutakuwa na maneno machache ya lawama, na mengi zaidi yashangwe na amani na furaha.

Katika kazi Zake, Yesu alichukua pamoja Naye furaha na busara.... Mara nyingi alidhihirisha furaha ya moyo Wake kwa kuimba zaburi na nyimbo za mbinguni. Mara kwa mara wakazi wa Nazareti waliisikia sauti Yake ikiwa imeinuliwa katika kuimba sifa na shukrani kwa Mungu. Alidumisha ushirika na mbingu katika nyimbo; na wakati washirika Wake walipolalama kuchoshwa na kazi, walihuishwa kwa sauti tamu ya wimbo kutoka midomoni Mwake. Kuimba Kwake sifa kulionekana kuwafukuzia mbali malaika waovu, na, kama vile uvumba, kupajaza mahali kwa harufu nzuri.

Aliikaribisha nuru ya asubuhi kwa sauti ya uimbaji. Alimsikiliza ndege aimbaye [lark] akiimba wimbo kwa Mungu wake, na kuunganisha sauti Yake na wimbo wa sifa na wa shukrani.

Wimbo ni silaha ambayo tunaweza kuitumia wakati wote dhidi ya kukatishwa tamaa. Sauti za wimbo wa kushukuru, wa sifa na shangwe zinasikika mbinguni. Sauti za malaika mbinguni zinaungana na sauti za watoto wa Mungu duniani wanapotoa heshima na utukufu na sifa kwa Mungu na kwa Mwana-Kondoo kwa ajili ya wokovu mkuu uliotolewa.

Hebu na tujifunze wimbo wa malaika sasa, ili kwamba tuweze kuuimba tutakapoungana na safu yao ya uimbaji.

## Siku ya Furaha Zaidi

*Zitakaseni sabato zangu; zitakuwa ishara kati ya mimi na ninyi, mpate kujua ya kuwa mimi ndimi Bwana, Mungu wenu. —Ezekieli 20:20.*

**S**abato ingefanywa ya kuvutia sana kwa familia zetu ili kwamba ujio wake wa kila juma ushangiliwe kwa furaha. Shule ya Sabato na mkutano kwa ajili ya Ibada huchukua sehemu tu ya Sabato. Sehemu iliyobaki kwa familia inaweza kufanywa kuwa majira matakatifu na ya thamani zaidi ya saa zote za Sabato.

Katika akili za watoto fikra ya Sabato inapaswa kufungwa kwa uzuri wa mambo ya asili.... Heri ni 'wa baba na mama ambao wanaweza kuwafundisha watoto wao neno la Mungu lililoandikwa na kwa vielelezo kutoka kwenye kurasa wazi za kitabu cha asili; ambao wanaweza kukusanyika chini ya miti ya kijani, yenyе hewa safi inayoburudisha, ili kulisoma Neno na kuimba sifa kwa Baba wa mbinguni.

Hebu wazazi na watembee na watoto wao kwenye mbuga na msituni kwenye hali ya hewa ya kupendeza. Katikati ya mambo mazuri ya asili waambie sababu ya uanzishwaji wa Sabato. Waeleze kuhusiana na kazi kubwa ya Mungu ya uumbaji. Waambie kwamba dunia ilipotoka katika mikono Yake, ilikuwa takatifu na nzuri mno. Kila ua, kila kichaka, kila mti, kiliitikia kusudi la Mwumbaji wake.... Waoneshe kwamba ilikuwa ni dhambi iliyoharibu kazi ya Mungu kamilifu; kwamba miiba na mbaruti, huzuni na maumivu na mauti, yote haya ni matokeo ya kutokumtii Mungu. Waambie waiangalie dunia, ijapokuwa imeharibiwa na laana ya dhambi, bado inafunua wema wa Mungu.

Ikiwa tunaweza kukuza ndani yetu uzuri wa roho unaolingana na uzuri wa asili unaotuzunguka, kutakuwa na mchanganyiko wa mawakala wa Mungu na wa kibinadamu.

Kadiri jua linapotua, hebu sauti ya maombi na wimbo wa sifa uweke ishara ya kuhitimishwa kwa saa takatifu na kualika uwepo wa Mungu kwenye mahangaiko ya juma la kazi.

Hivyo wazazi wanaweza kuifanya Sabato, kuwa kama inavyopaswa kuwa, siku ya furaha zaidi ya Juma. Wanaweza kuwaongoza watoto wao kuiona kuwa ni ya furaha, siku ya siku, takatifu ya Bwana, yenyе kuheshimika.



## Vazi la Kitalme la Mbinguni

Hata mtoto hujijulisha kwa matendo yake; kwamba kazi yake ni safi, kwamba ni adili.—*Mithali 20:11.*

**B**ora zaidi kuliko urithi mwingine wowote wa mali Bunaoweza kuwapa watoto wako utakuwa zawadi ya mwili wenye afya, akili timamu na tabia njema.

Masomo waliyojifunza, mazoea yaliyoundwa, wakati wa miaka ya kitoto na ya utotoni yana uhusiano zaidi na uundwaji wa tabia na mwelekeo wa maisha kuliko kuwa na maagizo na mafunzo yote ya baada ya miaka kadhaa.

Mungu hajazuia mbaraka ambao ni wa muhimu kwa ajili ya uundaji wa tabia ya watoto na vijana kulingana na kielelezo cha Mungu kilichotolewa kwao katika ujana wa Yesu.

Ukuaji wa Yesu kimwili, na maendeleo Yake ya kiroho, unaletwa kwetu katika maneno haya, "Yule mtoto akakua," na "akazidi kuendelea katika hekima na kimo." Katika utoto na ujana tahadhari inapaswa kutolewa kwa maendeleo ya kimwili. Wazazi wanapaswa kuwalea watoto wao katika mazoea mazuri ya kula na kunywa, kuvaa na kufanya mazoezi, ili msingi mzuri uwekwe kwa ajili ya afya njema katika maisha ya baadaye.... Hilo huwaweka watoto na vijana katika nafasi nzuri, ili, wakiwa na mafunzo yanayofaa ya kidini, waweze, kama Kristo, kuwa na nguvu katika roho.

Hebu vijana na watoto wadogo wafundishwe kujichagulia vazi hilo la kifalme lililofumwa katika kifumio cha mbinguni, cha "kitani nzuri, safi na nyeupe" (*Ufunuo 19:8*), ambayo watakatifu wote wa dunia watalivaa. Vazi hili, tabia ya Yesu Kristo mwenyewe isiyo na doa, hutolewa bure kwa kila mwanadamu. Lakini wote watakaolipokea watalipokea na kulivaa hapa na sasa duniani.

Hebu watoto wafundishwe kwamba wanapofungua akili zao kwa mawazo safi, yenye upendo na kufanya matendo ya upendo na msaada, wanajivika vazi Lake zuri la tabia. Vazi hili litawafanya wapendeze na kupendwa hapa, na baadaye itakuwa haki yao ya kukubaliwa kwenye kasri la Mfalme. Ahadi Yake ni: "Watakwenda pamoja nami hali wamevaa navazi meupe, kwa kuwa wamestahili" (*Ufunuo 3:4*).

## Mahali pa Kimbilio

*Msisahau kuwafadhili wageni; maana kwa njia hii wengine wamewakaribisha malaika pasipo kujua. – Waebraania 13:2.*

**U**tu wema wetu unapaswa kuvuka mipaka ya ubinafsi na wigo wa kuta za familia. Kuna fursa za thamani kwa wale ambao watafanya nyumba zao kuwa mbaraka kwa wengine.

Tuko katika ulimwengu wa dhambi na majaribu; tunazungukwa kote na roho zinazoangamia nje ya Yesu, na Mungu anataka tufanye kazi kwa ajili yao katika kila njia iwezenayo. Kama unayo nyumba nzuri, waalike humo vijana wasio na makazi, wale wanaohitaji msaada, wanaotamani kuhurumiwa na kusikia maneno ya fadhili, kwa ajili ya heshima na adabu.

Nyumba zetu zinapaswa kuwa mahali pa kimbilio kwa vijana waliojaribiwa. Wapo wengi wanaosimama katika njia panda pasipo na cha kufanya. Kila mvuto, kila ushawishi, unaweka chaguo linalounda hatima yao hapa na baadaye. Uovu unawaalika kwake. Makimbilio yake yamefanywa kuwa mazuri na ya kuvutia. Yana nafasi kwa kila anayekimbilia hapo. Vijana ambao hawana makazi wanatuzunguka kote, na wengi nyumba zao hazina uwezo wa kuwasaidia na kuwainua, na hivyo basi vijana huuelekea uovu....

Vijana hawa wanahitaji mkono ulionyoshwa kwao katika huruma.... Ikiwa tunataka ... tuwaalike majumbani mwetu, na kuwazingira kwa mvuto wa kuchangamsha na wa msaada, kuna wengi ambao wanaweza kugeuza hatua zao kwa furaha kuiendea njia ya mbinguni.

Msimu wa maombi hufanya mguso wake kwa wale wanaopokea maburudisho, na hata mjadala kidogo unaweza kumaanisha kuokoa roho kutoka mautini.

Hebu wageni waone kwamba tunajitahidi kukubaliana na mapenzi ya Kristo.... Angahewa la nyumba ya Kikristo ya kweli ni ile ya amani na utulivu. Mfano wa namna hiyo hautakuwa bila athari.

Unapofungua mlango wako kwa wahitaji na wanaoteseka wa Bwana Yesu Kristo, unawakaribisha malaika wasioonekana. Unaalika mshikamano na viumbe wa mbinguni. Wanaleta hali takatifu ya furaha na amani. Wanakuja wakiimba sifa midomoni mwao, na shauku ya kutoa majibu inasikika mbinguni. Kila tendo la rehema hufanya muziki usikike huko.

## Wigo Unaozidi Kupanuka

*Mlee mtoto katika njia impasayo, Naye hataiacha hata atakapokuwa mzee. — Mithali 22:6.*

**A**kina baba na akina mama wanapaswa kuhisi kwamba awamekabidhiwa wajibu juu yao wa kuongoza upendo wa vijana, ili uweze kujengwa juu ya wale ambao watakuwa wenzi bora. Wanapaswa ... kufinyanga tabia za watoto tangu miaka yao ya awali kabisa ili wawe safi na waungwana, na wavutwe kwa wema na kweli....

Upendo wa kweli ni kanuni ya juu na takatifu zaidi, ni tofauti kabisa katika sifa bainifu mbali na ule upendo ule ambao unaamshwa na mihemko ya ghafla, na ambao unakuwa ghafla unapajaribiwa vikali. Vijana wanapaswa kujiardaa kwa ajili ya nyumba zao wenyewe kwa kuwa waaminifu kwa majukumu wanayopewa katika nyumba za wazazi wao. Hebu na wajifunze kujikana nafsi hapa, na kuonesha wema, heshima na huruma ya Kikristo. Hivyo basi, upendo utadumishwa moyoni na yule anayetoka katika nyumba ya namna hiyo na kusimama kuwa kichwa cha familia yake mwenyewe, atajua jinsi ya kuendeleza furaha ya yule ambaye amemchagua kuwa mwenzi wa maisha yake.

Akina baba na akina mama, mnapaswa kujenga katika tabia hizi za maisha ambazo zitawasaidia kuwafanya watoto wenu wafae kwa ajili ya maisha ya baadaye na yasiyo na kikomo, ambayo yatawasaidia wao kuunda tabia ambazo hamtaona aibu kuwaona wao, kama wazazi wakichukua jukumu la kuwasimamia watoto wao wenyewe, na kuhamishia kwao tabia zenu wenyewe.

Hebu wale ambao wanakusudia kuingia katika ndoa wapime kila hisia na kila mwenendo wa tabia kwa yule ambaye wanafikiria kuunganisha hatima ya maisha yao.

Rafiki vijana, mfanyeni Mungu na wazazi wenu wacha Mungu kuwa washauri wenu. Liombeeni jambo hilo.... Hatua mnayokaribia kuichukua ni moja ya hatua muhimu mno maishani mwenu, na haipaswi kuchukuliwa kwa haraka. Wakati unapopenda, usipende kwa upofu.

Hebu kila hatua ya kuuelekea muungano wa ndoa ioneshe sifa bainifu za staha, usahili, uaminifu na kusudi la dharti la kumpendeza na kumheshimu Mungu.

## Nuru Angavu na Takatifu

*Mpatekuwawana wa Mungu wasion alawama, wala udanganyifu, wasio na ila kati ya kizazi chenye ukaidi, kilichopotoka; ambao kati ya hao mnaonekana kuwa kama mianga katika ulimwengu. — Wafilipi 2:15.*

**U**tume wa nyumbani unaenea zaidi ya mipaka ya wanafamilia wake. Nyumba ya Mkristo inapaswa kuwa somo kielelezo, ikieleza kwa mfano ubora wa kanuni za kweli za maisha.... Mvuto wa nyumba ya kweli juu ya mioyo na maisha ya wanadamu una nguvu zaidi kuliko hubiri lolote linaloweza kuhubiriwa. Vijana wanapotoka katika nyumba ya namna hiyo, wanatoa masomo waliyojifunza kwa wengine. Kanuni bora za maisha hutambulishwa katika kaya nyinginezo, na mvuto uadilishao hufanya kazi katika jamii.

Kutoka kwenye kila nyumba ya Mkristo, nuru takatifu inapaswa kuangaza na kuonekana. Upendo unapaswa kuoneshwa kwa vitendo. Unapaswa kutiririka katika ushirikiano wote wa nyumbani, ukijionesha kwa mawazo mema, kwa upole na heshima isiyo na ubinafsi. Kuna nyumba ambapo kanuni hii inatekelezwa — nyumba ambazo Mungu anaabudiwa humo, na upendo wa kweli unatawala. Kutoka katika nyumba hizi, asubuhi na jioni maombi yanapanda juu kwa Mungu kama uvumba safi, na rehema na baraka Zake hushuka juu ya waombaji kama umande wa asubuhi.... Wote wanaweza kuona kwamba kuna mvuto utendao kazi katika familia ambao unawagusa watoto, na kwamba Mungu wa Ibrahimu yuko pamoja nao. Ikiwa nyumba za wale wanaokiri kuwa Wakristo zina uongozi sahihi wa kidini, zinaweza kuweka mvuto mkuu zaidi kwa ajili ya wema. Kwa kweli zitakuwa ni "nuru ya ulimwengu."

Yeye ambaye anauishi Ukristo nyumbani atakuwa ni nuru angavu iangazayo kila mahali.

Taa, hata iwe ndogo kiasi gani, kama inaendelea kuwaka, inaweza kuwa njia ya kuwasha taa zingine nyingi. Uwanda wetu wa ushawishi unaweza kuonekana kuwa mfinyu, ... lakini tunao uwezekano wa ajabu kwa kutumia kwa uaminifu fursa za nyumba zetu wenyewe. Ikiwa tutafungua mioyo na nyumba zetu kuruhusu kanuni takatifu za maisha kutuongoza, tutakuwa njia kwa ajili ya mikondo ya nguvu zitoazo uzima. Kutoka kwenye nyumba zetu kutiririka vijito vyia uponyaji, vikitoa uzima na uzuri na matokeo mazuri pale ambapo sasa kuna utasa na upungufu.

## Karibu Kwenye Makao ya Mbinguni

*Wekeni wazi malango yake, Taifa lenye haki, lishikalo kweli, liingie. – Isaya 26:2.*

**M**aisha duniani ni mwanzo wa maisha ya mbinguni. Tu watoto wa Mfalme wa mbinguni, wanafamilia wa familia ya kifalme, warithi wa Mungu, na warithi pamoja na Kristo. Makao ambayo Bwana Yesu alienda kuyaandaa yanapaswa kuwapokea wale tu ambaa ni wa kweli, walio safi, wale wanaoyapenda na kuyatii maagizo Yake.... Ikiwa tunataka kufurahia furaha kamili ya milele, lazima tukuze dini nyumbani.... Amani, maelewano, upendo na furaha vinapaswa kuendelea kuthaminiwa kila siku, mpaka mambo haya ya thamani yakae mioyoni mwa wale wanaojenga familia.

Kile kitu ambacho kitaifanya tabia kuwa ni ya kuvutia nyumbani ndicho ambacho kitaifanya kuwa ya kuvutia katika makao ya mbinguni.

Ikiwa tutaidhihirisha tabia ya Yesu hapa, tukizitunza amri zote za Mungu, tutafurahishwa na kubarikiwa na mandhari ya kufurahisha katika makao ambayo Yesu alienda kuyaandaa.

Hebu yale yote yaliyo mazuri katika nyumba yetu ya duniani yatukumbushe mto wa kioo na maeneo ya kijani kibichi, miti inayoyumba-yumba na vijito vya uzima, jiji ling'aalo na waimbaji waliovaa mavazi meupe, wa makao yetu ya mbinguni – ule ulimwengu wa uzuri ambaa hakuna mchoraji anayeweza kuuchora, wala hakuna lugha ya mwanadamu afikwaye na mauti inayoweza kuuelezea.

Kule upendo na huruma ambazo Mungu amezipandikiza katika nafsi zitadhihirishwa kwa ukweli na uzuri zaidi. Mazungumzo safi na viumbe watakatifu, maisha ya kijamii yenye uwiano pamoja na malaika waliobarikiwa na pamoja na waaminifu wa vizazi vyote, ushirika mtakatifu unaofungamanisha pamoja "familia nzima mbinguni na duniani" – yote hayo ni mionganoni mwa matukio ya uzoefu wa baada ya kifo.... Kwa furaha isiyoelezeka tutaingia katika furaha na hekima ya viumbe wasioanguka.

Fursa hii ni kwa ajili ya wazazi kuwachukua watoto wao pamoja nao hadi kwenye malango ya jiji la Mungu, wakisema, "nimejaribu kuwafunza watoto wangu kumpenda Bwana, kuyafanya mapenzi Yake, na kumtukuza Yeye." Kwa wazazi hawa lango litafunguliwa, na wazazi pamoja na watoto wao wataingia ndani.

## Mahabubu katika Moyo wa Mungu

*"Je, mwanamke aweza kumsahau mtoto wake anyonyaye, hata asimhirumie mwana wa tumbo lake? Naam, hawa wawezahusahau, lakini mimi sitakusahau wewe. Tazama, nimekuchora katika vitanga vya mikono yangu; kuta zako ziko mbele yangu daima" -(Isaya 49:15, 16).*

**K**anisa la Kristo ni lenye thamani sana machoni Pake. Ni sanduku lenye vito Vyake, ua unaowazunguka kondoo Wake.

Kristo "alivyolipenda kanisa, akajitoa kwa ajili yake" (Waefeso 5:25). Alilinunua kwa gharama ya damu Yake. Mtakatifu Mwana wa Mungu anaonekana akipita kati ya vinara vya taa saba vya dhahabu. Yesu Mwenyewe huweka mafuta katika taa hizi zinazowaka. Yeye ndiye anayewasha moto. "Ndani yake ndimo ulimokuwa uzima, nao ule uzima ulikuwa nuru ya watu" (Yohana 1:4). Hakuna vinara, hakuna kanisa, linaloangaza peke yake. Nuru yote inatokea kwa Kristo ... Bwana Mungu Mwenyezi na Mwana-Kondoo ndio nuru yake.

Nyakati nyingine Bwana anaweza kuonekana kusahau hatari kubwa ya Kanisa Lake na uharibifu uliofanywa na maadui wake. Lakini Mungu hajasahau. Hakuna kitu katika ulimwengu huu kilicho kipenzi katika moyo wa Mungu kama Kanisa Lake. Si mapenzi Yake kwamba sera ya kidunia iharibu kumbukumbu yake. Hawaachi watu Wake wapate kushindwa kwa majaribu ya Shetani.

Mungu ananena kwamba hata mama aweza kumsahau mtoto wake, "lakini mimi sitakusahau wewe." ... Mungu huwafikiria watoto Wake kwa kutaka kuwasaidia kwa wema na huweka kitabu cha kumbukumbu mbele Yake, ili asisahau kamwe watoto anaowajali.

*"Kila uhusiano wa binadamu unaweza kuondoka,  
Rafiki kwa rafiki kutokuwa waaminifu,  
Wazazi kuacha kuwatunza watoto wao,  
Mbingu na dunia hatimaye kutoweke;  
Lakini hakuna mabadiliko  
Yanayoweza kuathiri upendo wa Yehova."*



## Mahabubu katika Moyo wa Mungu

*"Je, mwanamke aweza kumsahau mtoto wake anyonyaye, hata asimhurumie mwana wa tumbo lake? Naam, hawa waweza kusahau, lakini mimi sitakusahau wewe. Tazama, nimekuchora katika vitanga vya mikono yangu; kuta zako ziko mbele yangu daima" -(Isaya 49:15, 16).*

**K**anisa la Kristo ni lenye thamani sana machoni Pake. Ni sanduku lenye vito Vyake, ua unaowazunguka kondoo Wake.

Kristo "alivyolipenda kanisa, akajitoa kwa ajili yake" (Waefeso 5:25). Alilinunua kwa gharama ya damu Yake. Mtakatifu Mwana wa Mungu anaonekana akipita kati ya vinara vya taa saba vya dhahabu. Yesu Mwenyewe huweka mafuta katika taa hizi zinazowaka. Yeye ndiye anayewasha moto. "Ndani yake ndimo ulimokuwa uzima, nao ule uzima ulikuwa nuru ya watu" (Yohana 1:4). Hakuna vinara, hakuna kanisa, linaloangaza peke yake. Nuru yote inatokea kwa Kristo ... Bwana Mungu Mwenyezi na Mwana-Kondoo ndio nuru yake.

Nyakati nyingine Bwana anaweza kuonekana kusahau hatari kubwa ya Kanisa Lake na uharibifu uliofanywa na maadui wake. Lakini Mungu hajasahau. Hakuna kitu katika ulimwengu huu kilicho kipenzi katika moyo wa Mungu kama Kanisa Lake. Si mapenzi Yake kwamba sera ya kidunia iharibu kumbukumbu yake. Hawaachi watu Wake wapate kushindwa kwa majaribu ya Shetani.

Mungu ananena kwamba hata mama aweza kumsahau mtoto wake, "lakini mimi sitakusahau wewe." ... Mungu huwafikiria watoto Wake kwa kutaka kuwasaidia kwa wema na huweka kitabu cha kumbukumbu mbele Yake, ili asisahau kamwe watoto anaowajali.

*"Kila uhusiano wa binadamu unaweza kuondoka,  
Rafiki kwa rafiki kutokuwa waaminifu,  
Wazazi kuacha kuwatunza watoto wao,  
Mbingu na dunia hatimaye kutoweke;  
Lakini hakuna mabadiliko  
Yanayoweza kuathiri upendo wa Yehova."*



## Mji wa Makimbilio

*"Kwa kuwa BWANA ameichagua Sayuni, ameitamani akae ndani yake. Hapo ndipo mahali pangu pa raha milele, Hapo nitakaa kwa maana nimeitamani" (Zaburi 132:13, 14).*

**K**atika karne za mateso, migogoro na giza, Mungu limeendelea kulitunza kanisa Lake. Hakuna wingu hata moja lililoanguka juu yake ambalo Yeye hakulijua; hakuna nguvu pinzani hata moja iliyoinuka kupinga kazi Yake, ambayo Yeye hakuitabiri. Yote yametokea kama alivyotabiri. Hajalitelekeza kanisa Lake, bali amefuatisha katika maandiko ya unabii mambo yatakayotokea na yale ambayo Roho Wake aliwavuvia manabii kutabiri ya kuwa yametimia. Nia Zake zote zitatimizwa. Sheria Yake inahusishwa na kiti Chake cha enzi na hakuna nguvu ya uovu inayoweza kuivunja. Ukweli unaongozwa na kuhifadhiwa na Mungu; na utashinda kila upinzani.

Wakati wa zama za giza la kiroho, kanisa la Mungu limekuwa kama mji uliowekwa juu ya kilima. Kutoka kizazi hadi kizazi, kwa mfululizo wa vizazi, mafundisho safi ya mbinguni yamekuwa yakijitokeza ndani ya mipaka yake.... Ndiyo eneo la neema Yake, ambalo hufurahia kuonesha nguvu Yake ya kubadilisha miyo.

Kanisa ni ngome ya Mungu, mji Wake wa makimbilio, anaoushikilia katika ulimwengu ulioasi. Usaliti wowote dhidi ya kanisa ni udanganyifu dhidi Yake Yeye aliyemnunua mwanadamu kwa damu ya Mwana Wake wa pekee. Tangu mwanzo, waaminifu wameunda kanisa duniani. Katika kila zama Bwana amekuwa na walinzi Wake, ambao wametoa ushuhuda mwaminifu katika kizazi walichoishi. Walinzi hawa kwa zamu yao walitoa ujumbe wa onyo; na walipoitwa kuweka chini silaha zao, wengine waliendeleza kazi. Mungu aliwaleta mashahidi hawa katika uhusiano wa agano pamoja na Yeye mwenyewe, akiunganisha kanisa lililoko duniani pamoja na kanisa la mbinguni. Amewatuma malaika Zake kuwahudumia watu Wake na malango ya kuzimu hayajaweza kushinda dhidi ya watu Wake.

Mungu anawapenda watoto Wake kwa upendo usio kifani. Kwake, kitu cha thamani zaidi duniani ni kanisa Lake.

## Mungu Atalitunza Kanisa Lake

*"Upitapo katika maji mengi nitakuwa pamoja nawe; na katika mito haitakugharikisha; uendapo katika moto, hutateketea; wala mwali wa moto hautakuunguza" (Isaya 42:2).*

**M**ungu analo kanisa ulimwenguni, ambalo ni watu Wake wateule, wanaozishika amri Zake. Yeye anaongoza, si kama matawi yaliyotengana, si moja hapa na lingine pale, bali ni jamii ya watu.

Hakuna haja ya kutilia shaka, kuogopa kwamba kazi haitafanikiwa. Mungu Ndiye kiongozi wa kazi na ataweka kila kitu kama ipaswavyo. Ikiwa mambo yanahitaji marekebisho katika uongozi wa kazi, Mungu atashughulikia hilo na kufanya kila kitu kuwa sawa. Hebu tuwe na imani kwamba Mungu ataiendesha meli nzuri ibebayo watu wa Mungu salama mpaka bandarini.

Nilipokuwa nikisafiri kutoka Portland, Maine, kwenda Boston, miaka mingi iliyopita, dhoruba ilijitokeza na mawimbi makubwa yalitupeleka huku na huko. Taa zilidondoka na masanduku yenye nguo za kuogelea yalikuwa yakisukumwa huku na huko, kama mipira. Abiria walikuwa na hofu na wengi walikuwa wakilia, wakisubiri kufa.

Baada ya muda rubani aliingia ndani ya meli. Nahodha alisimama karibu na rubani aliposhika usukani na kuonesha hofu kuhusu njia ambayo meli ilielekezwa. "Je! Utashika usukani?" rubani aliuliza. Nahodha hakuwa tayari kufanya hivyo, kwa sababu alijua kwamba hakuwa na uzoefu. Kisha baadhi ya abiria walianza kuhisi wasiwasi na walisema wanahofia kwamba nahodha atawapeleka kwenye miamba. "Je! Utashika usukani?" rubani aliuliza; lakini walijua kwamba asingeweza kudhibiti usukani.

Unapofikiri kuwa kazi ipo hatarini, omba, "Bwana simama kwenye usukani. Tuvushe katika mfadhaiko huu. Tufikishe salama bandarini." Je! Hatuna sababu ya kuamini kwamba Bwana atatufikisha salama kwa ushindi? ...

Hamwezi kwa akili zenu finyu kuelewa utendaji kazi wa majaaliwa ya Mungu. Mwache Mungu aisimamie kazi Yake mwenywewe.

## Ujumbe wa Saa ya Hukumu

*"Kisha nikaona malaika mwingine, akiruka katikati ya mbingu, mwenye injili ya milele, awahubiri hao wakao juu ya nchi, na kila taifa na khabla na lugha na jamaa" (Ufunuo 14:6, 7).*

**M**kulima mwaminifu na mwenye moyo wa dhati, Mambaye aliongozwa kutilia shaka mamlaka ya Mungu ya Maandiko, lakini aliyetamani kwa dhati kuujua ukweli, ndiye mtu aliyechaguliwa mahususi na Mungu kuongoza katika kutangaza ujio wa pili wa Kristo.

Mungu alimtuma malaika Wake ... kumwongoza kuchunguza unabii.... Aliona kwamba wenyeji wa dunia walikuwa wakiishi katika matukio ya mwisho ya historia ya ulimwengu huu, ingawa hawakuja.... Mungu alimwita kuacha shamba lake.... Kwa kutetemeka, William Miller alianza kufunua siri za ufalme wa Mungu kwa watu, akiwapitisha wasikilizaji wake katika unabii hadi ujio wa pili.

Maelfu waliongozwa kuukubali ukweli uliohubiriwa na William Miller na watumishi wa Mungu waliinuliwa katika roho na nguvu ya Eliya kuutangaza ujumbe.... Na wakati onyo kali la kutoroka ghadhabu itakayokuja liliposikika, wengi waliokuwa wameunganishwa na makanisa walipokea ujumbe wa uponyaji; waliona upotovu wao na kwa machozi yenye uchungu wa toba na maumivu makali ya roho, walijinyenyekeza mbele za Mungu.

Mbaraka maalum wa Bwana, katika uongofu wa wenye dhambi na uamsho wa maisha ya kiroho mionganini mwa Wakristo, ulikuwa umethibitisha kuwa ujumbe ulikuwa wa Mbinguni.

Kwa uwazi, waumini... walitoasababu kwanini walimtarajia Bwana wao katika mwaka 1844. Wapinzani wao hawakuweza kuleta hoja dhidi ya sababu zenyengetu nguvu zilizotolewa.

Tangazo, "Saa ya hukumu yake imekuja," linadokeza mwisho wa kazi ya huduma ya Kristo kwa wokovu wa wanadamu. Linatangaza ukweli ambao lazima utangazwe hadi maombezi ya Mwokozi yatakapokoma, naye atarudi duniani kuwapeleka watu Wake Kwake.

## Nurú Katika Giza

*"Basi msiutupe ujasiri wenu, kwa maana una thawabu kuu. Maana mnahitaji saburi, ili kwamba mkiisha kuyafanya mapenzi ya Mungu mpate ile ahadi" (Waebrania 10:35, 36).*

Somo la patakatifu lilikuwa ufunguo uliofungua siri ya kukata tamaa kwa mwaka 1844. Lilifungua mtazamo kamili wa mfumo wa ukweli, uliouunganishwa na kupatanishwa, ukiashiria kwamba mkono wa Mungu uliongoza Vuguvugu kuu la Marejeo..

Wakati huo, Waadventista walidhani kwamba dunia au sehemu yake fulani, ilikuwa patakatifu. Walielewa kuwa kutakaswa kwa patakatifu kulikuwa ni utakaso wa dunia kwa moto wa siku kuu ya mwisho, na kwamba huo ungetokea wakati wa Ujio wa Pili. Kwa hiyo hitimisho kwamba Kristo angekuja duniani mwaka 1844.

Lakini wakati uliowekwa ulipita, naye Bwana hakuwa ameonekana. Waumini walijua kwamba Neno la Mungu halitashindwa; tafsiri yao ya unabii lazima ingekuwa na dosari; lakini kosa lilikuwa wapi? ...

Katika uchunguzi wao, walijifunza kwamba hakuna ushahidi wa Maandiko unaoidhinisha mtazamo wa watu kwamba dunia ndiyo patakatifu; lakini walipata katika Biblia maelezo kamili ya somo la patakatifu, asili yake, mahali pake na huduma zake.

Wale waliofuata katika nuru ya neno la unabii waliona kwamba, badala ya kuja duniani mwishoni mwa siku 2300 mwaka 1844, wakati huo Kristo aliingia katika patakatifu pa patakatifu pa mbinguni, kufanya kazi ya mwisho ya upatanisho, tayari kwa Kuja kwake....

Sasa katika patakatifu pa patakatifu walimwona tena, kuhani mkuu mwenye huruma, akikaribia kuonekana kama Mfalme wao na Mwokozi.

Wakimfuata kwa imani, waliweza pia kuona ufungaji wa kazi ya kanisa. Walikuwa na uelewa wazi wa ujumbe wa malaika wa kwanza na wa pili na walikuwa tayari kupokea na kutoa onyo kali la malaika wa tatu wa Ufunuo 14 ulimwenguni.

## Babeli Umeanguka

*"Kisha mwingine, malaika wa pili, akafuata, akisema, Umeanguka, Umeanguka Babeli, mji ulio mkubwa, maana ndio uliowanywesha mataifa yote mvinyo ya ghadhabu ya uasherati wake" (Ufunuo 14:8).*

**U**jumbe wa malaika wa pili wa Ufunuo 14 ulihubiriwa kwa mara ya kwanza katika majira ya joto ya mwaka 1844 na kisha kutumika moja kwa moja katika makanisa ya Marekani, ambapo onyo la hukumu lilikuwa limetangazwa sana na kukataliwa kwa ujumla, na ambapo kuporomoka kwa makanisa kulikuwa kwa kasi zaidi. Lakini ujumbe wa malaika wa pili haukufikia utimilifu wake kamili mwaka 1844. Wakati huo makanisa yalipitia poromoko la maadili, kwa sababu ya kukataa kwao nuru ya ujumbe wa Marejeo, lakini poromoko hilo halikuishia hapo. Kwa kuendelea kukataa kwao kweli maalum kwa wakati huu, wameporomoka zaidi na zaidi. Hata hivyo, bado inaweza kusemwa kwamba "Babeli umeanguka, ... maana ndio uliowanywesha mataifa yote mvinyo ya ghadhabu ya uasherati wake." Bado haujayafanya mataifa yote kufanya hivyo.... Kazi ya uasi haijafikia kilele chake.

Biblia inatangaza kwamba kabla ya ujio wa Bwana, Shetani atafanya kazi "kwa uwezo wote, na ishara na ajabu za uongo; na kwa madanganyo yote ya udhalimu;" na hao ambao "hawakukubali kuipenda ile kweli, wapate kuokolewa," wataachwa kupokea "nguvu ya upotevu, wauamini uongo" (2 Wathesalonike 2:9-11). Hatua hiyo itakapofikiwa na umoja wa kanisa na ulimwengu utakapokamilika kabisa kwa Wakristo wote, ndipo kuanguka kwa Babeli kutakapokamilika. Mabadiliko ni ya hatua kwa hatua na utekelezaji kamili wa Ufunuo 14:8 bado uko mbele.

Licha ya giza la kiroho na faraka kwenda mbali na Mungu ambalo lipo katika makanisa yanayounda Babeli, kundi kubwa la wafuasi wa kweli wa Kristo bado wapo katika ushirika wao. Kuna wengi kati yao ambao hawajawahi kuona kweli maalum za wakati huu.

## Onyo la Mwisho la Ibada

*"Na mwingine, malaika wa tatu, akawafuata, akisema kwa sauti kuu, Mtu awaye yote akimsujudu huyo mnyama na sanamu yake, na kuipokea chapa katika kipaji cha uso wake, au katika mkonono wake, yeye naye atakunywa katika mvinyo ya ghadhabu ya Mungu iliyotengenezwa, pasipo kuchanganywa na maji, katika kikombe cha hasira yake" (Ufimmo 14:9, 10).*

**H**uduma ya Yesu ilipomalizika katika patakatifu na kwenda katika patakatifu pa patakatifu, na kusimama mbele ya sanduku la agano lenye amri za Mungu, Alimtuma malaika mwingine mwenye nguvu mwenye ujumbe wa tatu duniani.... Ujumbe huu ulielekezwa kuwaweka watoto wa Mungu katika ulinzi wao, kwa kuwaonesha saa ya majaribu na uchungu uliokuwa mbele yao.

Alama hii (mnyama), kama ambavyo Waprotestanti wengi wameamini, huwakilisha Upapa....

"Sanamu ya mnyama" huwakilisha muundo ule wa Uprotestanti ulioasi utakaojengeka wakati makanisa ya Kiprotestanti yatakapotafuta msaada wa mamlaka ya kiserikali ili kusimamia utekelezaji wa mafundisho yake....

Kama ishara ya mamlaka ya Kanisa Katoliki, waandishi ambao ni waumini wa upapa wanatumia dondo hii: "tendo lenyewe la kubadili Sabato kuwa Jumapili." Badiliko hili la Sabato, hivyo basi, ni nini kama siyo ishara, au chapa, ya mamlaka ya Kanisa la Rumi – "chapa ya mnyama"?

Kuitunza Jumapili si alama ya mnyama na haitakuwa mpaka pale amri itakapotolewa ya kuwafanya watu kuiheshimu sabato hii bandia.

Na ni mpaka pale tu suala hili litakapokuwa limewekwa wazi, kama ilivyoelezwa, mbele ya watu, na watu kufikishwa mahali ambapo wataweza kuchagua kati ya amri za Mungu na amri za watu, ambapo wale watakaochagua kuendelea kutenda makosa watapokea "chapa ya mnyama."

Mungu anapowatumia watu maonyo yaliyo muhimu kiasi kwamba yanawakilishwa kana kwamba yanahubiriwa na malaika watakatifu wanaoruka katikati ya mbingu, anataka kila mtu mwenye ufahamu asikie ujumbe.

## Nani Atakayepokea Muhuri wa Mungu?

"Nikaona malaika mwingine, akipanda kutoka maawio ya juu, mwenye muhuri ya Mungu aliye hai; akawapigia kelele kwa sauti kuu wale malaika wanne waliopewa kuidhuru nchi na bahari, akisema, Msiihdhuru nchi, wala bahari, wala miti, hata tutakapokwisha kuwatia muhuri watumwa wa Mungu wetu juu ya vipaji vya nyuso zao" (Ufunuo 7:2, 3).

**M**uhuri wa Mungu anayeishi utawekwa juu ya wale tu Mwatakaodhihirisha kufanana na Kristo kitabia.

Kama ambavyo nta huchukua chapa ya muhuri, hivyo roho inapaswa kuchukua chapa ya Roho wa Mungu na kurejesha mfano wa Mungu.

Utii wa kanuni za amri za Mungu, ndio unaouumba tabia inayofanana na Mungu.

Muhuri wa Mungu upo katika amri ya nne. Hii tu, kati ya zote kumi, huonesha jina na cheo cha Mtoa-amri. Inamtangaza Yeye kuwa Mwumbaji wa mbingu na dunia na huonesha dai la kumheshimu na kumwabudu Yeye kuliko miungu mingine. Kando ya agizo hili, katika Amri Kumi hakuna nyingine inayomwonesha mwenye mamlaka katika amri iliyotolewa.

Waisraeli waliweka juu ya milango yao alama ya damu, kuonesha kwamba walikuwa ni milki ya Mungu. Hivyo watoto wa Mungu katika zama hizi watachukuwa alama ambayo Mungu ameiongesha. Watakuwa katika upatanifu pamoja na amri takatifu za Mungu. Chapa huwekwa juu ya kila mmoja wa watoto wa Mungu kama kwa hakika alama iliyowekwa juu ya milango ya nyumba za Waebrania, ili kuwahifadhi watu dhidi ya uharibifu. Mungu anatangaza, "Tena naliwapa sabato zangu, ziwe ishara kati ya mimi na wao, wapate kujua ya kuwa mimi, BWANA, ndimi niwatakasa;" (Ezekiel 20:12).

Mara tu watu wa Mungu wanapotiya muhuri katika vipaji vya nyuso zao – sio tu muhuri au chapa inayoweza kuonekana, bali ni kudumu katika ukweli, kwa akili pamoja na kwa kiroho, hivyo hawatayumbishwa – mara tu watu wa Mungu wanapotiya muhuri na kutayarishwa kwa ajili ya kupepetwa, kutakuja. Hakika, imekwishaanza; hukumu ya Mungu ipo juu ya nchi, ... kwamba tupate kuyafahamu yajayo.

## Ukamilifu wa Mungu kwa Kanisa Lake

*"Apate kujiletea Kanisa tukufu, lisilo na ila wala kunyanzi wala lolote kama hayo; bali liwe takatifu lisilo na matwaa" (Waefeso 5:27).*

Bwana Mungu ni Mungu mwenye wivu; bado huvumilia sana dhambi na maovu ya watu Wake katika kizazi hiki. Ikiwa watoto wa Mungu wangeenenda sawa na mashauri Yake, kazi ya Mungu ingekuwa yenyе maendeleo, jumbe za kweli zingechukuliwa kwa watu wote waishio katika uso wa dunia yote.... Lakini kwa sababu watu si watii, si wenye shukrani, waovu, kama walivyokuwa Waisraeli wa kale, muda umerefushwa ili watu wote wasikie ujumbe wa mwisho wa rehema iliyotangazwa kwa sauti kuu. Kazi ya Mungu imezuiwa, wakati wa kutiwa muhuri umekawilishwa. Wengi hawajasikia ukweli. Bali Mungu atawapatia nafasi ya kusikia na kuongolewa.

Unafanya nini ... katika kazi kuu ya kijiandaa? Wale wanaoungana na ulimwengu wanaumbwa na kujitayarisha kiulimwengu kwa ajili ya alama ya mnyama. Wale wasiojiamini wenyewe, wanaojinyenyekenza mbele za Mungu na kuzitakasa roho zao kwa kutii ukweli - hawa huumbwa kimbingu na kutayarishwa kwa ajili ya muhuri wa Mungu katika vipaji vya nyuso zao. Amri inapotolewa na kutiwa muhuri, tabia itaendelea kuwa halisi na isiyo na waa kwa ajili ya umilele. Huu ni wakati wa kujitayarisha. Muhuri wa Mungu hautiwi katika vipaji vya nyuzo za wanaume na wanawake waliowachafu. Hautatiwa katika vipaji vya nyuso za wanaume na wanawake wenye kutaka makuu, waipendao dunia. Hautawiwa katika vipaji vya nyuso za wanaume na wanawake wenye ndimi zenye hili au mioyo midanganyifu. Wote wanaopokea muhuri hawapaswi kuwa na waa mbele za Mungu - wataradhia wa mbinguni.

Kila mtu binafsi, ikiwa angepokea muhuri wa Mungu aishiye, anapaswa kusikia Neno la Mungu na kulitenda kwa uangalifu. Haipaswi kuwa kitu kama cha dini ya shaghalabagala ikiwa watu wanataka kuwa na nafasi katika familia ya Mungu.

Sasa ni wakati, wakati malaika wanne wanapozishikilia pepo nne, ili kufanya imara kuitwa kwetu na uteule wetu.

## Kushitakiwa kwa Kanisa

*"Kwa hiyo shangilieni enyi mbingu, nanyi mkaao humo. Ole wa nchi na bahari! Kwa maana yule Ibilisi ameshuka kwenu mwenye ghadhabu nydingi, akijua ya kuwa ana wakati mchache tu" (Ufunuo 12:12).*

Wale watunzao amri za Mungu na imani ya Yesu watapata ghadhabu ya yule joka na jeshi lake. Shetani huuhesabu ulimwengu kama milki yake, anaoudhibiti wa makanisa yaliyoasi; lakini kuna kundi dogo la wanaokataa utawala wake. Ikiwa anaweza kuwafuta kutoka duniani, ushindi wake utakamilika. Kama alivyowashawishi mataifa ya kipagani kuuharibu Israeli, hivyo, hivi karibuni atachochea mamlaka ovu za ulimwengu ili kuwaangamiza watoto wa Mungu.... Tumaini lao pekee lipo katika rehema za Mungu; kinga yao pekee itakuwa ni kuomba.

Uzoefu wa kushtakiwa ambako kuliwapata watu wa Mungu katika siku za Esta hakukuwa wa kipekee kwa enzi hiyo pekee. Yohana wa Ufunuo, akitazama kupitia nyakati hadi mwisho wa wakati, amekiri, "Joka akamkasirikia yule mwanamke, akaenda zake afanye vita juu ya wazao wake waliosalia, wazishikao amri za Mungu, na kuwa na ushuhuda wa Yesu" (Ufunuo 12:17). Baadhi ya wale ambao leo wanaishi duniani watashuhudia maneno haya yakitimizwa.

Ghadhabu ya Shetani inaongezeka kadiri wakati wake unavyozidi kuisha na kazi yake ya udanganyifu na uharibifu itafikia kilele chake wakati wa dhiki.

Maono ya kutisha ya asili ya kimiujiza hivi karibuni yatafunuliwa mbinguni, kama ishara ya nguvu za mapepo ya kufanya miujiza. Roho za mashetani zitaenda kwa wafalme wa dunia na kwa ulimwengu mzima, kuwafunga katika udanganyifu, na kuwahimiza kuungana na Shetani katika mapambano yake ya mwisho dhidi ya serikali ya mbinguni. Kwa njia hizi, watawala na raia watakuwa wamedanganyika sawa.

Wale wanaoutafuta ukweli, ili wautii katika upendo wake, ndio wale wanaochocha uovu wake (Shetani) na kuamsha ghadhabu yake. Kamwe hawesi kuwadhoofisha wanapomkaribia Yesu.

## Eliya na Kanisa la Kisasa

*"Angalieni, nitawapelea Eliya nabii, kabla haijaja siku ile ya BWANA, iliyo kuu na kuogofya. Naye ataigeuza miyo ya baba iwaelekee watoto wao, na miyo ya watoto iwaelekee baba zao, ili nisije nikaipiga dunia kwa laana" (Malaki 4:5, 6).*

**M**aneno ya mwisho ya Malaki ni unabii kuhusu kazi Mambayo inapaswa kufanywa ili kujiandaa kwa ajili ya ujio wa kwanza na wa pili wa Kristo.

Wale ambao wanapaswa kutayarisha njia ya ujio wa pili wa Kristo wanawakilishwa na Eliya mwaminifu, kama vile Yohana alivyokuja katika roho ya Eliya kutayarisha njia ya ujio wa kwanza wa Kristo.

Ujumbe wetu lazima uwe moja kwa moja kama ule wa Yohana. Aliwakemea wafalme kwa uovu wao. Licha ya hatari ya maisha yake, kamwe hakuruhusu ukweli kupunguka midomoni mwake...

Katika wakati huu wa uasi ulioenea karibia kote ulimwenguni, Mungu anaita wajumbe Wake kutangaza sheria Yake kwa roho na nguvu ya Eliya. Kama vile Yohana mbatizaji, katika kutayarisha watu kwa ajili ya ujio wa kwanza wa Kristo, aliwakumbusha amri kumi, vivyo hivyo sisi tunapaswa kutoa, kwa sauti isiyokuwa na shaka, ujumbe: "Mcheni Mungu, na kumtukuza, kwa maana saa ya hukumu yake imekuja." Kwa bidii ambayo iliutambulisha ujumbe wa Eliya nabii na Yohana mbatizaji, tunapaswa kujitahidi kutayarisha njia ya ujio wa pili wa Kristo.

Saa ya hukumu ya Mungu imefika, na juu ya washiriki wa kanisa Lake duniani kuna jukumu la kutoa onyo kwa wale wanaosimama kana kwamba wako kwenye ukingo wa uharibifu wa milele.

Kila mtu anaweza kufanya kitu katika kazi. Hakuna atakayetangazwa kuwa hana hatia mbele za Mungu isipokuwa amefanya kazi kwa bidii na kwa ukarimu kwa ajili ya wokovu wa roho.

Jukumu lako halitaweza kubebwa na mwingine. Hakuna mwingine anayeweza kufanya kazi yako isipokuwa wewe mwenyewe. Ikiwa utaizuia nuru yako, lazima kuna mtu ataachwa katika giza kwa kutojali kwako.

Bwana ana mahali pa kila mtu katika mpango Wake mkuu.

## Kanisa Linaloitunza Sabato

*"Joka akamkasirikia yule mwanamke, akaenda zake afanye vita juu ya wazao wake waliosalia, wazishikao amri za Mungu, na kuwa na ushuhuda wa Yesu; naye akasimama juu ya mchanga wa bahari"* (Ufunuo 12:14).

**K**atika sura ya kumi na mbili ya Ufunuo mgogoro mkuu katika ya utiifu na uasi unawasilishwa.

Ishara ya utiifu ni kuishika Sabato ya amri ya nne. Katika kuitii amri ya nne katika roho na kweli, watu watayatii maagizo yote ya amri kumi. Kuitimiza amri hii, lazima mtu awe na upendo zaidi kwa Mungu na kutumia upendo juu ya viumbe alivyoviumba.

Wakati unakuja ambapo watu wa Mungu watauona mkono wa mateso kwa sababu waliitunza siku ya saba... Yule mtu wa kuasi, aliyeazimu kubadili majira na sheria, ambaye amekuwa kila wakati akiwatesa watu wa Mungu, atashurutisha amri ya kuishika siku ya kwanza ya juma. Bali watu wa Mungu watasimama imara kwa ajili Yake.

Hebu mtu yejote asijisalimishe kwenye ushawishi na kukosa ari kwa uhusiano wake na sheria za Mungu kwa sababu ya dharau iliyo juu yake; kwa kuwa hicho ndicho kitu kinachopasa kutufanya tuombe kwa moyo, roho na sauti, "wakati umewadia BWANA atende kazi; kwa kuwa wameitangua sheria yako" (Zaburi 119:126). Hivyo basi, kwa sababu ya dharau iliyoenea pote, sitageuka na kuwa msaliti wakati Mungu atapopewa utukufu na kuheshimiwa zaidi kwa uaminifu wangu....

Je, Waadventista wa Sabato watapunguza utiifu wao wakati ambapo uwezo wao wote na nguvu unapaswa kuwekwa katika upande wa Bwana; wakati ushuhuda usioyumbishwa, wenyе adili na wenyе kuleta matumaini, unapaswa kutoka kwenye midomo yao? "Ndiyo maana nimependa maagizo yako, kuliko dhahabu, naam, dhahabu iliyo safi" (Zaburi 119:127). Wakati sheria ya Mungu inapodhihakiwa zaidi na kubezwa zaidi, basi ni wakati kwa kila mfuasi wa kweli wa Kristo... kusimama bila kutetereka kwa imani waliyokabidhiwa watakatifu mara moja tu."

## Karama za Roho

*"Basi, ndugu zangu, kwa habari ya karama za roho, sitaki mkose kufahamu... Lakini kila mmoja hupewa ufunuo wa Roho kwa kufaidiana" (1 Wakorintho 12:1, 7).*

**D**aulo anatangaza kuwa karama na ufunuo wa Roho uliwekwa ndani ya kanisa ... "hata na sisi sote tutakapoufikia umoja wa imani na kumfahamu sana Mwana wa Mungu, hata kuwa mtu mkamilifu, hata kufika katika cheo cha kimo cha utimilifu wa Kristo" (Waefeso 4:13).

Watu wote hawapokei karama sawa, lakini kwa kila mtumishi wa Bwana karama fulani ya Roho imeahidiwa.

Bwana anahitaji la watu wenye aina anuai za ujuzi. "Naye alitoa wengine kuwa mitume, na wengine kuwa manabii; na wengine kuwa wainjilisti na wengine kuwa wachungaji na waalimu; kwa kusudi la kuwakamilisha watakatifu, hata kazi ya huduma itendeke, hata mwili wa Kristo ujengwe" (Waefeso 4:11, 12).

Kwa kuunganisha pamoja na matukio ya siku kuu ya Mungu, Bwana kwa nabii Yoeli aliahidi udhihirisho pekee wa Roho Wake (Yoeli 2:28). Unabii huu ulipokea kwa kiasi fulani utimizwaji wa kumiminwa kwa Roho katika siku ya Pentekoste; hata hivyo itatimizwa kamilifu katika udhihirisho wa neema ya Mungu ambayo itaambatana na kufungwa kwa kazi ya injili....

Wakati huu, kipaji maalum cha neema ya Mungu na nguvu hakihitajiki kwa kanisa pungufu na kilivyohitajika katika siku za mitume.

Katika siku hizi Mungu atawakirimia wanaume na wanawake nguvu kutoka juu, kama alivyowakirimia wale ambao walilisikia neno la wokovu katika siku ya Pentekoste. Katika wakati huu, Roho Wake na neema Yake vyote viro kwa ajili ya watu wanaovihitaji na kuenenda katika neno Lake.

Karama tayari ni zetu katika Kristo, lakini umiliki wetu halisi unategemea mapokezi yetu ya Roho wa Mungu....

Ikiwa wana uhusiano na Kristo, ikiwa karama za Roho ni za kwao, walio maskini na walio na ujuzi mdogo kabisa katika wanafunzi Wake watapata nguvu ambayo itagusia mioyo. Mungu huwafanya kuwa njia kwa ajili ya kazi yenye mvuto wa hali ya juu ulimwenguni.

## Sauti ya Nabii katika Wakati Wetu

*"Hata itakuwa, baada ya hayo, ya kwamba nitamimina roho yangu juu ya wote wenye mwili; na wana wenu, waume na wake, watatabiri, wazee wenu wataota ndoto, na vijana wenu wataona maono"* (Yoeli 2:28).

**K**atika Neno Lake, Mungu ameweke kwa wanadamu maarifa yanayohitajika kwa ajili ya wokovu. Maandiko Matakatifu yanapaswa kupokelewa kama ufunuo usiokosewa wenye mamlaka wa mapenzi Yake. Ndiyo kiwango cha tabia, ndiyo yanafunua mafundisho na kipimo cha uzoefu...

Hata hivyo, ukweli kwamba Mungu ameyafunua mapenzi Yake kwa wanadamu kuitia Neno Lake, hakufanyi kutokuwa na haja ya kuendelea kuwepo na uongozi wa Roho Mtakatifu....

Katika nyakati zilizopita wakati Maandiko ya Agano la Kale na Jipyä yalipokuwa yakinolewa, Roho Mtakatifu hakuacha kutoa mwanga katika akili ya mtu binafsi, mbali na ufunuo utakaoandikwa katika Kanuni Takatifu.... Na wanatajwa manabii katika nyakati tofauti, ambao matamshi yao hayakurekodiwa. Vivyo hivyo, baada ya kufungwa kwa kanuni ya Maandiko, Roho Mtakatifu alikuwa bado anaendeleza kazi yake, kuwaelimisha, kuwaonya na kuwafariji watoto wa Mungu.

Mungu ameahidi kuonesha maono katika "siku za mwisho"; si kwa ajili ya kanuni mpya ya imani, bali kwa ajili ya faraja ya watu Wake na kuwarekebisha wale wanaopotoka kutoka katika ukweli wa Biblia.

Kama ambavyo Roho wa Mungu aliifunulia akili yangu juu ya kweli kuu za Neno Lake na matukio ya zamani na ya siku zijazo, nimeamriwa kuwafahamisha wengine yale yaliyofunuliwa.

Kuna wale watakaofurahia kukubembeze ili upate usingizi katika usalama wako wa kimwili, lakini mimi nina kazi tofauti. Ujumbe wangu ni kukutahadharisha, kukualika kurekebisha maisha yako na kukomesha uasi wako dhidi ya Mungu mwenye ulimwengu. Lichunguze Neno la Mungu, uone kama unaendana nalo. Je, tabia yako itastahimili hukumu ya mbingu?

## "Usiogope ... Ni Pamoja Nawe"

*"Usiogope, kwa maana mimi ni pamoja nawe; usifadhaike, kwa maana mimi ni Mungu wako; nitakutia nguvu, naam, nitakusaidia, naam, nitakushika kwa mkono wa kuumé wa haki yangu" (Isaya 41:10).*

**H**aikuchukua muda mrefu baada ya kipindi cha mwaka 1844 kwamba maono yangu ya kwanza yalitolewa kwangu. Nilikuwa ninamtembelea dada mpendwa katika Kristo, ambaye moyo wake ulikuwa umefungamana na wangu; sisi watano, tukiwa wanawake wote, tulikuwa tukisujudu kimya kwenye madhabahu ya familia. Tulipokuwa tukiomba; nguvu ya Mungu ilinija ambavyo kamwe sikuwahi kuhi hapo awali. Nilionekana nimezungukwa na mwanga na nilionekana kuinuka juu na juu kutoka duniani. Niligeuka kuwatafuta watu wanaosubiri Ujio ulimwenguni, lakini sikuwaona, wakati sauti iliposema kwangu: "Tafuta tena, na tazama juu kidogo." Sasa niliinua macho yangu na kuona njia iliyonyoka na nyembamba, ikijitokeza juu sana ya ulimwengu. Katika njia hii watu wanaosubiri Ujio walikuwa wakisafiri kuelekea kwenye mji...

Nilieleza maono haya kwa waumini..., ambao walikuwa na imani kamili kwamba yalitoka kwa Mungu. Roho wa Bwana alifuatana na ushuhuda na utakatifu wa milele ukawa juu yetu. Hofu isiyoelezeka ilinijaza, kwamba mimi, niliye mdogo na dhaifu, ningechaguliwa kuwa chombo ambacho Mungu angeangazia nuru kwa watu Wake...

Katika maono ya pili, ambayo kwa haraka yalifuata baada ya maono ya kwanza, nilioneshwa majoribu ambayo nilipaswa kuyapitia na kwamba, ilikuwa wajibu wangu kwenda na kuwaeleza wengine yale ambayo Mungu alikuwa amenifunulia...

Niliomba kwa bidii kwa siku kadhaa na mpaka usiku, ili mzigo huu uondolewe kwangu na kuwekwa juu ya mtu mwenye uwezo zaidi wa kuubeba. Lakini nuru ya wajibu haikubadilika.

Mwokozi wangu aliniweka kuwa mjumbe Wake. "Kazi yako," Yeye alinifundisha, "ni kubeba Neno Langu... Roho Yangu na nguvu Yangu vitakuwa pamoja nawe... Ndiye Bwana atoaye ujumbe."

Sikuwa nikiandika ... nilieleza tu mawazo yangu binafsi. Ndiyo yaliyokuwa yamefunuliwa na Mungu imbele yangu katika maono – miali ya mwanga yenye thamani inayong'aa kutoka kwenye kiti cha enzi.

## Ushuhuda wa Yesu

*"Nami nikaanguka mbele ya miguu yake, ili nimsujudie; akaniambia angalia, usifanye hivi; mimi ni mijoli wako na wa ndugu zako walio na ushuhuda wa Yesu. Msujudie Mungu. Kwa maana ushuhuda wa Yesu ndio roho ya unabii" (Ufunuo 19:10).*

**K**ando ya vitabu vingine vyote, Neno la Mungu lazima kliwe somo kwetu, kitabu kikuu, msingi wa elimu yote. Shuhuda hazilifanyi Neno la Mungu kuwa duni, bali kuliihua na kuzivutia akili kwake, ili urahisi mzuri wa ukweli upate kuwashawishi wote.

Nilichukua Biblia yenye thamani na kuizungushia Shuhuda za Kanisa kadhaa.... Hapa, nilisema, visa vya karibuni vyote vinakutana. Dhambi wanazopaswa kuepuka zimeelezwa. Mashauri wanayotamani yanaweza kupatikana hapa, yaliyotolewa kwa visa vingine vilivyo kama vyao. Mungu amekuwa na furaha kutoa mstari kwa mstari na agizo kwa agizo. Lakini wengi wenu hamjui yaliyomo kwenye Shuhuda. Hamjazoea Maandiko. Kama mngelefanya Neno la Mungu kuwa somo kwenu, kwa shauku ya kufikia kiwango cha Biblia na kufikia ukamilifu wa Kikristo, msingehtaji Shuhuda....

Bwana anakusudia kuwaonya, kuwakemea, kuwashauri, kuitia shuhuda zilizotolewa na kushawishi akili zenu juu ya umuhimu wa ukweli wa Neno Lake. Shuhuda zilizoandikwa siyo zenye kuleta nuru mpya, bali kuweka dhahiri mioyoni kweli za ufunuo uliofunuliwa tayari. Wajibu wa mwanadamu kwa Mungu na kwa mwenzake umeelezwa wazi katika Neno la Mungu; lakini wachache wenu ni watifu kwa nuru mliyopewa. Ukweli wa ziada haujaletwa; lakini Mungu ameweke katika Shuhuda kweli kuu zilizotolewa tayari na kwa njia Yake mwenyewe aliyoichagua kuzileta mbele ya watu ili kuamsha na kuzishawishi akili zao, ili wote wasiwe na udhuru.

Ikiwa tunayapuuza [maonyo katika Shuhuda], tunaweza kutoa sababu gani?

## Jaribuni Mambo Yote

*"Msimzimishe Roho; msitweze unabii; jaribuni mambo yote; lishikeni lililojema" (1 Wathesalonike 5:19-21).*

“Katika nyakati za kale Mungu alisema na watu kwa kinywa cha manabii na mitume. Katika siku hizi Yeye husema kupitia shuhuda za Roho Wake. Kamwe hakukuwa na wakati ambapo Mungu aliwaagiza watu Wake kwa bidii zaidi kuliko anavyowaagiza sasa kuhusu mapenzi Yake na njia ambayo angependa waifuate.”

Maelekezo yaliyotolewa katika siku za mwanzo za ujumbe huu yanapaswa kufuatwa kwa tahadhari katika siku zake za mwisho.

Hebu Shuhuda zihukumiwe kwa matunda yake. Je, ni roho ipi iliyo katika mafundisho yake? Je, nini kilikuwa matokeo ya mvuto wake? “Wote wanaotaka kufanya hivyo wanaweza kufahamu matunda ya maono haya....”

“Kazi hii ni ya Mungu, au siyo. Mungu hafanyi kazi kwa kushirikiana na Shetani. Kazi yangu ... inabeba muhuri wa Mungu au muhuri wa adui. Hakuna kazi nusu-nusu katika jambo hili. Shuhuda ni za Roho wa Mungu, au Shetani.”

Hila ya mwisho kabisa ya Shetani itakuwa kufanya ushuhuda wa Roho wa Mungu kutokuwa na maana. “Pasipo maono, watu huacha kujizuia.” (Mithali 29:18. Shetani atafanya kazi kwa werevu, kwa njia tofauti na kwa mawakala tofauti, ili kudhoofisha imani ya masalia wa Mungu katika ushuhuda wa kweli. Ataleta maono ya uongo, ili kupotosha na kuchanganya yaliyo ya uongo na ya kweli, na hivyo kuwaudhi watu mpaka watachukulia kila kitu kinachobeba jina la maono kwa namna iliyokithiri; lakini nafsi zilizoaminifu, kwa kulinganisha kati ya uongo na ukweli, zitawezeshwa kutofautisha kati yake.”

“Wakati Shuhuda, ambazo zamani ziliaminiwa, zinapotiliwa shaka na kuachwa, Shetani anajua kuwa waliodanganyika hawataishia hapa; naye huzidisha juhudi zake mpaka anapowaweka katika uasi wa wazi, usioponyeka na kuishia katika uharibifu.”

## Mtumishi wa Mwanadamu

"Amin, amin, nawaambia ninyi, Mtumwa si mkuu kuliko bwana wake; wala mtume si mkuu kuliko yeye aliyempeleka" (Yohana 13:16).

**K**atika maisha Yake na mafundisho, Kristo ametoa mfano kamili wa huduma isiyo na choyo ambayo ina chimbuko lake katika Mungu. Mungu haishi kwa ajili Yake mwenyewe. Kwa kuumba ulimwengu na kwa kudumisha vitu vyote, Yeye daima anahudumia wengine... wazo hili la huduma Mungu ameliweka katika Mwana Wake. Yesu alipewa kusimama juu ya ubinadamu, ili kwa mfano Wake aweze kufundisha namna ya kuhudumu. Maisha Yake yote yalikuwa chini ya sheria ya huduma... Hivyo aliiishi sheria ya Mungu na kwa mfano Wake aliwfundisha jinsi ya kuitii.

Mara kwa mara Yesu alijaribu kuweka kanuni hii miongoni mwa wanafunzi Wake. Wakati Yakobo na Yohana walipotaka nafasi kuu, alisema, "bali mtu yeyote anayetaka kuwa mkubwa kwenu, na awe mtumishi wenu" (Mathayo 20:26). Katika ufalme Wangu, kanuni ya upendeleo na ukuu haina nafasi. Ukuu pekee ni ukuu wa unyenyekevu. Utuftuti pekee unapatikana katika utayari wa kuwahudumia wengine.

Huduma ya kutawadhana miguu ni huduma ya utumishi. Hili ni somo ambalo Bwana angependa watu wote wajifunze na kilitenda. Huduma hii inapoadhimishwa kwa haki, watoto wa Mungu wanatetwa katika uhusiano mtakatifu wa kila mmoja na mwenzake, ili kusaidiana na kubarikiana.

Ili watu Wake wasipotoshwe kwa ubinaksi unaokaa katika moyo wa asili na ambao unaimarishwa kwa kujifikiria, Kristo Mwenyewe alituwekea mfano wa unyenyekevu. Asingeweza kuacha somo hili kubwa lifanywe na binadamu. Aliliona kuwa lenye maana sana kiasi kwamba Yeye mwenyewe, Aliye sawa na Mungu, alitawadha miguu ya wanafunzi Wake... Kitendo hiki kina maana kubwa kwetu. Mungu angependa tuzingatie tukio zima, siyo tu tendo moja la usafi wa nje. Somo hili halimaanishi tu tendo moja. Lengo lake ni kufunua ukweli mkuu kwamba Kristo ni mfano wa sisi tunavyopaswa kuwa kupitia neema Yake katika ushirikiano wetu na wengine. Linaonesha kwamba maisha yote yanapaswa kuwa ya unyenyekevu, huduma ya kweli.

## Kielelezo cha Yesu katika Unyenyekevu

*"Basi ikiwa mimi, niliye Bwana na Mwalimu, nimewatawadha miguu, imewapasa vivyo kutawadhana miguu ninyi kwa ninyi. Kwa kuwa nimewapa kielelezo; ili kama mimi nilivyowatendea, nanyi mtende hivyo"* (Yohana 13:14, 15).

**K**atika mwanadamu kuna tabia ya kujiinua zaidi kuliko ndugu yake, kufanya kazi nafsi, kutafuta nafasi za juu; na mara nyingi hii imesababisha dhana ovu na uchungu wa roho. Agizo linaloitangulia Meza ya Bwana ni kuondoa sintofahamu, kumwondoa mwanadamu kutoka katika ubinafsi wake, katika kujiinua sana, kuwa na unyenyekevu wa moyo utakaomwezesha kumtumikia nduguye.

Huduma ya kutawadhana miguu hueleza kwa nguvu umuhimu wa unyenyekevu wa kweli. Wakati wanafunzi walipokuwa wakishindana kwa ajili ya nafasi ya juu, katika ufalme ulioahidiwa, Kristo alijifunga na kufanya huduma ya utumwa kwa kuwatawadha miguu wale waliomwita Bwana.

Uptanisho wa kila mmoja na mwenzake ndiyo kazi ambayo ilianzishwa kwa huduma ya kutawadha miguu.... Kila inapoahimishwa, Kristo huwapo kwa Roho Wake Mtakatifu. Roho huyu ndiye aletaye usadikisho wa miyo.

Kama Kristo alivyoahimisha kaida hii pamoja na wanafunzi Wake, usadikisho uliwajia miyoni mwa wote isipokuwa Yuda. Hivyo basi tutapata usadikisho pale Kristo anakapozungumza katika miyo yetu. Chemchemi za roho zitakatishwa. Akili zitatiwa nguvu na katika kazi na maisha, itavunja kila kizuzi kilichosababisha utengano na mfarakano. Dhambi zote zilizotendwa zitaonesha kwa uwazi zaidi kuliko zamani; kwa kuwa Roho Mtakatifu atazileta katika kumbukumbu zetu.

Kwa kutawadha miguu ya wanafunzi, Yeye (Yesu) alisema, "Kwa kuwa nimewapa kielelezo; ili kama mimi nilivyowatendea, nanyi mtende hivyo." ... hapa Kristo alikuwa akianzisha dini ya utumishi. Kwa tendo la Bwana wetu, tendo hili la fedheha lilifanywa kuwa huduma takatifu. Lilipaswa kutazamwa na wanafunzi, ili kwamba waweze kuyahifadhi akilini mafundisho Yake ya unyenyekevu na utumishi.



## Uthibitisho wa Uaminifu

"Mkiyajua hayo, heri ninyi mkiyatenda" (Yohana 13:17).

Kaida hii ya kutawadhana miguu ilifanywa kuwa Khuduma ya dini.... Ilitolewa kuwa kitu cha kupima au kuthibitisha uaminifu wa watoto wa Mungu. Israeli mpya ilipotazama kaida ya sakramenti, udhihirisho huu ungechukua nafasi ya ishara ya kifo cha Bwana.

Huduma hii ilitolewa kwa faida ya wanafunzi wa Yesu. Kristo alimaanisha yote aliyojasema, midomo Yake ilipotamka maneno, "Kwa kuwa nimewapa kielelezo; ili kama mimi nilivyowatendea, nanyi mtende hivyo.... Mkiyajua hayo, heri ninyi mkiyatenda" Alikusudia kwa hili kupima hali halisi ya moyo na akili ya wale walioshiriki.

Kristo aliwafundisha wanafunzi Wake kwamba kuwatawadha miguu yao hakukuondoa dhambi zao, bali kwamba utakaso wa moyo yao ulipimwa katika huduma hii ya unyenyekevu. Ikiwa moyo ultakaswa, tendo hili ndilo lilihitajika ili kufunua ukweli huo. Alipotawadha miguu ya Yuda; bali alisema, "nanyi mmekuwa safi, lakini si wote." Yuda alileta moyo wa usaliti katika tukio hili na Kristo alifunua kwa wote kwamba alimjua ya kuwa ni msaliti wa Bwana wake na kwamba kutawadhada miguu yake haikuwa huduma ya kusafisha roho kutoka katika uchafu wake wa kimaadili.

Wakati waumini wakikusanyika kuadhimisha huduma, kuna wajumbe wasioonekana kwa macho ya kibinadamu.... Malaika wa mbinguni ... wapo. Wageni hawa wasioonekana wapo katika kila wakati kama huu....

Kristo kwa Roho Mtakatifu yupo hapo kuweka muhuri kwa huduma Yake mwenyewe. Yupo hapo kusadikisha na kulainisha moyo. Hakuna uangalizi, wala fikira ya toba, inayoepuka kujua Kwake. Kwa mwenye kutubu, mwenye moyo uliovunjika, Yupo akimingoja. Mambo yote yameandaliwa kwa mapokezi ya roho hiyo. Yeye aliyetawadha miguu ya Yuda anatamani kutawadhada kila moyo kutoa madoa ya dhambi.... Wote wanaokuja wakiwa na imani yao iliyotheabitii Kwake watabarikiwa sana.

## Kwa Ukumbusho Wangu

*"Akatwaa mkate, akashukuru, akaumega, akawapa, akisema, Huu ndio mwili wangu unaotolewa kwa ajili yenu; fanyeni hivi kwa ukumbusho wangu" (Luka 22:19).*

**K**atika Pasaka ya mwisho Bwana wetu aliyoshiriki na wanafunzi Wake, Alianzisha Meza ya Bwana badala ya Pasaka, ili kuadhimishwa kwa kumbukumbu ya kifo Chake.

Sherehe ya kitaifa ya Wayahudi ilipaswa kuondolewa milele. Huduma ambayo Kristo aliianzisha ilipaswa kuadhimishwa na wafuasi Wake katika nchi zote na kwa nyakati zote.

Mungu hajawaachia wanadamu waseme ni nani watakaohudhuria katika matukio haya. Kwa kuwa ni nani anayeweza kuusoma moyo? Ni nani anayeweza kutofautisha magugu na ngano? "Lakini mtu ajihoji wenyewe, na hivyo aule mkate, na kukinywea kikombe." Kwa kuwa "Kila aulaye mkate huo, au kukinywea kikombe hicho cha Bwana isivyostahili, atakuwa amejipatia hatia ya mwili na damu ya Bwana." "Maana alaye na kuinywa, hula na kunywa hukumu ya nafsi yake, kwa kutokuupambanua ule mwili" (1 Wakorintho 11: 28, 27, 29).

Kwa kushiriki na wanafunzi Wake mkate na divai, Kristo Mwenyewe aliwaahidi kuwa Mkombozi wao.... Tunapopokea mkate na divai vikiashiria mwili wa Kristo uliovunjika na damu iliyomwagika, tunashiriki kwa kufikiri katika tukio la Ushirika katika chumba cha juu. Tunaonekana kupita kwenye bustani iliyofanywa wakfu kwa maumivu ya Yule aliyechukua dhambi za ulimwengu. Tunashuhudia mapambano ambayo kwayo upatanisho wetu na Mungu ulipatikana. Kristo amesulubishwa msalabani mionganini yetu.

Tukimwangalia Mkombozi aliyesulubiwa msalabani, tunaelewa kwa kina zaidi wingi na maana ya kafara iliyofanywa kwa Utukufu wa mbinguni. Mpango wa wokovu unatakaswa mbele yetu na wazo la Kalvari linaamsha uhai na hisia takatifu miyoni mwetu. Sifa kwa Mungu na Mwana-Kondoo itakuwa miyoni mwetu na kwenye midomo yetu; kwa maana kiburi na ibada binafsi haziwezi kuchanua katika roho ambayo inaendelea kuhifadhi kumbukumbu ya matukio ya Kalvari.

## Agano Jipyka Katika Damu Yangu

*"Kikombe nacho vivyo hivyo baada ya kula; akisema, kikombe hiki ni agano jipyka katika damu yangu, inayomwagika kwa ajili yenu"* (Luka 22:20).

Kwa kushiriki na wanafunzi Wake mkate na divai, Kristo Kaliahidi kwao kuwa Mkombozi wao. Aliwakabidhi agano jipyka, ambalo kwa wote wanaomkubali wanakuwa watoto wa Mungu na warithi pamoja na Kristo. Kwa agano hili, kila baraka ambayo mbingu ingeweza kumpa kwa maisha haya na yajayo ilikuwa yao. Agano hili lilikuwa liidhinishwe kwa damu ya Kristo. Na uendeshaji wa kaida hii ulikusudiwa kuweka mbele ya wanafunzi daima kafara isiyo kifani iliyotolewa kwa ajili ya kila mmoja wao binafsi kama sehemu ya jamii ya wanadamu wote walioanguka.

Lakini huduma ya meza ya Bwana haikuwa kipindi cha huzuni. Hii haikuwa kusudi lake. Wakati wanafunzi wa Bwana wanakusanyika karibu na meza Yake, hawapaswi kukumbuka na kuombolezea mapungufu yao. Hawapaswi kufikiria kuhusu uzoefu wao wa kidini wa zamani, iwe uzoefu huo umekuwa wenye kuleta heshima au kudhofisha. Hawapaswi kukumbuka tofauti kati yao na ndugu zao. Huduma ya maandalizi imebeba haya yote. Uchunguzi binafsi, kutubu dhambi, kupatanisha tofauti, vyote vimefanyika. Sasa wanaweza kukutana na Kristo. Hawapaswi kusimama katika kivuli cha msalaba, bali katika nuru yake unayookoa. Wanapaswa kufungua roho kwa miale ing'aayo ya Jua la Haki. Kwa mioyo iliyosafishwa na damu yenye thamani zaidi ya Kristo, katika ufahamu kamili wa kuwepo Kwake, ingawa haonekani, wanapaswa kusikia maneno Yake, "Amani nawaachieni; amani yangu nawapa; niwapavyo mimi sivyo kama ulimwengu utoavyo" (Yohana 14:27).

Dhabihu ya upatanisho ni kamili na ya kutosha. Agano jipyka, ndilo lililotiwa muhuri kwa damu Yake, ambayo iliyomwagika kwa ajili ya wengi kwa ondoleo la dhambi. Kristo aliyatangaza haya katika Meza ya Bwana. Katika kikombe hiki kuna matokeo, kwa wale wanaokunywa kwa imani, kuleta amani na kutakasa nafsi. Ni zeri ya Gileadi, ambayo Mungu ametoa kurejesha afya na uzima wa kiroho kwa roho iliyopo<sup>t</sup>oka kwa dhambi.

## Kila Mwulapo Mkate na Kunywa

*"Maana kila mwulapo mkate huu na kukinywea kikombe hiki, mwaitangaza mauti ya Bwana hata ajapo" (1 Wakorintho 11:26).*

**W**okovu wa mwanadamu unategemea matumizi ya mara kwa mara ya damu safi ya Kristo katika mioyo yao. Kwa hivyo, Meza ya Bwana haikuwa ya kuadhimishwa mara chache au kila mwaka, bali mara nyingi zaidi kuliko Pasaka ya kila mwaka. Kaida hii ya ukumbusho ni kwa ajili ya tukio kubwa zaidi kuliko ukombozi wa wana wa Israeli kutoka Misri. Ukombozi huo ulikuwa ni mfano wa upatanisho mkubwa ambao Kristo aliufanya kwa kuyatoa maisha Yake kafara kwa ajili ya ukombozi wa mwisho wa watu Wake.

Agizo hili halipaswi kuwa la kipweke, kama watu wengi wanavyofanya. Kila mtu lazima ashiriki hadharani, na hivyo kutoa ushuhuda: Ninamkubali Kristo kama Mwokozi wangu binafsi. Aliyatoa maisha Yake kwa ajili yangu, ili niokolewe kutoka kifoni.

Kaida hii inaonesha ujio wa pili wa Kristo. Ilikuwa imekusudiwa kudumisha tumaini hili katika akili za wanafunzi. Kila walipokutana kwa pamoja kwa ajili ya ukumbusho wa kifo Chake, walieleza jinsi alivyo "kitwaa kikombè, akashukuru, akawapa, akisema, Nyweni nyote katika hiki; kwa maana hii ndiyo damu yangu ya agano jipyä, imwagikayo kwa ajili ya wengi kwa ondoleo la dhambi. Lakini nawaambieni, Sitakunywa kabisa tangu sasa uzao huu wa mzabibu, hata siku ile nitakapokunywa mpya pamoja nanyi katika ufalme wa Baba yangu" (*Mathayo* 26: 27-29). Katika taabu yao, walipata faraja katika tumaini la kurudi kwa Bwana wao. Wazo la thamani kuu isiyoelezeka kwao lilikuwa ni, "kila mwulapo mkate huu na kukinywea kikombe hiki, mwaitangaza mauti ya Bwana hata ajapo."...

Kristo ameanzisha huduma hii ili izungumze na hisia zetu juu ya upendo wa Mungu.... Hakuna umoja kati ya roho zetu na Mungu isipokuwa kupitia kwa Kristo. Umoja na upendo kati ya ndugu na ndugu lazima uimarishe na kufanya kuwa wa milele kwa upendo wa Yesu. Na hakuna chochote isipokuwa kifo cha Kristo kinachoweza kufanya upendo Wake uwe na nguvu kwetu. Ni kwa sababu tu ya kifo Chake ndiyo tunaweza kutazamia kwa furaha ujio Wake wa mara ya pili. Kafara Yake ndiyo kitovu cha tumaini letu.

## Ubatizo na Mateso ya Kristo

*"Mkizikwa pamoja naye katika ubatizo; na katika huo mkafufuliwa pamoja naye, kwa kuziamini nguvu za Mungu aliyefufuliwa katika wafu" (Wakolosai 2:12).*

Kristo alipumzika kaburini siku ya Sabato na wakati Kriumbe watakatifu wa mbinguni na duniani walipokuwa wameamka asubuhi ya siku ya kwanza ya juma, alifufuka kutoka kaburini ili kuanza upya kazi Yake ya kufundisha wanafunzi Wake. Lakini ukweli huu hauiweki wakfu siku ya kwanza ya juma na kuifanya kuwa Sabato. Yesu, kabla ya kifo Chake, aliweka kumbukumbu ya kuvunjika kwa mwili Wake na damu Yake iliyomwagika kwa ajili ya dhambi za ulimwengu, katika kaida ya Meza ya Bwana, akisema, "Maana kila mwulapo mkate huu na kukinywea kikombe hiki, mwaitangaza mauti ya Bwana hata ajapo" (1 Wakorintho 11:26). Na muumini aliyetubu, anayezichukua hatua zinazohitajika katika wongofu, anakumbuka katika ubatizo wake kifo, mazishi na ufufuo wa Kristo. Anashuka ndani ya maji katika mfano wa kifo na maziko ya Kristo na anainuliwa kutoka majini katika mfano wa ufufuo Wake... kuishi maisha mapya katika Kristo Yesu.

Jeshi la malaika lilijawa na mshangao walipoona mateso na kifo cha Mfalme wa utukufu. Lakini... haikuwa ajabu kwao kwamba Bwana wa uzima na utukufu... angetangua vifingo vya kifo na kutoka katika gereza Lake, mshindi mwenye furaha. Kwa hivyo, ikiwa moja ya matukio haya yote inayopaswa kuadhimishwa kwa siku ya mapumziko, ni kusulubiwa. Lakini nalionna kwamba hakuna moja ya matukio haya yaliyokusudiwa kubadilisha au kufuta sheria ya Mungu; badala yake, yanatoa uthibitisho mkubwa wa kutokubadilika-kwake....

Sabato iliwekwa Edeni kabla ya Anguko na iliadhimishwa na Adamu na Hawa, na jeshi lote la mbinguni. Mungu alipumzika siku ya saba, akabariki na kuifanya takatifu. Nalionna kwamba Sabato haitafutwa kamwe; lakini watakatifu waliokombolewa na jeshi lote la malaika, wataiadhimisha kwa heshima ya Muumba mkuu hata milele.

## Jina Alilotupatia Bwana

*"BWANA atakuweka uwe taifa takatifu kwake, ... utakaposhika maagizo ya BWANA, Mungu wako, na kutembea katika njia zake. Na mataifa yote ya duniani watakuona umeitwa kwa jina la BWANA, nao watakiwa na hofu kwako" (Kumbukumbu la Torati 28:9, 10).*

Ikiwa tunataka kuingia katika umiliki wa urithi wa Imbinguni, utukufu na vitu vya milele, lazima tuwe katika uhusiano wa agano na Mungu, na kutumia kila uwezo wetu kuleta roho kwa Kristo.... Watu wa Mungu lazima wawe watu wa pekee, watakatifu, wenye utofauti kwa tabia na mazoea kutoka ulimwenguni, wakitofautishwa na watu wote wa dini za siku hizi. Wanapaswa kuwa mfano katika utauwa binafsi na matendo mema. Kuna kazi kuu na takatifu zaidi ya kufanya kuliko ambayo tumefanya hadi sasa. Kristo amosema, "Ufalme wangu sio wa ulimwengu huu." Hauna kanuni zitakazokidhi kanuni za ulimwengu. Bwana ameliweka kanisa Lake kama nuru ulimwenguni, kuuongoza ulimwengu kuelekea mbinguni. Linapaswa kuwa sehemu ya mbinguni, iliyopo duniani, ikiangaza nuru takatifu kwenye njia ya roho zilizo gizani.

Wewe ni onesho kwa ulimwengu, kwa malaika na kwa wanadamu. Watu wa Mungu sasa wanapaswa kupokea nuru na kuieneza. Hawahitaji kujaribu kung'aa; ikiwa mioyo yao imeangaziwa na Kristo, hawawezi kuzuia kung'aa. Mng'ao utaonekana; kila mwanafunzi wa kweli atamfunua Kristo kwa ulimwengu kama Mwokozi anayesamehe dhambi.

Sisi ni Waadventista wa Sabato. Je! Tunaona haya kwa ajili ya jina letu? Tunajibu, Hapana, hapana! Hatuoni. Ni jina ambalo Bwana ametupatia. Linabainisha ukweli ambao utakuwa jaribu kwa makanisa. Ili hili liwe hivyo, lazima tumwelekee Yesu daima.

Jina la Wadventista wa Sabato linaonesha sifa halisi ya imani yetu mbele na litasadikisha akili yenye kudadisi. Kama mshale kutoka katika podo la Mungu, litawajeruhi wanaokiuka sheria ya Mungu na litasababisha toba kwa Mungu na imani kwa Bwana wetu Yesu Kristo.

Kuna wengi wanaokutazama, kuona dini inaweza kukufanya nini. Ikiwa utakuwa mwaminifu katika kazi uliyopewa na Mungu, utakuwa na mvuto sahihi na utaziongoza roho katika njia ya haki.

## Wajenzi, Sio Waharabu

*"Na watu wako watapajenga mahali palipokuwa ukiwa; utaiinua misingi ya vizazi vingi; naue utaitwa, mwenye kutengeneza mahali palipobomoka; na, mwenye kurejeza njia za kukalia" (Isaya 58:12).*

Je, Mungu hana kanisa lililo hai? Analo kanisa, lakini Jni kanisa lililo vitani, si kanisa lililokwisha shinda. Tuhasikitika kuwa kuna washiriki wenye upungufu.... Wakati Bwana anapoleta katika kanisa wale walioongoka kweli, Shetani wakati huo huo analeta watu ambao hawajaongoka katika ushirika wake. Wakati Kristo anapanda mbegu nzuri, Shetani anapanda magugu. Kuna nguvu mbili pinzani kila mara zinazotumika kwa washiriki wa kanisa. Kuna nguvu moja inayofanya kazi kwa utakaso wa kanisa na nyininge kwa kuharibu watu wa Mungu....

Ingawa kuna maovu yanayoendelea kuwepo katika kanisa na yatakuwepo hadi mwisho wa dunia, kanisa katika siku hizi za mwisho linapaswa kuwa nuru kwa ulimwengu uliochafuliwa na kudhoofishwa na dhambi....

Kuna kanisa moja tu ulimwenguni ambalo kwa sasa linasimama katika ufa na kujenga wigo, kujenga mahali pa zamani palipobomoka; na kwa mtu ye yeyote kuvuta umakini (usikivu) wa ulimwengu na makanisa mengine kwa kanisa hili, kulishutumu kama Babeli, ni kufanya kazi kwa kupatar a na yule aliye mshitaki wa ndugu.... Ulimwengu wote umejawa chuki kwa wale wanaotangaza madai sheria ya Mungu yanayowahusu watu wote, na kanisa ambalo ni waaminifu kwa Yehova lazima washiriki katika mapambano yasiyo ya kawaida.... Wale wenye utambuzi wowote wa maana ya vita hivi, hawatapeleka silaha zao kinyume na kanisa linalopigana, bali kwa nguvu zao zote watapambana pamoja na watu wa Mungu dhidi ya muungano wa uovu.

Wale wanaoanza kutangaza ujumbe kwajukumu lao binafsi, ambao, wakati wakidai kuwa wamefunzwa na kuongozwa na Mungu, bado wanafanya kazi yao maalum ya kuvunja kile ambacho Mungu amekuwa akikijenga kwa miaka mingi, hawafanyi mapenzi ya Mungu. Hebu ijulikane kwamba watu hawa wako upande wa mdanganyifu mkuu. Usiwaamini.

## Utajiri wa Laodikia

*"Nakupa shauri, ununue kwangu dhahabu iliyosafishwa kwa moto, upate kuwa tajiri, na mavazi meupe upate kuвая, aibu ya uchi wako isionekane, na dawa ya macho ya kujipaka macho yako, upate kuона"* (Ufunuo 3:18).

**U**jumbe kwa kanisa la Laodikia unatumika kwa wote ambao wamepata nuru kuu na fursa nyingi, lakini hawajazitambua.

Kuna idadi kubwa ya Wakristo wa kuigiza ambao hawamfuati kweli Yesu. Hawachukui msalaba kwa kujikana ipasavyo na kujisalimisha. Ingawa wanajionesha kuwa Wakristo wa kweli, wanafuma katika tabia zao nyuzi nyingi za hali za udhaifu wao wenyewe ili kwamba ruwaza nzuri iharibike. Kristo anasema, kuhusu wao: "Mnajisifu kuwa matajiri na kuwa na maendeleo ya kiroho ya kufikirika. Kwa kweli wewe si baridi wala moto, lakini mmejawa na kiburi cha bure. Usipoongoka, huwezi kuokolewa; kwa sababu mngelicheribu mbingu kwa hekima yenu isiyotakaswa. Siwezi kuidhinisha roho yako na matendo yako. Hautendi kulingana na Kielelezo cha Mungu. Unaufuata muundo ulio wa ubunifu wako mwenyewe tu. Kwa sababu una uvuguvugu, nitakutapika utoke katika kinywa changu."

Shahidi wa Kweli amesema, "ununue kwangu dhahabu iliyosafishwa kwa moto, upate kuwa tajiri, na mavazi meupe upate kuвая, aibu ya uchi wako isionekane"

Yesu anakwenda mlango kwa mlango, akisimama mbele ya kila hekalu la roho, akitangaza, "Nasimama mlangoni, nabisha." Kama mfanyabiashara wa kimbingu, anafungua hazina Zake... "Fungueni milango yenu," anasema mfanyabiashara mkuu, mmiliki wa utajiri wa kiroho, "na shughulikeni kazi zenu Nami. Ndiye Mimi, Mkombozi wako, ambaye nakushauri ununue kutoka Kwangu."

Mashauri ya Shahidi wa Kweli yamejawa tumaini na faraja. Makanisa bado yanaweza kununua dhahabu ya ukweli, imani, upendo na kuwa tajiri katika hazina ya kimbingu.

## Watu Wazishikao Amri za Mungu

*"Hapa ndipo penye subira ya watakatifu, hao wazishikao amri za Mungu, na imani ya Yesu" (Ufunuo 14:12).*

Tuko kwenye kizingiti cha matukio makubwa na mazito. Unabii unatimia. Historia ya ajabu na ya matukio inaandikwa katika vitabu vya mbinguni. Kila kitu katika ulimwengu wetu kiko katika msukosuko.... Muda mfupi, kama ulivyokuwa, ndiyo uliobaki....

Shetani anaendelea kufanya mipango yake kwa vita kuu ya mwisho, ambapo kila mtu atachagua upande....

Wanadamu katika upofu wao wanajisifu kwa maendeleo mazuri na uongofu; lakini macho ya Ujuzi wa Kila Kitu yanawaona wenye hatia na uovu wa ndani. Walinzi wa mbinguni wanauona ulimwengu ulioja vurugu na uhalifu. Utajiri unapatikana kwa kila aina ya wizi, siyo wizi wa watu tu, bali wa Mungu. Watu wanatumia mali Yake kutosheleza ubinafsi wao. Kila kitu wanachoweza kushika kinatumiwa kwa ajili ya tamaa yao. Uchoyo na kupenda anasa hushinda. Watu wanathamini sifa za mwanzo za mdanganyifu mkuu. Wame ... jazwa na roho yake.

Lakini wingu la ghadhabu ya hukumu linawazunguka juu yao, likiwa na sifa zilizoiharibu Sodoma. Katika maono yake ya mambo yajayo, nabii Yohana alilionna tukio hili. Ibada hii ya pepo ilifunuliwa kwake, na ilionekana kwake kana kwamba ulimwengu wote ulikuwa ukingoni mwa uharibifu. Lakini alipotazama kwa shauku kubwa, aliwaona watu wa Mungu wanaozishika amri. Walikuwa na muhuri wa Mungu aliye hai juu ya vipaji vyao na akasema: "Hapa ndipo penye subira ya watakatifu, hao wazishikao amri za Mungu, na imani ya Yesu."

Bendera hii ya pekee ... [Ufunuo 14:12 inanukuliwa] inapaswa kubebwa ulimwenguni hadi kufikia kufungwa kwa muda wa rehema.

Wakati huu si wakati wa kukata tamaa, kuonea haya imani yetu.

Kila mtu anapaswa kusimama katika nafasi na mahali pake, akifikiri, akizungumza na kufanya kazi kwa ushirikiano pamoja na Roho wa Mungu.

## Habari Njema katika Ulimwengu Wote

*"Tena habari njema ya ufalme itahubiriwaa katika ulimwengu wote, kuwa usuhuhuda kwa mataifa yote; hapo ndipo ule mwishio utakapokuja" (Mathayo 24:14).*

**S**i otumchungaji aliye teuliwa pekee anayejibika kwenda kutimiza agizo hili. Kila mtu ambaye amempokea Kristo ameitwa kufanya kazi kwa ajili ya wokovu wa wanadamu wenzake. "Roho na bibi-arusi, wanasema, Njoo! Naye asikiaye na aseme, Njoo!" (*Ufunuo 22:17*). Jukumu la kutoa mwaliko huu linajumuisha kanisa zima. Kila mtu ambaye amesikia mwaliko huo anapaswa kutoa ujumbe kutoka milimani na mabondeni, akisema, "Njoo."

Ni kosa la kufisha kudhani kwamba kazi ya kuokoa **roho** inategemea huduma peke yal e. Muumini mnyenyekemu na aliyejitlea ambaye Bwana wa hamba la mizabibu humweke mzigzo wa roho, anapaswa kutiwa moyo na wale ambao Bwana amewapatia majukumu makubwa. Wale ambao wanashika nafasi za uongozi katika kanisa la Mungu wanapaswa kutambua kuwa agizo la Mwokozi limetolewa kwa **wote** wanaoamini kwa jina Lake. Mungu atawatuma wengi **katika** shamba Lake la mizabibu ambao hawajajitoa kikamilifu **katika** huduma kwa kuwekewa mikono.

Mamia, naam, maelfu, ambao wamesikia ujumbe **wote** wokovu, bado ni wamekaa bila kazi sokoni, wakati wanawez kushiriki katika aina fulani ya huduma ya kazi. Kwa **hawajajitoa** Kristo anasema, "Mbona mmesimama hapa mchana **kutwisha** bila kazi?" na anaongezea, "enendeni nanyi katika shamba la mizabibu" (*Mathayo 20:6, 7*). Kwa nini wengi **hawajajitoa** wito? Je! Ni kwa sababu wanadhani wako huru kwa **kuwekewa** hawasimami kwenye mimbari? Hebu waelewe **kwamili** kuna kazi kubwa inayofanywa nje ya mimbari na maelfu **kwamili** waumini waliojitlea.

Kwa muda mrefu Mungu amengojea kwa ajili ya **roho** huduma kwa kanisa zima, ili kila mtu afanye kazi kwa a Yake kulingana na uwezo wake. Wakati washiriki wa kanisa Mungu wakifanya kazi yao iliyoteuliwa katika maeneo yenye uhitaji nyumbani na nje ya nchi, kwa kutimiza agizo la **habari** njema, ulimwengu wote hivi karibuni utaonywa na **Bwana Yesu** atarejea katika dunia hii kwa nguvu na utukufu **mkutano**.

## Upendo Huzaa Upendo

*"Yeye asiyemwachilia Mwana wake mwenyewe, bali alimtoa kwa ajili yetu sisi sote, atakosaje kutukirimia na mambo yote pamoja naye?" (Warumi 8:32).*

**W**ale walioongoka kweli ... watatoa, kwa maendeleo ya kazi, vile alivyowapatia katika mikono yao....

Sisi ni mashahidi wa Kristo na hatupaswi kuruhusu mivuto na mipango ya kiulimwengu kuchukua muda na usikivu wetu. Kuna mivuto mikubwa zaidi....

Tunaomba kwa ajili ya fedha inayotumika katika mambo yasiyo na ulazima.... Usipoteze fedha yako kwa kununua vitu visivyohitajika. Unaweza kufikiri kwamba jumla ya hivi vidogo havina thamani kubwa, lakini vingi vitafanya jumla kubwa. Acha matumizi yoyote ya ubadhirifu. Usiruhusu kitu chochote kinachofanya kwa ajili ya maonesho tu. Fedha yako inamaanisha wokovu wa roho. Hebu kuwe na utaratibu wa kutoa kwa mpangilio. Wengine wanaweza wasiweze kutoa kiasi kikubwa, lakini wote wanaweza kuweka kando kila juma kitu kwa ajili ya Bwana. Ruhusu watoto kufanya sehemu yao. Hebu wazazi wawafundishe watoto kutunza senti zao ili kuzitoa kwa Bwana. Huduma ya Injili inapaswa kutegemezwa na kujinyima na kujitoa....

Hebu washiriki wa kanisa letu wasinung' unike kwa sababu wanaombwa kutoa mara kwa mara. Ni nini kinachofanya wito wa mara kwa mara kuwa lazima? Je! Si kuongezeka kwa kasi kwa miradi ya kimisionari? ...

Kwa muda mrefu zipo roho za kuokoa, mivuto yetu katika kazi ya kuokoa roho ni kujua kuwa hakuna kukoma. Kanisa haliwezi kupunguza kazi yake bila kumkana Bwana wake....

Upendo kwa roho zilizopotea ulimleta Kristo katika msalaba wa Kalvari. Upendo kwa roho utatuongoza kujinyima na kujitoa, kwa ajili ya kuokoa kile kilichopotea. Na wafuasi wa Kristo wanaporudisha kwa Bwana kile kilichokuwa Chake, wanakusanya hazina ambayo itakuwa yao wanaposikia maneno haya: "Vema, mtumwa mwema na mwaminifu; ... ingia katika furaha ya bwana wako" (Mathayo 25:21). Furaha ya kuona roho zilizookolewa milele itakuwa tuzo ya wote wanaofuata nyayo za Mkombozi.

## Jenga Juu ya Mwamba

*"Nami nakuambia, Wewe ndiwe Petro, na juu ya mwamba huu nitalijenga kanisa langu; wala milango ya kuzimu haitalishinda"* (Mathayo 16:18).

**N**eno Petro linamaanisha jiwe - jiwe linalobingirika. Petro hakuwa mwamba ambao kanisa lilijengwa juu yake. Malango ya kuzimu yalishinda juu yake alipomkana Bwana wake kwa kulaani na kuapa. Kanisa lilijengwa juu ya Mmoja ambaye malango ya kuzimu yasingeweza kushinda... Kanisa limejengwa juu ya Kristo kama msingi wake; ni kumtii Kristo kama kiongozi wake.

Kama Yesu angeweka mamlaka maalum kwa mmoja wa wanafunzi kuliko wengine, tusingekuta mara nyingi wakipigania ya kuwa nani angekuwa mkuu. Wangejitolea kwa mapenzi ya Bwana wao na kumheshimu yule ambaye amemchagua.

Badala ya kumteua mmoja kuwa kiongozi wao, Kristo aliwaambia wanafunzi, "Bali ninyi msiitwe Rabi," "wala msiitwe viongozi; maana kiongozi wenu ni mmoja, naye ndiye Kristo" (Mathayo 23:8, 10).

"Kichwa cha kila mwanamume ni Kristo." Mungu, ye ye anayeweka vitu vyotechini ya miguu ya Mwokozi, "akamweka awe kichwa juu ya ... kanisa" (1 Waefeso 1:22).

Katika kuwepo kwa Mungu, na akili zote za kimbingu, mbele ya jeshi lisiloonekana la kuzimu, Kristo alilijenga Kanisa Lake juu ya Mwamba unaoishi. Mwamba huo ni Yeye mwenyewe—mwili Wake mwenyewe, uliovunjwa na kuumizwa kwa ajili yetu. Dhidi ya kanisa lililojengwa juu ya msingi huu, malango ya kuzimu hayataweza kushinda...

Kwa miaka elfu sita, imani imejengwa juu ya Kristo. Kwa miaka elfu sita, mafuriko na dhoruba za ghadhabu ya Shetani zimepigana juu ya Mwamba wa wokovu wetu; lakini umesimama bila kutetereka...

Mwamba wa imani ndiyo kuwepo kwa Kristo katika kanisa. Juu ya huo, walio dhaifu wanaweza kuutegemea na wale wanaojiona wenye nguvu zaidi watakuwa dhaifu, isipokuwa wainemfanya Kristo kuwa ufanisi wao... Bwana "Yeye Mwamba, kazi yake ni kamilifu." "Heri wote wanaomkimbilia" (Kumbukumbu la Torati 32:4; Zaburi 2:12).

### Kwa Wakati Kama Huu!

*Kwa maana wewe ukinyamaza kabisa wakati huu, ndipo kutakapowatokea Wayahudi msaada na wokovu kwa njia nyininge; ila wewe utaangamia pamoja na mlango wote wa baba yako; lakini ni nani ajuaye kama wewe hukuujia usalme kwa ajili ya wakati kama huu?  
— Esta 4:14.*

**Y**eyote anayeona tabia ya kuchukiza ya dhambi, na kwa nguvu kutoka juu anapinga majoribu, kwa hakika ataamsha hasira ya Shetani.

Roho ile ile ambayo katika nyakati za zamani iliwaongoza watu kulitesa kanisa la kweli, katika nyakazi zijazo itaongoza katika kufanywa kwa kazi kamahiyo kwa wale wanaodumisha uaminifu wao kwa Mungu....

Amri ambayo hatimaye itatolewa dhidi ya watu waliosalia wa Mungu itafanana sana na ile iliyotolewa na Ahasuero dhidi ya Wayahudi. Leo, maadui wa kanisa la kweli wanaona katika kundi dogo linaloshika amri ya Sabato, Mordekai akiwa langoni....

Shetani ataamsha hasira dhidi ya wachache wanaokataa kukubali mila na desturi zinazopendwa na watu wengi.... Watesaji viongozi, wachungaji na washiriki wa kanisa watapanga njama dhidi yao. Kwa sauti na kalamu, kwa majigambo, vitisho na dhihiaka, watatafuta kuangusha imani yao.... Pasipo kuwa na "Kama yasemavyo Maandiko Matakatifu" ili kuleta dhidi ya watetezi wa Sabato ya Biblia, wataishia kutunga sheria kandamizi ili kutimiza lengo lao. Ili kupata umaarufu na mamlaka, wabunge watakubali matakwa ya sheria za Jumapili. Lakini wale wanaomcha Mungu hawawezi kukubali chombo kinachokiuka maagizo ya amri kumi za Mungu. Katika uwanja huu wa vita patapiganwa pambano kuu la mwisho katika pambano kati ya ukweli na uongo.

Maneno ya Mordekai kwa Esta yanaweza kutumika kwa wanaume na vijana wa leo: "lakini ni nani ajuaye kama wewe hukuujia usalme kwa ajili ya wakati kama huu?"

## Mamlaka Katili ya Adui

*Basi mtiini Mungu. Mpingeni Shetani, naye atawakimbia. Mkari-bieni Mungu, naye atawakaribia ninyi. Itakaseni mikono yenu, enyi wenye dhambi, na kuisafisha mioyo yenu, enyi wenye nia mbili. — Yakobo 4:7, 8.*

**K**una watu wengi leo waliochini yanguvu za pepo wabaya kama alivyokuwa yule mwenye pepo wa Kapernaumu. Wote wanaojitenga na amri za Mungu kwa kukusudia wanajiweka. wenyewe chini ya utawala wa Shetani. Watu wengi wanacheza na uovu, wakifikiri kwamba wanaweza kuacha wakati wowote wakiamua; lakini wanavutwa na kuendelea, hadi wanajikuta wakitawaliwa na nguvu kubwa zaidi kuliko uwezo wao. Hawezi kukwepa nguvu zake za ajabu. Dhambi ya siri au shauku kuu inaweza kumshika mateka kama asiyekuwa na msaada kama alivyokuwa yule mwenye pepo wa Kapernaumu.

Shetani ni mungu wa dunia hii; mvuto wake ni kupotosha akili, kutawala akili ya mwanadamu kwa uovu, na kuwaongoza mateka wake kwenye uvunjifu wa sheria na uovu. Anapanda ugomvi na kutia giza akili. Kazi ya Kristo ni kuvunja nguvu zake juu ya watoto wa wanadamu. Lakini bado ni wangapi katika kila nyanja ya maisha, nyumbani, katika shughuli za biashara, na kanisani, wanamkataa Yesu katika maisha yao na kumruhusu yule Ibilisi mwenye chuki aingie.

Njia ya Shetani ni pana saña na yenyewe udanganyifu zaidi. Imefanywa ionekane ya kuvutia zaidi, wakati ni ngumu, isiyoeleweka, na ilijoja masikitiko.

Anayetambua hatari itokanayo na matendo yake mwenyewe awe mwangalifu asije akamhuzunisha Roho Mtakatifu kisha akajitenga na Mungu kwa sababu anajua kwamba hapendezwi na mwenendo wake. Ni bora na salama zaidijinsi gani kuwa karibu na Mungu, ilinuru safi inayoangaza kutoka katika Neno Lake iweze kuponya majeraha ambayo dhambi imeyatengeneza katika roho. Kadiri tunavyokuwa karibu na Mungu, ndivyo tunavyokuwa salama zaidi, kwa kuwa Shetani anachukia na kuogopa uwepo wa Mungu.

Werevu wa Shetani hautapungua, lakini hekima iliyotolewa kwa wanadamu kuitia uhusiano hai na Chanzo cha nuru yote na elimu ya Mungu itafungamana na ujuzi na hila zake.

## Hila ya Kupenda Anasa za Dunia

*Shetani asije akapata kutushinda; kwa maana hatukosi kuzijua fikira zake. —2 Wakorintho 2:11.*

Sulemani anasema, "Mwenye kujitumainia moyo wake Sni mijinga" (Mithali 28:26); na kuna mamia ya watu kama hao waliopo miongoni mwa wanaodai kuwa wacha Mungu. Mtume anasema: "kwa maana hatukosi kuzijua fikira zake [Shetani]." Lo! werevu ulioje, ujuzi ulioje, hila ilioje, inayotumiwa kuwaongoza wale wanaodai kuwa wafuasi wa Kristo katika kuungana pamoja na ulimwengu kwa kutafuta furaha katika burudani za ulimwengu, chini ya udanganyifu kwamba wema fulani unapaswa kupatikana! Na hivyo wasiolindwa huingia moja kwa moja kwenye mtego, wakijidanganya wenyewe kwamba hakuna uovu njiani....

Nawezaje kustahimili wazo kwamba vijana walio wengi katika zama hizi wataukosa uzima wa milele! Laiti sauti ya muziki wa ala ingekoma na wakati wakiwa mbali wasiwe tena na muda wa thamani katika kuzifurahisha nafsi zao. Laiti wasingetumia muda mwingi katika mavazi na mazungumzo yasiyo na maana, na wawasilishe maombi yao ya dhati, ya kuugua kwa Mungu kwa ajili ya uzoefu mzuri. Kuna umuhimu mkubwa wa kujichunguza kwa ukaribu katika nuru ya Neno la Mungu; hebu kila mmoja ajiulize swalii: "Je, mimi ni mwema, au ni mwovu? Je, nimefanywa upya katika Kristo, au bado nina tamaa za mwili moyoni, nikiwa na vazi jipya lililovaliwa kwa nje?" Uandae moyo wako kwa ajili ya hukumu ya mwisho, na kwa nuru ya Mungu chunguza ili kuona kama kuna dhambi yoyote ya siri ambayo unaipenda, sanamu yoyote ambayo haujaiacha. Ombo, naam, ombo kwa jinsi ambavyo hujawahi kuomba hapo kabla, ili usidanganyike na hila za Shetani.... Hakika msingi wa tumaini lako la uzima wa milele hautaweza kuhakikishwa sana.... Wakati ambapo wale wanaotuzunguka wanaweza kuwa wasiofaa na wanaojishughulisha katika kutafuta anasa na upumbavu, mazungumzo yetu yako mbinguni, ambako tunamtazamia Mwokozi; roho inamtafuta Mungu kwa ajili ya msamaha na amani, kwa ajili ya haki na utakatifu wa kweli.

Ondoeni dhambi miyoni mwenu, kwa sababu dhambi ilisababisha kifo cha Mwana wa Mungu.

Vijana wapendwa, Yesu alikufa, si ili mwendeleee kuishi katika dhambi, bali awaokoe kutoka dhambini.

## Kuijaribu Sauti ya Wachungaji

*Mimi ndimi mchungaji mwema; nao walio wangu nawajua; nao walio wangu wanijua mimi. — Yohana 10:14.*

**K**ila mmoja wetu atajaribiwa sana; imani yetu itajaribiwa kabisa.

Tunahitaji kuweka nanga katika Kristo, tukiwa imara **na** dhabiti katika imani. Shetani anafanya kazi kupitia mawakala. Shetani huchagua wale ambao hawajanywa maji ya **uzima**, ambao roho zao zina kiu ya kitu kipyaa na cha ajabu, na **ambao** wako tayari wakato wowote kunywa kwenye chemchemi yoyote itakayoweza kujitokeza. Sauti zitasikika, zikisema, "Tazama, Kristo yuko hapa," au "Tazama, yuko kule; lakini hatupaswi kuziamini. Tuna ushahidi usio na shaka wa **sauti** ya Mchungaji wa Kweli, na anatuita tumfuate. Anasema, "Nimezishika amri za Baba yangu." Anawaongoza kondoo Wake katika njia ya utii mnyenyekevu kwa sheria ya Mungu....

"Sauti ya mgeni" ni sauti ya mtu asiyeshika wala kutii **sheria** takatifu, ya haki, na njema ya Mungu. Wengi wanajifanya sana kuwa watakatifu, na kujivunia miujiza wanayofanya katika kuponya wagonjwa, wakati hawazingatii kiwango **hiki** kikubwa cha haki. Lakini je, ni kwa uwezo wa nani uponyaji huo unafanywa? Je, macho ya upande wowote yanafunguliwa kwa uvunjaji wao wa sheria? Na je, wanajionesha kama watoto wanyenyekevu, watiifu, walio tayari kutii matakwa yote ya Mungu? Yohana anashuhudia juu ya wale wanaodai kuwa wana wa Mungu: "Yeye asemaye, Nimemjua, wala hazishiki amri zake, ni mwongo, wala kweli haimo ndani yake."<sup>1</sup> Yohana 2:4.... Kama wale ambao kupitia kwao uponyaji unafanyika, kwa sababu ya matukio haya, wameachwa, ili kutoa udhuru kwa kupuuza kwao sheria ya Mungu, na kuendelea katika uasi, ingawa wana nguvu katika kila eneo, haimaanishi kwamba wana nguvu kubwa ya Mungu. Kinyume chake, ni nguvu ya kutenda miujiza ya mdanganyifu mkuu.... Tunapaswa kuwa macho na utakatifu wa kuigiza unaoruhusu uvunjaji wa sheria ya Mungu. Hawawezi kutakaswa wanaoikanyaga sheria hiyo chini ya miguu yao, na kujipima wenyewe kwa kipimo cha kanuni zao wenyewe.

## Ombi Kwa Ajili ya Wagonjwa

*Basi ungameni dhambi zenu ninyi kwa ninyi, na kuombeana, ili mpate kuponywa. Sala yake mwenye haki ina nguvu nyingi, na hutenda mengi. – Yakobo 5:16.*

**K**risto ni tabibu mwenye huruma sawa sasa kama Kalivyokuwa wakati wa huduma Yake duniani. Kwake kuna mafuta ya uponyaji kwa kila ugonjwa.

Kwa nini watu hawataki kumwamini Yeye aliyemuumba mwanadamu, na ambaye anaweza, kwa kugusa, kwa neno, kwa kutazama, kuponya magonjwa ya kila aina? Ni nani anayestahili tumaini letu zaidi ya Yule ambaye ametoa dhabihu kubwa sana kwa ajili ya ukombozi wetu? Bwana wetu ametupa maelekezo maalum, kuitia mtume Yakobo, kuhusu wajibu wetu katika suala la ugonjwa. Msaada wa mwanadamu unaposhindwa, Mungu atakuwa msaada wa watu Wake. "Mtu wa kwenu amekuwa mgonjwa? Na awaite wazee wa kanisa; nao wamwombee, na kumpaka mafuta kwa jina la Bwana. Na kule kuomba kwa imani kutamwokoa mgonjwa yule, na Bwana atamwinua; hata ikiwa amefanya dhambi, atasamehewa" (Yakobo 5:14, 15).

Lakini kuomba ombi kama hilo ni tendo makini sana, na halipaswi kutekelezwa bila uangalifu mkubwa....

Kwa wale wanaotamani maombi ya kurejeshwa kwa afya zao, inapaswa ifahamike wazi kwamba uvunjaji wa sheria ya Mungu, uwe wa kawaida au wa kiroho, ni dhambi, na kwamba ili wapate baraka Zake, dhambi lazima iungamwe na kuachwa....

Tunajua kwamba Mungu anatusikia kama tukiomba sawasawa na mapenzi Yake. Lakini kupeleka maombi yetu pasipo roho ya kujitoa siyo sahihi; maombi yetu yanapaswa kufuata utaratibu, siyo wa kuamrisha, bali wa kusihi.

Kuna matukio ambayo Mungu huamua kufanya kwa uwezo Wake wa uungu katika kurejesha afya. Lakini siyo wagonjwa wote wanaponywa. Wengi wanahifadhiwa kupumzika katika Yesu....

Shauku na mivuto yetu inapaswa kusalimishwa katika mapenzi Yake. Matukio haya yanayojaribu imani ni kwa Faida yetu.... Imani huimarishwa kwa matendo. Tunapaswa suruhusu uvumilivu uoneshe matunda yake, tukikumbuka swamba kuna ahadi za thamani katika Maandiko kwa wale vanaomngeojea Bwana.

## Roho ya Ujasiri wa Kweli

*Maana Bwana MUNGU atanisaidia; kwa sababu hiyo sikutahayari, kwa sababu hiyo nimekaza uso wangu kama jiwe, nami najua ya kuwa sitaona haya. — Isaya 50:7.*

**U**imara wa tabia unajumuisha vitu viwili-nguvu ya dhamiri na nguvu ya kujitawala nafsi. Vijana wengi hudhani tamaa isiyodhibitiwa ndiyo nguvu ya tabia; lakini ukweli ni kwamba ye ye atawaliwaye na tamaa za nafsi yake ni mtu dhaifu. Ukuu halisi na uadilifu wa mwanadamu hupimwa kwa nguvu ya hisia anazozishinda, na siyo kwa nguvu ya hisia zinazomshinda. Mtu mwenye nguvu zaidi ni yule ambaye, ingawa anaumizwa na unyanyasaji, bado atazuia hisia kali na kusamehe adui zake. Watu kama hao ni mashujaa wa kweli.

Kielelezo cha mtu mwenye nguvu ni cha muhimu sana; ana nguvu ya umeme dhidi ya wengine. Anakutana na vikwazo katika kazi yake; lakini ana msukumo ndani yake, na badala ya kuruhusu njia yake kuzungushiwa wigo, anavunja kila kizuizi....

Kuna miiba katika kila njia. Wote wanaofuata uongozi wa Bwana lazima watazamie kukutana na kukatishwa tamaa, kukataliwa, na kupata hasa. Lakini roho ya ujasiri wa kweli itawasaidia kuyashinda haya. Wengi hutukuza sana changamoto zinazoonekana, na kisha kuanza kujihurumia na kutoa nafasi ya kukata tamaa. Watu wa namna hiyo wanahitaji kufanya mabadiliko kamili wao wenyewe. Wanapaswa kujidhibiti wenyewe ili kutanguliza juhudi, na kushinda hisia zote za kipuuzi. Wanapaswa kutambua kwamba maisha hayatatumika katika kushughulika na mambo ya kipuuzi. Hebu waazimie kukamilisha jambo fulani, kisha walifanye. Wengi hufanya maazimio mazuri, lakini kila mara wanaenda kufanya kitu fulani na kamwe hawafikii maazimio hayo. Na jumla ya maazimio yao yote ni porojo....

Kila mmoja anapaswa kuwa na lengo, jambo, maishani. Viuno vya nia vinapaswa kufungwa, na mawazo yaelekezwe kutokwenda kinyume na lengo, kama mshale wa kaskazini.... malengo ya msingi yanapaswa kutazamwa kila mara, na kila wazo na tendo lielekee katika kutimizwa. Hebu kuwe na lengo thabiti la kutekeleza kile kilichoazimiwa.

## Kuujaribu Ustahimilivu Wetu

*Wapenzi, msione kuwa ni ajabu ule msiba ulio kati yenu, unaowapata kama moto ili kuwajaribu, kana kwamba ni kitu kigeni kiwapatacho. Lakini kama minavyoyashiriki mateso ya Kristo, furahini; ili pia katika ufunuo wa utukufu wake mfurahi kwa shangwe. —1 Petro 4:12, 13.*

**W**afuasi wa Kristo wanafahamu kidogo sana juu ya njama ambazo Shetani na majeshi yake wanapanga dhidi yao. Lakini Yeye aketiye mbinguni atatangua hila hizi zote ili kutimiza mipango Yake ya kina. Bwana anaruhusu watu wake kuwekwa chini ya majoribu makali, si kwa sababu anafurahia dhiki na taabu zao, bali kwa sababu mchakato huu ni muhimu kwa ushindi wao wa mwisho.

Kwa upanga wa kweli wa Mungu mwenye uweza tumechukuliwa kutoka kwenye karakana ya dunia na kuletwa katika karakana ya Bwana ili kutayarishwa kwa ajili ya sehemu katika hekalu Lake. Katika kazi hii nyundo na patasi lazima zichukue nafasi yake, na baadaye kunga'arishwa kunafuata. Usiasi chini ya mchakato huu wa neema. Unaweza kuwa jiwe gumu, ambalo kazi kubwa inapaswa ifanyike kabla ya kuandaliwa kwa ajili ya mahali ambapo Mungu amekupanga kuwa. Haupaswi kushangazwa ikiwa kwa nyundo na patasi ya majoribu Mungu ataondoa kasoro zako za tabia. Yeye peke Yake anaweza kukamilisha kazi hii. Na kuhakikishiwa kwamba atafanya kazi Yake kwa ufasaha.

Mungu alinionesha kwamba aliwapa watu Wake kikombe kichungu ili wanywe, ili kuwatakasa na kuwasafisha.... Kikombe hiki kichungu kinaweza kufanywa kuwa kitamu kwa saburi, ustahimilivu na maombi, na ... kitakuwa na matokeo yake yaliyokusudiwa juu ya mioyo ya wale wanaokipokea, na Mungu ataheshimiwa na kutukuzwa. Siyo jambo dogo kuwa Mkristo na kumilikiwa na kuidhinishwa na Mungu.

Neema Yake inatosha katika majoribu yetu yote; na ingawani makubwa zaidi kuliko hapo awali, lakini kama tunamtumaini Mungu kabisa, tunaweza kushinda kila jaribu na kwa njia ya neema Yake twatoka tukiwa washindi. Tunapaswa tuvae silaha zote za Mungu na kuwa tayari wakati wowote kwa ajili ya kupambana na nguvu za uovu.

## Usalama Katika Kuwa Macho

*Basi tusilale usingizi kama wengine, bali tukeshe, na kuwa na kiasi. – 1 Wathesalonike 5:6.*

**N**ilioneshwa Shetani kama alivyokuwa hapo kabla, malaika mwenye furaha, aliyetukuzwa. Kisha nikaoneshwa jinsi alivyo sasa. Bado ana umbo la kifalme. Bado sifazakeninzuri, kwakuwa yeyenimalaika aliyeanguka. Lakini sura ya uso wake imejaa wasiwas, mashaka, huzuni, uovu, chuki, fitina, udanganyifu na kila aina ya uovu. Nilitazama hasa, paji la uso ambalo hapo kabla lilikuwa zuri sana. Kipaji cha uso wake kilianzia kwenye macho yake kilianza kufifia (kupoteza mng'ao wake). Niliona kwamba alizoea kufanya mabaya kwa muda mrefu hivyo kila sifa njema ilishushwa thamani, na kila tabia mbaya ilikuzwa. Macho yake yalikuwa ya werevu, madanganyifu, na yalioneshwa welekevu mkubwa. Umbo lake lilikuwa kubwa, lakini nyama zilining'inia mikononi na usoni mwake. Nilipomwona, alishika tama kwa mkono wake wa kushoto. Alionekana kuwa katika mawazo mazito. Tabasamu lilikuwa usoni mwake, ambalo lilinifanya nitetemeke, lilikuwa limejaa uovu na udanganyifu wa Shetani. Hili tabasamu ndilo analoonesha kabla ya kuhakikisha mafanikio ya lengo lake, na wakati anapomfunga mhanga wake katika mtego wake, tabasamu hili linakuwa la kutisha.

Watu wa Mungu wanapaswa wajitayarische kukabiliana na adui mwerevu. Ni upinzani huu ambao Shetani anauogopa. Anajua vizuri zaidi kuliko sisi kikomo cha uwezo wake na jinsi anavyoweza kushindwa kwa urahisi ikiwa tutampinga na kumkabili. Kwa nguvu za Mungu mtakatifu aliye dhaifu ni zaidi ya kumlingana yeye na malaika zake wote, na kama angeletwa kwenye majaribu [mtakatifu aliye dhaifu zaidi] angeweza kuthibitisha uwezo wake mkuu. Kwa hiyo hatua ya Shetani ni ya kimya, mienendo yake ni ya siri, na hatua zake zimefichwa....

Mwanadamu ni mfungwa wa Shetani na kwa asili ana mwelekeo wa kufuata maelekezo yake na kufanya amri zake. Ndani yake mwenyewe hana uwezo wowote wenyewe ufanisi wa kukataa uovu. Ni kwa Kristo tu kukaa ndani yake kwa imani iliyo hai, akiongoza tamaa zake na kumtia nguvu kutoka juu, ndipo mwanadamu anaweza kuthubutu kukabiliana na adui wa kutisha. Kila njia nyingine ya kujilinda ni bure kabisa.

## Sauti za Leo za Ajabu

*Na mtu yule atakayewaenda wenye pepo, na wachawi, ili kuzini pamoja nao, nitakaza uso wangu juu ya mtu yule, nitamtenga na watu wake. –Mambo ya Walawi 20:6.*

**W**achawi wa zama za upagani wana wenzi wao mawakala wa umizimu, wabashiri na wapiga ramli wa leo. Sauti za ajabu zilizonena kule Endori na Efeso zingali kwa maneno yao ya uongo zikiwapotosha watoto wa wanadamu. Kama pazia lingeweza kuondolewa mbele ya macho yetu, tungeweza kuona malaika waovu wakitumia werevu wao wote kudanganya na kuharibu.

Viumbe wa kiroho wakati fulani huonekana kwa watu katika umbo la rafiki zao waliokufa, na husimulia matukio yanayohusiana na maisha yao, na hufanya vitendo walivyofanya wakiwa hai. Kwa kufanya hivyo wanawaongoza wanadamu kuamini kwamba rafiki zao waliokufa ni malaika, wanaozungukazunguka juu yao, na kuwasiliana nao. Wale wanaodhania kuwa ni roho za waliofariki, wanachukuliwa kuwa na ibada fulani ya sanamu, na kwa wengi neno lao lina uzito mkubwa kuliko Neno la Mungu.

Niliona kasi ambayo kwayo udanganyifu huu [umizimu] ulikuwa ukienea. Nilioneshwa msururu wa magari, ukienda kwa kasi ya umeme. Malaika aliniambia tazama kwa makini. Nilikaza macho yangu kwenye msururu. Ilionekana kuwa ulimwengu wote ulikuwa kwenye treni. Kisha akanionesha kondakta, mtu mwadilifu, mstaarabu, ambaye abiria wote walimtzama na kumheshimu sana. Nilifadhaishwa na kumuuliza malaika wangu aliyenihudumia mtu yule ni nani. Alisema, "Ni Shetani. Yeye ndiye kondakta, kwa mfano wa malaika wa nuru. Ameuchukua ulimwengu mateka.... Na wote wanaenda kwa kasi ya umeme hadi upotevuni."

Udanganyifu huu utaenea, na tunapaswa kupambana nao uso kwa uso; isipokuwa tumejiandaa kwa hilo, tutanaswa na kushindwa.

Watu wa Mungu wanapaswa kutayarishwa ili kustahimili roho hizi kwa ukweli wa biblia kwamba wafu hawajui neno lolote, na kwamba hao wanaowatokea ni malaika wa Shetani.

## Mfumo wa Hatari wa Tiba ya Akili

*Angalieni mtu asiwafanye mateka kwa elimu yake ya bure na madanganyo matupu, kwa jisi ya mapokeo ya wanadamu, kwa jinsi ya mafundisho ya awali ya ulimwengu, wala si kwa jinsi ya Kristo.*  
*– Wakolosai 2:8.*

**K**una ... aina ya tiba ya akili ambayo ni mojawapo. Kya njia zenyе ufanisi zaidi kwa uovu. Kupitia hiki kitu kinachoitwa sayansi, akili inaletwa chini ya udhibiti wa mwingine ili kwamba ubinadamu wa aliye dhaifu uunganishwe na yule aliye na akili yenyе nguvu zaidi. Mtu mmoja anafanya mapenzi ya mtu mwingine....

Lakini hiyo inayoitwa sayansi imejikita katika kanuni za uongo. Haipatani na asili na roho ya Kristo. Haiongozi kwa Yeye ambaye ni uzima na wokovu. Yule anayevuta akili kumwelekea yeye mwenyewe huwaongoza kujitenga na Chanzo cha kweli cha nguvu zao.

Katika siku hizi ambapo mashaka na upagani mara nyingi huonekana katika vazi la kisayansi, tunahitaji kulindwa kila upande. Kwa njia hii adui yetu mkuu anawadanganya maelfu ya watu, na kuwachukua mateka kulingana na mapenzi yake. Faida anayoipata kwenye sayansi, sayansi zinazohusiana na akili ya mwanadamu, ni kubwa sana. Hapa, kama nyoka, anajipenyeza pasipo kuonekana ili kupotoshakazi ya Mungu....

Ingawa inaaminika kwamba akili ya mwanadamu mmoja huathiri kwa namna ya ajabu sana nyingine, Shetani, ambaye yuko tayari kutumia kila fursa, anajipenyeza kwa hila, na kufanya kazi pande zote. Na wakati wale ambao wamejitoa katika sayansi hizi, wanazisifu mno kwa sababu ya kazi kubwa na nzuri ambazo wanathibitisha kuwa zinafanywa na wao, hawajui ni nguvu gani ya uovu wanayoitukuza.... Zingatia ushawishi wa sayansi hizi, mpendwa msomaji; kwa maana pambano kati ya Kristo na Shetani bado halijaisha....

Kukataa maombi huwaongoza wanaume kutegemea nguvu zao wenyewe, na hufungua mlango wa majoribu. Katika matukio mengi fikra zinatekwa na utafiti wa kisayansi, na wanadamu wanadanganyika kupitia ufahamu wa nguvu zao wenyewe.

Jiwekeni mbali na kila aina ya ladha ipumbazayo akili, sayansi ambayo kwayo mawakala wa Shetani hutumia kufanya kazi.

## "Litwayo Elimu kwa Uongo"

*Ee Timotheo, ilinde hiyo amana; ujiepushe na maneno yasiyo ya dini, yasiyo na maana, na mashindano ya elimu iitwayo elimu kwa uongo. – 1 Timotheo 6:20.*

**U**fahamu wa binadamu wa vitu vya kimwili na vya kiroho ni sehemu tu na siyo kamilifu; kwa hiyo wengi hawawezi kupatanisha maoni yao kuhusu sayansi na maelezo ya Maandiko. Wengi hukubali nadharia na makisio tu kama mambo ya kweli ya sayansi, na wanafikiri kwamba Neno la Mungu linapaswa kupimwa na mafundisho ya "iitwayo elimu kwa uwongo." ...

Wanadamu wamejaribu kuwa na hekima kuliko Muumba wao; falsafa ya mwanadamu imejaribu kutafuta na kueleza mafumbo ambayo hayatafunuliwa kamwe, katika vizazi vyote.

Kwa wengi, utafiti wa kisayansi umekuwa laana. Mungu ameruhusu gharika ya nuru kumwaga juu ya ulimwengu katika uvumbuzi wa sayansi na sanaa; lakini hata akili kubwa zaidi, ikiwa haziongozwi na Neno la Mungu katika utafiti wao, huchanganyikiwa katika majaribio yao ya kuchunguza uhusiano wa sayansi na ufunuo.

Mungu ndiye msingi wa kila kitu. Sayansi yote ya kweli inapatana na kazi Zake; elimu yote ya kweli inaongoza kwenye utii kwa serikali Yake. Sayansi inafungua maajabu mapya katika mtazamo wetu; hupaa angani, na kuchunguza vilindi vipya; lakini haleti chochote kutokana na utafiti wake ambacho kinapingana na ufunuo mtakatifu.

Mungu ndiye mwanzilishi wa sayansi.... Ndivyo ilivyo, sayansi na Neno Lililoandikwa vinakubaliana, na vyote vinaangaziana nuru. Vyote kwa pamoja hutuongoza kwa Mungu, kwa kutufundisha jambo fulani la sheria zenye hekima na za manufaa ambazo kuitia hizo Mungu hufanya kazi.

Elimu ya sayansi ya kweli ni nguvu.... Lakini wakati elimu ya sayansi ni nguvu, elimu ambayo Yesu alikuja katika nafsi yake ili kuarifu bado ni uwezo mkubwa zaidi. Sayansi ya wokovu ni sayansi muhimu zaidi ya kujifunza katika shule ya maandalizi ya hapa duniani. Hekima ya Sulemani inahitajika, lakini hekima ya Kristo inahitajika zaidi na ni ya muhimu zaidi.

## Mbwa Mwitu Katika Vazi la Kondoo

*Maana utakuja wakati watakapoyakataa mafundisho yenye uzima; ila kwa kuzifuata nia zao wenyewe watajipatia waalimu makundi makundi, kwa kuwa wana masikio ya utafiti. – 2 Timotheo 4:3*

**K**wa haraka wanadamu wanajiweka wao wenyewe chini ya bendera waliyoichagua, pasipo kutulia wakingoja na kuangalia mienendo ya viongozi wao. Kuna wale wanaokesha na kusubiri na kufanya kazi kwa ajili ya marejeo ya Bwana wetu; wakati upande mwingine unaanguka kwa kasi kwenye njia chini ya uongozi wa yule mwasi mkuu wa kwanza. Wanamtafuta mungu katika ubinadamu, na Shetani huwa mfano halisi wa yule wanayemtafuta. Kundi kubwa la watu watadanganyika sana kwa kukataa kwao ukweli, kwamba watakubali ule uongo. Ubinadamu unatukuzwa kama Mungu.

Shetani yuko macho siku zote ili kudanganya na kupotosha. Anatumia kila uchawi kuwavuta watu katika njia pana ya uasi. Anapambana ili kuchanganya akili kwa hisia za uongo, na kuondoa alama kwa kuweka maneno yake ya uongo kwenye alama elekezi ambazo Mungu ameziweka ili kuelekeza njia sahihi.

Walimu wa uongo watatokea ili kukuondoa kwenye njia nyembamba na lango lililosonga. Jihadhari nao; wajapokuwa wamejificha katika mavazi ya kondoo, kwa ndani ni mbwa-mwitu wakali....

Hatujaalikwa kuwathibitisha kwa mazungumzo yao ya heshima na taaluma zilizotukuka. Wanapaswa kuhukumiwa kwa Neno la Mungu.... "Mwanangu, acha kusikia mafundisho, Ukitaka tu kuyaasi maneno ya maarifa" (*Mithali* 19:27). Je, walimu hawa wanaleta ujumbe gani? Je, unakuongoza katika kunyenyekaa na kumcha Mungu? Je, unakuongoza kudhihirisha upendo wako Kwake kwa kuwa mtiifu kwa amri Zake?

Walimu hawa wa uongo, wanaoinuka katika kanisa na kuhesabiwa haki na wengi wa ndugu zao katika imani, mtume aliwafananisha na "Hawa ni visima visivyo na maji, na mawingu yachukuliwayo na tufani, ambao weusi wa giza ni akiba waliyowekewa" (*2 Petro* 2:17).

Je! miguu yetu imepandwa kwenye mwamba wa neno la Mungu lisilobadilika? Je, tumejiandaa kusimama imara katika kulinda amri za Mungu na imani ya Yesu?

## Je, Upo Hatarini?

*Ni nani mionganini mwenu amchaye BWANA, aitiye sauti ya mtumishi wake? Yeye aendaye katika giza, wala hana nuru, naye alitumainia jina la BWANA, na kumtegemea Mungu wake. —Isaya 50:10.*

**W**apo vijana wengi waendao gizani, na hawana nuru.... Mkono wa Bwana umenyooshwa kwa huruma tefutefu na upendo; lakini hawaoni umuhimu wa kumwamini. Wanataka kuhisi kuwa na uwezo kamili wa kubuni na kupanga kwa ajili yao wenyewe.... Bwana anaweka alama njia ambayo kwayo angewataka watembee. Amewaaazima talanta ili zitumike kwa utukufu wake, ili kumfanyia Bwana kazi fulani; lakini Shetani anasema, "Nitatangua mpango wa Kristo. Nitatafuta njia nyingine ya kazi kwa ajili ya akili itendayo kazi na mikono yenye shughuli nyingi, ambapo kwayo watanitumikia mimi. Nitazima shauku ya umilele mbele ya kijana huyu, na kuvuta akili yake kwa mambo ya dunia.... Nitamfunga kwa tamaa za dunia kama nyuzi bora, ambazo nguvu zake za kumfunga hatimaye zitakuwa kama kamba za chuma, naye atafungwa katika utumishi wangu..."

Hebu vijana wachunguze kwa kina nia zao, kwa maombi na kuyachunguza Maandiko, na kuona kama mapenzi na matakwa yao wenyewe hayaongozi kwenda mbali na matakwa ya Mungu....

Vijana wa kiume na wa kike, jichunguzeni katika mahusiano yenu ya biashara, Je, nipo mahali ambapo Mungu angenitaka niwe? ... Je, nipo katika njia ya wajibu wangu? Baraka za Mungu zitakuwa juu ya wale ambao wapo pale ambapo mpango ya Mungu ingewafanya wawe. Je, Bwana amekupa nuru ambayo anakuhitaji ufanye kazi fulani? Ikiwa ndiyo, siyo salama kwako kutotii. Hebu kuwe na mawazo ya kweli katika upande wako. Jiulize, Je, ninamtumikia Bwana wangu, Yesu Kristo? Au je, ninajifurahisha mwenyewe, na kushindwa kumpendeza Mungu, na kuleta heshima katika jina Lake takatifu?

Je, ungependa kubadilisha mpangilio huu wa mambo pasipo kuchelewa? Je, ungechagua kumtumikia Mungu? Basi Yesu anakualika kuamini.... Shika mkono wenyе nguvu zisizo na kikomo. Imani hukua kwa mazoezi. Jilishe katika ahadi; kuwa tayari kutumaini ahadi sahili za Neno la Mungu. Usingoje tena kwa kutokuamini; kwa maana mpo katika hatari ya kupoteza nafsi zenu.

## Kuzishika Nguvu za Mungu

*Au azishike nguvu zangu, Afanye amani nami; Naam, afanye amani nami. Isaya 27:5.*

**K**atika Ufunuo [Shetani] anatangazwa kuwa "mshitaki wa ndugu zetu," "ye ye awashitakiye mbele za Mungu wetu, mchana na usiku" (*Ufunuo 12:10*). Pambano linafanyika juu ya kila nafsi ambayo imekombolewa kutoka katika nguvu za uovu na ambayo jina lake limeandikishwa katika kitabu cha uzima cha Mwanakondoo. Kamwe hakuna mtu anayekubaliwa kutoka katika familia ya Shetani kuingia katika familia ya Mungu pasipo kuamsha hisia thabiti za kumpinga yule mwovu.... Anawaongoza wanadamu kwenye mashaka, akiwafanya wapoteze imani kwa Mungu na kujitenga na upendo Wake; anawajaribu kuvunja sheria Yake, na kisha anawadai kama mateka wake na kupingana na haki ya Kristo ya kuwachukua kutoka kwake. Anajua kwamba wale wanaomtafuta Mungu kwa bidii kwa ajili ya msamaha na neema watapata; kwa hiyo anaziweka dhambi zao mbele yao ili kuwakatisha tamaa.... Kwa hila nyingi, za werevu na kikatili zaidi, anajitahidi kupata shutuma kwao.

Mwanadamu hawezi kukabiliana na mashtaka haya mwenyewe. Katika mavazi yake yenye madoa ya dhambi, akiungama hatia yake, anasimama mbele za Mungu. Lakini Yesu Mwombezi wetu anatoa ombi lenye kuleta matokeo kwa niaba ya wote ambao kwa toba na imani wamekabidhi nafsi zao katika utunzaji wake. Anawatetea na kumshinda mshitaki wao kwa hoja kuu za Kalvari. Utii wake mkamilifu kwa sheria ya Mungu, hata kifo cha msalaba, umempa uwezo wote mbinguni na duniani, Naye anadai kutoka kwa Baba yake rehema na upatanisho kwa ajili ya mtu mwenye hatia....

Hakuna hata nafsi moja ambayo kwa toba na imani imedai ulinzi Wake ambayo Kristo ataruhusu ipite chini ya nguvu za adui. Neno lake liliahidi: "Au azishike nguvu zangu, Afanye amani nami ; Naam, afanye amani nami." Ahadi ... inatolewa kwa wote: "Kama ukienda katika njia zangu, na kama ukishika maagizo yangu, ndipo utakapoihukumu nyumba yangu, nami nitakupa nafasi ya kunikaribia kati yao wasimamao karibu" (*Zekaria 3:7*). Malaika wa Mungu watatembea pande zao zote, hata katika ulimwengu huu, na hatimaye watasimama kati ya malaika wanaokizunguka kiti cha enzi cha Mungu."

## Maadui Wasioonekana na Wanaoonekana

*Wengi watajitakasa, na kujifanya weupe, na kusafika; bali wabaya watatenda mabaya; wala hataelewa mtu mbaya awaye yote; bali wao walio na hekima ndio watakaoelewa. –Danieli 12:10.*

**K**anisa halina budi na litapigana dhidi ya maadui wanaoonekana na wasioonekana. Wakala wa Shetani katika umbo la mwanadamu wako juu ya nchi. Wanadamu wameungana pamoja kumpinga Bwana wa majeshi. Muungano huu utaendelea hadi Kristo atakapoondoka mahali Pake pa maombezi mbele ya kiti cha rehema na kuva mavazi ya kisasi. Mawakala wa Shetani wapo katika kila jiji, wakiwa na shughuli nyingi katika kuandaa karamu zinazopinga sheria ya Mungu. Wanaodai kuwa watakatifu na wasioamini wanakubaliana na karamu hizi.

Mungu amefunuakilekitakachotokea katikasiku zamwisho, ili kwamba watu Wake waweze kuwa tayari kusimama dhidi ya tufani ya upinzani na ghadhabu. Wale ambao wameonywa juu ya matukio yaliyo mbele yao hawapaswi kuketi kwa kutulia wakitazamia dhoruba inayokuja, wakijifariji kwamba Bwana atawalinda waaminifu wake katika siku ya taabu....

Syo wakati sasa [Iliandikwa mwaka 1885, wakati ambapo uhuru wa kidini ulitishiwa, kama ilivyo leo.] kuruhusu akili zetu kujishughulisha sana na mambo yenye umuhimu mdogo.... Harakati za Jumapili sasa zinaendelea gizani. Viongozi wanaficha hoja ya kweli, na wengi wanaoungana katika harakati hiyo hawaoni wenyewe ni wapi mkondo huo unakoelekeea. Madai yake ni ya upole na yanaonekana kuwa ya Kikristo, lakini itakaponena itadhihirisha roho ya joka. Ni wajibu wetu kufanya yote tuwezayo kuepusha hatari inayotisha.

Wakati unakuja ambapo watu wa Mungu watapitia mkono wa mateso kwa sababu wanaitunza siku ya saba.... Mtu wa kuasi, ambaye aliazimu kubadili majira na sheria, na ambaye daima amewatesa watu wa Mungu, atasababisha sheria iundwe ikilazimisha utunzaji wa siku ya kwanza ya juma. Lakini watu wa Mungu wanapaswa kusimama imara kwa ajili Yake. Na Bwana atafanya kwa niaba yao, akionesha wazi kwamba Yeye ni Mungu wa miungu.

## Uamsho wa Kweli na Bandia

*Mtawatambua kwa matunda yao. Je! Watu huchuma zabibu katika miiba, au tini katika mibaruti? Vivyo hivyo kila mti mwema huzaa matunda mazuri; na mti mwovu huzaa matunda mabaya. — Mathayo 7:16, 17.*

**K**abla ya ujio wa mwisho wa hukumu za Mungu juu ya dunia, kutakuwa, kati ya watu wa Bwana, uamsho wa utauwa wa kale ambao haujashuhudiwa tangu nyakati za mitume. Roho na uwezo wa Mungu vitamiminwa juu ya watoto wake. Wakati huo wengi watajitenga na yale makanisa ambayo upendo wa ulimwengu huu umechukua mahali pa upendo kwa Mungu na Neno Lake. Wengi, wachungaji na watu, watapokea kwa furaha kweli hizo kuu ambazo Mungu amefanya zienezwe kwa wakati huu, ili kuwaandaa watu kwa ajili ya ujio wa pili wa Bwana. Adui wa roho anatamani kuizuia kazi hii; na kabla ya wakati wa vuguvugu kama hilo kutokea, atajitahidi kuuzuia, kwa kuanzisha uamsho bandia. Katika makanisa hayo ambayo anaweza kupeleka chini ya nguvu zake za udanganyifu, atafanya ionekane kwamba baraka ya pekee ya Mungu imemiminwa; kutakuwapo na udhihirisho wa kile kinachofikiriwa kuwa ni mapenzi makubwa ya dini....

Popote pale watu wanapopuuza ushuhuda wa Biblia, wakigeuka kutoka katika kweli zilizo wazi, zinazozijaribu roho zinazohitaji kujikana nafsi na kuukana ulimwengu, hapo tunaweza kuwa na uhakika kwamba baraka za Mungu hazitolewi....

Dhana mbaya endelevu ya tabia, na wajibu wa sheria takatifu, vimesababisha makosa kuhusiana na uongofu na utakaso, na umesababisha kushusha kiwango cha kumcha Mungu katika kanisa. Hapa ndipo panapatikana siri ya ukosefu wa Roho na uwezo wa Mungu katika uamsho wa wakati wetu....

Ni pale tu sheria ya Mungu inaporejeshwa kwenye nafasi yake inayofaa ndipo kunaweza kuwa na uamsho wa imani ya kale na kumcha Mungu mionganoni mwa watu wanaodai kuwa watu Wake. "BWANA asema hivi, Simameni katika njia kuu, mkaone, mkaulize habari za mapito ya zamani, I wapi njia iliyo njema? Mkaende katika njia hiyo, nanyi mtajipatia raha katika nafsi zenu" (Yeremia 6:16).

## Pambano na Machozi

*Nikimtumikia Bwana kwa unyenyekevu wote, na kwa machozi, na majaribu yaliyonipata kwa hila za Wayahudi. —Matendo 20:19.*

Tangu siku za Adamu hadi wakati wetu, adui yetu mkuu amekuwa akitumia uwezo wake kutesa na kuangamiza. Sasa anajiandaa kwa ajili ya pambano lake la mwisho dhidi ya kanisa.

Kwa kukusudia anaficha tabia na makusudi yake halisi, Ameamua awasilishwe hivyo ili kutoleta msisimko mkubwa bali kudhihakiwa na kudharauliwa. Anafurahishwa sana kutazamwa kama kitu cha kupuuzwa au cha kuchukiza, chenye umbo baya, nusu mnyama na nusu binadamu.

Kama Shetani alikuwa mwerevu sana hapo mwanzo, atakuwaje sasa, baada ya kupata uzoefu wa maelfu mengi ya miaka? Bado Mungu na malaika watakatifu, na wale wote wanaodumu katika kutii mapenzi yote ya Bwana, wana hekima kuliko yeye.

Wote wanaojishughulisha kwa bidii na kazi ya Mungu, wakitafuta kufunua udanganyifu wa yule mwovu na kumwonesha Kristo mbele ya watu, wataweza kujiunga na ushuhuda wa Paulo, ambao anazungumza juu ya kumtumikia Bwana kwa unyenyekevu wote wa akili, kwa machozi na majaribu mengi....

Mjaribu hana uwezo wa kutawala nia au kuilazimisha nafsi kutenda dhambi. Anaweza kutesa, lakini hawezi kutia unajisi. Anaweza kusababisha maumivu, lakini siyo unajisi.

Shetani hawezi kusoma mawazo yetu, lakini anaweza kuona matendo yetu, kusikia maneno yetu; na kutokana na ufahamu wake wa muda mrefu wa familia ya wanadamu, anaweza kutengeneza majaribu yake ili kutumia fursa ya udhaifu wetu wa tabia. Na ni mara ngapi tunamruhusu kufahamu siri ya jinsi anavyoweza kupata ushindi dhidi yetu. Laiti tungeweza kudhibiti maneno na matendo yetu!

Shetani alimshambulia Kristo kwa majaribu yake makali na ya hila; lakini alishindwa katika kila pambano. Vita hivyo vilipiganwa kwa niaba yetu; ushindi huo hutuwezesha sisi kushinda. Kristo atawapa nguvu wale wote wanaoitafuta.

## Mashambulizi ya Kimwili ya Shetani

*BWANA akamwuliza Shetani, Umetoka wapi weve? Ndipo Shetani akamjibu BWANA, na kusema, Natoka katika kuzungukazunguka duniani, na katika kutembea huku na huku humo. —Ayubu 1:7.*

**S**hetani alikuwa "Mwuaji tangu mwanzo" (*Yohana 8:44*). Majaribu yake yanaongoza kundi kubwa la watu kwenye uharibifu. Kutokuwa na kiasi kunaondoa **akili**; anasa za dunia, ugomvi, na umwagaji damu hufuata. Shetani anafurahia vita; kwa kuwa inaamsha tamaa mbaya zaidi za nafsi, na kisha kuwaondoa kwenye umilele wahanga wake waliozama katika uovu na damu. Ni lengo lake kuyashawishi mataifa kupigana wao kwa wao; kwa maana hiyo anaweza kugeuza mawazo ya watu kutoka katika maandalizi **ya kusimama** katika siku ya hukumu ya Mungu.

Shetani anatumia kila namna ili kukusanya mavuno yake ya roho ambazo hazijatayarishwa. Amechunguza siri za mazingira, na anatumia uwezo wake wote kudhibiti mambo ya asili kadiri Mungu anavyoruhusu. Aliporuhusiwa kumtesa Ayubu, ilikuwa haraka kiasi gani kondoo na ng'ombe, watumishi, nyumba, watoto walivyofutiliwa mbali, shida zilifuatana moja baada ya nyiningine kwa muda mfupi. Mungu ndiye anayevilinda viumbe vyake, na kuviwekea wigo dhidi ya nguvu za mharibifu....

Katika ajali na majanga ya baharini na nchi kavu, katika mioto mikubwa, katika tufani kali na mvua ya mawe ya kuogofya, katika dhoruba, mafuriko, vimbunga, mawimbi makubwa ya maji na matetemeko ya ardhi, kila mahali na kwa njia elfu, Shetani anatumia uwezo wake. Huondolea mbali mavuno yaliyokomaa, na njaa na taabu hufuata. Huweka katika hewa doa la kufisha, na maelfu huangamia kwa tauni. Mateso haya yanakuwa ya mara kwa mara na yenye uharibifu.

Nguvu na uovu wa Shetani na jeshi lake unapaswa kutuamsha, ikiwa hatujatafuta hifadhi na ukombozi katika uwezo mkuu wa Mwokozi wetu.... Wale wanaomfuata Kristo daima wako salama chini ya ulinzi Wake. Malaika wenyenguvu nydingi hutumwa kutoka mbinguni ili kuwalinda. Mwovu hawezi kupenya katika ulinzi ambao Mungu ameweke juu ya watu Wake.

## Katika Saa ya Uamuzi

*Makutano makubwa, makutano makubwa, wamo katika bonde la  
kukata maneno! Kwa maana siku ya BWANA i karibu, katika bonde  
la kukata maneno. — Yoeli 3:14.*

Unabii wa Ufunuo 13 unatangaza kwamba mamlaka inayowakilishwa na mnyama mwenye pembe mfano wa mwanakondoo itafanya "dunia na wote wakaao ndani yake" kuabudu Upapa – uliofananishwa na mnyama "kama chui." Yule mnyama mwenye pembe mbili pia atawaambia "wakaao juu ya nchi kumfanyia sanamu yule mnyama;" na, zaidi ya hayo, ni kuwaamuru wote, "wadogo kwa wakubwa, na matajiri kwa maskini, na walio huru kwa watumwa," wapokee "alama ya mnyama." ...

Marekani ndiyo mamlaka inayowakilishwa na yule mnyama mwenye pembe kama za mwanakondoo, na ... unabii huu utatimizwa wakati Marekani itakapotekeleza amri ya utunzaji wa Jumapili, ambayo Rumi inadai kuwa ni heshima maalum ya ukuu wake. Lakini kwa heshima hii kuu kwa Upapa Marekani haitakuwa peke yake. Ushawishi wa Rumi katika nchi ambazo hapo awali zilikubali mamlaka yake, ziko mbali na kuangamizwa kwake. Na unabii unatabiri kurejeshwa kwa mamlaka yake. "Nikaona kimoja cha vichwa vyake kana kwamba kimetiwa jeraha la mauti; na pigo lake la mauti likapona; Dunia yote ikamstaajabia mnyama yule" (Ufunuo 13:3).

Kuwekwakwajeraha la mauti kunaelekeza katika kuanguka kwa Upapa mwaka 1798. Baada ya hayo, nabii anasema, "Jeraha lake la mauti likapona: Paulo anaeleza wazi kwamba mtu wa kuasi ataendelea hadi Ujio wa Pili wa Kristo.... Katika Dunia ya Kale na Dunia Mpya, Upapa utapokea heshima kuu inayotolewa kwa utunzaji wa Jumapili, ambayo imanzishwa na mamlaka ya Kanisa la Rumi pekee....

Neno la Mungu limetoa onyo juu ya hatari inayokaribia; hebu hili lipuuzwe, na ulimwengu wa Kiprotestanti utajifunza makusudi ya Rumi ni nini hasa, wakati ambao watakuwa wamechelewa kuepuka mtego.

Inatupasa sasa kutafuta uzoefu hai na wa kina katika mambo ya Mungu. Hatuna muda wa kupoteza.

## Siku Ngumu za Mateso

*Naam, na wote wapendao kuishi maisha ya utauwa katika Kristo Yesu wataudhiwa. –2 Timotheo 3:12.*

**W**akati unapofika kwa ajili yake [ujumbe wa malaika wa tatu] kutolewa kwa uwezo mkuu zaidi, Bwana atafanya kazi kupitia kwa watu wa kawaida kabisa, akiongoza mawazo ya wale wanaojiweka wakfu katika huduma Yake. Watendakazi watathibitishwa zaidi kwa kujazwa na Roho Wake badala ya mafunzo ya taasisi za elimu. Watu wa imani na maombi watalazimika kusonga mbele kwa bidii takatifu, wakitangaza maneno ambayo Mungu anawapatia. Dhambi za Babeli zitawekwa wazi. Matokeo ya kutisha ya kulazimisha kushika kanuni za kanisa na mamlaka ya kiraia, kuendelea kwa imani ya umizimu, maendeleo ya siri lakini ya haraka ya mamlaka ya upapa – yote yatafunuliwa. Kwa maonyo haya mazito watu wataamshwa....

Nguvu inayoambatana na ujumbe itawatia wazimu wale tu wanaoipinga.... Kanisa linaomba mkono wenye nguvu wa mamlaka ya kiraia, na katika kazi hii, wafuasi wa kanisa katoliki na Waprotestanti wanaungana. Kadiri harakati za ushnikizaji wa Jumapili zinavyozidi kuthibitishwa na kuamuliwa, sheria itatumika dhidi ya washikao amri....

Maneno ya Paulo yatativu sawasawa, "Wote wapendao kuishi maisha ya utauwa katika Kristo Yesu wataudhiwa." Watetezi wa ukweli wanapokataa kuipa utukufu sabato ya Jumapili, baadhi yao watatupwa gerezani, wengine watafukuzwa, wengine watatendewa kama watumwa. Kwa hekima ya binadamu, haya yote sasa yanaonekana kutokuwezekana; lakini Roho wa Mungu azuiaye atakavyoondolewa kutoka kwa wanadamu, nao watakuwa chini ya udhibiti wa Shetani, ... kutakuwa na matukio ya ajabu....

Hakuna mtu anayeweza kumtumikia Mungu pasipo kuijunga dhidi ya kupinga majeshi ya uovu.

Wale ambao zamani waliteswa kwa ajili ya Kristo walikuwa na nguvu gani? Ilikuwa ni umoja pamoja na Mungu, umoja pamoja na Roho Mtakatifu, umoja pamoja na Kristo. Ni ushirika huu na Mwokozi ambao utawawezesha watu wa Mungu kuvumilia hadi mwisho.

## Usalama Pekee Katika Utii

*Kwa kuwa macho ya Bwana huwaelekea wenyewe haki, Na masikio yake husikiliza maombi yao; Bali uso wa Bwana ni juu ya watenda mabaya. —1 Petro 3:12.*

**H**akuna mwanadamu aliye salama kwa saa au siku moja pasipo maombi. Zaidi sana tunapaswa kumwomba Bwana hekima ili kuelewa Neno Lake. Hapa zinafunuliwa hila za mjaribu, na njia ambazo anaweza kipingwa kwa mafanikio. Shetani ni mtaalamu katika kunukuu Maandiko, akiweka tafsiri yake mwenyewe juu ya vifungu, ambavyo kwavyo anatarajia kutufanya tujikwae. Tunapaswa kujifunza Biblia kwa unyenyekevu wa moyo, kamwe pasipo kupoteza mtazamo wa kumtegemea Mungu. Ijapokuwa tunapaswa daima kujilinda dhidi ya hila za Shetani, tunapaswa kuomba kwa imani siku zote, "Usitutie majaribuni."

Wakati Balaamu, akishawishiwa na ahadi ya thawabu nyingi, alipofanya uchawi dhidi ya Israeli, na kwa njia ya dhabihu kwa Bwana alipotaka kuleta laana juu ya watu wake, Roho wa Mungu alizuia uovu ambao alitamani sana kuutamka, na Balaamu alilazimika kusema: "Nimlaanje, yeye ambaye Mungu hakumlaani?" *Hesabu 23:8....*

Watu wa Israeli kwa kipindi hiki walikuwa waaminifu kwa Mungu; na maadamu waliendelea kutii sheria Yake, hakuna mamlaka yoyote duniani au kuzimu ambayo ingeweza kuwashinda. Lakini laana ambayo Balaamu hakuwa ameruhusiwa kuitamka dhidi ya watu wa Mungu, hatimaye alifanikiwa kuwaletea kwa kuwashawishi watende dhambi. Walipovunja amri za Mungu, basi walijitenga na Mungu, na waliachwa ili wahisi nguvu za mharibifu.

Shetani anafahamu vyema kwamba nafsi dhaifu zaidi inayokaa ndani ya Kristo ni zaidi ya muungano wa majeshi ya uovu.... Ni katika kumtumaini Mungu kwa unyenyekevu, na utii kwa amri zake zote, ndipo tunaweza kuwa salama.

Mtu yejote asijidanganye kwa kuamini kwamba Mungu atamsamehe na kumbariki wakati akikanyaga mojawapo ya matakwa Yake. Ufanyaji wa makusudi wa dhambi inayojulikana hunyamazisha sauti ya Roho inayoshuhudia, na huitenganisha nafsi na Mungu.

## Pentekoste Nyingine Inakuja!

*Nami nitawafanya wao, na mahali palipo pande zote za mlima wangu, kuwa baraka, nami nitaleta manyunyu kwa wakati wake; yatakuwako manyunyu ya baraka. —Ezekiel 34:26.*

**B**wana amewateua vijana kuwa mkono Wake wa msaada. Vijana wengi wa leo, wanaokua kama alivyokua Danieli nyumbani kwao Yuda, akijifunza Neno la Mungu na kazi zake, na kujifunza masomo ya kutumika kwa uaminifu, bado watasimama kwenye mabaraza ya sheria, katika kumbi za kutaka haki, au katika mahakama za kifalme, kama shahidi kwa ajili ya Mfalme wa wafalme....

Tukiwa na jeshi la jinsi hii la watendakazi kama vijana wetu, waliofunzwa vyema, na kuwezesha vizuri, ni kwa upesi jinsi gani ujumbe wa Mwokozi aliyesulubishwa, aliyefufuka, na anayekuja hivi karibuni utaweza kubebwa kupelekwa ulimwenguni kote!

Kazi kubwa ya injili siyo kuhitimisha kwa udhihirisho mdogo wa nguvu za Mungu kuliko ile iliyofungua kazi Yake. Unabii ambao ultimizwa katika kumwagwa kwa mvua ya kwanza wakati wa kufunguliwa kwa injili, utatimizwa tena kwa kumwagwa kwa mvua ya masika katika kufungwa kwake... Watumishi wa Mungu, nyuso zao zikiwa zimeangazwa na kung'aa kwa utakaso mtakatifu, wataharakisha kutoka sehemu fulani hadi sehemu nyingine kutangaza ujumbe kutoka mbinguni. Kwa maelfu ya sauti, katika dunia yote, onyo litatolewa. Miujiza itafanyika, wagonjwa wataponywa, na ishara na maajabu zitafuatana na waaminio. Shetani pia hufanya miujiza ya uongo, hata kushusha moto kutoka mbinguni machoni pa wanadamu. Hivyo wakazi wa dunia wataletwa kuonesha msimamo wao.

Ujumbe hautapelekwa kwa mabishano bali kwa usadikisho wa kina wa Roho wa Mungu.... Miali ya nuru itapenya kila mahali, ukweli unaonekana katika uwazi wake, na watoto waaminifu wa Mungu watakata kamba ambazo aliwafunga.

Mungu ana kazi kwa ajili ya watu Wake kufanya kwa ajili ya ulimwengu, na kama watafanya kazi kwa upatanifu wao kwa wao pamoja na mbingu, Ataonesha uwezo Wake kwa niaba yao kama alivyofanya kwa wanafunzi Wake wa kwanza siku ya Pentekoste.

## Mvua ya Awali ya Roho wa Mungu

*Furahini, basi, enyi wana wa Sayuni, mkamfurahie BWANA, Mungu wenu; kwa kuwa yeye huwapa ninyi mvua ya masika, kwa kipimo cha haki, naye huwanyeshea mvua, mvua ya masika, na mvua ya vuli, kama kwanza. — Yoeli 2:23.*

Kwa mfano wa mvua ya awali na ya masika, inayonyesha katika nchi za Mashariki wakati wa kupanda na wakati wa kuvuna, manabii wa Kiebrania walitabiri utoaji wa neema ya kiroho kwa kiwango cha ajabu kwa kanisa la Mungu. Kumwagwa kwa Roho katika siku za mitume ulikuwa mwanzo wa mvua ya vuli au ya kwanza, na matokeo yalikuwa ni yenyе utukufu.... Lakini karibu na mwisho wa mavuno ya dunia, utoaji wa pekee wa neema ya kiroho umeahidiwa kuliandaa kanisa kwa ajili ya kuja Kwake Mwana wa Adamu. Kumwagwa huku kwa Roho kunafananishwa na kunyesha kwa mvua ya masika.

Mvua ya masika, mavuno yaliyokomaa ya dunia, yanawakilisha neema ya kiroho inayoliandaa kanisa kwa ajili ya ujio wa Mwana wa Adamu. Lakini mvua ya kwanza isiponyesha, hakutakuwana uhai; nyasi za kijani hazitachipuka. Isipokuwa manyunu ya vuli yamefanya kazi yake, mvua ya masika haiwezi kuotesha mbegu kwa ukamilifu....

Kunapaswa kuwe na mabadiliko endelevu ya wema wa Kikristo, maendeleo endelevu katika uzoefu wa Kikristo... Kila mtu anapaswa kutambua shida yake mwenyewe. Moyo unapaswa kusafishwa na kila aina ya uchafu, na kutakaswa kwa ajili ya kukaa kwa Roho. Ilikuwa ni kwa kuungama na kuacha dhambi, kwa maombi ya dhati na kujiweka wakfu kwa Mungu, ambapo wanafunzi wa kwanza walijiandaa kwa ajili ya kumwagwa kwa Roho Mtakatifu siku ya Pentekoste. Kazi hiyo hiyo, kwa kiwango kikubwa, inapaswa kufanywa sasa....

Hakupaswi kuwapo na kupuuzwa kwa neema iliyowakilishwa na mvua ya vuli. Ni wale tu ambao wanaishi kulingana na nuru waliyo nayo, watakaopokea nuru kubwa zaidi. Isipokuwa kila siku tunaendelea katika kielelezo hai cha wema wa Kikristo, hatutotambua udhihirisho wa Roho Mtakatifu katika mvua ya masika. Inaweza kunyesha pande zote miyoni mwetu, lakini hatutoitambua au kuipokea.

## Kumwagwa kwa Mvua ya Masika

*Mwombeni BWANA mvua wakati wa masika, naam, BWANA afanyaye umeme, naye atawapa manyunyu ya mvua, kila mtu atapewa nyasi kondeni. —Zekaria 10:1.*

**H**uko Mashariki mvua ya vuli hunyesha wakati wa ukupanda. Inahitajika ili kwamba mbegu iweze kuota. Kwa ushawishi wa manyunyu yanayorutubisha, mche mwororo huchipua. Mvua ya masika, inayonyesha karibu na mwisho wa msimu, huikomaza mbegu, na kuiandaa kwa ajili ya mundu. Bwana hutumia mchakato huu wa asili kuonesha kazi ya Roho Mtakatifu....

Ingawa tunathamini baraka ya mvua ya vuli, hatupaswi, kwa upande mwingine, kutokuzingatia ukupeli kwamba pasipo mvua ya masika, kujaza masiko na kukomaza mbegu, mavuno hayatokuwa tayari kwa ajili ya mundu; na kazi ya mpanzi itakuwa bure. Neema ya Mungu inahitajika mwanzoni, neema ya Mungu katika kila hatua ya awali, na neema ya Mungu pekee ndiyo inaweza kukamilisha kazi....

Usiridhike kwamba katika kipindi cha kawaida cha msimu, mvua itanyesha. Omba kwa ajili ya mvua.... Tunapaswa kutafuta msaada Wake kwa dhati kama manyunyu ya neema yatakuja kwetu. Tunapaswa kuboresha kila fursa ya kujiweka katika mkondo wa baraka. Kristo alisema, "Kwa kuwa walipo wawili watatu wamekusanyika kwa jina langu, nami nipo papo hapo katikati yao" (Mathayo 18:20). Mikutano ya kanisa, kama vile katika mikutano ya kambi, mikutano wa kanisa la nyumbani, na matukio yote ambayo kunafanyika kazi kwa ajili ya kuongoa roho, ni fursa zilizowekwa na Mungu kwa ajili ya kunyesthesia mvua ya vuli na mvua ya masika....

Katika kila mikutano tunaohudhuria maombi yetu yanapaswa kupaa ili kwa wakati huu, Mungu apashe joto na manyunyu roho zetu. Tunapomtafuta Mungu kwa ajili ya Roho Mtakatifu, tutafanywa wapole, wanyenyekemu wa akili, kumtegemea Mungu kwa ajili ya mvua ya masika inayokamilisha. Tukiomba baraka kwa imani, tutaipokea kama Mungu alivyoahidi.

Roho Mtakatifu atakuja kwa wote wanaoomba mkate wa uzima ili kutoa kwa jirani zao.

## Kilio Kikuu cha Malaika wa Tatu

*Baada ya hayo niliona malaika mwingine, akishuka kutoka mbinguni, akiwa na mamlaka makuu; na nchi ikaangazwa kwa utukufu wake. – Ufunuo 18:1.*

**N**ikaona malaika mwingine mwenye nguvu akitumwa kushuka duniani, kuunganisha sauti yake na malaika wa tatu, na kutoa nguvu na uwezo katika ujumbe wake.

Kazi ya ulimwengu wote yenye uwezo wa ajabu inatabiriwa hapa.

Malaika alipewa uwezo mkuu na utukufu, naye aliposhuka, dunia iliangazwa kwa utukufu wake. Nuru ilioambatana na malaika huyu ilipenya kila mahali, alipolia kwa nguvu, kwa sauti kuu, "Umeanguka, umeanguka Babeli ule mkuu; umekuwa maskani ya mashetani, na ngome ya kila roho mchafu, na ngombe ya kila ndege mchafu mwenye kuchukiza" (*Ufunuo 18:2*). Ujumbe wa anguko la Babeli, kama ulivyotolewa na malaika wa pili, unarudiwa, pamoja na nyongeza ya kutajwa kwa upotoshaji ambao umekuwa ukiingia kanisani tangu mwaka 1844. Kazi ya malaika huyu inakuja kwa wakati sahihi ili kujiunga kwenye kazi kubwa ya mwisho ya ujumbe wa malaika wa tatu unapopanuka na kuwa kilio kikuu. Na hivyo watu wa Mungu wamejiandaa kusimáma katika saa ya majoribu, ambayo watakatana nayo hivi karibuni. Niliona nuru kubwa juu yao, nao wakaungana kutangaza ujumbe wa malaika wa tatu bila woga.

Malaika walitumwa kumsaidia yule malaika mkuu kutoka mbinguni, nami nilisikia sauti ambazo zilizoonekana kusikika kila mahali, "Tokeni kwake, enyi watu wangu." ... Utukufu wa Mungu ukatulia juu ya watakatifu, wenye subira, waliokuwa wakingoja, na pasipo woga walitoa onyo zito la mwisho, wakitangaza anguko la Babeli na kuwaita watu wa Mungu watoke kwake ili waepuke maangamizi yake ya kutisha.

Nuru ilioangazwa juu ya wale waliokuwa wakingoja ilipenya kila mahali, na wale waliokuwa ndani ya makanisa ambao hawakuwa na nuru, waliosikia na kupokea ujumbe wa malaika wa tatu, waliitika wito na kuyaacha makanisa yaliyoanguka.

## Kutotikiswa Wakati wa Kupepetwa

*Basi kwa kuwa tunapokea ufalme usioweza kutetemeshwa, na mwe na neema, ambayo kwa hiyo tumtolee Mungu ibada ya kumpendeza, pamoja na unyenyekevu na kicho. — Waebrania 12:28.*

**W**ale wanaompokea Kristo, na kwa imani yao ya kwanza wanasema, nimekombolewa, wako katika hatari ya kujitumainia wenyewe. Wanapoteza uoni wa udhaifu wao wenyewe na hitaji lao la kudumu la nguvu za Mungu. Hawajajiandaa kwa ajili ya hila za Shetani.... Usalama wetu pekee ni katika kuacha kujitumainia, na kumtegemea Kristo.

Hatari kubwa ya mwanadamu imo katika kujidanganya, kuendekeza kujitosheleza nafsi, na kwa hivyo anajitenga na Mungu, aliye chanzo cha nguvu zake.

Bwana anakuja upesi sana, na tunaingia katika kipindi cha majanga.

Hatupaswi kusema: Hatari za siku za mwisho zitakuja mbele yetu hivi karibuni. Sasa zipo. Tunahitaji sasa upanga wa Bwana kuchunguza roho zetu na tamaa zote za mwili, hamu, na shauku.

Akili ambazo zimesalimishwa katika mawazo ya upotovu zinapaswa kubadilishwa.... Mawazo yanapaswa yaelekezwe kwa Mungu. Huu ndio wakati wa kuweka juhudzi za dhati ili kushinda mielekeo ya mazoea ya kupenda tamaa za mwili.

Dhoruba inapokaribia, kundi kubwa ambalo lilikiri imani katika ujumbe wa malaika wa tatu, lakini halikutakaswa kwa njia ya utii kwa ile kweli, wataikana imani yao, na kujiunga na kundi la wapingao. Kwa kuungana na ulimwengu na kushiriki kusudi lake, watayaona mambo kwa nuru ileile; na jaribu linapoletwa, wanakuwa tayari kuchagua upande usio na taabu, wa watu wengi. Watu wenyе talanta na sifa ya kupendeza, ambao hapo awali walifurahi katika kweli, wanatumia uwezo wao ili kudanganya na kupotosha roho. Wanakuwa maadui wakali sana wa ndugu zao wa zamani.

Tupo katika wakati wa kupepetwa, wakati ambapo kila kitu kinachowezza kupepetwa kitapepetwa. Bwana hatawasamehe wale wanaojua kweli ikiwa hawatii amri Zake kwa neno na kwa vitendo.

## Jiweke Tayari Kuonana na Mungu Wako

*Basi nitakutenda hivi, Ee Israeli, na kwa sababu nitakutenda hivi, ujiweke tayari kuonana na Mungu wako, Ee Israeli. —Amosi 4:12.*

**W**engi hawatambui jinsi wanavyopaswa kuwa ili kuishi mbele za Bwana pasipo kuhani mkuu katika patakatifu wakati wa taabu. Wale wanaopokea muhuri wa Mungu aliye hai na kulindwa wakati wa taabu wanapaswa kuakisi sura ya Yesu kwa ukamilifu.

Nguo zao hazipaswi kuwa na doa, tabia zao zinapaswa kutakaswa kuachana na dhambi kwa damu ya kunyunyiza. Kwa neema ya Mungu na jitihada zao makini, wanapaswa kuwa washindi katika vita dhidi ya uovu. Hukumu ya upelelezi inapoendelea mbinguni, wakati dhambi za waumini waliotubu zikiondolewa kutoka patakatifu pa patakatifu, kutakuwa na kazi maalum ya utakaso, ya kuondoa dhambi, kati ya watu wa Mungu duniani.

Niliona kwamba wengi walikuwa wakipuuza maandalizi yaliyohitajika sana na walikuwa wakitazamia wakati wa "kuburudishwa" na "mvua ya masika" ili kuwaweka tayari kusimama katika siku ya Bwana na kuishi mbele zake. Lo! ni wangapi niliowaona wakati wa taabu bila hifadhi! Walikuwa wamepuuza maandalizi ya lazima; kwa hivyo hawakuweza kupokea burudiko ambalo lazima wote wawe nalo ili kuwaweka tayari kuishi mbele ya Mungu mtakatifu.

Wale wanaokataa maonyo ya manabii na kushindwa kuzitakasa nafsi zao katika kutii kweli yote, na ambao wako tayari kuamini kwamba hali yao ni bora zaidi kuliko ilivyo hasa, watashtuka wakati wa kumwagwa kwa mapigo, na kisha kuona kwamba walihitaji kuchongwa na kupigwa msasa kwa ajili ya jengo....

Niliona kwamba hakuna ambaye angeweza kushiriki "kuburudishwa" isipokuwa amepata ushindi dhidi ya kila pingamizi, dhidi ya kiburi, ubinafsi, kuipenda dunia, na dhidi ya kila neno na tendo baya. Kwa hiyo, tunapaswa kukaribia zaidi na zaidi kwa Bwana na kutafuta kwa dhati maandalizi hayo ya lazima ili yatuwezeshe kusimama katika pambano katika siku ya Bwana. Hebu wote tukumbuke kwamba Mungu ni mtakatifu na kwamba hakuna yejote isipokuwa viumbwe watakatifu wanaoweza kukaa katika uwepo Wake.

## Tendo la Ajabu la Mungu

*Maana BWANA ataondoka kama vile katika mlima Perasimu, ataghadhibika kama vile katika bonde la Gibeoni; apate kufanya kazi yake, kazi yake ya ajabu; na kulitimiza tendo lake, tendo lake la ajabu. Isaya 28:21.*

**K**wa usahihi usiokosea, Mungu bado anatunza kumbukumbu za mataifa yote. Wakati rehema Yake inasihi, kwa wito wa kufanya toba, kumbukumbu hizi zinabakia wazi; bali pale ambapo kiasi cha maovu kitaufikia upeo wake ambao umewekwa na Mungu, huduma ya ghadhabu Yake itaanza. Wakati wa kutoa hesabu unafungwa. Uvumilivu wa Mungu unakoma. Hakuna tena kusihi rehema kwa ajili yao.

Nabii, akitazama zama zote, wakati huu ulioneshwa katika maono yake. Mataifa yote katika zama hii yamekuwa wapokeaji wa rehema ya pekee.... Lakini kuongezeka kwa kiburi, tamaa, kuabudu sanamu, kumdharau Mungu na utovu wa shukrani vimeandikwa dhidi yao. Kwa haraka wanazuia uhusiano wao na Mungu....

Hatari inakaribia kwa haraka. Kwa haraka idadi kubwa itaonesha kwamba wakati wa kurudi kwa Mungu umekaribia.

Kwa Mungu wetu mwenye rehema tendo la kuadhibu ni tendo la ajabu. "Kama mimi niishivyo, asema Bwana MUNGU, sikufurahii kufa kwake mtu mwovu" Ezekiel 33:11.... Hata hivyo hata "mhesabia mtu mwovu kuwa hana hatia kamwe." "Bwana si mwepesi wa hasira, ana uweza mwingi, wala hatamhesabia mtu mwovu kuwa hana hatia kamwe" (Kutoka 34:6, 7; Nahumu 1:3). Kwa njia ya mambo ya kutisha ya haki atathibitisha mamlaka ya sheria Yake iliyokanyagwa. Ukali wa adhabu inayomsubiri mkosaji inaweza kupimwa kwa subira ya Mungu katika kutekeleza hukumu. Taifa ambalo Mungu analivumilia sana, taifa ambalo hatalipiga mpaka lijaze kipimo cha uovu wake katika hesabu ya Mungu, hatimaye litakunywa kutoka katika kikombe cha hasira isiyochanganywa na rehema.

Baada ya Mungu kufanya yote yaliyopaswa ili kumwokoa mwanadamu, ikiwa bado wanaonesha katika maisha yao kwamba walipata rehema kidogo, kifo kitakuwa sehemu yao; na kitakuwa kifo chenye kuhofiya sana, kwa kuwa watapaswa kubeba maumivu makali ambayo Kristo aliyapata pale msalabani. Kisha watatambua kile walichokipoteza - uzima wa milele na urithi wa milele.

## "Wakati wa Taabu"

*Wakati huo Mikaeli atasimama, jemadari mkuu, asimamaye upande wa wana wa watu wako; na kutakuwa na wakati wa taabu, mfano wake haukuwapo tangu lilipoanza kuwapo taifa hata wakati uo huo; na wakati huo watu wako wakaokolewa; kila mmoja atakayeonekana ameandikwa katika kitabu kile. —Danieli 12:1.*

**U**jumbe wa malaika wa tatu utakapofungwa, rehema haitasihi tena kwa ajili ya wakazi wa dunia wenye hatia. Watu wa Mungu watakuwa wamekamilisha kazi yao.... Jaribio la mwisho limefanyika duniani, na wote ambao wamethibitika kuwa watiifu kwa amri za Mungu wamepokea "muhuri wa Mungu." Ndipo Yesu anasitisha maombezi Yake katika patakatifu pa mbinguni. Ananyanya juu mikono Yake na kwa sauti kubwa anasema, "Imekwisha." ...

Uvumilivu wa Mungu umefikia kikomo Chake. Ulimwengu umekataa rehema Yake na umedhihaki upendo Wake, na umeikanyaga sheria Yake. Waovu wamevuka mpaka wa rehema yao; Roho wa Mungu, amepingwa kabisa kwa muda mrefu, hatimaye ameondolewa. Bila wigo wa neema ya Mungu, hawana ulinzi dhidi ya yule mwovu. Shetani atawaingiza wakazi wa dunia katika taabu moja, kubwa ya mwisho.... Watu wa Mungu watatumkizwa katika zile mandhari za mateso na maudhi yaliyoelezwa na nabii kama wakati wa taabu ya Yakobo.

Wale tu walio na mikono iliyo safi na mioyo safi ndiyo watakaosimama katika wakati ule wa jaribio. Sasa ni wakati wa sheria ya Mungu kuwa katika akili zetu, vipaji vya nyuso zetu na kuandikwa katika mioyo yetu.... Tuna nafasi kiasi gani ili kutumia katika kuchunguza Biblia, ambayo itatuhukumu katika siku ya mwisho....

Hebu amri za Mungu na ushuhuda wa Yesu Kristo uwe katika akili zetu daima na hebu tuyaondoe mawazo ya duniani na taabu. Ulalapo na uamkapo, hebu iwe tafakari yako. Ishi na tenda kabisa katika rejea ya ujio wa Mwana wa mwanadamu. Watati ni mdogo na punde utakwisha. Sasa ni wakati, wakati malaika wanne wanapozishikilia pepo nne, ili kuufanya hakika wito wetu na uteule wetu.

## Mapigo Saba ya Mwisho

*Maskini na wahitaji wanatafuta maji, wala hapana; ndimi zao zimekauka kwa kiu; mimi; BWANA, nitawasikia, mimi, Mungu wa Israeli, sitawaacha. —Isaya 41:17.*

**K**risto anapomaliza kazi Yake ya kutuombea katika kpatakatifu, għadhabu isiyochanganywa na maji inayowatisha wale wanaomwabudu mnyama na sanamu yake na kuipokea chapa yake, itamiminwa kwao. Mapigo juu ya Misri wakati Mungu alipokuwa karibu kuwaokoa Waisraeli yalifanana katika sifa na zile hukumu za kutisha na kubwa zaidi zitakazoanguka juu ya ulimwengu mara tu kabla ya ukombozi wa mwisho wa watu wa Mungu. Nabii wa ufunuo anasema, akielezea mapigo ya kutisha: "Pakawa na jipu baya, bovu, juu ya wale watu wenye chapa ya huyo mnyama, na wale wenye kuisujudia sanamu yake." Bahari "ikawa damu kama damu ya mfu, na vitu vyote vyenye roho ya uhawatiha katika bahari vikafa." Na "mito na chemchemi za maji; zikawa damu" (Ufunuo 16:2-4). Mapigo haya, ya kutisha kama yalivyo, yanathibitisha haki ya Mungu kikamilifu....

Mapigo haya hayataenea pote, au kwa wakazi wote wa dunia kufikia kikomo. Bado kutakuwa na mateso ya kutisha ambayo hayajawahi kuwako kwa wanadamu. Hukumu zote kwa wanadamu, kabla ya kufungwa kwa mlango wa rehema, zimechanganywa na rehema. Damu ya Kristo inayosihi imewazuilia wenye dhambi kupokea kipimo kamili cha hatia yake; bali katika hukumu ya mwisho, hasira inamiminwa pasipo kuchanganywa na rehema.

Haiwezekani kutoa wazo lolote la uzoefu wa watu wa Mungu watakao kuwa hai duniani wakati huzuni na utukufu wa mbingu vitakapochanganywa. Watatembea katika nuru itokayo katika kiti cha enzi cha Mungu. Kwa uwezowa malaika pale siku zote patakuwa na mawasiliano kati ya mbingu na dunia.

Watu wa Mungu hawatayaepuka mateso; bali... wataachwa kudumu.... Wakati waovu wakiangamia kwa njaa na tauni, malaika watawakinga wenye haki na kuwapatia mahitaji. Kwa ye ye "aendaye kwa haki" ameahidiwa, "atapewa chakula chake; maji yake hayatakoma" (Isaya 33:16).

## Kama Ilivyokuwa Siku za Nuhu

*Na kama ilivyokuwa siku za Nuhu, ndivyo itakavyokuwa katika siku zake Mwana wa Adamu. Luka 17:26.*

Tangu zama hadi zama maonyo ambayo Mungu ametuma ulimwenguni kwa njia ya watumishi Wake yamepokelewa kwa ... mshangao na kutokuamini. Wakati uovu wa watu wa kabla ya gharika ulipomsababisha kuleta gharika juu ya nchi, kwanza aliwajulisha kusudi Lake, ili wawe na fursa ya kugeuka kutoka katika njia zao mbaya. Kwa miaka mia na ishirini ilipigwa panda masikioni mwao ya onyo la kutubu, ili ghadhabu ya Bwana isije ikadhihirishwa kwa uangamivu wao. Lakini ujumbe ulionekana kwao hadhithi zisizo na maana, nao hawakuliamini.

Wenye kukejeli walielekeza kwenye vitu vya asili – kwa misimu inayofuata isiyobadilika, kwa anga la bluu ambalo kamwe lilikuwa halijawahi kunyesha mvua, kwa nyanda za kijani kibichi ambazo zilizoshamirishwa na umande laini wa usiku – kisha wakapiga kelele, “Je, haneni kwa mifano?” Kwa dharau walimtangaza mhubiri wa haki mtu mwenye ari anayekurupuka; kisha wakaendelea, wakiwa na shauku zaidi katika utafutaji wao wa anasa, wakidhamiria zaidi kuendelea na njia zao ovu, kuliko ilivyowahi kuwa kabla. Lakini kutoamini kwao hakukuzuia tukio lililotabiriwa...

Yesu anasema kuwa kutakuwa na kutoamini kwa jinsi hiyo hiyo kuhusiana na ujio Wake wa pili. Kama ambavyo watu wa siku za Nuhu, “wasitambue, hata gharika ikaja, ikawachukua wote; ndivyo,” kwa maneno ya Mwokozi wetu, “kutakavyokuwa kuja kwake Mwana wa Adamu” (*Mathayo 24:39*).

Kwa uzito huo huo yanatujia katika karne zote maneno ya maonyo ya Bwana wetu kutoka mlima wa Mizeituni: “Basi, jiangalieni, mioyo yenu isije ikalemewa na ulafi, na ulevi na masumbufu ya maisha haya; siku ile ikawajia ghafla,” “Basi, kesheni ninyi kila wakati, mkiomba, ili mpate kuokoka katika haya yote...”

## Walilia Amani

*Wakati wasemapo, Kuna amani na salama, ndipo uharibifu uwajiapo kwa ghafula, kama vile utungu umjiavyo mwenye mimba, wala hakika hawataokolewa. 1 Wathesalonike 5:3.*

**M**tumwa mbaya anasema moyoni mwake, "Bwana wangu anakawia." Hasemi kwamba Kristo hatakuja. Hakejeli suala la kuja Kwake mara ya pili. Lakini moyoni mwake na kwa vitendo vyake na maneno anatangaza kwamba kuja kwa Bwana kunakawilishwa. Anaondoa katika fikra za wengine usadikisho kuwa Bwana anakuja upesi. Mvuto wake unawasababisha wengine ufidhuli, kuchelewa kizembe. Wanatiwa moyo katika kupenda anasa za dunia na kulala usingizi. Tamaa za kidunia, mawazo potovu, yanatawala akili. Mtumwa mbaya anakula na kunywa na kwa ulevi, na kuijunga na dunia katika kutafuta anasa. Anawapiga watumishi wenzake, akiwashutumu na kuwalaumu wale walio waaminifu kwa Bwana wao.

Kuja kwa Kristo kutakuwa kwa ghafla kwa walimu wa uongo. Wanasema, "kuna amani na usalama." Kama ilivyokuwa kwa makuhani na walimu kabla ya kuanguka kwa Yerusalem, wanatafuta kanisa ili wale utajiri na utukufu wa kidunia. Ishara za nyakati wanafasili kama ambazo zinaliashiria hilo. Lakini lasemaje neno la uvuvio? "Ndipo uharibifu uwajiapo kwa ghafla." ...

Wengi wanakuweka mbali sana kuja kwa Bwana. Wanayacheka maonyo. Wanafanya majivuno ya kiburi, "vitu vyote vinakaa hali iyo hiyo, tangu mwanzo wa kuumbwa." "Kesho itakuwa kama leo, sikuu kupita kiasi" (2 Petro 3:4; Isaya 56:12). Tutaendelea kuzama katika kupenda anasa. Lakini Kristo anasema "Tazama, naja kama mwivi" (Ufunuo 16:15). Katika wakati ule ambapo dunia inauliza kwa kejeli, "iko wapi ahadi ya kuja Kwake?" Ishara zinatimia, wakati wasemapo "kuna amani na usalama," mara uangamivu unakuja. Wakati mwenye kukejeli, mwenye kuikataa kweli, amekuwa mfidhuli; wakati utaratibu wa kazi katika nyanja mbalimbali za kutafuta fedha unapoendelea bila kujali kanuni zake; wakati mwanafunzi kwa shauku kubwa anatafuta elimu ya kila kitu isipokuwa tu katika Biblia yake, Kristo anakuja kama mwizi.

## Ishara Katika Nchi

*Kavu na Baharini Hiyo siku ya Bwana iliyo kuu i karibu; I karibu, nayo inafanya haraka sana; Naam, sauti ya siku ya BWANA; Shujaa hulia kwa uchungu mwingi huko! Sefania 1: 14.*

Tumekaribia mwisho wa wakati. Nimeoneshwa kwamba hukumu za Mungu za kupatiliza tayari zipo nchini. Bwana ametupatia onyo juu ya matukio ambayo yanakaribia kutokea. Wale wanaokunywa kutoka katika kisima kile kile cha baraka watakaribiana. Ukweli uliomo katika mioyo ya waumini utawasababishia mlishizo wenye heri. Hivyo litajibowi lile ombi la Kristo kwamba wanafunzi Wake wawe wamoja kama Yeye na Baba walivyo wamoja. Kila mmoja aliyeongoka kweli kweli atajitahidi kuufikia umoja huu.

Kwa wale wasiomcha Mungu kutakuwa na upatanifu wa kilaghai ambao hasa unaficha kutopatana kwa daima waliko nako. Katika upinzani wao kwa mapenzi na kweli ya Mungu wanaungana, wakati ambapo katika mambo mengine yote wanararuriwa na chuki, husuda, wivu na mapambano ya kufisha.

Mungu anaondoa kizuizi chake toka duniani, na mara kutakuwa na kifo na uharibifu, kuongezeka kwa maovu na ukatili, utendaji wa mabaya dhidi ya matajiri ambao wamejiinua dhidi ya maskini. Wale ambao hawana ulinzi wa Mungu hawatapata usalama mahali popote pale. Mawakala wa kibinadamu wanapewa mafunzo, na wanatumia uwezo wao wa ubunifu kuweka katika utendaji chombo madhubuti kabisa kujeruhi na kuua.

Bwana atainuka ili kuitetemesha dunia. Tutashuhudia adha kila upande. Maelfu ya meli yatakuwa yakizama vilindini mwa bahari. Manowari zitazama, na maisha ya watu kwa mamilioni yataangamia. Mioto italipuka bila kutarajiwa, na hakuna jitihada za mwanadamu zitakazoweza kuizima. Ikulu za duniani zitafutiliwa mbali na miali mikali ya moto. Majanga kwa njia ya reli yatatokea kwa wingi zaidi; kuchanganyikiwa, kugongana, na kifo bila onyo la wakati huo vitatokea katika njia kuu za usafiri. Mwisho umekaribia, mlango wa rehema unafungwa. O, hetu tumtafute Bwana maadamu anapatikana, tumwite maadamu yu karibu!

## Ishara Mbinguni

*Basi kwa mtini jifunzeni mfano; tawi lake likiisha kuchipuka na kuchanua majani, mwatambua ya kuwa wakati wa mavuno u karibu; nanyi kadhalika, myaonapo hayo yote, tambueni ya kuwa yu karibu, milangoni. Mathayo 24:32-33.*

**M**wokozi anatoa ishara za kuja Kwake, na zaidi ya hili, Manaweka muda ambapo ishara ya kwanza kati ya hizo itatokea: "Lakini mara, baada ya dhiki ya siku zile, jua litatiwa giza, na mwezi hautatoa mwanga wake, na nyota zitaanguka mbinguni, na nguvu za mbinguni zitatikisika; ndipo itakapoonekana ishara yake Mwana wa Adamu mbinguni; ndipo mataifa yote ya ulimwengu watakapoomboleza, nao watamwona Mwana wa Adamu akija juu ya mawingu ya mbinguni pamoja na nguvu na utukufu mwangi..." (Mathayo 24:29-31).

Utakapokaribia wakati wa utesaji mkuu wa upapa, Kristo alisema, jua litapaswa kutiwa giza, na mwezi hautapaswa kutoa mwanga wake. Kisha, nyota zitapaswa kudondoka kutoka angani.

Hivyo ndivyo zilivyooneshwa ishara za mwisho katika ishara za kuja Kwake, ambazo kuhusiana nazo Kristo aliwaasa wanafunzi Wake, "Myaonapo hayo yote, tambueni ya kuwa yu karibu." Baada ya ishara hizi, Yohana aliona, kadiri tukio kubwa linalofuata lilipokaribia, mbingu zikunjwa kama gombo, wakati dunia ikipata tetemeko, milima na visiwa vikiondolewa mahali pake, waovu kwa hofu walitaka kutoroka kutoka katika uwepo wa Mwana wa Adamu.

Lakini siku na saa ya kuja kwake Kristo hajaifunua... Wakati hasa wa kuja mara ya pili kwa Mwana wa Adamu ni siri ya Mungu.

Muda si mrefu, tutamwona Mfalme katika uzuri Wake. Muda si mrefu, Naye atafuta machozi yote kutoka machoni petu. Muda si mrefu atatusimamisha "mbele ya utukufu Wake bila mawaa katika furaha kuu." Yuda 24. Hivyo, alipowapa ishara za kuja Kwake Alisema, "Basi mambo hayo yaanzapo kutokea, changamkeni, mkaviinue vichwa vyenu, kwa kuwa ukombozi wenu umekaribia" (Luka 21:28).

## Jifunze Unabii

*Heri asomaye na wao wayasikiao maneno ya unabii huu, na kuyashika yaliyoandikwa humo; kwa maana wakati u karibu. Ufunuo 1:3.*

Kutokana na kuinuka na kuanguka kwa mataifa kama Kulivyowekwa wazi katika vitabu vya Danieli na Ufunuo, tunahitaji kujifunza jinsi utukufu wa nje na wa kidunia tu usivyo na thamani. Babeli, pamoja na mamlaka yake na utukufu wake wote, ambao mfano wake dunia yetu haijapata kuona - mamlaka na utukufu ambao kwa watu wa wakati ule ulionekana thabiti na wa kudumu- jinsi ambavyo umetoweke kabisa! Kama "ua la majani," umetoweke kabisa. Ndivyo pia ulivyotoweke ufalme wa Wamedi na Waajemi, kadhalika na falme za Kiyunani na Kirumi. Na ndivyo vitowekavyo vyote ambavyo Mungu si msingi wake. Ni kile tu ambacho kimefungamanishwa na kusudi Lake, kinachoonesha tabia Yake, ndicho kinachodumu. Kanuni zake ndivyo vitu thabiti pekee ambavyo dunia yetu inavyo.

Vitabu vya Danieli na Ufunuo vinapoeleweka vyema, waumini watakuwa na uzoefu tofauti kabisa wa kidini. Watakuwa wamepewa muonjo tu wa malango yaliyofunguliwa ya mbinguni kiasi kwamba moyo na akili vitavutwa na tabia ambayo wote wanatakiwa kuijenga ili wapate kutambua uheri ambao utakuwa thawabu ya wenye moyo safi. Bwana atawabariki wote ambao watatafuta kwa upole na unyenyekevu kuelewa kile kilichofunuliwa katika Ufunuo. Kitabu hiki kina vitu vingi ambavyo vinahusiana na hali ya kutokufa na kujaa utukufu kiasi kwamba wote wakisomao na kukichunguza kwa bidii hupokea baraka kwa wale "wayasikiayo maneno ya unabii, na kuyashika yaliyoandikwa humo." Kitu kimoja kwa hakika kitaeleweka kutokana na kujifunza kitabu cha Ufunuo - kwamba uhusiano kati ya Mungu na watu Wake ni wa karibu na thabiti.

Hebu tutenge muda zaidi kujifunza Biblia. Hatulielewi Neno kama tunavyopaswa. Kitabu cha Ufunuo kinaanza amri kwetu kuelewa maelekezo yaliyomo... Tutakapoelewa umuhimu wa kitabu hiki kwetu kutaonekana mionganini mwetu uamsho mkubwa.

## Kitendo cha Kilele cha Udanganyifu

*Yesu akajibu, akawaambia, Angalieni, mtu asiwadanganye. Kwa sababu wengi watakuja kwa jina langu, wakisema, Mimi ni Kristo; nao watadanganya wengi. Mathayo 24: 4, 5.*

Kama kitendo cha juu kabisa cha sakata kuu la Kudanganyifu, Shetani mwenyewe atajifanya kuwa Kristo. Kwa muda mrefu kanisa limedai kutazamia kuja kwa Mwokozi kama utimilizaji wa tumaini lake. Sasa mdanganyaji mkuu atafanya ionekane kwamba Kristo amekuja. Katika sehemu mbalimbali za dunia, Shetani atajidhihirisha mwenyewe miongoni mwa watu kama mtukufu mwenye mng'ao mkali wa ajabu, unaofanana kabisa maelezo juu ya Mwana wa Mungu yaliyotolewa na Yohana katika Ufunuo... Kelele za ushindi zitasikika angani, "Kristo amekuja! Kristo amekuja!" Watu wanasujudu kwa ajili ya kumwabudu... Kwa sauti ya upole na huruma anawasilisha baadhi ya kweli zile zile zenye fadhili za kimbingu, ambazo Mwokozi alizitamka; anaponya magonjwa ya watu, na kisha, katika tabia yake ya kujifanya Kristo, anadai kubadilisha Sabato kwenda Jumapili na kuwataka wote kuiheshimu siku aliyoibariki...

Ni wale tu ambao wamekuwa wanafunzi wa Maandiko wenyе bidii, na ambao wamepokea upendo wa ukweli, watakingwa kutoka katika udanganyifu huu unaoiteka dunia.

Mwokozi amewaonya watu wake..., na ameeleza bayana jinsi kuja Kwake mara ya pili kutakavyokuwa. "Kwa maana watatokea makristo wa uongo... Basi wakiwaambia, yuko jangwani, msitoke; yumo nyumbani, msisadiki. Kwa maana kama vile umeme utokavyo mashariki ukaonekana hata magharibi, hivyo ndivyo kutakavyokuwa kuja kwake Mwana wa Adamu" (*Mathayo 24:24-27*). Ujio huu, haiwezekani kuuigiza. Utafahamika ulimwengu mzima - kushuhudiwa na ulimwengu mzima.

Je, watu wa Mungu kwa sasa wamejengwa thabiti katika Neno Lake ili wasije wakajisalimisha kwa Ushahidi wa hisia zao? Je, katika zahama ya jinsi hii, tutashikilia Biblia, na Biblia peke yake?

## Kuokolewa Kutoka Katika Vurugu

*Mtakuwa na wimbo kama vile wakati wa usiku, ishikwapo sikukuu takatifu, mtakuwa na furaha ya moyo kama vile mtu aendapo na filimbi katika mlima wa BWANA, aliye Mwamba wa Israeli. Isaya 30:29.*

**W**akati ulinzi wa sheria za kibinadamu utakapoondolewa kutoka kwa wale wanaoiheshimu sheria ya Mungu, kutakuwa katika nchi zingine, na harakati za kuwaangamiza kwa wakati huo huo.

Watu wa Mungu - wengine katika mahabusu za magereza, wengine wakiwa wamejificha katika makimbilio ya siri katika misitu na milima - wakiwa bado wanaomba kwa ajili ya ulinzi wa Mungu, wakati ambapo katika kila mahali makundi ya watu wenyе silaha, wakisukumwa na majeshi ya malaika waovu, wanajiandaa kwa ajili ya kazi ya mauaji.

Kwa kelele za ushindi, dhihaka na laana, makundi ya watu waovu wanavamia mawindo yao, ambapo, tazama, giza nene, giza totoro kuliko usiku, linaifunika dunia. Ndipo upinde wa mvua... unaonekana mbinguni na unaonekana kuwazunguka kila kundi la watu wanaoomba.

Kwa upande wa watu wa Mungu sauti, ya wazi na tamu inasikika, ikisema, "Tazameni Juu" na wanapoinua macho yao kutazama mbinguni wanaona upinde wa ahadi. Mawingu meusi yaliyochafuka yaliyokuwa yamefunika anga yanatawanyika, na kama Stefano, wanatazama juu mbinguni kwa bidii na wanaona utukufu wa Mungu na wa Mwana wa Adamu wakiwa wamekaa juu ya kiti Chake cha enzi. Katika umbo lake la kiungu wanatambua unyenyekevu Wake, na kutoka katika mikono Yake, na kutoka katika midomo Yake wanasisia ombi likiwasilishwa mbele ya Baba Yake na malaika watakatifu, "Hao ulionipa nataka wawe pamoja nami popote nilipo" (*Yohana 17:24*). Tena sauti nzuri na ya ushindi, inasikika ikisema "Waje! Waje! Watakatifu, hawana madhara, na ni safi. Wamelitunza neno la subira Yangu, watembee mionganini mwa malaika," na midomo mikavu inayotetemeka ya wale walioishika sana imani yao inapiga kelele za ushindi. Ni wakati wa usiku wa manane ambapo Mungu anadhihirisha nguvu Yake kwa ajili ya ukombozi wa watu Wake. Jua linatokea liking'aa katika nguvu yake. Ishara na maajabu vinatokea mfululizo na haraka haraka. Waovu wanayaona matukio hayo kwa hofu na mshangao, wakati wenyе haki wanatazama kwa furaha kuu viashiria vya ukombozi wao.

## Na Uje, Bwana Yesu

*Tukilitazamia tumaini lenye baraka na mafunuo ya utukufu wa Kristo Yesu, Mungu mkuu na Mwokozi wetu. Tito 2:13.*

**M**oja ya kweli makini na tena kweli zenyе kufurahisha Mmno zinazofunuliwa katika Biblia ni ule wa ujio wa pili wa Kristo, kukamilisha kazi kuu ya ukombozi... Fundisho la imani la Marejeo ndilo hasa mada kuu ya Maandiko Matakatifu.

Kuja kwa Bwana kumekuwa katika zama zote tumaini la wafuasi Wake wa Kweli.

Mzee wa imani Ayubu katika usiku wa mateso yake alitamka kwa tumaini thabiti: "Lakini mimi najua ya kuwa Mteteaji wangu yu hai, na ya kuwa hatimaye atasimama juu ya nchi. Na baada ya ngozi yangu kuharibiwa hivi, Lakini, pasipokuwa na mwili wangu nitamwona Mungu; Nami nitamwona mimi nafsi yangu, Na macho yangu yatamtazama, wala si mwingine" (Ayubu 19:25-27).

Ahadi ya Mwokozi wakati akiondoka juu ya mlima wa Mizeituni, kwamba atakuja tena, iliangaza siku za usoni za wanafunzi Wake, ikijaza mioyo yao kwa furaha na tumaini ambalo huzuni isingeweza kulizima au majaribu kulihaftifisha. Katikati ya shida na mateso, "kuonekana kwa Mungu mkuu na Mwokozi wetu Yesu Kristo" kulikuwa "tumaini lenye baraka." ...

Katika Patmo iliyojaa miamba yule mwanafunzi mpendwa anasikia ahadi "Naam, Naja upesi," na mwitikio wa shauku yake unatoa mwangwi wa ombi la kanisa katika safari yake yote duniani, "Na uje, Bwana Yesu" (Ufunuo 22:20).

"Ulimwengu huu ambao umechakaa hauko mbali na mwisho wake," alisema Melanchthon. Calvin anawaasa Wakristo "kutosita, kutaka kwa shauku kubwa siku ya kuja kwa Kristo kama ya kheri kuu kuliko matukio yote." ... "Fikra za kuja kwa Bwana," alisema Baxter, "ni tamu kabisa na za furaha kwangu." "Ni kazi ya imani na tabia ya watakatifu Wake kupenda kuonekana Kwake."

"Hii ndiyo siku ambayo waumini wote wanapaswa kuionea shauku, na tumaini, na kuingoja, ikiwa kama utimilishaji wa kazi yote ya ukombozi wao, na shauku na jitihada yote ya nafsi zao." "Iharakishe, ee Bwana, siku hii yenye kheri!"

## Mfalme Aonekana Mwenyewe

*Mungu wetu atakuja wala hatanyamaza, moto utakula mbele zake na tufani yavuma ikimzunguka pande zote. Ataziita mbingu zilizo juu na nchi pia awahukumu watu wake. Zaburi 50:3, 4.*

**M**falme wa wafalme anashuka mawinguni, akiwa namezingirwa na mwali wa moto. Mbingu zinakunjwa pamoja kama ukurasa, nchi inatetemeka mbele Zake, na kila mlima na kisiwa kinahamishwa kutoka mahali pake.

Yesu anashuka kama mshindi mkuu. Sasa si "mtu wa huzuni nydingi," kukinywea kikombe kichungu cha aibu na huzuni, Anakuja, mshindi mbinguni na duniani, kuwahukumu walio hai na wafu. "aitwaye Mwaminifu na wa Kweli," "naye kwa haki ahukumu na kufanya vita," Na "Majeshi yaliyo mbinguni wakamfuata" (*Ufunuo 19:11, 14*). Kwa nyimbo za sauti tamu za malaika, umati mkubwa usioweza kuhesabika, unaambatana Naye ajapo. Anga linaonekana kujazwa na sura zinazong'aa - "elfu kumi mara elfu kumi, na elfu elfu." Hakuna kalamu ya mwanadamu inayoweza kuchora mandhari hiyo; hakuna akili ya mwanadamu inayoweza kutambua kikamilifu utukufu wake. "Utukufu Wake ukazifunika mbingu, nayo nchi ikajaa sifa yake, mwangaza Wake ulikuwa kama nuru" (*Habakuki 3:3, 4*). Kadiri wingu hili hai linavyosogea karibu, kila jicho linamwona Mfalme wa Uzima. Hakuna taji ya miiba kwa sasa inayoharibu kile kichwa kitakatifu, bali taji ya utukufu imekaa juu ya kipaji chake kitakatifu. Mwonekano wake unang'aa kuzidi mngao mkuu kabisa wa juu la adhuhuri. "Naye ana jina limeandikwa katika vazi lake, MFALME WA WAFALME, NA BWANA WA MABWANA" (*Ufunuo 19:16*).

Mbele ya uwepo Wake, "nyuso zote zimegeuka rangi;" kwa wale walioikataa rehemaya Mungu kuna hofu na kukata tamaa milele. "Moyo unayeyuka, na magoti yanagongana gongana... na nyuso za wote zimekuwa nyeupe kwa hofu" (*Yeremia 30:6; Nahumu 2:10*). Wenye haki wanalia kwa kutetemeka, "Ni nani atakayeweza kusimama?" Wimbo wa Malaika unakoma, na kuna kipindi cha ukimya wa kutisha. Kisha sauti ya Yesu inasikika, akisema, "Neema Yangu yakutosha."

## Matayarisho Kwa Ajili ya Kuhamishwa

*Kwa imani Henoko alihamishwa, asije akaona mauti, wala hakuonekana, kwa sababu Mungu alimhamisha; maana kabla ya kuhamishwa alikuwa ameshuhudiwa kwamba amempendeza Mungu. Waebrania 11:5.*

Tunaishi katika zama za uovu. Hatari za siku za mwisho zinazotuzunguka zinaendelea kuongezeka. Kwa sababu uovu unaongezeka, upendo wa wengi unapoa. Henoko alitembea na Mungu kwa muda wa miaka 300. Sasa ufupi wa muda unaonekana kuhimizwa kama sababu ya kutafuta haki. Je, ni lazima utisho wa siku ya Mungu uwekwe mbele yetu ili kutusukuma kutenda yaliyo haki? Kielelezo cha Henoko kiko mbele yetu. Kwa mamia ya miaka alitembea na Mungu. Aliishi katika zama zilizopotoka, wakati uchafuzi wa maadili ulipokuwa ukiongezeka kote kumzunguka; na bado alizifunza fikra zake kuabudu, na kupenda usafi. Mazungumzo yake yalihu mambo ya mbinguni. Alielimisha fikra zake kupita njia hii, na alibeba chapa ya Mungu. Mwonekano Wake uling'aa kwa nuru ing'aayo katika uso wa Yesu.

Henoko alikuwa na majaribu kama tulivyo sisi. Alizingirwa na jamii ambayo haikuwa ikipenda haki zaidi ya ilivyo hii inayotuzunguka. Angahewa ambamo alivuta pumzi lilikuwa limechafuliwa na dhambi na ubadhilifu, kama ulivyo wa kwetu; na bado aliishi maisha matakatifu. Hakuchafuliwa na dhambi za wakati wake alioishi. Hivyo yatupasa kudumu kuwa wasafi na waaminifu. Alikuwa mwakilishi wa watakatifu wanaoishi katikati ya hatari na uovu wa siku za mwisho. Kwa sababu ya utii na uaminifu wake kwa Mungu alihamishwa. Vivyo hivyo, waaminifu, watakaokutwa hai, watahamishwa. Wataondolewa katika dunia ya dhambi na uovu kwenda kwa furaha safi za mbinguni. Mwelekeo wa watu wa Mungu unapaswa kuwa wa kupanda juu na kusonga mbele kuelekea ushindi.

Kuhamishwa kwa Henoko kwenda mbinguni kabla tu ya kuangamizwakwaulimwengu kwanjia ya gharikahuwakilisha kuhamishwa kwa wenyehaki wote watakaokutwa hai kutoka duniani kabla tu ya dunia kuteketezwa kwa moto. Watakatifu watatukuzwa mbele za wale ambao wamewachukia kwa utii wao kwa amri za Mungu zenye haki.

## Huyu Yesu Atarudi

*Wakasema, Enyi watu wa Galilaya, mbona mmesimama mkitazama mbinguni? Huyu Yesu aliyechukuliwa kutoka kwenu kwenda juu mbinguni, atakuja jinsi iyo hiyo mlivyomwona akienda zake mbinguni. Matendo. 1:11.*

**M**alaika waliokawia katika anga ya mlima wa Mizeituni MBAADA ya kupaa kwa Kristo, walirudia ahadi ya kurudi Kwake kwa wanafunzi: "Huyu Yesu aliyechukuliwa kutoka kwenu kwenda juu mbinguni, atakuja jinsi iyo hiyo mlivyomwona akienda zake mbinguni." Kwa kweli, ahadi hii ilikuwa ya thamani kubwa kwa wanafunzi wale waliokuwa wakihuzunika, kwamba wangemwona tena Yesu, ambaye alipendwa sana nao wote. Ahadi hii pia ni ya thamani kwa kila mfuasi wa kweli wa Kristo. Hakuna ye yote anayempenda kweli Yesu atakuwa na huzuni kwamba Anakuja tena....

Yesu anakuja! Lakini si kusikiliza matatizo ya binadamu, na kumsikia mwenye hatia ya dhambi akitubu dhambi zake, na kumtamkia msamaha; kwa maana kesi ya kila mtu itakuwa imeamuliwa kwa uzima au kifo. Wale ambao wameishi dhambini watabaki kuwa wenye dhambi milele. Wale walio tubu dhambi zao kwa Yesu katika patakatifu, wamemfanya kuwa rafiki yao na wamependa kuonekana Kwake, wataandikiwa msamaha kwa dhambi zao zote...

Yesu anakuja kama alivyopaa kwenda mbinguni, lakini kwa fahari zaidi. Anakuja na utukufu wa Baba Yake, na malaika wote watakatifu pamoja naye, kumsindikiza katika ujio Wake. Badala ya taji ya miiba yenye ukatili kumchoma mapaji yake matakatifu, taji ya utukufu inayong'aa itapamba kipaji kitakatifu cha uso Wake... Hatavaa joho lisilo na mshono, bali vazi jeupe kuliko theluji—lenye kung'aa sana. Yesu anakuja! Lakini si kutawala kama mkuu wa kidunia anayetawala kwa kitambo tu. Atawafufua wenye haki waliokufa, kubadilisha watakatifu walio hai kuwa na hali ya utukufu ya kutokufa, na, pamoja na watakatifu, kuchukua ufalme chini ya mbingu nzima....

Mpendwa msomaji kijana, fanya maandalizi kamili kukutana na Yesu, ili atakapotokea uweze kusema kwa furaha, "Tazama, huyu ndiye Mungu wetu; Ndiye tuliyemngoja, atusaidie" (Isaya 25:9). Uzima wa milele utakuwa wako wakati huo, na utashiriki pamoja na Kristo katika utukufu Wake, daima ukisikia sauti Yake ya utukufu yenye kukubali na kutazama umbo Lake lenye kupendeza.

## Taji Kwa Kila Mtakatifu

*Heri mtu astahimiliye majaribu; kwa sababu akiisha kukubaliwa ataipokea taji ya uzima, Bwana aliyowaahidia wampendao. **Yakobo 1:12.***

Nikaona idadi kubwa sana ya malaika wakileta kutoka mjini taji zenye utukufu – taji kwa kila mtakatifu, na jina lake limeandikwa juu yake. Yesu alipoomba taji ziletwe, malaika wakamletea, na kwa mkono Wake wa kuume Yesu mwenye upendo alizitia taji katika vichwa vya watakatifu. Kwa namna ile ile malaika walileta vinubi, Pia Yesu akavikabidhi kwa watakatifu. Malaika wakuu kwanza walipiga noti, na kisha kila sauti ikapazwa katika sifa ya shukrani na furaha, na kila mkono ukapiga kwa ustadi nyuzi zote za kinubi, na kutoa muziki wa kwa sauti kamili za kupendeza ...

Ndani ya mji kulikuwa na kila kitu cha kufurahisha macho. Waliona utukufu mwingi kila mahali. Kisha Yesu akawatazama watakatifu Wake waliokombolewa; nyuso zao zilionekana kung'aa kwa utukufu; na alipowatazama kwa macho Yake ya upendo, Alisema, kwa sauti Yake ya nguvu ya kimuziki, "Ninaona taabu ya nafsi yangu, nami Nimeridhika. Utukufu huu mwingi ni kwa ajili yenu kufurahia milele. Huzuni zenu zimekwisha. Kifo hakitakuwepo tena, wala huzuni wala kilio, wala maumivu hayatakuwepo tena." ...

Kisha nikamwona Yesu akiwaongoza watu Wake kuelekea kwenye mti wa uzima.... Juu ya mti wa uzima kulikuwa na matunda mazuri sana, ambayo watakatifu wangeweza kuyala kwa uhuru, hapo mjini kulikuwa na kiti cha enzi chenye utukufu mkuu, kutoka kwake kulikuwa na mto wa maji safi ya uzima, safi kama bilauri. Kila upande wa mto huo kulikuwa na mti wa uzima, na kwenye kingo za mto kulikuwa na miti mingine mizuri inayozaa matunda...

Lugha inakuwa dhaifu sana kujaribu kuelezea mbinguni. Kadiri mandhari inavyojitokeza mbele yangu, ninahemewa kwa mshangao. Kuchukuliwa mbali na utukufu unaovuka kila kitu na utukufu bora, ninaliweka kalamu chini, na kupaza sauti, "Oh, upendo ulioje! upendo wa kustaajabishaje!" Lugha yenye kuheshimika zaidi haiwezi kuelezea utukufu wa mbinguni au kina kisicho kifani cha upendo wa Mwokozi.

## Kufungwa kwa Shetani

*Kisha nikaona malaika akishuka kutoka mbinguni, mwenye ufunguo wa kuzimu, na mnyororo mkubwa mkononi mwake. Akamshika yule joka, yule nyoka wa zamani, ambaye ni Ibilisi na Shetani, akamfunga miaka elfu. Ufunuo 20:1, 2.*

**W**akati wa kuja kwa Kristo, waovu wanafutwa kutoka usoni pa dunia nzima – wanateketezwa na pumzi ya kinywa Chake, na kuangamizwa na mwangaza wa utukufu Wake. Kristo anawachukua watu Wake kwenda katika mji wa Mungu, na dunia inaachwa bila wenyiji wake....

Dunia nzima inaonekana kama jangwa la ukiwa. Mabaki ya miji na vijiji vilivyoharibiwa na tetemeko la ardhi, miti iliyong'olewa, miamba iliyochanwa na kutupwa nje na bahari au kutoka ardhini yenyewe, imesambaa juu ya uso wake, wakati ambapo mapango makubwa yanaonesha mahali ambapo milima imevunjwa kutoka misingi yake.

Hapa ndipo patakuwa nyumbani mwa Shetani na malaika zake waovu kwa miaka elfu moja. Hapa ndipo atafungiwa, atembee huku na huko juu ya uso uliovunjwa wa dunia na kuona athari za uasi wake dhidi ya sheria ya Mungu. Kwa miaka elfu moja atashiriki matunda ya laana alirosababisha. Amezuiliwa katika dunia hii pekee, hatakuwa na fursa ya kuzurura kwenye sayari zingine, kuwajaribu na kuwasumbua wale ambao hawakuanguka. Katika kipindi hiki, Shetani anakumbana na mateso makali sana. Tangu kuanguka kwake tabia yake ya uovu imedumu kufanya kazi. Lakini wakati huo atanyang'anywa nguvu yake, na kuachwa kutafakari kile alichofanya tangu alipoanguka, na kutazama mbele kwa kutetemeka na hofu kwa siku zijazo zenye kutisha, atakazopaswa kuteseka kwa uovu wote alioufanya na kuadhibiwa kwa dhambi zote alizosababisha kufanywa.

Nikasikia vifijo vya ushindi kutoka kwa malaika na kutoka kwa watakatifu waliookolewa, ambavyo vilisikika kama vyombo elfu kumi vya muziki, kwa sababu hawatasumbuliwa tena wala kujaribiwa na Shetani na kwa sababu wakazi wa sayari zingine walikuwa wamewekwa huru kutoka kwa uwepo wake na majaribio yake.

## Tutawahukumu Malaika

*Hamjui ya kuwa mtawahukumu malaika, basi si zaidi sana mambo ya maisha haya? 1 Wakorintho 6:3.*

**K**atika ile miaka elfu kati ya ufufuo wa kwanza na **w**a pili, hukumu ya waovu inafanyika.... Katika kipindi hiki wenye haki wanatawala kama wafalme na makuhani kwa Mungu. Yohana katika Ufunuo anasema: "Kisha nikaona viti vya enzi, wakaketi juu yake, nao wakapewa hukumu." "watakuwa makuhani wa Mungu na wa Kristo, nao watatawala pamoja naye hiyo miaka elfu" (Ufunuo 20:4, 6). Ni katika wakati huu ambapo, kama alivyotabiriwa na Paulo, "watakatifu watahukumu ulimwengu" (1 Wakorintho 6:2). Kwa umoja na Kristo wanahukumu waovu, wakilinganisha matendo yao na kitabu cha sheria, Biblia, na kuamua kila kesi kulingana na matendo yaliyofanywa katika mwili. Kisha sehemu ambayo waovu lazima waipate inapimwa, kulingana na matendo yao; na imeandikwa mbele ya majina yao katika kitabu cha mauti.

Shetani pia na malaika waovu wanahukumiwa na Kristo na watu Wake. Paulo asema, "Hamjui kwamba tutawahukumu malaika?" Na Yuda anatangaza kwamba "Na malaika wasioilinda enzi yao wenyewe, lakini wakayaacha makao yao yaliyowahusu, amewaweka katika vifungo vya milele chini ya giza kwa hukumu ya siku ile kuu." Yuda 6.

Mwisho wa miaka elfu ufufuo wa pili utatokea. Kisha waovu watafufuliwa kutoka kwa wafu, na kusimama mbele za Mungu kwa utekelezaji wa "hukumu iliyoandikwa." Hivyo Yohana wa Ufunuo, baada ya kuelezea ufufuo wa wenye haki, anasema, "Hao wafu waliosalia hawakuwa hai, hata itimie ile miaka elfu" (Ufunuo 20: 5). Na Isaya anatangaza, kuhusu waovu, "nao watakusanywa pamoja kama vile wakusanywavyo wafungwa katika shimo nao watafungwa katika gereza; na baada ya muda wa siku nyingi watajiliwa" (Isaya 24:22).

Adhabu kwa kuvunja sheria ya Mungu inalingana na bei iliylipwa kufidia wakosaji wake. Ni furaha iliyoje iliyoandaliwa kwa wale watakaookolewa kuitia Kristo, na ni kina kilichoje cha mateso kwa wale wanaodharau na kukataa wokovu Wake mkuu!

## Kushuka kwa Yerusalemu Mpya

*Akanichukua katika Roho mpaka mlima mkubwa, mrefu, akanionyesha ule mji mtakatifu, Yerusalemu, ukishuka kutoka mbinguni kwa Mwenyezi Mungu. Ufunuo 21:10.*

**M**wishoni mwa miaka elfu, Kristo anarudi tena duniani. Anaandamana na jeshi la waliokombolewa, na kusindikizwa na msafara wa malaika. Anaposhuka kwa utukufu mkubwa, anawaamuru wafu waovu kuamka ili kupokea hukumu yao. Wanaibuka, jeshi kubwa, kama mchanga wa baharini. Tofauti kubwa iliyoje na wale waliokuwa wamefufufuliwa katika ufufuo wa kwanza! Wenyе haki walikuwa wamevikwa ujana na uzuri usio na mwisho. Waovu wanabeba alama za ugonjwa na kifo.

Kila jicho katika umati mkubwa linageuzwa kuutazama utukufu wa Mwana wa Mungu. Kwa sauti moja, majeshi ya waovu wanapiga kelele, "Na abarikiwe yeye ajaye kwa jina la Bwana!" Si upendo kwa Yesu unaosababisha tamko hili. Nguvu ya ukweli inasukuma maneno kutoka kwenye midomo isiyotaka. Kama ambavyo waovu walikwenda makaburini mwao, vivyo hivyo wanatokea, na uadui ule ule kwa Kristo, na roho ile ile ya uasi. Hawatakuwa na kipindi kipycha cha rehema, cha kurekebisha kasoro za maisha yao ya zamani. Hakuna ambacho kingepatikana kutokana na hilo. Kuishi maisha yote uovuni hakujalainisha mioyo yao. Kama wangepewa kipindi cha pili cha rehema, kingetumiwa kama kile cha kwanza, kwa kuepuka matakwa ya Mungu na kuchochea uasi dhidi Yake.

Kristo anashuka juu ya Mlima wa Mizeituni, ambako, baada ya kufufuka kwake, alipaa, na ambapo malaika walirudia ahadi ya kurudi Kwake. Anasema nabii: "Bwana, Mungu wangu, atakuja, na watakatifu wote pamoja nawe." "Na siku hiyo miguu yake itasimama juu ya mlima wa Mizeituni, unaoelekea Yerusalemu upande wa mashariki, nao mlima wa Mizeituni utapasuka katikati yake, ... litakuwako huko bonde kubwa sana" (Zekaria 14:5, 4) ... Kama Yerusalemu Mpya, katika utukufu wake wa ajabu, unashuka kutoka mbinguni, unakaa mahali palipotakaswa na kufanywa tayari kuupokea, na Kristo, pamoja na watu Wake na malaika, wanatingia katika mji mtakatifu.

## Mamlaka ya Juu Kabisa ya Yesu

*Ili kwa jina la Yesu kila goti lipigwe, la vitu vya mbinguni, na vya duniani, na vya chini ya nchi; na kila ulimi ukiri ya kuwa YESU KRISTO NI BWANA, kwa utukufu wa Mungu Baba. Wafilipi 2:10, 11.*

**M**bele ya wakazi wa dunia na mbinguni waliokusanyika, Mkutawazwa kwa mwisho kwa Mwana wa Mungu kunafanyika. Na sasa, akiwa amevikwa utukufu na mamlaka ya juu kabisa, Mfalme wa wafalme anatoa hukumu kwa waasi dhidi ya utawala Wake, na kutekeleza haki kwa wale ambao wamevunja sheria Yake na kuwatesa watu Wake... Kadiri... jicho la Yesu linapoangalia waovu, wanatambua kila dhambi ambayo wamewahi kufanya...

Juu ya kiti cha enzi unafunuliwa msalaba; na kama mwonekano wa mfululizo wa matukio mbalimbali kunaonekana mandhari ya majaribu na kuanguka kwa Adamu, na hatua zinazofuata katika mpango mkubwa wa ukombozi...

Dunia yote ya waovu inajipanga mbele ya kizimba cha Mungu, kwa kosa la uhaini mkubwa dhidi ya serikali ya mbinguni. Hawana wa kuwatetea; hawana udhuru; na hukumu ya kifo cha milele inatangazwa dhidi yao. Sasa inaonekana wazi kwa wote kwamba mshahara wa dhambi si uhuru wa kimaadili na uzima wa milele, bali utumwa, uharibifu na kifo... Shetani anaonekana amelegea anapoona utukufu na ukuu wa Kristo. Yeye ambaye alikuwa kerubi afunikaye anakumbuka pale alipoanguka. Serafi ang'aaye, "mwana wa asubuhi;" jinsi alivyobadilika, jinsi alivyoshuka hadhi!...

Shetani anaona kuwa uasi wake wa hiari umemfanya asifae kuingia mbinguni. Ameelekeza nguvu zake kupigana dhidi ya Mungu; usafi, amani na umoja wa mbinguni ungekuwa mateso makubwa kwake. Mashtaka yake dhidi ya rehema na haki ya Mungu sasa yote yamezimwa. Fedheha ambayo amejitahidi kuweka juu ya Yehova sasa inaanguka juu yake mwenyewe. Na sasa Shetani anainama, na kukiri kuwa hukumu yake ni ya haki... Kwa kutambua ukweli wote wa pambano kuu, ulimwengu wote, watifuli na wakaidi, kwa pamoja wanatangaza, "Ni za haki, na za kweli, njia zako, Ee Mfalme wa mataifa" (Ufunuo 15:3).

## Shetani na Waovu Waangamizwa

*Umewakemea mataifa, na kumwangamiza mdhalimu, umelifuta jina lao milele na milele. Zaburi 9:5.*

**S**asa Shetani anajiandaa kwa mapambano ya mwisho syenye nguvu kwa ajili ya ukuu.... Kadiri wafu waovu wanavyofufuliwa, na anapoona umati mkubwa upande wake, matumaini yake yanahuishwa, na ananuia kutojisalimisha katika pambano kuu.... Anajitokeza kwa watu wake waliopotoka kama mwokozi, akawahakikishia kwamba nguvu yake imewatoa kutoka makaburini mwao.... Hatimaye, amri ya kusonga mbele inatolewa, na jeshi lisilo na hesabu linasonga mbele.... Majeshi ya Shetani yanauzingira mji, na kujitayarisha kwa mashambulizi.

Moto unashuka kutoka kwa Mungu kutokea mbinguni. Ardhi inapasuka. Silaha zilizofichwa ardhini zinavutwa nje. Miali ya moto inawaka kutoka kila shimo kubwa lililo wazi. Hata miamba yenye we inawaka moto. Siku imefika ambayo itawaka kama tanuri. Vitu vya asili vinayeyuka kwa joto kali, pia ardhi, na kazi zilizomo vinateketezwa kwa moto. Uso wa nchi unaonekana kama kitu kimoja kilichoyeyuka – ziwa kubwa la moto linalochemka.

Shetani na wote waliojiunga naye katika uasi watakatiliwa mbali. Dhambi na wenye dhambi wataangamizwa, mzizi na matawi (*Malaki 4:1*) – Shetani mzizi, na wafuasi wake matawi.... “Nao watakuwa kana kwamba hawakuwa kamwe” (*Obadia 16*).

Itaonekana kuwa uasi wa Shetani dhidi ya Mungu umesababisha uharibifu kwake mwenyewe, na kwa wote waliochagua kuwa wafuasi wake. Ameonesha kwamba mema makubwa yatatokana na uasi; lakini itaonekana kwamba “mshahara wa dhambi ni mauti.” *Warumi 6:23*.... Dhambi itakomeshwa, pamoja na huzuni na uharibifu uliotokea kutokana nayo. Mhubiri anasema, “Umewakemea mataifa, na kumwangamiza mdhalimu, umelifuta jina lao milele na milele. Adui wamekoma na kuachwa ukiwa milele” (*Zaburi 9:5, 6*).

Yeye (Shetani) alikuwa ameaminu kuwa angevunja mpango wa wokovu; lakini msingi wake ulikuwa umewekwa imara sana.... Yeye mwenyewe hatimaye lazima afe, na ufalme wake ukabidhiwe kwa Yesu.

## Haki ya Mungu Yeye anikataaaye

*Mimi, asiyeyakubali maneno Yangu, anaye amhukumuye; neno hilo nililolinena ndilo litakalomhukumu siku ya mwisho. Yohana 12:48.*

Waovu wanapokea fidia yao duniani.... Baadhi wanaangamizwa kufumba na kufumbua, wakati ambapo wengine wanateseka kwa siku nyingi. Wote wanapata adhabu "sawasawa na matendo yao." Dhambi za wenyehaki zikiwa zimehamishiwa kwa Shetani, analazimika kuteseka si tu kwa uasi wake mwenyewe, bali na kwa dhambi zote ambazo amesababisha watu wa Mungu kuzifanya. Adhabu yake itakuwa kubwa zaidi kuliko ile ya wale aliojadanganya. Baada ya wote waliopotea kwa udanganyifu wake kufa, bado ataendelea kuishi na kuteseka.

Katika moto wa usafishaji, waovu hatimaye wanaangamizwa, mzizi na matawi—Shetani mzizi, wafuasi wake matawi. Haki ya Mungu imetoshelezwa, na watakatifu na jeshi lote la malaika wanasema kwa sauti kuu, Amina.

Wakati ambapo dunia imo ndani ya moto wa kisasi cha Mungu, wenyehaki wanakaa salama katika Mji Mtakatifu. Kwa wale walio na sehemu katika ufufuo wa kwanza, kifo cha pili hakina nguvu (*Ufunuo* 20:6). Wakati ambapo kwa waovu Mungu ni moto uteketezao, kwa watu Wake Yeye ni juu na ngao (*Zaburi* 84:11).

Na kelele ya sifa na ushindi inapanda kutoka kwa ulimwengu wote wa waaminifu. "Sauti ya makutano mengi," "na kama sauti ya maji mengi, na kama sauti ya radi yenye nguvu," inasikika, ikisema, "Haleluya: kwa Bwana Mungu wetu, Mwenyezi, amemiliki." *Ufunuo* 19:6....

Moto unaowateketeza waovu unasafisha dunia. Kila ishara ya laana inafagiliwa mbali. Hakuna moto wa kuzimu unaowaka milele utakaodumisha mbele ya waliokombolewa matokeo ya kutisha ya dhambi ....

Yote yaliyopotea kutokana na dhambi yamerejeshwa.... Kusudi la awali la Mungu katika uumbaji wa dunia limefikiwa kwa kuwa imefanywa makao ya milele ya waliokombolewa. "Wenye haki watairithi nchi, nao watakaa humo milele" (*Zaburi* 37:29).

## Utukufu Mwingi Sana wa Milele

*Maana dhiiki yetu nyepesi, iliyo ya muda wa kitambo tu, yatufanyia utukufu wa milele uzidio kuwa mwingi sana. 2 Wakorintho 4:17.*

**N**ilielekezwa kutazama utukufu wa mbinguni, hazina iliyowekwa kwa ajili ya watakatifu. Kila kitu kilikuwa cha kupendeza na cha kustaajabisha. Malaika walikuwa wakiimba wimbo wa kupendeza, kisha walikoma kuimba na kuvua taji zao kutoka vichwani mwao na kuzitupa zikimetameta miguuni pa Yesu mwenye kupendeza, huku wakisema kwa sauti tamu, "Utukufu, haleluya!" Nilijiunga nao katika nyimbo zao za sifa na heshima kwa Mwanakondoo, na kila nilipofungua mdomo wangu kumsifu, nilihisi hisia isiyoelezeka ya utukufu ulionizunguka. Ulikuwa utukufu wa milele uzidio kuwa mwingi sana. Malaika akasema, "Kundi dogo lililosalia linalompenda Mungu na kushika amri zake na ni waaminifu hadi mwisho watapata utukufu huu na kuwa daima katika uwepo wa Yesu na kuimba na malaika watakatifu."

Kisha macho yangu yaliondolewa kutoka kwa utukufu, na nikaelekezwa kutazama waliosalia duniani. Malaika aliwaambia, "... Jiandae, jiandae, jiandae. Lazima mfanye maandalizi makubwa zaidi ya sasa, kwa sababu siku ya Bwana inakuja, yenye ghadhabu na hasira kali, kuiweka nchi katika hali ya ukiwa na kuwaangamiza wenyе dhambi waliomo ndani yake. Toa vyote dhabihu kwa Mungu. Weka yote juu ya madhabahu yake – nafsi, mali, na yote, kama dhabihu hai. Ni lazima utoe vyote ili upate kuingia katika utukufu. Jiwekee hazina mbinguni, ambapo mwivi hawezi kukaribia wala kutu kuharibu. Lazima uwe mshiriki wa mateso ya Kristo hapa ili uwe mshiriki Naye wa utukufu Wake baadaye."

Mbingu itafikika kirahisi, ikiwa tutaipata kuitia mateso. Lazima tujikane nafsi kote safarini, tuifie nafsi, kuruhusu Yesu pekee aonekane, na kuendelea kuwa na utukufu Wake akilini muda wote.

Kazi ya wokovu si mchezo wa kitoto, kuchukuliwa kwa hiari na kuachwa kwa raha. Ni kusudi thabiti, jitihada zisizokoma, ambazo mwishowe zitapata ushindi. Ni yule anayevumilia hadi mwisho ndiye atakayepata wokovu. Ni wale wanaoendelea kwa subira katika kutenda mema ambao watakuwa na uzima wa milele na thawabu ya kuwa na umilele.

## Kuishi Maisha ya Edeni

*Kisha nikaona mbingu mpya na nchi mpya; kwa maana mbingu za kwanza na nchi ya kwanza zimekwisha kupita, wala hapana bahari tena. Ufunuo 21:1.*

**M**bingu ni shule; nyanja yake ya masomo, ulimwengu; Mwalimu wake, Yule Asiye na ukomo. Tawi la shule hii lilianzishwa katika Edeni; na, mpango wa ukombozi ukikamilishwa, elimu itaendelea tena katika shule ya Edeni....

Nabii wa Patmo hivyo anaelezea mahali pa shule ya baadaye:

"Nikaona mbingu mpya na nchi mpya; kwa maana mbingu ya kwanza na nchi ya kwanza zimekwisha kupita.... Nami nikauona mji ule mtakatifu, Yerusalemu mpya, ukishuka kutoka mbinguni kwa Mungu, umewekwa tayari kama bibi-harusi aliyekwisha kupambwa kwa mumewe." *Ufunuo 21:1, 2....*

Kupewa mti wa uzima katika Edeni kulikuwa na masharti, na hatimaye uliondolewa. Lakini karama za maisha ya baadaye ni za kipekee na za milele....

Kwa kurejeshwa mbele Zake, mwanadamu atafundishwa tena na Mungu: "Watu wangu watalijua jina langu: ... watajua siku ile kuwa mimi ndiye ninenaye: tazama, ni mimi." *Isaya 52:6....*

Hazina zote za ulimwengu zitakuwa wazi kwa ajili ya masomo ya watoto wa Mungu. Kwa furaha isiyoelezeka tutashiriki katika furaha na hekima ya viumbe ambavyo havikuanguka dhambini. Tutashiriki hazina zilizopatikana kuitia nyakati na nyakati zilizotumiwa katika kutafakari kazi ya mikono ya Mungu. Na miaka ya milele, kadiri inavyozidi kuendelea, itaendelea kuleta ufunuo mkuu zaidi. "Zaidi sana kuliko yote tuyombayo au tuyawazayo" (*Waefeso 3:20*) itakuwa milele na milele, kugawanya zawadi za Mungu....

Maisha duniani ni mwanzo wa maisha mbinguni; elimu duniani ni utambulisho katika kanuni za mbinguni; kazi yetu ya maisha hapa ni mafunzo kwa kazi ya maisha pale. Kile tulicho sasa, katika tabia na utumishi mtakatifu, ni dalili ya hakika ya kile tutakachokuwa.

## Mwali Angavu wa Utukufu

*Mwangaza wake ulikuwa kama nuru; Alikuwa na mishale ya nuru ubavuni mwake; ndipo ulipofichwa uweza wake. Habakuki 3:4.*

**S**hetani, kwa njia ya mafanikio yake katika kumgeuza mwanadamu kutoka kwenye njia ya utii, akawa "mungu wa ulimwengu huu" (2 Wakorintho 4:4). Mamlaka ambayo awali yalikuwa ya Adamu, yakapitishwa kwenda kwa mnyang'anyi. Lakini Mwana wa Mungu alikusudia kuja duniani kulipa adhabu ya dhambi, na hivyo si tu kumkomboa mwanadamu, bali pia kurejesha mamlaka yaliyopotezwa.... Mtume Paulo ameurejelea [kurudishiwa utawala uliopotezwa] kama "ukombozi wa mali iliyonunuliwa" (Waefeso 1:14).

Siyo tu mwanadamu bali hata dunia ilikuwa chini ya nguvu za mwovu kwa sababu ya dhambi, na ilikuwa lazima irejeshwe kwa njia ya mpango wa ukombozi.

Msalaba wa Kalvari, wakati ambapo unatangaza kuwa sheria haiwezi kubadilika, unatangaza kwa ulimwengu kuwa mshahara wa dhambi ni mauti. Katika kilio cha Yesu wakati anakaribia kufa, "Imekwisha," kengele ya kifo cha Shetani ilipigwa. Pambano Kuu ambalo liliikuwa likiendelea kwa muda mrefu liliamuliwa wakati huo, na utokomezaji wa mwisho wa uovu ulihakikishwa. Mwana wa Mungu alipitia kwenye malango ya kaburi, ili "kwa njia ya mauti amharibu yeye aliyekuwa na nguvu za mauti, yaani, Ibilisi" (Waebrania 2:14). Shauku ya Lusifa ya kujitukuza mwenyewe ilimfanya aseme, "Nitakiinua kitichangu juu kuliko nyota za Mungu: ... Nitafanana na Yeye Aliye juu" (Isaya 14:13, 14). Mungu anatangaza, "Nimekufanya kuwa majivu juu ya nchi... Wala hutakuwa tena hata milele" (Ezekiel 28:18, 19).

"Nikaona mbingu mpya na nchi mpya...." Ufunuo 21:1.... Kila ishara ya laana imefagiliwa mbali....

Kumbukumbu moja pekee inabaki: Mkombozi wetu daima ataendelea kubeba alama za kusulubishwa Kwake. Kwenye kichwa Chake kilichojeruhiwa, kwenye ubavu Wake, mikono na miguu, ndio alama pekee za kazi mbaya ambayo dhambi imetenda. Anasema nabii, akiona Kristo katika utukufu Wake, "Alikuwa na mishale ya nuru ubavuni mwake; ndipo ulipofichwa uweza wake."

Msalaba wa Kristo utakuwa sayansi na wimbo wa waliokombolewa milele zote.

## Mauti Haitakuwapo Tena

*Naye atafuta kila chozi katika macho yao, wala mauti haitakuwapo tena; wala maombolezo, wala kilio, wala maumivu hayatakuwapo tena; kwa kuwa mambo ya kwanza yamekwisha kupita. Ufunuo 21:4.*

**N**yumbani kwa waliokombolewa hakutakuwa na machozi, misafara ya mazishi, wala beji za maombolezo. "Wala hapana mwenyeji atakayesema, Mimi mgonjwa; watu wakaao humo watasamehewa uovu wao" (*Isaya 33:24*). Mkondo mkuu mmoja wa furaha utaendelea kumiminika na kuongezeka kadiri milele inavyopita....

Tuzingatie kwa uangalifu sana heri ya baadaye. Hebu imani yetu ipenye kupitia kila wingu la giza na kumtazama yule aliyekufa kwa ajili ya dhambi za ulimwengu. Amefungua milango ya Paradiso kwa wote wanaomkubali na kumwamini.... Hebu matatizo ambayo yanatumiza sana yawe masomo ya kujifunzia, kutufundisha kusonga mbele kuelekea kuifikia tuzo ya wito wetu mkuu katika Kristo. Hebu tutiwe shime na wazo kwamba Bwana anakuja hivi karibuni. Hebu tumaini hili lilete furaha mioyoni mwetu....

Tunaelekea nyumbani. Yeye aliyetupenda sana hata kufa kwa ajili yetu ametujengea mji. Yerusalemu Mpya ndio mahali pa mapumziko yetu. Hakutakuwa na huzuni katika mji wa Mungu. Hakutakuwa na kilio cha huzuni, wala wimbo wa matumaini yaliyovunjika na mapenzi yaliyozikwa, havitasikika kamwe. Hivi karibuni mavazi ya huzuni yatabadilishwa kuwa mavazi ya harusi. Hivi karibuni tutashuhudia taji ya Mfalme wetu. Wale ambao maisha yao yamefichwa na Kristo, wale ambao katika dunia hii wamevipiga vita vizuri vyta imani, wataangazwa na utukufu wa Mkombozi katika ufalme wa Mungu.

Haitachukua muda mrefu kwetu kumwona Yeye ambaye ni kiini cha matumaini yetu ya uzima wa milele. Na katika kuwepo Kwake, majaribu yote na mateso ya maisha haya hayatakuwepo.... Angalia juu, angalia juu, na ruhusu imani yako kuongezeka daima. Hebu imani hii ikuongoze kupitia njia nyembamba inayopitia malango ya mji wa Mungu kwenye utukufu mkuu, mpana, usio na ukomo wa siku za usoni ambao ni kwa ajili ya waliokombolewa.

## Makao Makuu ya Ulimwengu

*Na mji ule hauhitaji jua wala mwezi kuuangaza, kwa maana utukufu wa Mungu huutia nuru, na taa yake ni Mwana-Kondoo.*  
**Ufunuo 21:23.**

**K**una Yerusalemu Mpya, makao makuu ya dunia mpya yenye utukufu, "Nawe utakuwa taji ya uzuri katika mkonono wa BWANA, na kilemba cha kifalme mkononi mwa Mungu wako" (*Isaya 62:3*). "na mwangaza wake ulikuwa mfano wa kito chenye thamani nyingi kama kito cha yaspi, safi kama bilauri" (*Ufunuo 21:11*).

Barabara za mji zimepambwa kwa dhahabu safi, na malango ya mji ni ya dhahabu yaliyowekwa na lulu. Utajiri uliopatikana hapa unaweza kuisha haraka.... Huko hakuna mwizi atakayekaribia; hakuna nondo wala kutu itakayoharibu.... Utakuwa na hazina isiyoharibika ambayo huwezi kuwa katika hatari ya kuipoteza.

Katika mji wa Mungu "hakutakuwa na usiku." Hakuna mtu atakayehitaji au kutamani kupumzika. Hakutakuwa na uchovu katika kufanya mapenzi ya Mungu na kutoa sifa kwa jina Lake. Tutahisi daima upya na nguvu za asubuhi, na daima tutakuwa mbali mno na mwisho wake. "Wala hawana haja ya taa wala ya nuru ya jua; kwa kuwa Bwana Mungu huwatia nuru" (*Ufunuo 22:5*). Nuru ya jua nafasi yake itachukuliwa na mwangaza ambao mng'ao wake hauumizi macho, lakini ambao unazidi sana mwangaza wa mchana wetu. Utukufu wa Mungu na Mwana-Kondoo unajaza Mji Mtakatifu na nuru isiyopauka. Waliookolewa wanatembea katika utukufu usio na jua wa siku isiyo na mwisho.

"Nami sikuona hekalu ndani yake; kwa maana Bwana Mungu Mwenyezi na Mwana-Kondoo, ndio hekalu lake" (*Ufunuo 21:22*). Watu wa Mungu wanayo fadhila ya kuwa na mawasiliano ya wazi na Baba na Mwana. "Sasa tunaona kwa kioo kwa jinsi ya fumbo" (*1 Wakorintho 13:12*). Tunatazama picha ya Mungu ikionekana, kama kwenye kioo, katika kazi za asili na katika matendo Yake kwa wanadamu; lakini wakati huo tutamwona Yeye uso kwa uso, bila kitambaa kizuiacho. Tutasimama mbele za uwepo Wake, na kuona utukufu wa uso Wake.

Hebu tudhamirie kuwa haidhuru igharimu kila kitu tutaingia mbinguni na kuwa washiriki wa asili ya Mungu.

## Nchi Mbili Zalinganishwa

*Lakini, kama ilivyoandikwa, Mambo ambayo jicho halikuyaoni wala sikio halikuyasikia, wala hayakuungia katika moyo wa mwanadamu, mambo ambayo Mungu aliwaandalia wampendao. I Wakorintho 2:9.*

Utukufu wa ulimwengu wa milele umefunuliwa mbele yangu. Ninataka kukwambia kwamba mbingu inastahili kushindaniwa hadi kuiingia. Inapaswa kuwa lengo la maisha yako kujiandaa kwa ushirika na waliokombolewa, na malaika watakatifu, na Yesu, Mkombozi wa ulimwengu. Ikiwa tungekuwa na mtazamo mmoja tu wa mji wa mbinguni, kamwe hatungependa kuishi duniani tena. Kuna mandhari nzuri duniani, nami nafurahia maoni haya yote ya uzuri katika asili. Ninayahusisha na Muumba. Lakini najua kwamba ikiwa ninampenda Mungu, na kushika amri Zake, kuna utukufu wa milele uzidio kuwa mwingi sana uliohifadhiwa mbinguni kwa ajili yangu.

Huko, wakatipazialinalotufunikamaonolitakapoondolewa, na macho yetu yataona ulimwengu huo wa uzuri ambao sasa tunauona kwa mbali kupitia darubini; wakati tutakapotazama utukufu wa mbinguni, sasa tunauona kwa mbali kupitia darubini; wakati baka la dhambi litakapoondolewa, dunia nzima itaonekana katika "uzuri wa Bwana Mungu wetu," uwanja ulioje utakaokuwa wazi kwa utafiti wetu! Huko mwanafunzi wa sayansi anaweza kusoma kumbukumbu za uumbaji na kugundua hakuna kumbukumbu ya sheria ya uovu. Anaweza kusikiliza muziki wa sauti za asili na kugundua hakuna mlio wa kilio au kivuli cha huzuni. Katika vitu vyote vilivyoumbwa anaweza kufuatilia maandishi yanayofanana – katika ulimwengu mpana ataona "jina la Mungu limeandikwa kwa herufi kubwa," na hakuna ishara ya ubaya inayobaki duniani, baharini au angani.

Acha fikra zako zione makao ya waliokolewa, na kumbuka kwamba yatakuwa na utukufu zaidi kuliko fikra zenye mng'ao wa juu kabisa unazoweza kuwa nazo. Katika zawadi mbalimbali za Mungu katika asili tunachokiona ni mwangaza dhaifu tu wa utukufu Wake.

Lugha ya kibinadamu haiwezi kuelezea thawabu ya wenye haki kwa ufanisi. Itajulikana tu na wale watakao kuionna. Akili yenye ukomo haiwezi kufahamu kwa mapana yake utukufu wa Paradiso ya Mungu.

## Uanaheri wa Mbinguni

*Yeye ashindaye atayarithi haya, nami nitakuwa Mungu wake, naye atakuwa mwanangu. Ufunuo 21:7.*

**H**akuna mtu anayeingia mbinguni kwa bahati. Hakuna mtu anayeenda huko akiwa amefungwa kidoto. Ikiwa atachukua muda wa kutafakari, kila mtu anaweza kujua ikiwa yupo katika njia nyembamba na iliyonyoka, au katika njia pana iendayo kifoni na kuzimu.

Ikiwa hatupokei dini ya Kristo kwa kujilisha Neno la Mungu, hatutakuwa na haki ya kuingia katika mji wa Mungu. Baada ya kuishi kwa chakula cha kidunia, baada ya kuelimisha ladha zetu kupenda vitu vya kidunia, hatutakuwa tayari kwa mahakama ya mbinguni; hatutaweza kuthamini mkondo safi wa mbinguni unaozunguka mbinguni. Sauti za malaika na muziki wa vinubi vyao havitatutosheleza. Sayansi ya mbinguni itakuwa kama fumbo kwa akili zetu. Tunahitaji kuhisi njaa na kiu ya haki ya Kristo; tunahitaji kufinyangwa na kuundwa kwa mvuto wa neema Yake ibadilishayo, ili tuweze kuwa tayari kwa ushirika wa malaika wa mbinguni.

Tunahitaji kuwa na maono ya siku za usoni na ya baraka ya mbinguni.... Huko waliookolewa wanawakaribisha wale waliowaongoza kwa Mwokozi aliyeinuliwa.... Mapambano yamekwisha. Shida zote na mvutano umekwisha. Nyimbo za ushindi zinazijaza mbingu zote waliookolewa wanapokizunguka kiti cha enzi cha Mungu.

Kisha mataifa hayataitambua sheria nyingine isipokuwa sheria ya mbinguni. Wote watakuwa familia iliyofurahi, iliyounganika, iliyovikwa mavazi ya sifa na shukrani.... Juu ya tukio, nyota za asubuhi zitaimba pamoja na wana wa Mungu wataimba kwa furaha, wakati Mungu na Kristo wanaungana katika kutangaza, "Hapatakuwa na dhambi tena, wala hapatakuwa na kifo tena."

Tunataka kuzoea kuzungumza juu ya mbingu, mbingu nzuri. Zungumza juu ya maisha yale ambayo yataendelea kwa muda mrefu kama Mungu aishivyo, na kisha utasahau majoribu na shida zako ndogo. Acha akili iwekezwe kwa Mungu.

## Kisio Kuhusu Maisha ya Baadaye

*"Kwa maana watakapofufuka katika wafu, hawaoi wala hawaolewi, bali huwa kama malaika walioko mbinguni" (Marko 12:25).*

**W**apo watu leo huonesha imani yao kwamba kutakuwa na ndoa na uzazi katika nchi mpya, bali wale wanaoamini Maandiko hawawezi kuamini mafundisho hayo. Fundisho la kwamba watoto watazaliwa katika nchi mpya si sehemu ya "neno hakika la unabii." Maneno ya Kristo yako wazi sana ili kueleweka. Yanaweza kusuluuhisha milele swali la ndoa na uzazi katika nchi mpya. Si wale watakaofufuliwa katika wafu, wala wale watakaohuishwa bila kuonja mauti, wataoa au kuolewa. Watakuwa kama malaika wa Mungu, wanafamilia ya kifalme.

Nitazungumza kwa wale walio na mitazamo kinyume na tamko hili la wazi la Kristo: katika masuala kama hayo ukimya ndiyo umbuji. Ni jambo linalowezekana kuliingiza katika makisio na dhana kuhusu masuala ambayo Mungu hajayafunua kwetu katika Neno Lake. Hatupaswi kuingia katika kisio kuhusu hali yetu ya baadaye....

"Lihubiri neno, uwe tayari, wakati ukufaa na wakati usiokufaa" (2 Timotheo 4:2). Usiweke katika msingi wa ubao, nyasi kavu na mashina ya mabua - dhana zako na makisio yako, yasiyo na faida kwa yejote.

Kristo hakuruhusu kutoa kweli yoyote muhimu katika wokovu wetu. Mambo yaliyofunuliwa ni kwa ajili yetu na watoto wetu, lakini hatupaswi kudhani ili kuwekea kiunzi mafundisho kuhusu mambo ambayo hayajafunuliwa.

Bwana ameweka kila hitaji kwa ajili ya furaha yetu katika maisha yetu ya baadaye. Lakini hajaweka ufunuo kuhusu mipango hii, na hatupaswi kukisia kuihusu. Aidha tunapaswa kupima hali ya maisha ya baadaye kwa hali ya maisha haya.... Inaonekana kwangu kwamba hekaya za kiroho zinawateka watu.... Kwa wote wanaoendekeza mawazo haya maovu, ningesema, Acha; kwa ajili ya Kristo, simama hapo ulipo. Upo katika eneo lililokatazwa.

## Mbingu Huanzia Duniani

*"Njoni kwangu, ninyi nyote msumbukao na wenyewe kulemewa na mizigo, nami nitawapumzisha" (Mathayo 11:28).*

**M**bingu yapaswa kuanzia katika dunia hii. Wale wanaotii maneno ya Kristo na kusalimisha roho zao katika ufadhili Wake, maisha yao katika utaratibu Wake, watapata amani na utulivu. Hakuna kitu duniani kitakachowafanya wapate huzuni wakati Yesu anawafanya kuwa na furaha kwa kuwepo Kwake. Katika ukubali kamilifu kuna pumziko kamilifu. Bwana anasema, "Utamlinda yeye ambaye moyo wake umekutegemea katika amani kamilifu, kwa kuwa anakutumaini" (Isaya 26:3). Maisha yetu yanaweza kuonekana yenyе msongamano; lakini tunapojisalimisha kwa Bwana wa Kazi mwenye hekima, Yeye ataleta mwenendo wa maisha na tabia ambayo itakuwa kwa ajili ya utukufu Wake mwenyewe. Na tabia hiyo inayodhihirisha utukufu - tabia - ya Kristo itapokelewa katika Paradiso ya Mungu. Jamii iliyobadilishwa watatembea Naye wakiwa na mavazi meupe, kwa kuwa wanastahili.

Kwa kupitia Yesu tunaingia katika pumziko. Mbingu huanzia hapa. Tunaitikia mwaliko Wake, Njoo, mjifunze Kwangu na kwa kuja tunaanza uzima wa milele. Mbingu ni njia isiyokoma kwa Mungu kupitia Kristo. Tunapokuwa katika furaha kamili ya mbingu, zaidi na hata zaidi ya utukufu utafunuliwa kwetu; na zaidi tunapomfahamu Mungu, furaha yetu itakua zaidi sana.

Pale watu wa Mungu wanapokuwa wapole na wema, watatambua kuwa bendera Yake juu yao ni upendo na tunda Lake litakuwa tamu katika ladha zao. Watafanya mbingu hapa chini ili kuijandaa kwa ajili ya mbingu ya juu.

Tunapotembea na Yesu katika maisha haya, tunaweza kujazwa na upendo Wake, kujitosheleza katika kuwepo Kwake. Kila anachowenza kukistahimili mwenye asili ya binadamu, tunaweza kukipokea hapa. Lakini je, ni nini kinacholinganishwa na sasa na baadaye? Kwa hiyo "wako mbele ya kiti cha enzi cha Mungu, nao wanamtumikia mchana na usiku katika hekalu lake, na yeye aketiye katika kiti cha enzi atatanda hema yake juu yao... kwa maana huyo Mwana-Kondoo, aliye katikati ya kiti cha enzi, atawachunga, naye atawaongoza kwenye chemchemi za maji yenyе uhai" (Ufunuo 7:15-17).

## Mbingu Mahali Halisi

*"Watu wangu watacaa katika kao la amani; na katika maskani zilizo salama, na katika mahali pa kupumzikia penye utulivu" (Isaya 32:18).*

Hofu ya kuufanya urithi wa milele kuwa ni wa **vitu** Hzaidi imewafanya watu wengi kuona kila kitu ni **cha** kiroho katika kutafsiri ukweli unaoeleza mahali tutakapoishi mbinguni. Kristo aliwahakikishia wanafunzi Wake kuwa alikwenda kuandaa makao kwa ajili yao katika nyumba ya Baba Yake. Watu wanaoyakubali mafundisho ya neno la Mungu hawatashindwa kuelewa kabisa kuhusiana na makao ya mbinguni....

Katika Biblia, urithi wa waliookolewa unaitwa nchi. Pale Mchungaji wa mbinguni anapowaongoza kondoo Wake hadi kwenye chemchemi ya maji ya uzima. Mti wa uzima unazaa matunda yake kila mwezi, na majani ya mti ni kwa ajili ya kuwaponya mataifa. Pale kuna mito inayotiririka daima maji, meupe kama bilauri, na kando ya mito kuna miti inayopepea na kuweka kivuli chake juu ya njia zilizoandaliwa kwa ajili ya waliokombolewa na Bwana. Pale nyika pana na kubwa zinaenea na kupanda katika vilima vizuri, na milima ya Mungu nyuma ya vilele vyake virefu. Kwenye nyanda hizo za amani, kando ya mito hiyo iliyo hai, watu wa Mungu, watu waliosafiri na kutanga-tanga kwa muda mrefu, wataishi humo.

*"Watu wangu watacaa katika kao la amani; na katika maskani zilizo salama, na katika mahali pa kupumzikia penye utulivu" (Isaya 32:18). "Jeuri haitasikiwa tena katika nchi yako, Ukiwa na uharibifu hazitakuwa mipakani mwako; Bali utaziita kuta zako, Wokovu, Na malango yako, Sifa" (Isaya 60:18). "Nao watajenga nyumba, na kukaa ndani yake; watapanda mizabibu, na kula matunda yake. Hawatajenga, akakaa mtu mwingine ndani yake; hawatapanda, akala mtu mwingine; ... wateule wangu watafurahia kazi ya mikono yao muda wa siku nyingi" (Isaya 65:21, 22).*

Pale, "nyika na mahali palipo ukiwa patafurahi; jangwa litashangilia na kuchanua maua kama waridi" (Isaya 35:1). "Badala ya michongoma utamea msonobari, Na badala ya mibigili, mhadesi" (Isaya 55:13). "Mbwa-mwitu atakaa pamoja na mwana-kondoo, na chui atalala pamoja na mwana-mbuzi; ... na mtoto mdogo atawaongoza" (Isaya 11:6).

## Mashindano kwa ajili ya Uzima ya Milele

*"Basi na sisi pia, kwa kuwa tunazungukwa na wingu kubwa la mashahidi namna hii, na tuweke kando kila mzigo mzito, na dhambi ile ituzingayo kwa upesi; na tupige mbio kwa saburi katika yale mashindano yaliyowekwa mbele yetu" (Waebrania 12:1).*

**K**atika waraka kwa Waebrania inaonesha kwa unyoofu kkusudi ambalo litatoa sifa za mashindano ya Mkristo kwa ajili ya uzima wa milele.... Wivu, kijicho, mawazo maovu, mazungumzo maovu, uchu – haya ni mambo muhimu ambayo Mkristo anapaswa kuyaacha ikiwa atapaswa kushinda kwa mafanikio mashindano ya uovu. Kila mwenendo au tendo liongozalo katika dhambi na kuleta fedheha kwa Kristo, linapaswa kuondolewa, kwa kafara iwayo yote. Baraka za mbinguni haziwezi kumfikia mtu yejote anayekiuka kanuni za milele za uadilifu. Dhambi moja iliyolelewa inatosha kuleta uvunjifu wa tabia na kupotosha wengine.

"Na mkono wako ukikukosesha," Mwokozi alisema, "ukate; ni afadhali kuingia katika uzima u kitugu, kuliko kuwa na mikono miwili, na kwenda zako jehanum, kwenye moto usiozimika; ambamo humo funza wao hafi, wala moto hauzimiki. Na mguu wako ukikukosesha, ukate; ni afadhali kuingia katika uzima, u kiwete, kuliko kuwa na mguu miwili, na kutupwa jehanum" (Marko 9:43-45). Ikiwa kuuokoa mwili kutoka katika kifo, mguu au mkono unapaswa kukatwa, au hata jicho kuchomolewa, ni zaidi kiasi gani Mkristo atapaswa kuacha dhambi, inayopelekea kufa kwa roho!

Washindani katika michezo ya kale, wanapokuwa wameshajitoa katika kujikana nafsi na nidhamu imara, hawakuwa hata na uhakika wa ushindi....

Hilo si chochote katika vita ya Mkristo. Si kila anayetii masharti matumaini yake yatavunjika mwishoni mwa mashindano. Hakuna mwenye bidii na mstahimilivu atakaye shindwa kufikia mafanikio. Mashindano si kwa wenye haraka, wala pambano si kwa wenye nguvu. Mtakatifu dhaifu, pamoja na mwenye nguvu, wanaweza kuvali taji ya utukufu wa milele. Wote wanaweza kushinda, kupitia nguvu ya neema takatifu, kuleta maisha yao katika ulinganifu wa mapenzi ya Kristo.

## Thawabu kwa Wanaoongoa Roho

*"Na walio na hekima watang'aa kama mwangaza wa anga; na hao waongozao wengi kutenda haki watang'aa kama nyota milele na milele" (Danieli 12:3).*

**K**atika maisha yetu hapa, duniani, ijapokuwa dhambi kimezuliwa, furaha kubwa na maarifa ya juu viko katika kutoa huduma. Katika hali ya baadaye, kutopingwa kwa vizuizi vya binadamu aliyeasi, ni katika kutoa huduma ambapo furaha yetu kuu na maarifa yetu ya juu vitapatikana.

**"Kazi ya mtu aliyoijenga ..., atapata thawabu"** (1 Wakorintho 3:14). Sifa kuu zitakuwandiyo thawabu zilizotolewa pale ambapo watumishi waaminifu watakakusanyika mbele za kiti cha enzi cha Mungu na Mwana-Kondoo.... Wamekuwa washiriki pamoja na Kristo katika masumbuko Yake, wamekuwa watendakazi pamoja Naye katika mpango wa wokovu na washiriki walio pamoja Naye katika furaha ya kuona roho zilizokombolewa katika ufalme wa Mungu, wakiwa pale kumsifu Mungu hata milele.

Mkristo aliwahi kusema, kwamba alipofika mbinguni alitarajia kukutana na vyanzo vitatu vya ajabu. Angeshangaa kuwakuta wale ambao hakuwatarajia kukutana nao pale. Angeshangaa kutowakuta wale ambao alitarajia kukutana nao, na, mwisho, angeshangaa zaidi kukutana na wenye dhambi wasiostahili kama yeye mwenyewe katika Paradiso ya Mungu. Wengi waliokuwa katika nyadhifa za juu kama Wakristo juu ya nchi hawataonekana katika umati wenye furaha ambao watakizunguka kiti cha enzi. Wale walio kuwa na ufahamu na kipaji na bado wakifurahishwa na pambano na vita ya Shetani, hawatakuwa na nafasi pamoja na wale waliokombolewa.... Walikuwa na shauku ya kutenda kazi iliyo njema, ili kwamba waweze kusifiwa na kufurahiwa na wanadamu, lakini majina yao hayakuandikwa katika kitabu cha uzima cha Mwana-Kondoo. "Siwajui," ni maneno yenye kuhuzunisha ambayo Kristo atawaambia hao. Bali wale ambao maisha yao yalikuwa mazuri kwa matendo yao madogo ya wema, kwa maneno ya upole yenye upendo na huruma, ambao mioyo yao ilinywea katika vita na ushindani, ambao hawakutenda kazi njema yoyote ili kusifiwa na wanadamu, hawa wanakutwa katika kumbukumbu kwenye kitabu cha uzima cha Mwana-Kondoo. Japokuwa dunia iliwhesabu wao kama watu wasio na maana, wanathibitishwa na Mungu mbele ya kusanyiko la ulimwengu.

## Kumjua Bwana Kunakoifunika Nchi

*"Maana dunia itajawa na kumjua BWANA, kama vile maji yanavyoifunika bahari" (Isaya 11:9).*

Tunapoingia katika ufalme wa Mungu, kuishi milele, majaribu, shida na mifadhaiko tulioipata hapa havitakuwa na maana. Maisha yetu yatafanana pamoja na maisha ya Mungu.

Pale, akili zisizokuwa na hali ya kufa zitatafakari kwa furaha isiyo na kikomo maajabu ya uwezo wa uumbaji, siri za upendo na ukombozi. Hakutakuwa na adui katili wa kumjaribu mtu kumsahau Mungu. Kila karama itakuzwa, kila talanta itaongezwa. Matakwya kupata maarifa hayatachosha akili wala kudhoofisha nguvu. Pale, shughuli muhimu zitaendelezwa, vilele vya juu vya matarajio vitafikiwa, matamanio ya juu kabisa yatapatikana; na bado kutatokea vilele vipyta vya kupanda na kupita, maajabu mapya ya kufurahia, kweli mpya za kujifunza, malengo mapya ya kuhitaji nguvu za akili na roho na mwili.

Hazina zote za ulimwengu zitakuwa wazi kwa ajili ya mafunzo yawatuwa Mungu waliokombolewa. Bilakukatishwa na hali ya kufa, wanaruka kwa mabawa yao na kwenda katika sayari za mbali – sayari zilizozizima kwa huzuni kwa sababu ya tabu za mwanadamu na kurindima nyimbo za furaha kwa ajili ya roho moja iliyokombolewa. Kwa furaha isiyoelezeka watoto wa duniani wanaingia katika furaha na hekima ya viumbe ambao hawakuanguka. Wanashiriki hazina za ujuzi na ufahamu uliopatikana kwa zama nyingi kwa kutafakari juu ya kazi za mikono ya Mungu.... Yesu alipofungua mbele yao upana wa ukombozi na mafanikio ya kushangaza katika pambano kuu dhidi ya Shetani, mioyo ya waliokombolewa ilizizima kwa kujiweka wakfu na kumpenda Yesu zaidi, na kwa furaha kubwa wanapiga vinubi vyao vya dhahabu; na sauti kumi elfu mara kumi elfu na maelfu kwa maelfu ya sauti yanafumka na kuimba kibwagizo cha sifa.

Mdundo wa mwafaka na furaha unapiga katika uumbaji wake wote. Kutoka Kwake Yeye aliyewaumba wote, vinatiririka uzima na nuru na furaha, katika maeneo yote na nafasi isiyokuwa na ukomo. Kutoka kwa atomu ndogo sana hadi ulimwengu mkubwa sana, mambo yote, vyenye uhai na visivyo na uhai, katika uzuri wao usiokuwa na kivuli na furaha kamili, vinakiri kuwa Mungu ni pendo.

“Hao wote wanakungoja Wewe, Uwape chakula chao lwa wakati wake” (Zab. 104:27). Ni hakika, kama ilivyo katika hifaji la chakula cha kimwili, macho ya wote wajua pale uzima wao unapotokea, humngojea Yeye aliye Mpaji wa chakula cha kiroho na kimwili.

“Imani Iokoayo,” ni kitabu kilicho lishe ya kiroho ya kila siku ya mwaka mzima, kinachokusaidia kujua kwamba hatuokolewi kwa njia ya imani yoyote ile. Bali ipo Imani mahsusini tunayookolewa kwayo.

Kuanzia katika kujua Neno la Mungu na kazi zake, Utatu Mtakatifu, kuibuka kwa Shetani, uasi wake na anguko lake, ufumbuzi wa tatizo la dhambi, tumaini la baada ya maisha haya, hekalu la Mungu, hadi katika kutembea kulingana na mwenendo kama wa Kristo, mtu mmoja mmoja, jumuiya ya waumini, tunaandaliiwa kwa jaribio la mwisho na ushindi utakaopatikana kwa kila mtu anayeamua kuwa na Imani inayookoa.

Mjumbe wa Mungu, Ellen G. White, akiongozwa na Mungu ananena nawe kwa uzoefu wa Neno la Mungu ili akuandae kuwa mshindi kwa njia ya Imani ya kweli katika Kristo Yesu anayekupenda upeo.



Ufunuo Publishing House  
P.O. Box 635, Morogoro